

Namo tassa bhagavato arahato sammāsambuddhassa

## Khuddasikkhā-mūlasikkhā

### Khuddasikkhā

#### Ganthārambhakathā

(Ka)

Ādito upasampanna-sikkhitabbaṃ samātikam;  
**Khuddasikkhaṃ** pavakkhāmi, vanditvā ratanattayaṃ.

**Tatrāyaṃ mātikā** –

(Kha)

Pārājikā ca cattāro, garukā nava cīvaraṃ;  
Rajanāni ca patto ca, thālakā ca pavāraṇā.

(Ga)

Kālikā ca paṭiggāho, maṃsesu ca akappiyaṃ;  
Nissaggiyāni pācitti, samaṇakappa bhūmiyo.

(Gha)

Upajjhācariyavattāni, vaccappassāvathānikaṃ;  
Āpucchakaraṇaṃ naggo, nhānakappo avandiyo.

(Ña)

Cammaṃ upāhanā ceva, anolokiyamañjanī;  
Akappiyasayanāni, samānāsanikopi ca.

(Ca)

Asaṃvāsiko ca kammaṃ, micchājīvavivajjanā;  
Vattaṃ vikappanā ceva, nissayo kāyabandhanaṃ.

(Cha)

Pathavī ca parikkhāro, bhesajjuggahadūsaṇaṃ;  
Vassūpanāyikā cevāvebhaṅgiyaṃ pakiṇṇakaṃ.

(Ja)

Desanā chandadānādi, uposathappavāraṇā;  
Saṃvaro suddhi santoso, caturakkhā vipassanāti.

## 1. Pārājikaniddeso

### Pārājikā ca cattāroti –

1. Maggattaye anikkhittasikkho santhatasanthate;  
Allokāse nimittam sam, tilamattampi santhatam.
2. Asanthatamupādiṇṇam, pavesanto cutotha vā;  
Pavesanaṭṭhituddhārapaviṭṭhakkhaṇasādako.
3. Ādiyeyya hareyyāvahareyya iriyāpatham;  
Kopeyya ṭhānā cāveyya, saṅketam vītināmāye.
4. Adinnaṃ theyyacittena, bhava pārājikoṭṭhā vā;  
Theyyābalakusacchannaparikappāvahārako;  
Bhaṇḍakālagghadesehi, paribhogettha nicchayo.
5. Manussaviggahaṃ cicca, jīvitā vā viyojaye;  
Sattahāraṇam vāssa maraṇacetano upanikkhiṇe.
6. Gāheyya maraṇūpāyam, vadeyya maraṇe guṇam;  
Cuto payogā sāhatthinissaggāṇattithāvarā.
7. Iddhivijjāmayā kālavatthāvudhīriyāpathā;  
Kriyāviseso okāso, cha āṇattiniyāmakā.
8. Jhānādibheda nosantamattanattupanāyikaṃ;  
Katvā koṭṭhāsamekekaṃ, paccuppannabhavassitaṃ.
9. Aññāpadesarahitaṃ, dīpentonadhīmāniko;  
Kāyena vācā viññatti-pathe ñāte cuto bhava.
10. Pārājikete cattāro, asaṃvāsā yathā pure;  
Abhabbā bhikkhubhāvāya, sīsacchinnova jīvitaṃ.
11. Pariyāyo ca āṇatti, tatiye dutiye pana;  
Āṇattiyeva sesesu, dvayametam na labbhati.
12. Sevetukāmatācittaṃ, magge maggappavesanaṃ;  
Imaṃ methunadhammassa, āhu aṅgadvayaṃ budhā.
13. Manussasaṃ tathāsaññī, theyyacittaṅca vatthuno;  
Garutā avahāro ca, adinnādānahetuyo.
14. Pāṇo mānussako pāṇa-saññitā ghātacetanā;  
Payogo tena maraṇam, pañcete vadhahetuyo.
15. Asantatā attani pāpamicchatā-  
Yārocanā tassa manussajātītā;  
Nāññāpadeso ca tadeva jānanaṃ,  
Pañcettha aṅgāni asantadīpane.

16. Asādhāraṇā cattāro, bhikkhunīnamabhabbakā;  
Ekādasa ca vibbhantā, bhikkhunī mudupiṭṭhiko.
17. Lambī mukhena gaṇhanto, aṅgajātaṃ parassa ca;  
Tatthevābhiniśīdanto, cattāro anulomikā.
18. Magge maggappavesanā, methunassa idhāgatā;  
Cattāroti catubbīsa, samodhānā parājikāti.

## 2. Saṅghādisesaniddeso

### Garukā navāti –

19. Mocetukāmatā sukka-ssupakkamma vimocayaṃ;  
Aññatra supinantena, samaṇo garukaṃ phuse.
20. Itthisaññī manussitthiṃ, kāyasamsaggarāgavā;  
Samphusanto upakkamma, samaṇo garukaṃ phuse.
21. Tathā suṇantiṃ viññuñca, maggaṃ vārabbha methunaṃ;  
Duṭṭhullavācārāgena, obhāsetvā garuṃ phuse.
22. Vatvāttakāmupaṭṭhāna-vaṇṇaṃ methunarāgino;  
Vācā methunayuttana, garuṃ methunayācane.
23. Paṭiggahetvā sandesaṃ, itthiyā purisassa vā;  
Vīmaṃsitvā haraṃ paccā, samaṇo garukaṃ phuse.
24. Saṃyācitaparikkhāraṃ, katvādesitavatthukaṃ;  
Kuṭiṃ pamāṇātikantaṃ, attuddesaṃ garuṃ phuse.
25. Mahallakaṃ vihāraṃ vā, katvādesitavatthukaṃ;  
Attano vasanattāya, samaṇo garukaṃ phuse.
26. Amūlakena codento, codāpentova vatthunā;  
Antimena ca cāvetuṃ, suṇamānaṃ garuṃ phuse.
27. Aññassa kiriyā disvā, tena lesena codayaṃ;  
Vatthunā antimenāññaṃ, cāvetuṃ garukaṃ phuse.
28. Chādeti jānamāpannaṃ, parivaseyya tāvatā;  
Careyya saṅhe mānattaṃ, parivuttho cha rattiyo.

Ciṇṇamānattamabbheyya, taṃ saṅgho vīsatiṅgaṇo.

29. Āpattinukkhittamanantarāya  
Pahuttatāyo tathasaññitā ca;  
Chādetukāmo atha chādanāti,  
Channā dasaṅgehyaruṇuggamamhīti.

## 3. Cīvaraniddeso

**Cīvaranti –**

30. Khomakoseyyakappāsa-sāṇabhaṅgāni kambalaṃ;  
Kappiyāni chaletāni, sānulomāni jātito.
31. Dukūlañceva paṭṭuṇṇa-paṭaṃ somāracīnaṃ;  
Iddhiyaṃ devadinnāṇca, tassa tassānulomikaṃ.
32. Ticīvaraṃ parikkhāra-coḷaṃ vassikasāṭhikaṃ;  
Adhiṭṭhe na vikappeyya, mukhapuñchananisīdanaṃ.
33. Paccattharaṇakaṃ kaṇḍu-cchādimeṭṭha ticīvaraṃ;  
Na vaseyya vinekāhaṃ, cātumāsaṃ nisīdanaṃ.
34. “Imaṃ saṅghāṭiṃdhiṭṭhāmi”, saṅghāṭimiccadhiṭṭhaye;  
Ahatthapāsametanti, sesesupi ayaṃ nayo.
35. Adhiṭṭhahanto saṅghāṭi-ppabhutiṃ pubbacīvaraṃ;  
Paccuddharitvādhiṭṭheyya, pattādhiṭṭhahane tathā.
36. Etaṃ imaṃ va saṅghāṭiṃ, saṃse paccuddharāmiti;  
Evaṃ sabbāni nāmena, vatvā paccuddhare vidū.
37. Saṅghāṭi pacchimantena, dīghaso muṭṭhipaṇcako;  
Uttamantena sugata-cīvarūnāpi vaṭṭati.
38. Muṭṭhittikaṇca tiriyaṃ, tathā ekaṃsikkassapi;  
Antaravāsako cāpi, dīghaso muṭṭhipaṇcako;  
Aḍḍhateyyo dvihattho vā, tiriyantena vaṭṭati.
39. Nisīdanassa dīghena, vidatthi dve visālato;  
Diyadḍhaṃ dasā vidatthi, sugatassa vidatthiyā.
40. Kaṇḍuppaṭicchādikassa, tiriyaṃ dve vidatthiyo;  
Dīghantato catassova, sugatassa vidatthiyā.
41. Vassikasāṭhikāyāpi, dīghaso cha vidatthiyo;  
Tiriyaṃ aḍḍhateyyāva, sugatassa vidatthiyā.
42. Ettha chedanapācitti, karontassa taduttari;  
Paccattharaṇa mukhacoḷā, ākaṅkhitappamāṇikā.
43. Parikkhāraçoḷe gaṇanā, pamāṇaṃ vā na dīpitaṃ;  
Tathā vatvā adhiṭṭheyya, thavikādiṃ vikappiyaṃ.
44. Ahatāhatakappānaṃ, saṅghāṭi diguṇā siyā;  
Ekacciyyottarāsaṅgo, tathā antaravāsako.
45. Utuddhaṭāna dussānaṃ, saṅghāṭi ca catugguṇā;  
Bhaveyyuṃ diguṇā sesā, paṃsukūle yathārucci.
46. Tīsu dve vāpi ekaṃ vā, chinditabbaṃ pahoti yaṃ;

Sabbesu appahontesu, anvādhimādiyeyya vā;  
Acchinnañca anādiṇṇaṃ, na dhāreyya ticīvaraṃ.

47. Gāme nivesane uddo-sitapāsādahammiye;  
Nāvāṭṭamāḷaārāme, satthakhattakhale dume.
48. Ajjhokāse vihāre vā, nikkhipitvā ticīvaraṃ;  
Bhikkhusammutiyaññātra, vippavatthum na vaṭṭati.
49. Rogavassānapariyantā, kaṇḍucchādikasātikā;  
Tato paraṃ vikaṭṭeyya, sesā apariyantikā.
50. Paccattharaṇa parikkhāra-mukhapuñchanacoḷakaṃ;  
Dasaṃ pyarattanādiṇṇakappaṃ labbhaṃ nisīdanaṃ.
51. Adasaṃ rajitaṃyeva, sesacīvarapañcakaṃ;  
Kappatādiṇṇakappaṃva, sadasaṃva nisīdanaṃ.
52. Anadhiṭṭhitaniṣṣaṭṭhaṃ, kappetvā paribhuñjaye;  
Hatthadīghaṃ tatopaḍḍha-vitthārañca vikappiyaṃ.
53. Ticīvarassa bhikkhussa, sabbametam pakāsitaṃ;  
Parikkhāraḷiyo sabbam, tathā vatvā adhiṭṭhati.
54. Acchedavissajjanagāhavibbhamā,  
Paccuddharo māraṇaliṅgasikkhā;  
Sabbesvadhiṭṭhānaviyogakāraṇā,  
Vinividdhachiddaṇca ticīvarassa.
55. Kusavākaphalakāni, kambalaṃ kesavālaṃ;  
Thullaccayaṃ dhārayatolūkapakkhājīnakkhiṭṭe.
56. Kadalerakakkadusse, potthake cāpi dukkaṭṭam;  
Sabbanīlakamañjēṭṭha-pītalohitakaṇḥake.
57. Mahāraṅgamahānāma-raṅgaratte tirīṭṭake;  
Acchinnadīghadasake, phalapupphadase tathā;  
Kañcuke veṭṭhane sabbam, labhaticchinnacīvaroti.

#### 4. Rajananiddeso

**Rajanāni cāti** –

58. Mūlakkhandhatacapatta-phalapupphappabhedato;  
Rajanā chappakārāni, anuññātāni satthunā.
59. Mūle haliddiṃ khandhe ca, mañjēṭṭha tuṅgahāraḷe;  
Alliṃ nīlañca pattesu, tace loddāñca kaṇḍulaṃ;  
Kusumbhaṃ kiṃsukaṃ pupphe, sabbam labbhaṃ vivajjiyāti.

#### 5. Pattaniddeso

**Patto cāti –**

60. Ayopatto bhūmipatto, jātiyā kappiyā duve;  
Ukkaṭṭho majjhimo ceva, omako ca pamāṇato.
61. Ukkaṭṭho magadhe nāḷi-dvayataṇḍulasādhitaṃ;  
Gaṇhāti odanaṃ sūpaṃ, byañjanañca tadūpiyaṃ.
62. Majjhimo tassupaḍḍhova, tatopaḍḍhova omako;  
Ukkaṭṭhato ca ukkaṭṭho, apatto omakomako.
63. Atirekapatto dhāreyyo, dasāhaparamaṃ sako;  
Kappo nissaggiyo hoti, tasmim kāletināmite.
64. Acchedadānagāhehi, vibbhamā maraṇuddhaṭā;  
Liṅgasikkhāhi chiddena, pattādhittānamujjhati.
65. Pattam na paṭisāmeyya, sodakaṃ na ca otape;  
Uḥhe na nidahe bhūmyā, na ṭhape no ca laggaye.
66. Miḍḍhante paribhaṇḍante, aṅke vā ātapattake;  
Pādesu mañcapīṭhe vā, ṭhapetuṃ na ca kappati.
67. Na nīhareyya ucchiṭṭho-dakañca calakaṭṭhikaṃ;  
Pattena pattahattho vā, kavāṭaṃ na paṇāmaye.
68. Bhūmiādhārake dārudaṇḍādhāre susajjite;  
Duve patte ṭhapeyyekaṃ, nikkujjivāna bhūmiyaṃ.
69. Dārurūpiyasovaṇṇa-mañiveḷuriyāmayā;  
Kaṃsakācatipusīsaphalikātambalohajā.
70. Chavasīsamayo cāpi, ghaṭṭitumbakaṭāhajā;  
Pattā akappiyā sabbe, vuttā dukkaṭavattthukāti.

**6. Thālakāniddeso****Thālakā cāti –**

71. Kappiyā thālakā tisso, tambāyomattikāmayā;  
Dārusovaṇṇarajatamañiveḷuriyāmayā.
72. Akappā phalikākācakamsajā gihisantakā;  
Saṅghikā kappiyā tumbaghaṭṭijā tāvakālikāti.

**7. Pavāraṇāniddeso****Pavāraṇāti –**

73. Yenīriyāpathenāyaṃ, bhuñjamāno pavārito;  
Tato aññena bhuñjeyya, pācittinatirittakaṃ.

74. Asanaṃ bhojanañceva, abhihāro samīpatā;  
Kāyavācāpaṭikkhepo, pañcaāṅgā pavāraṇā.
75. Odano sattu kummāso, maccho maṃsañca bhojanaṃ;  
Sāli vīhi yavo kaṅgu, kudrūsavaragodhumā;  
Sattannamesaṃ dhaññānaṃ, odano bhojjayāgu ca.
76. Sāmākāditīnaṃ kudrūsake varakacorako;  
Varake sāliyañceva, nīvāro saṅghaṃ gato.
77. Bhaṭṭhadhaññamayo sattu, kummāso yavasambhavo;  
Maṃso ca kappiyo vutto, maccho udakasambhavo.
78. Bhuñjanto bhojanaṃ kappa-makappaṃ vā nisedhayāṃ;  
Pavāreyyābhihaṭṭaṃ kappaṃ, tannāmena imanti vā.
79. Lājā taṃsattubhattāni, goraso suddhakhajjako;  
Taṇḍulā bhaṭṭhapiṭṭhañca, puthukā veḷuādinaṃ.
80. Bhattaṃ vuttāvasesānaṃ, rasayāgu rasopi ca;  
Suddhayāguphalādīni, na janenti pavāraṇaṃ.
81. Pavāritena vuṭṭhāya, abhuttēna ca bhojanaṃ;  
Atirittaṃ na kātabbaṃ, yena yaṃ vā pure kataṃ.
82. Kappiyaṃ gahitañcevu-ccāritaṃ hatthapāsagaṃ;  
Atirittaṃ karontevaṃ, ‘‘alameta’’nti bhāsatu.
83. Na karenupasampanna-hatthagaṃ pesayitvāpi;  
Kāretuṃ labbhate sabbo, bhuñjituṃ tamakārakoti.

### 8. Kālikaniddeso

**Kālikā cāti –**

84. Paṭiggahitā cattāro, kālikā yāvakālikaṃ;  
Yāmakālikaṃ sattāha-kālikaṃ yāvajīvikaṃ.
85. Piṭṭhaṃ mūlaṃ phalaṃ khajjaṃ, goraso dhaññabhojanaṃ;  
Yāgusūpappabhutayo, hontete yāvakālikā.
86. Madhumuddikasālūka-cocamocambajambujaṃ;  
Phārusaṃ naggisantattaṃ, pānakaṃ yāmakālikaṃ.
87. Sānulomāni dhaññāni, ṭhapetvā phalajo raso;  
Madhūkapupphamaññātra, sabbo puppharasopi ca.
88. Sabbapattaraso ceva, ṭhapetvā pakkaḍākaṃ;  
Sītodamadditodicca-pāko vā yāmakāliko.
89. Sappinonītatelāni, madhuphāṇitameva ca;  
Sattāhakālikā sappi, yesaṃ maṃsamavāritaṃ.

90. Telam tilavaseranḍa-madhusāsapasambhavam;  
Khuddābhamaramadhukari-makkhikāhi katam madhu;  
Rasādiucchuvikati, pakkāpakkā ca phāṇitam.
91. Savatthupakkā sāmaṃ vā, vasā kāle amānusā;  
Aññesaṃ na pace vatthum, yāvakālikavatthunam.
92. Haliddim singiverañca, vacattam lasuṇam vacā;  
Usīram bhaddamuttañcātivisā kaṭurohiṇī;  
Pañcamūlādikañcāpi, mūlam tam yāvajīvikam.
93. Bīlaṅgam maricam goṭṭha-phalam pippali rājikā;  
Tiphaleranḍakādīnam, phalam tam yāvajīvikam.
94. Kappāsanimbakuṭajapaṭolasulasādīnam;  
Sūpeyyapaṇṇam vajjetvā, paṇṇam tam yāvajīvikam.
95. Thapetvā ucchuniyyāsam,  
Sarasam ucchujam tacam;  
Niyāsō ca taco sabbo,  
Loṇam loham silā tathā.
96. Suddhasitthañca sevālo, yañca kiñci sujhāpitam;  
Vikaṭādiṭṭhapaṭṭhañca, ñātabbam yāvajīvikam.
97. Mūlam saram taco pheggu, paṇṇam puppham phalam latā;  
Āhārattha masādhentam, sabbam tam yāvajīvikam.
98. Sabbakālikasambhogo, kāle sabbassa kappati;  
Sati paccaye vikāle, kappate kālikattayam.
99. Kālayāmatikkantā, pācittim janayantubho;  
Janayanti ubhopete, antovutthañca sannidhim.
100. Sattāhakālike satta, ahāni atināmite;  
Pācitti pāḷināruḷhe, sappiādimhi dukkaṭam.
101. Nissatṭhaladdham makkheyya, naṅgam najjhohareyya ca;  
Vikappentassa sattāhe, sāmaṇerassadhiṭṭhato;  
Makkhanādiñca nāpatti, aññassa dadatopi ca.
102. Yāvakālikaādīni, saṃsatṭhāni sahattanā;  
Gāhāpayanti sabbhavam, tasmā evamudīritam.
103. Pure paṭiggahitañca, sattāham yāvajīvikam;  
Sesakālikasammissam, pācitti paribhuñjato.
104. Yāvakālikasammissam, itaram kālikattayam;  
Paṭiggahitam tadahu, tadaheva ca bhuñjaye.
105. Yāmakālikasammissam, sesamevam vijāniyam;  
Sattāhakālikamissañca, sattāham kappatetaranti.



## 9. Paṭiggāhaniddeso

### Paṭiggāhoti –

106. Dātukāmābhīhāro ca, hatthapāseraṇakkhamam;  
Tidhā dente dvidhā gāho, pañcaṅgevam paṭiggaho.
107. Asamhāriye tatthajāte, sukhome ciñcaādinam;  
Paṇṇe vāsayaḥbhāre ca, paṭiggāho na rūhati.
108. Sikkhāmaraṇalingehi, anapekkhavisaggato;  
Acchedānupasampanna-dānā gāhopasammati.
109. Appaṭiggahitam sabbam, pācitti paribhuñjato;  
Suddhañca nātibahalam, kappate udakam tathā.
110. Aṅgalaggamavicchinnaṃ, dantakkhikaṇṇagūthakam;  
Loṇassukheḷasiṅghāṇi-semhamuttakarīsakam.
111. Gūthamattikamuttāni, chārikañca tathāvidhe;  
Sāmam gahetvā seveyya, asante kappakārake.
112. Durūpaciṇṇe rajokiṇṇe, athuggahappaṭiggāhe;  
Antovutthe sayampakke, antopakke ca dukkaṭanti.

## 10. Akappiyamaṃsaniddeso

### Maṃsesu ca akappiyanti –

113. Manussahatthiassānam, maṃsam sunakhadīpinam;  
Sīhabyagghataracchānam, acchassa uragassa ca.
114. Uddissakatamaṃsañca, yañca appaṭivekkhitam;  
Thullaccayam manussānam, maṃse sesesu dukkaṭam.
115. Aṭṭhīpi lohitaṃ cammam, lomamesam na kappati;  
Sacittakamva uddissa-kataṃ sesā acittakāti.

## 11. Nissaggiyaniddeso

### Nissaggiyānīti –

116. Arūpiyam rūpiyena, rūpiyam itarena ca;  
Rūpiyam parivatteyya, nissaggi idha rūpiyam.
117. Kahāpaṇo sajjhu siṅgī, vohārūpagamāsakam;  
Vatthamuttādi itaram, kappam dukkaṭavatthu ca.
118. “Imam gahetvā bhutvā vā, imam dehi karānaya;  
Demi vā”ti samāpanne, nissaggi kayavikkaye.

119. Attano aññato lābhaṃ, saṅghassaññassa vā nataṃ;  
Pariṇāmeyya nissaggi, pācitti cāpi dukkaṭaṃ.
120. Anissajjitvā nissaggiṃ, paribhuñje na deyya vā;  
Nissaṭṭhaṃ sakasaññāya, dukkaṭaṃ aññathetaranti.

## 12. Pācittianiddeso

**Pācittī** –

121. Musāvādomasāvāde, pesuññaharaṇe tathā;  
Padasodhammasāgāre, ujjhāpanakakhīyane.
122. Talasattianādarakukkuccuppādanesu ca;  
Gāmappavesanāpucchā, bhojane ca paramparā.
123. Anuddharitvā gamane, seyyaṃ senāsanāni vā;  
Itthiyāddhānagamane, ekekāya nisīdane.
124. Bhīsāpanākoṭanaaññavāde,  
Vihasaduṭṭhullapakāsachāde;  
Hāsodake nicchubhane vihārā,  
Pācitti vuttānupakhajjasayaneti.

## 13. Samaṇakappaniddeso

**Samaṇakappāti** –

125. Bhūtagāmasamārambhe, pācitti katakappiyaṃ;  
Nakhena vāggisatthehi, bhava samaṇakappiyaṃ.
126. Sa mūlakhandhabījagga-phaḷubījappabhāvito;  
Ārambhe dukkaṭaṃ bījaṃ, bhūtagāmaviyojitaṃ.
127. Nibbaṭṭabījaṃ nobīja-makatañcāpi kappati;  
Kaṭāhabaddhabījāni, bahiddhā vāpi kāraye.
128. Ekābaddhesu bījesu, bhājane vāpi bhūmiyaṃ;  
Kate ca kappiyekasmiṃ, sabbesveva kataṃ bhava.
129. Nikkhitte kappiyaṃ katvā, mūlapaṇṇāni jāyaruṃ;  
Kappiyaṃ puna kāreyya, bhūtagāmo hi so tadā.
130. Sapaṇṇo vā apaṇṇo vā, sevālodakasambhavo;  
Cetiyaḍīsu sevālo, nibbaṭṭadvattipattako;  
Bhūtagāmo vā bījampi, mūlapaṇṇe viniggate.
131. Ghaṭātipiṭṭhe sevālo, makuḷaṃ ahichattakaṃ;  
Dukkaṭasseva vatthūni, phullamabyavahārikaṃ.
132. Lākhāniyyāsachattāni, allarukkhe vikopiya;

Gaṇhato tattha pācitti, chindato vāpi akkharaṃ.

133. Pīletuṃ nāḷikerādiṃ, dārumakkaṭakādīnā;  
Chindituṃ gaṇṭhikaṃ kātuṃ, tiṇādiṃ na ca kappati.
134. Bhūtagāmaṃ va bījaṃ vā, chinda bhindocināhi vā;  
Phālehi vijjha paca vā, niyametvā na bhāsaye.
135. Imaṃ karohi kappiyaṃ, imaṃ gaṇhedamāhara;  
Imaṃ dehi imaṃ sodhevevaṃ vaṭṭati bhāsītunti.

#### 14. Bhūminiddeso

**Bhūmiyoti –**

136. Sammutussāvanantā ca, gonisādī gahāpati;  
Kappiyā bhūmiyo yāsu, vutthaṃ pakkañca kappati.
137. Vāsattāya kate gehe, saṅghike vekasantake;  
Kappiyā kuṭi laddhabbā, sahaseyyappahonake.
138. Gehe saṅghassa vekassa, karamānevamīrayaṃ;  
Paṭhamiṭṭhakathambhādiṃ, ṭhapeyyussāvanantikā;  
“Kappiyakuṭiṃ karoma, kappiyakuṭiṃ karomā”ti.
139. Yebhuyyenāparikkhitto, ārāmo sakalopi vā;  
Vuccate “**gonisādī**”ti, **sammutī** saṅghasammatā.
140. Bhikkhuṃ ṭhapetvā aññehi, dinno tesavaṃva santako;  
Atthāya kappakuṭiyā, geho **gahapatī** mato.
141. Akappakuṭiyā vutthasappiādīhi missitaṃ;  
Vajeyya antovutthattaṃ, purimaṃ kālikadvayaṃ.
142. Teheva bhikkhunā pakkaṃ, kappate yāvajīvikaṃ;  
Nirāmisavaṃva sattāhaṃ, sāmise sāmapākātā.
143. Ussāvanantikā yehi, thambhādīhi adhiṭṭhitā;  
Tesuyevāpanītesu, tadaññesupi tiṭṭhati.
144. Sabbesu apanītesu, bhava jahitavatthukā;  
Gonisādī parikkhitte, sesā chadanavibbhamāti.

#### 15. Upajjhācariyavattaniddeso

**Upajjhācariyavattānī –**

145. Nissāyupajjhācariye, vasamāno supesalo;  
Dantakaṭṭhāsanaṃ toyaṃ, yāguṃ kāle dade sadā.
146. Patte vattaṃ care gāma-ppavese gamanāgame;

Āsane pādapīṭhe ca, kathalopāhanacīvare.

147. Paribhojanīyapānīya-vaccapassāvaṭṭhānisu;  
Vihārasodhane vattaṃ, puna paññāpane tathā.
148. Na papphoṭeyya sodhento, paṭivāte ca saṅgaṇe;  
Vihāraṃ bhikkhu pānīya-sāmantā sayanāsanam.
149. Nhāne nhātassa kātabbe, raṅgapāke ca dhovane;  
Sibbane cīvare theve, rajanto na vaje ṭhite.
150. Ekaccassa anāpucchā, pattaṃ vā cīvarāni vā;  
Na dadeyya na gaṇheyya, parikkhāraṇca kiñcanaṃ.
151. Ekaccaṃ pacchato kātuṃ, gantuṃ vā tassa pacchato;  
Piṇḍapātaṇca ninnetuṃ, nīharāpetumattano.
152. Kiccayaṃ parikammaṃ vā, kesacchedaṇca attano;  
Kārāpetuṃ va kātuṃ vā, anāpucchā na vaṭṭati.
153. Gāmaṃ susānaṃ nissīmaṃ, disaṃ vā gantumicchato;  
Attano kiccayaṃ vāpi, anāpucchā na vaṭṭati.
154. Uppannaṃ aratiṃ diṭṭhiṃ, kukkucçaṃ vā vinodaye;  
Kareyya vāpi ussukkaṃ, saṅghāyattesu kammaṃ.
155. Gilānesu upaṭṭheyya, vuṭṭhānaṃ nesamāgame;  
Vattabhedena sabbattha, anādarena dukkaṭanti.

### 16. Vaccapassāvaṭṭhānikaniddeso

Vaccapassāvaṭṭhānikanti –

156. Na kareyya yathāvuḍḍhaṃ, vaccaṃ yātānupubbiyā;  
Vaccapassāvakuṭiyo, nhānatitthaṇca labbhati.
157. Paviseyyubbhajitvā no, sahasā paviseyya ca;  
Ukkāsivāvubbhajeyya, pādukāsveva saṅghito.
158. Na kare nitthunaṃ vaccaṃ, dantakaṭṭhaṇca khādayaṃ;  
Vaccapassāvadoṇīnaṃ, na kareyyubhayaṃ bahi.
159. Kūpe kaṭṭhaṃ na pāteyya, kheḷaṃ passāvadoṇiyā;  
Nāvalekheyya pharuse-nuhatañcāpi dhovaye.
160. Na nikkhameyya sahasā-vubbhajitvā na nikkhame;  
Capu capu nācameyya, uklāpaṇca visodhayeti.

### 17. Āpucchakaraṇaniddeso

Āpucchakaraṇanti –

161. Anajjhittova therena, pātimokkhaṃ na uddise;  
Dhammaṃ na kathaye pañhaṃ, na pucche na ca vissaje.
162. Āpucchitvā kathentassa, puna vuḍḍhatarāgame;  
Puna āpucchanaṃ natthi, bhattage cānumodato.
163. Vasanto ca anāpucchā, vuḍḍhenekavihārake;  
Na sajjhāyeyya uddesaṃ, paripucchañca no dade.
164. Dhammaṃ na bhāsaye dīpaṃ, na kare na ca vijjhape;  
Vātapānaṃ kavāṭaṃ vā, vivareyya thakeyya ca.
165. Caṅkame caṅkamantopi, vuḍḍhena parivattaye;  
Yena vuḍḍho sa saṅghāṭi-kaṇṇenenam na ghaṭṭayeti.

### 18. Nagganiddeso

Naggoti –

166. Naggo maggaṃ vaje bhuñje, pive khāde na sāyaye;  
Na gaṇhe na dade neva, vande vandāpayeyya vā.
167. Parikammaṃ na kāreyya, na kare paṭichādisu;  
Parikamme duve vattha-cchādi sabbattha kappiyāti.

### 19. Nhānakappaniddeso

Nhānakappoti –

168. Na ca nhāyeyya therānaṃ, puratopari vā tathā;  
Dadeyya otarantānaṃ, maggamuttaramānako.
169. Kuṭṭatthambhataruṭṭāne, nhāyamāno na ghaṃsaye;  
Kāyaṃ gandhabbahatthena, kuruvindakasuttiyā.
170. Mallakenāññamaññaṃ vā, sarīrena na ghaṃsaye;  
Kapālittakakhaṇḍāni, vatthavaṭṭi ca vaṭṭati.
171. Sabbesaṃ puthupāṇi cā-kallassākatamallakaṃ;  
Pāsāṇapheṇakathalā, kappanti pādaghamaṃsaneti.

### 20. Avandiyaniddeso

Avandiyoti –

172. Ukkhittānupasaṃpanna-nānāsaṃvāsaitthiyo;  
Navo ca garukaṭṭho ca, paṇḍako ca avandiyāti.

### 21. Cammaniddeso

Camanti –

173. Migājelakacammāni, kappanti paribhuñjitum;  
Rohiteṇipasadā ca, kuruṅgā migajātikā.
174. Anuññātattayā aññaṃ, cammaṃ dukkaṭavattthukam;  
Thavikopāhane cammaṃ, sabbaṃ kappatimānusanti.

## 22. Upāhananiddeso

Upāhanā cevāti –

175. Majjhadese na kappanti, gaṇaṅgaṇupāhanā navā;  
Sabbassa kappantārāme, sabbatthākallakassa ca.
176. Sabbanīlakaodātapītalohitakaṇhakā;  
Mahāraṅgamahānāma-raṅgarattā cupāhanā.
177. Sabbamañjeṭṭhikā citrā, nīlapītādivaddhikā;  
Tittirapattikā meṇḍa-ajavisāṇavaddhikā.
178. Khallabaddhā puṭabaddhā, tūlapuṇṇā cupāhanā;  
Pāliguṇṭhimakā mora-piñchena parisibbitā.
179. Vicchikālikatā sīhabyagghuddājīnadīpinam;  
Majjārakāḷakolūkacammehi ca parikkhaṭā;  
Pādukā saṅkamanīyā, koci dhāreyya dukkaṭam.
180. Nīlādivaṇṇam sakalam, puñchitvā vekadesakam;  
Upāhanā vaḷañjeyya, hāretvā khallakādikanti.

## 23. Anolokiyaniddeso

Anolokiyanti –

181. Sāratto itthiyā yoniṃ, mukham vā bhikkhadāyiyā;  
Parassa pattamuḷḷhānasaññī vā attano mukham;  
Ādāsodakapatte vā, olokeyyassa dukkaṭanti.

## 24. Añjanīniddeso

Añjanīti –

182. Vaṭṭaṭṭhasoḷasaṃsā vā, maṭṭhā vaṭṭati añjanī;  
Tissopi mūle gīvāyam, lekhā ekāva bandhitum.
183. Yam kiñci rūpaṃ mālādikammaṃ makaradantakam;  
Gomuttakaḍḍhacandādi-vikāram nettha vaṭṭati.
184. Labbhekavaṇṇasuttēna, sibbitum thavikā tathā;  
Sipāṭi kuñcīkākoso, salākāpi acittakā.
185. Saṅkhanābhivisaṇaṭṭhi-naḷadantamayā tathā;

Phalakaṭṭhamayā veḷu-lākhālohamayāpi ca.

186. Añjaniyo salākāyo, dhūmanettā ca labbhare;  
Tathā satthakadaṇḍāni, natthudānā ca tammayāti.

## 25. Akappiyasayananiddeso

**Akappiyasayanānīti** –

187. Āsandī tūlī pallaṅko, paṭikaṃ gonacittakaṃ;  
Paṭalī vikatī udda-lomī ekantalomikā.
188. Kuttaṃ koseyyaṃ kaṭṭissaṃ, hatthiassarathattharā;  
Jinappaveṇikadalī-migappavaraattharā.
189. Salohitavitānañcu-bhatorattūpadhānakam;  
Akappiyāni etāni, dukkaṭaṃ paribhuñjato.
190. Āsandādittayā sese, labbhate gihisantake;  
Dhammāsane ca bhattagge, ghare cāpi nisīdituṃ;  
Bhūmattharaṇasaṅkhepe, sayituñcāpi kappati.
191. Caturaṃsapīṭhā sattaṅgā, pañcaṅgā uccapādakā;  
Tūlonaddhā ghareyeva, mañcapīṭhā nisīdituṃ.
192. Coḷavākunṇapaṇṇānaṃ, tiṇānañceva pūritā;  
Cīvaracchaviyo pañca, bhisī sabbattha kappiyā.
193. Tūlattayaṃ bhisigabbho, lomāni migapakkhinaṃ;  
Bimbohane anuññātaṃ, tūlavajjā masūrake.
194. Manussalomamuñṇāyaṃ, paṇṇe pupphaṃ tamālakaṃ;  
Suddhaṃ na āsanañceva, labbhamappaṭivekkhitanti.

## 26. Samānāsanikaniddeso

**Samānāsanikopi cāti** –

195. Tivassantarānuññātaṃ, bhikkhūnamekamāsaṇaṃ;  
Sattavassativassehi, pañcavasso nisīdituṃ.
196. Ṭhapetvā paṇḍakaṃ itthiṃ, ubhatobyañjanaṃ muni;  
Dīghāsane anuññāsi, sabbeheva nisīdituṃ.
197. Antaṃ dīghāsaṇaṃ tiṇṇaṃ, yaṃ pahoti nisīdituṃ;  
Mañcake vāpi pīṭhe vā, dvinnaṃ labbhaṃ nisīditunti.

## 27. Asaṃvāsikaniddeso

**Asaṃvāsiko cāti** –

198. Ukkhittonupasampanno, bhikkhunī chinnamūlako;  
Nānāsaṃvāsaniissīma-ṭṭhitavehāyaṣaṅṭhitā;  
Ekādasa abhabbā ca, asaṃvāsāti dīpitāti.

## 28. Kammaniddeso

### Kammañcāti –

199. Vaggena adhammakammaṃ, samaggena adhammikam;  
Vaggena dhammakammañca, samaggena ca dhammikam;  
Catutthamyevānuññātam, sesakammesu dukkaṭam.
200. Catuvaggo pañcavaggo, dasavīsativaggiko;  
Tirekavīsativaggo, pañca saṅghā vibhāvītā.
201. Catuvaggettha abbhānu-pasampadāpavāraṇā;  
Pañcavaggo ca abbhānam, majjhadesupasampadam.
202. Dasavaggo ca abbhānam, ṭhapetvā sabbakammiko;  
Itaro sabbakammesu, kammappattoti dīpito.
203. Catuvaggena kattabbe, cattāro pakatattakā;  
Kammappattā pare chandā-rahā sesepyayam nayo.
204. Catuvaggādikattabbaṃ, asaṃvāsakammāraha;  
Garukaṭṭhesvaññātaram, katvāna gaṇapūrakam;  
Parivāsādikam kammaṃ, kataṃ kuppañca dukkaṭam.
205. Adhammakammaṃ vāreyya, antarāye duve tayo;  
Diṭṭhāvimekodhiṭṭhānam, vārenteva tatodhikā.
206. Kammārahā asaṃvāsā, khittacittadukhaṭṭitā;  
Etesaṃ saṅghamajjhamhi, paṭikkhepo na ruhati.
207. Pakatattekasīmaṭṭha-samasamvāsabhikkhuno;  
Ārocentassantamaso-nantarassāpi rūhati.
208. Kopetum dhammikam kammaṃ, paṭikkoseyya sammukhā;  
Tirokkhā kāyasāmaggiṃ, chandaṃ no deyya dukkaṭanti.

## 29. Micchājīvavivajjanāniddeso

### Micchājīvavivajjanāti –

209. Dāruṃ veḷum phalaṃ pupphaṃ, cuṇṇam nhānamukhodakam;  
Mattikādantakaṭṭhādīm, na dade kulasaṅghā.
210. Pāribhaṭakatāmugga-sūpyatāvattuvijjayā;  
Paheṇadūtakammena, jaṅghapesaniyena vā.
211. Anuppadānappaṭiṇḍa-vejjakammena vā pana;



Nāññena vāpi sambuddhappaṭikuṭṭhena jīvaye.

212. Viññattinesanābhūtullapanākuhanādihi;  
Kuladūsādinuppannapaccaye parivajjayeti.

### 30. Vattaniddeso

Vattanti –

213. Āgantuko na ārāmaṃ, pavise saupāhano;  
Sachattogunṭhito sīse, karitvā vāpi cīvaram.
214. Pānīyena na dhoveyya, pāde vuḍḍhatarepi ca;  
Āvāsikebhivādeyya, puccheyya sayanāsanam.
215. Gamiko paṭisāmetvā, dārumattikabhaṇḍakam;  
Vihārañca thaketvāna, āpuccha sayanāsanam.
216. Āpucchitabbe asati, saṃgopetvāna sādhuḥkam;  
Pakkameyyaññathā tassa, pakkantum na ca kappati.
217. Āvāsiko paññāpeyya, vuḍḍhāgantussa āsanam;  
Upanikkhipe pādoda-ppabhutiṃ pattacīvaram.
218. Paccuggantvāna gaṇheyya, pānīyena ca pucchaye;  
Āgantukebhivādeyya, paññape sayanāsanam.
219. Ajjhāvutthamavuttham vā, gocarāgocaram vade;  
Vaccapassāvaṭṭhānāni, katikam sekkhasammutiṃ.
220. Pavesanikkhame kālam, paribhojijapāniyam;  
Nisinnova navakassa, etaṃ sabbam samuddiseti.

### 31. Vikappanāniddeso

Vikappanā cevāti –

221. Sammukhā parammukhāti, duve vuttā vikappanā;  
Sammukhāya vikappento, byattassekassa santike;  
“Imam cīvaram tuyham, vikappemī”’ti bhāsaye.
222. Ettāvātā nidhetumva, kappatī na ca kappati;  
Paribhogādikam tena, appaccuddhaṭabhāvato.
223. “Mayham santakam paribhuñja vā vissajjehi vā yathāpaccayam vā karohī”’ti –  
Tena paccuddhaṭeyeva, paribhogādi kappati.
224. Aparā sammukhāvekā, bhikkhussekassa santike;  
Gahetvā nāmamekassa, pañcannam sahadhamminam.

**225.** “Imaṃ cīvaraṃ tissassa bhikkhuno, tissāya bhikkhuniyā, tissassa sāmaṇerassa, tissāya sāmaṇeriyā, tissāya sikkhamānāya vikappemi”ti vattabbaṃ.

Tena bhikkhunā “tissassa bhikkhuno, tissāya bhikkhuniyā, tissassa sāmaṇerassa, tissāya sāmaṇeriyā, tissāya sikkhamānāya santakaṃ paribhuñja vā vissajjehi vā yathāpaccayaṃ vā karohī”ti vattabbaṃ.

**226.** Parammukhāvikappane-kassantikevamīraye;  
“Imaṃ cīvaraṃ tuyhaṃ vikappanattāya dammī”ti.

**227.** Tena vattabbo “ko te mitto vā sandiṭṭho vā”ti. Itarena cevaṃ vattabbaṃ “tisso bhikkhū”ti vā “tissā bhikkhunī”ti vā “tisso sāmaṇero”ti vā “tissā sāmaṇerī”ti vā “tissā sikkhamānā”ti vā.

Puna tena “ahaṃ tissassa tissāya vā dammī”ti vikappetvā teneva “tissassa bhikkhuno, tissāya bhikkhuniyā, tissassa sāmaṇerassa, tissāya sāmaṇeriyā, tissāya sikkhamānāya santakaṃ paribhuñja vā vissajjehi vā yathāpaccayaṃ vā karohī”ti paccuddharitabbaṃ.

**228.** Dūrasantikattekkatabahubhāvaṃ vijāniya;  
“Etaṃ ima”nti “etāni, imāni”tettha yojaye.

**229.** Dasāhaṃ māsamekaṃ vā, pañca vā kathinatthate;  
Pāripūratthamūnassa, paccāsā satī māsakaṃ;  
Nuppādayati nissaggiṃ, nādhīṭṭhitavikappitanti.

### 32. Nissayaniddeso

**Nissayoti –**

**230.** Byattassa pañcavassassa, natthi nissaya kāriyaṃ;  
Yāvajīvampi abyatto, nissitoyeva jīvati.

**231.** Ekaṃsaṃ cīvaraṃ katvā, pagganhitvāna añjalim;  
Ukkuṭikaṃ nisīditvā, vade yāvataṭṭiyakaṃ;  
“Ācariyo me, bhante, hohi,  
Āyasmato nissāya vacchāmī”ti.

**232.** Pakkante pakkhasaṅkante, vibbhante vāpi nissayo;  
Maraṇāṇattupajjhāya-samodhānehi sammati.

**233.** Nissāya na vaselajjim, apubbaṃ ṭhānamāgato;  
Āgame catupañcāhaṃ, ñātuṃ bhikkhusabhāgataṃ.

**234.** Addhikassa gilānassa, gilānupaṭṭhakassa ca;  
Yācitassa araṇṇe vā, sallakkhantena phāsukaṃ;  
Sabhāge dāyakesante, vasituṃ tāva labbhātīti.

### 33. Kāyabandhananiddeso

**Kāyabandhananti –**

**235.** Akāyabandhano gāmaṃ, dukkaṭaṃ paviseyya ce;

Bandheyya yattha saratī, tatthevāsatiyā gato.

236. Paṭṭikā sūkarantanti, duvidhaṃ kāyabandhanaṃ;  
Dussapaṭṭo ca rajju ca, ekā tadanulomikā.
237. Macchakaṇṭakakhajjūrī-pattā maṭṭhā ca paṭṭikā;  
Labbhā dasā catassopi, ante diguṇasuttakaṃ.
238. Mālādiṃ kakkaṭacchādiṃ, dassetvā guṇasuttaka;  
Koṭṭitā kuṅjaracchādiṃ, paṭṭikā na ca kappati.
239. Ghaṭakaṃ makaramukhādiṃ, na kappanti dasāmukhe;  
Ubhante ghaṭakā lekhā, vidhe aññañca cittakaṃ.
240. Deḍḍubhakañca murajaṃ, maddavīṇaṃ kalābukaṃ;  
Na kappanti dasāsu dve, majjhimāyeva kappare.
241. Veḷudantavisāṇaṭṭhikaṭṭhalākhāphalāmayā;  
Saṅkhanābhimayā suttanaḷalohamayāpi ca;  
Vidhā kappanti kappiyā, gaṇṭhiyo cāpi tammayāti.

Paṭhamabhāṇavāraṃ niṭṭhitaṃ.

### 34. Pathavīiddeso

Pathavī cāti –

242. Jātājātāti duvidhā, suddhamattikapamsukā;  
Jātādaḍḍhā ca pathavī, bahumattikapamsukā;  
Cātumāsādhikovaṭṭhapamsumattikarāsi ca.
243. Suddhasakkharapāsāṇamarumbakathalavālukā;  
Daḍḍhā ca bhūmi yebhuyyasakkharādīmahīpi ca;  
Dutiyā vuttarāsi ca, cātumāsomavaṭṭhako.
244. Dve bhāgā tīsu bhāgesu, mattikā yassa bhūmiyā;  
Yebhuyyamattikā esā, sesesupi ayaṃ nayo.
245. Pācitti khaṇane jāte, jātasaññissa dukkaṭaṃ;  
Dveḷhassājātasaññissa, nāpattāṇāpane tathā.
246. Pahāre pahārāpatti, khaṇamānassa attanā;  
Ekāyāṇattiyā ekā, nānāṇattīsu vācaso.
247. “Imaṃ ṭhānamimaṃ kandamidha vāpiṃ khaṇettha ca;  
Jālehaggi”nti vā vattaṃ, niyametvā na vaṭṭati.
248. “Thambhassimassāvāṭaṃ vā, mattikaṃ jāna māhara;  
Karoḥi kappiyañce”ti, vacanaṃ vaṭṭatedisaṃ.
249. Asambaddhaṃ pathaviyā, sukkhakaddamaādikaṃ;

Kopetum tanukam labbhamussiñcanīyakaddamam.

250. Gaṇḍuppādam upacikāmatikam mūsikukkiram;  
Cātumāsādhikovaṭṭham, leḍḍādīñca na kopaye.
251. Patite vāpiādīnam, kūle udakasantike;  
Pāsāṇe ca raje lagge, patite navasonḍiyā.
252. Vammike mattikākuṭṭe, abbhokāsutṭhite tathā;  
Yebhuyyakathalaṭṭhāne, tiṭṭhatiṭṭhakakuṭṭako.
253. Thambhādiṃ gaṇhitum bhūmiṃ, sañcāletvā vikopayam;  
Dhārāya bhinditum bhūmiṃ, kātum vā visamam samam.
254. Sammuñjanīhi ghaṃsitum, kaṇṭakādiṃ pavesitum;  
Dassessāmīti bhindanto, bhūmiṃ caṅkमितum padaṃ.
255. Ghaṃsitum aṅgapaccaṅgam, kaṇḍurogī taṭādisu;  
Hattham vā dhovitum bhūmiṃ, ghaṃsitum na ca kappati.
256. Thambhādiujukuddhāro, pāsāṇādīpavaṭṭanam;  
Sākhādikaḍḍhanam rukkhalatācchedanaphālanam.
257. Seko passāvaādīnam, suddhacittassa vaṭṭati;  
Allahattham ṭhapetvāna, rajaggāho ca bhūmiyā.
258. Aggissa anupādāne, kapāle iṭṭhakāya vā;  
Pātetum labbhate aggim, bhūmiyam vāvase satīti.

### 35. Parikkhāraniddeso

**Parikkhāroti** –

259. Pañcavaṇṇehi suttehi, anto bahi ca sibbitum;  
Girikūṭaḍḍhacandādiṃ, chatte paṇṇe ca chinditum.
260. Ghaṭakam vālarūpam vā, daṇḍe lekhā na vaṭṭati;  
Vaṭṭatī daṇḍabundamhi, ahicchattakasādisam.
261. Sibbitum ekavaṇṇena, pañjaram vā vinandhitum;  
Thirattham vaṭṭatī chatte, daṇḍe lekhāva bandhitum.
262. Ante paṭṭamukhe vāpi, veṇi saṅkhalikāpi vā;  
Sūcivikāramaññaṃ vā, cīvare na ca kappati;  
Kappabinduvikārampi, pāḷikaṇṇikaādikam.
263. Gaṇṭhipāsakapaṭṭāpi, catukkoṇāva agghiyam;  
Muggaro kakkaṭacchādi-vikāram nettha vaṭṭati.
264. Koṇasuttā ca pīlakā, duviññeyyāva kappare;  
Gandham telam va lākham vā, rajane na ca pakkhipe.

265. Rattaṃ saṅkhena maṇinā, ghaṭṭeyyaññaena vā na ca;  
Ghaṃseyya doṇiyaṃ katvā, pahāre na ca muṭṭhinā.
266. Kaṇṇakoṇakasuttāni, ratte chindeyya cīvare;  
Lekhā na vaṭṭatī dhamma-karaṇe chattavaṭṭiyaṃ.
267. Lekhaṃ ṭhapetvā maṇikā, pīlakā kuṅcikāya ca;  
Pippahale ca pariccheda-lekhā daṇḍamhi vaṭṭati.
268. Mālādyaraṇiyaṃ patta-maṇḍale bhittikamma ca;  
Heṭṭhā lekhādavyayaṃ uddhaṃ, ahicchattakasādisaṃ.
269. Hitvā kattarayaṭṭhimhi, sūcisaṇḍāsakepi ca;  
Yaṃ kiñci girikūṭādi-vaṇṇamaṭṭhaṃ na vaṭṭati.
270. Bimbohane bhisimañca-pīṭhādisayanāsane;  
Sammuñjanimhi saṅkāra-chaḍḍane raṅgabhājane.
271. Pānīyabhājane pāda-pīṭhe kathalikāya ca;  
Pattādhārapidhānesu, tālavaṇṭe ca bījane;  
Yaṃ kiñci mālākammādi-vaṇṇamaṭṭhamavāritaṃ.
272. Senāsane pana dvāarakavāṭādippabhedane;  
Sovaṇṇamayanuññātaṃ, vaṇṇamaṭṭhamhi kā kathā.
273. Visāṇanāḷilābvādippabhede telabhājane;  
Pumithirūparahitaṃ, vaṇṇamaṭṭhamavāritanti.

### 36. Bhesajjaniddeso

#### Bhesajjanti –

274. Janassa kātuṃ bhesajjaṃ, dātuṃ vattuṃ na labbhati;  
Bhikkhācariyaviññatti, sakehi sahadhammiṇaṃ.
275. Pitūnaṃ tadupaṭṭhākabhikkhunissitabhaṇḍunaṃ;  
Labbhaṃ bhesajjakaraṇaṃ, veyyāvaccakarassa ca.
276. Mahācūlapitāmātābhātābhaginiādiṇaṃ;  
Tesaṃ sakenattaniye, dātabbaṃ tāvakālikaṃ.
277. Kuladūsanaviññatti, bhesajjakaraṇādi hi;  
Mātāpitūhi sambandhaññātakesu na rūhati.
278. Piṇḍapāto anāmaṭṭho, mātādīnamavārito;  
Channaṃ dāmarikacorassa, dātumissariyassa ca.
279. Tesaṃ suttodakeheva, parittaṃ kayirā nattano;  
Bhaṇitabbaṃ bhaṇāpente, parittaṃ sāsanoḍadhaṃ.
280. Sīlaṃ dhammaṃ parittaṃ vā, āgantvā detu bhāsatu;  
Dātuṃ vattuñca labbhati, gantvā kenaci pesitoti.

### 37. Uggahaniddeso

Uggahoti –

281. Kammacetiyasaṅghañña-puggalattham gaṇassa ca;  
Dasabhedampi ratanam, uggaṇhantassa dukkaṭam.
282. Nissaggi tesu attattham, dvīsu sesesu dukkaṭam;  
Anāmasitvā vutte tu, gaṇam saṅghañca puggalam.
283. “Cetyassa navakammassa, dammī”ti na paṭikkhipe;  
Vade kappiyakārānam, “vadantevamime” iti.
284. Khettham vatthum taḷākam vā, dente dāsapasvādikam;  
Paṭikkhipitvā gaṇheyya, kappiyena kamena ca;  
Khetādāni vihārassa, vutte dammīti vaṭṭati.
285. Navamātikakedāra-taḷākakiriyānave;  
Mattikuddharaṇam bandho, thirakāro ca āḷiyā.
286. Tirekabhāgagahaṇam, kedāre anave nave;  
Aparicchannabhāge ca, sasse “dethettake” iti;  
Kahāpaṇuṭṭhāpanañca, sabbesampi akappiyam.
287. Avatvā kasa vappiccādettkāya ca bhūmiyā;  
Paṭiṭṭhāpeti bhūmiṃ vā, bhāgo deyyoti ettako.
288. Bhūmibhāge kataṃ sassam, ettake gaṇhathettakam;  
Gaṇhanattham vadantevam, pamāṇam daṇḍarajjubhi.
289. Minane rakkhaṇe ṭhatvā, khale taṃnīharāpane;  
Koṭṭhādīpaṭisāmane, tassevetamakappiyam.
290. Paṭisāmeyya pācitti, yaṃ kiñci gihisantakam;  
Bhaṇḍāgārikasīna, sacepi pitusantakam.
291. Pitūnam kappiyam vatthum, avassam paṭisāmiyam;  
Attano santakam katvā, labbhate paṭisāmitum.
292. Dehīti paṭisāmetvā, vutte cāpi paṭikkhipe;  
Pātetvāna gate labbham, palibodhoti gopitum.
293. Kamam karonto ārāme, sakam vaḍḍhakiādayo;  
Parikkhāraṇca sayana-bhaṇḍam vā rājavallabhā.
294. Dehīti paṭisāmetvā, vadanti yadi chandato;  
Na kareyya bhayā ṭhānam, guttam dassetu vaṭṭati.
295. Balakkārena pātetvā, gatesu paṭisāmitum;  
Bhikkhum manussā saṅkanti, naṭṭhe vatthumhi tādise.
296. Vihārāvasathassanto, ratanam ratnasammatam;

Nikkhipeyya gahetvāna, maggeraññepi tādise;  
Sāmikānāgamam ñatvā, patirūpam karīyatīti.

### 38. Kuladūsanāniddeso

**Dūsananti –**

297. Pupphaṃ veḷuṃ phalaṃ cuṇṇaṃ, dantakaṭṭhañca mattikaṃ;  
Saṅghaṇaṭṭhaṃ dadato, kuladūsanadukkaṭṭhaṃ.
298. Thullaccayaṃ garubhaṇḍaṃ, issarenettha saṅghikaṃ;  
Dentassa dukkaṭṭādīni, theyyā saṅghañña santakaṃ.
299. Kulasaṅgahā ropetuṃ, ropāpetuñca sabbathā;  
Phalapupphūpagaṃ rukkhaṃ, jaggituñca na vaṭṭati.
300. Nimitto bhāsato kappavohārapariyāyato;  
Attano paribhogatthaṃ, ropanādīni labbhare.
301. Vuttāva vejjikā jaṅghapesane gihikammasu;  
Ṭhapetvā pitaro bhaṇḍuṃ, veyyāvaccakaraṃ sakaṃ.
302. Dukkaṭṭhaṃ padavārena, haraṇe dūtasāsaṇaṃ;  
Sāsaṇaṃ aggahetvāpi, paṭhamam vadato puna.
303. Uppannapaccayā evaṃ, pañcannampi akappiyā;  
Abhūtārocānārūpa-saṃvohāruggahādīsā.
304. Harāpetvā haritvāpi, pitūnaṃ sesaññātinam;  
Pattānaṃ vatthupūjatthaṃ, dātuṃ pupphāni labbhati;  
Maṇḍanaṭṭhañca liṅgādi-pūjatthañca na labbhati.
305. Tathā phalaṃ gilānānaṃ, sampattissariyassa ca;  
Paribbayavihīnānaṃ, dātuṃ saparasantakaṃ.
306. Bhājente phalapupphamhi, deyyaṃ pattassa kassaci;  
Sammatenāpaloketvā, dātabbamitarena tu.
307. Vihāre vā paricchijja, katvāna katikaṃ tato;  
Deyyaṃ yathāparicchedaṃ, gilānassetarassa vā;  
Yācamānassa katikaṃ, vatvā rukkāva dassiyā.
308. Sirīsakasavādīnaṃ, cuṇṇe sese ca nicchayo;  
Yathāvuttanayo eva, paṇṇampettha pavesayeti.

### 39. Vassūpanāyikaniddeso

**Vassūpanāyikā cevāti –**

309. Purimikā pacchimikā, duve vassūpanāyikā;  
Tatthālayapariggāho, vacībhedo ca ediso.

310. “Imasmim vihāre imaṃ, temāsaṃ vassaṃ upemi;  
Idha vassaṃ upemi”’ti, cittuppādettha ālayo.
311. Nopetukāmo āvāsaṃ, tadahūtikkameyya vā;  
Bhaveyya dukkaṭāpatti, jānaṃ vānupagacchato.
312. Dutiyam upagaccheyya, chinnavassonupāgato;  
Na pakkameyya temāsaṃ, avasitvāna cārikaṃ.
313. Mātāpitūnamatthāya, pañcannaṃ sahadhamminam;  
Gilānatadupaṭṭhāka-bhattamesissamosadham.
314. Pucchissāmi upaṭṭhissaṃ, gantvānabhirataṃ ahaṃ;  
Vūpakāsissaṃ kukkucçaṃ, diṭṭhiṃ garukamādikaṃ.
315. Karissaṃ vāpi kāressaṃ, vinodanaṃ vivecanaṃ;  
Vuṭṭhānaṃ vāpi ussukkaṃ, gantumiccevamādinā;  
Labbhaṃ sattāhakiccena, pahitāpahitepi vā.
316. Saṅghakamme vaje dhamma-ssavanatthaṃ nimantito;  
Garūhi pahito vāpi, garūnaṃ vāpi passituṃ.
317. Na bhaṇḍadhovanuddesa-ñātupaṭṭhākadassane;  
Labbhaṃ na pāpuṇeyyajje-vāgamissantudūrago.
318. Sesañātīhi pahite, bhikkhunissitakena ca;  
Upāsakopāsikāhi, niddisitvāva pesite.
319. Vassacchede anāpatti, antarāye satattano;  
Saṅhasāmaggiyā vā no, chinnavasso pavāraye.
320. Ajjhokāse ca rukkhassa, susire viṭapepi vā;  
Chavakuṭichattacāṭī-sūpagantuṃ na vaṭṭati.
321. Asenāsanikenāpi, upagantuṃ na labbhati;  
Pavāretuñca labbhati, nāvāsathavajūpagoti.

#### 40. Avebhaṅgiyaniddeso

##### Avebhaṅgiyanti –

322. Ārāmārāmavattūni, vihāro tassa vatthu ca;  
Mañco pīṭhaṃ bhisi bibbo-hanādisayanāsaṃ.
323. Lohakumbhī kaṭāho ca,  
Lohabhāṇakavārako;  
Kuṭhārī vāsi pharasu,  
Kuddālo ca nikhādanaṃ.
324. Valli veḷu tiṇaṃ paṇṇaṃ, muñjapabbajamattikā;  
Dārumattikabhaṇḍāni, pañcete avibhājiyā.



325. Thullaccayaṃ bhājayato, bhājitāpi abhājitā;  
Garubhaṇḍāni vuccanti, etevissajjiyāni ca.
326. Valliḍḍhabāhumattāpi, veḷu aṭṭhaṅgulāyato;  
Tiṇādi muṭṭhimattampi, paṇṇaṃ ekampi mattikā.
327. Pākatā pañcavaṇṇā vā, sudhākaṅguṭṭha ādikā;  
Tālapakkappamāṇāpi, dinnā vā tatthajātakā.
328. Rakkhitā saṅghikā rajju-yottādīpi abhājiyā;  
Niṭṭhite bhājiyā kamme, saṅghike cetiyassa vā.
329. Pattādi bhikkhusāruppaṃ, tathā vipakatākatam;  
Bhājiyaṃ lohabhaṇḍesu, vāraṃ pādagaṇhakaṃ.
330. Veḷumhi bhājiyā tela-nāḷi kattaradaṇḍako;  
Chattadaṇḍasalākāyo, tathopāhanadaṇḍako.
331. Anuññātavāsidaṇḍo, karaṇḍo pādagaṇhako;  
Araṇaṇjanisingādi, bhikkhūpakaraṇaṃ tathā.
332. Tacchitāniṭṭhitaṃ dārubhaṇḍaṃ dantañca bhājiyaṃ;  
Bhikkhūpakaraṇe pādagaṇhako mattikāmayo.
333. Bhājiyaṃ kappiyaṃ cammaṃ, eḷacammambhājiyaṃ;  
Garunā garubhaṇḍaṇca, thāvaram thāvarena ca.
334. Thāvaram parivatteyya, tathā katvā ca bhuñjatu;  
Vallādiṃ phātikammaṇa, gaṇhe sesambhājiyanti.

#### 41. Pakiṇṇakaniddeso

##### Pakiṇṇakanti –

335. Sadvārabandhane ṭhāne, sodukkhalakapāsake;  
Sayantena divā dvāraṃ, bandheyya parivaṭṭakaṃ.
336. Sante viññumhi purise, ābhogo cāpi kappati;  
Savase taṃ vinākāraṃ, sayanto dukkaṭaṃ phuse.
337. Ratanānitthirūpāni, dhaññamitthipasādhanam;  
Tūriyāvudhabhaṇḍāni, āmasantassa dukkaṭam.
338. Sitthatelodatelehi, phaṇahatthaphaṇehi vā;  
Kocchenavāpi yo kese, osaṇṭtheyyassa dukkaṭam.
339. Nekapāvuraṇā ekattharaṇā vā tuvaṭṭayum;  
Tathekamañce bhuñjeyyum, ekasmiṃ vāpi bhājane.
340. Caturaṅgulato ūnamadhikaṭṭhaṅgulaṃ tathā;  
Dantakaṭṭhaṃ na khādeyya, lasuṇaṃ na akallako.

341. Hīnukkaṭṭhehi ukkaṭṭhaṃ, hīnaṃ vā jātiādihi;  
Ujjuṃ vāññāpadesena, vade dubbhāsitaṃ davā.
342. Dīghe nakhe ca kese ca, nāsalome na dhāraye;  
Na labbhaṃ vīsatiṃmaṭṭhaṃ, sambādhe lomahāraṇaṃ.
343. Yathāvuḍḍhaṃ na bādheyya, saṅghuddiṭṭhaṃva saṅghikaṃ;  
Adhotaallapādehi, nakkame sayanāsaṇaṃ;  
Sudhotapādakaṃ vāpi, tatheva saupāhano.
344. Saṅghāṭiyā na pallatthe, bhittādiṃ na apassaye;  
Parikkammakataṃ sante, uduke no na ācame.
345. Akappiyasamādāne, davā silāpavijjhane;  
Desanāya sabhāgāya, āvikamme ca dukkaṭaṃ.
346. Paṭissavavisaṃvāde, suddhacittassa dukkaṭaṃ;  
Paṭissavakkhaṇe eva, pācitti itarassa tu.
347. Na rukkhamaḥhirūheyya, sati kicceva porisaṃ;  
Āpadāsu yathākāmaṃ, kappatī abhirūhitaṃ.
348. Vināddhānaṃ vajantassa, dukkaṭaṃ parisāvanaṃ;  
Yācamānassa addhāne, adadantassa dukkaṭaṃ.
349. Thullaccayaṃ phuse aṅgajātachedena dukkaṭaṃ;  
Ābādhappaccayāññātra, sesaṅge attaghātane.
350. Cittapotthakarūpāni, na kare na ca kāraye;  
Na vuṭṭhāpeyya bhuñjantaṃ, āramāraññagehasu.
351. Yānāni pumayuttāni, sivikaṃ hatthavaṭṭakaṃ;  
Pāṭaṅkiñca gilānassa, kappatī abhirūhitaṃ.
352. Buddhaṃ dhammañca saṅghañca, ārabba karaṇe davaṃ;  
Dukkaṭaṃ parisaṃ vāpi, aññassa upalāḷane.
353. Kāyaṃ ūruṃ nimittaṃ vā, bhikkhunīnaṃ na dassaye;  
Vivāritvā na siñceyya, tā kaddamudakādīnā.
354. Na gaṇhato ca ovādaṃ, na paccāharatopi ca;  
Bālaṃ gilānaṃ gamiyaṃ, vajjayitvāna dukkaṭaṃ.
355. Lokāyataṃ na vāceyya, palitaṃ na ca gāhaye;  
Peḷāyapi na bhuñjeyya, na kīḷe kiñci kīḷitaṃ.
356. Pārupe na nivāseyya, gihipārutanivāsaṇaṃ;  
Saṃvelliyaṃ nivāseyya, dāyaṃ nālimpayeyya vā.
357. Vaḍḍhiṃ payojaye yāce, noññātakappavārite;  
Attano paribhogatthaṃ, dinnamaññassa no dade;  
Aggaṃ gahetvā bhutvā vā, katipāhaṃ puno dade.

358. Uddissa yācane rakkhaṃ, ñatvāñatvā va daṇḍinaṃ;  
Gīvāssa daṇḍite daṇḍo, sayamaṃ daṇḍāpane pana;  
Daṇḍassa agghabhedena, ñeyyā pārājikādikā.
359. Harantesu parikkhāraṃ, “coro coro”ti bhāsita;  
Anatthāyesamaṃ gaṇhante, daṇḍamaṃ gīvāssa tattakamaṃ.
360. Vighāsuccārasaṅkāra-muttaṃ chaḍḍeyya dukkaṭamaṃ;  
Bahi pākāraḍḍānaṃ, vaḷaṅṅe nāvalokiya;  
Harite vāpi vīhādi-nāḷikerādiropime.
361. Yo jāpetuṃ payojetuṃ, payuttāni ca passituṃ;  
Na labbhaṃ dhammayuttampi, naccamaṃ gītaṅca vāditamaṃ;  
“Upahāraṃ karomā”ti, vutte vā sampaṭicchituṃ.
362. Rājāgāraṃ pokkharāṇiṃ, uyyānaṃ cittagāraṅkaṃ;  
Kīḷatthaṃ gacchato daṭṭhuṃ, āraṃamaṃ dukkaṭamaṃ kataṃ.
363. Nave na paṭibāheyyā-sanenuṅhe na cīvaramaṃ;  
Nidaheyya khamāpeyya, garuṇā ca paṇāmito.
364. Akkosane parammukhā, āpattīhi ca sattahi;  
Bhikkhuṃ upāsakamaṃ vāpi, aññeneva ca dukkaṭamaṃ.
365. Na labbhaṃ vinipātetuṃ, saddhādeyyaṅca cīvaramaṃ;  
Labbhaṃ pitūnaṃ sesānaṃ, ñātīnampi na labbhati.
366. Vassaṃvutthoññatoññatra, bhāgaṃ gaṇheyya dukkaṭamaṃ;  
Paṭideyya naṭṭhe jiṅṅe, gīvā no deyya codito;  
Dhuranikkhepato tesamaṃ, hoti bhaṇḍagghakāriyo.
367. Na santaruttaro gāmaṃ, kallo vā saupāhano;  
Paviseyya na dhāreyya, cāmarīmakasabjāṇiṃ.
368. Agilāno na chindeyya, kese kattariyā bahi;  
Ārāmato na dhāreyya, chattaṃ labbhati guttiyā.
369. Gāheyya nubhatokājaṃ, ekantarikakājakaṃ;  
Sīsakkhandhakaṭṭibhārā, hattholambo ca labbhati.
370. Āpattiyā anokāsa-kataṃ codeyya dukkaṭamaṃ;  
Suddhassa ca avatthusmiṃ, tathā okāsakāraṅge.
371. Aṭṭhaṅgulādhikaṃ mañcapaṭipādaṃ na dhāraye;  
Pakataṅgulena sattānaṃ, mañcaṃ vā uccapādaṅkaṃ.
372. Mūgabbatādiṃ gaṇheyya, dukkaṭamaṃ titthiyabbataṃ;  
Khurabhaṇḍamaṃ parihare, tathā nhāpitapubbako.
373. Yaṃ kiñci yācituṃ hatthakammaṃ tadanusārato;  
Laddhaṃ gaḥetuṃ nikkammamayācivāpi kappati;  
Kāretumāharāpetuṃ, yaṃ kiñciparasantakamaṃ.

374. Gihīnaṃ gopake dente, gahetuṃ deti yattakaṃ;  
Labbhaṃ yathāparicchedaṃ, saṅghacetiyasantaṅke.
375. Dvīhāpajjeyya āpattiṃ, kāyavācāhi vā chahi;  
Alajjīññānakukkuccapakatattā satiplavā;  
Akappiye vā kappiye, kappākappiyasaññitā.
376. Alajjīññānatāpattiṃ, kāyavācāhi chādaye;  
Līṅge saṅghe gaṇekasmiṃ, catudhāpattivuṭṭhiti.
377. Parikathobhāsaviññatti, na labbhā paccayadvaye;  
Viññattiyeva tatiye, sese sabbampi labbhati.
378. Na rūhataccaye dānaṃ, pañcannaṃ sahadhammiṇaṃ;  
Saṅghasseva ca taṃ hoti, gihīnaṃ pana rūhati.
379. Bhikkhu vā sāmaṇero vā, kālaṃ kayirāthūpassaye;  
Bhikkhusaṅghova dāyajjo, tattha sesepyayaṃnayo.
380. Purimassevimaṃ dinnāṃ, dehi netvāsukassati;  
Pacchimasseva dammīti, dinnāṃ ñatvā imaṃ vidhiṃ;  
Gaṇhe vissāsagāhaṃ vādhiṭṭhe matakacīvaraṃ.
381. Lohabhaṇḍe paharaṇiṃ, dārubhaṇḍe ca dārujaṃ;  
Pattaṃ pādukaṃpallaṅkaṃ, āsandiṃ mattikāmaye;  
Ṭhapetvā kappati sabbāṃ, katakaṃ kumbhakārikanti.

## 42. Desanāniddeso

### Desanāti –

382. Cāgo yo bhikkhubhāvassa, sā pārājikadesanā;  
Yathāvuttena vuṭṭhānaṃ, garukāpattidesanā.
383. Ukkuṭikaṃ nisīditvā, paggaṇhitvāna añjaliṃ;  
Thullaccayādiṃ deseyya, evamekassa santike.

384. “Ahaṃ, bhante, ekaṃ thullaccayāpattiṃ āpajjiṃ, taṃ tumhamūle paṭidesemī”ti vatvā tena “passasi, āvuso, taṃ āpatti”nti vutte “āma, bhante, passāmī”ti vatvā puna tena “āyatim, āvuso, saṃvareyyāsī”ti vutte “sādhu suṭṭhu, bhante, saṃvarissāmī”ti vattabbaṃ. “Ahaṃ, bhante, dve thullaccayāpattiyo āpajjiṃ, ahaṃ bhante sambahulā thullaccayāpattiyo āpajjiṃ, tā tumhamūle paṭidesemī”ti vattabbaṃ.

Nissaggiyesu pana “idaṃ me, bhante, cīvaraṃ dasāhātikkantaṃ nissaggiyaṃ, imāhaṃ āyasmato nissajjāmī”ti. “Imāni me, bhante, cīvarāni...pe... etaṃ me, bhante, cīvaraṃ...pe... etāni me, bhante, cīvarāni dasāhātikkantāni nissaggiyāni, etānāhaṃ āyasmato nissajjāmī”ti.

385. Nissajjitvāna deseyya, āpattiṃ tena bhikkhunā;  
Paṭigahetvā āpattiṃ, deyyaṃ nissaṭṭhacīvaraṃ.

“Imaṃ, imāni, etaṃ, etāni cīvarāni āyasmato dammī”ti.

**386.** (Ka) idaṃ me, bhante, cīvaraṃ rattivippavutthaṃ aññatra bhikkhusammutiyā nissaggiyaṃ.

(Kha) idaṃ me, bhante, akālacīvaraṃ māsātikantaṃ nissaggiyaṃ.

(Ga) idaṃ me, bhante, purāṇacīvaraṃ aññātikāya bhikkhuniyā dhovāpitaṃ nissaggiyaṃ.

(Gha) idaṃ me, bhante, cīvaraṃ aññātikāya bhikkhuniyā hatthato paṭiggahitaṃ aññatra pārivattakā nissaggiyaṃ.

(Ña) idaṃ me, bhante, cīvaraṃ aññātaṃ gahapatikaṃ aññatra samayā viññāpitaṃ nissaggiyaṃ.

(Ca) idaṃ me, bhante, cīvaraṃ aññātaṃ gahapatikaṃ tatuttari viññāpitaṃ nissaggiyaṃ.

(Cha) idaṃ me, bhante, cīvaraṃ pubbe appavārito aññātaṃ gahapatikaṃ upasaṅkamitvā vikappaṃ āpannaṃ nissaggiyaṃ.

(Ja) idaṃ me, bhante, cīvaraṃ pubbe appavārito aññātake gahapatike upasaṅkamitvā vikappaṃ āpannaṃ nissaggiyaṃ.

(Jha) idaṃ me, bhante, cīvaraṃ atirekatikkhattuṃ codanāya atirekachakkhattuṃ ṭhānena abhinipphāditaṃ nissaggiyaṃ.

(Ña) idaṃ me, bhante, kosiyamissakaṃ santhataṃ kārāpitaṃ nissaggiyaṃ.

(Ṭa) idaṃ me, bhante, suddhakālakānaṃ eḷakalomānaṃ santhataṃ kārāpitaṃ nissaggiyaṃ.

(Ṭha) idaṃ me, bhante, santhataṃ anādiyitvā tulaṃ odātānaṃ tulaṃ gocariyānaṃ kārāpitaṃ nissaggiyaṃ.

(Ḍa) idaṃ me, bhante, santhataṃ ūnakachabbassāni kārāpitaṃ aññatra bhikkhusammutiyā nissaggiyaṃ.

(Ḍha) idaṃ me, bhante, nisīdanasanthataṃ anādiyitvā purāṇasanthatassa sāmantaṃ sugatavidatthiṃ kārāpitaṃ nissaggiyaṃ.

(Ṅa) imāni me, bhante, eḷakalomāni tiyojanaparamaṃ atikkāmitāni nissaggiyāni.

(Ta) imāni me, bhante, eḷakalomāni aññātikāya bhikkhuniyā dhovāpitāni nissaggiyāni.

(Tha) ahaṃ, bhante, rūpiyaṃ paṭiggahesiṃ, idaṃ me, bhante, nissaggiyaṃ, imāhaṃ saṅghassa nissajjāmi.

(Da) ahaṃ, bhante, nānappakāraṃ rūpiyaṃvohāraṃ samāpajjiṃ, idaṃ me, bhante, nissaggiyaṃ, imāhaṃ saṅghassa nissajjāmīti.

**387.** Nissajjitvāna āpattiṃ, deseyyātha gihiṃ vade;  
“Jānāhima”nti iminā, so vadeyyāharāmi kiṃ.

**388.** Avatvāmanti telādiṃ, vade bhikkhūna kappiyaṃ;  
Yaṃ āharati so tena, parivattetvāna kappiyaṃ.

**389.** Labbhaṃ ṭhapetvā dvepete, sesehi paribhuñjituṃ;  
Tato aññena laddhopi, bhāgo tesam na kappati.

**390.** Rukkhacchāyāpyantamaso, tannibattā na kappati;  
Nissaṭṭhaṃ paṭiladdhampi, ādito santhatattayaṃ.

**391.** No ce labhetha evaṃ so, imaṃ chaḍḍehi saṃsiyo;  
Evampi bhikkhu chaḍḍeyya, no ce labhetha sammato.

**392.** Etāni dutiyo patto, saṅghe sesāni labbhare;  
Saṅghekasmim̐ gaṇe vattuṃ, labbhaṃ bhāsantarenapi.

**393.** (Ka) ahaṃ, bhante, nānappakāraṃ kayavikkayaṃ samāpajjīm, idaṃ me, bhante,  
nissaggiyaṃ.

(Kha) ayaṃ me, bhante, patto dasāhātikkanto nissaggiyo.

(Ga) ayaṃ me, bhante, patto ūnapañcabandhanena pattena cetāpito nissaggiyo, imāhaṃ saṅghassa  
nissajjāmīti.

**394.** Nissajjivāna deseyya, āpattiṃ pattaḡāhakaṃ;  
Sammantivāna saṅghassa, pattantaṃ tassa dāpaye.

**395.** (Ka) idaṃ me, bhante, bhesajjaṃ sattāhātikkantaṃ nissaggiyaṃ.

(Kha) idaṃ me, bhante, vassikasāṭhikacīvaraṃ atirekamāse sese gimhāne pariyaṭṭhaṃ,  
atirekaḍḍhamāse sese gimhāne katvā paridahitaṃ nissaggiyaṃ.

(Ga) idaṃ me, bhante, cīvaraṃ bhikkhussa sāmaṃ datvā acchinnam̐ nissaggiyaṃ.

(Gha) idaṃ me, bhante, cīvaraṃ sāmaṃ suttaṃ viññāpetvā tantavāyehi vāyāpitaṃ nissaggiyaṃ.

(Ña) idaṃ me, bhante, cīvaraṃ pubbe appavārito aññātakassa gahapatikassa tantavāye  
upasaṅkamtivā vikappaṃ āpannaṃ nissaggiyaṃ.

(Ca) idaṃ me, bhante, accekacīvaraṃ cīvarakālasamayaṃ atikkāmitaṃ nissaggiyaṃ.

(Cha) idaṃ me, bhante, cīvaraṃ atirekachārattaṃ vippavutthaṃ aññatra bhikkhusammutiyā  
nissaggiyaṃ.

(Ja) idaṃ me, bhante, jānaṃ saṅghikaṃ lābhaṃ pariṇataṃ attano pariṇāmitaṃ nissaggiyaṃ,  
imāhaṃ āyasmato nissajjāmīti.

**396.** Sesam̐ sabbam̐ yathāyogaṃ, ādimhi viya yojaye.

**397.** (Ka) ahaṃ, bhante, ekaṃ pācittiyāpattiṃ āpajjīm. Dve sambahulā pācittiyāpattiyo āpajjīm.

(Kha) gārayhaṃ, bhante, dhammaṃ āpajjīm asappāyaṃ pāṭidesanīyaṃ, taṃ pāṭidesemīti. Tena  
“passasi, āvuso, taṃ dhamma”nti vattabbaṃ.

(Ga) ahaṃ, bhante, ekaṃ dukkaṭāpattiṃ āpajjīṃ. Dve sambahulā dukkaṭāpattiyo āpajjīṃ.

(Gha) ahaṃ, bhante, ekaṃ dubbhāsītāpattiṃ āpajjīṃ. Dve sambahulā dubbhāsītāpattiyo āpajjīṃ. Tā tumhamūle paṭidesemīti.

(Ña) “ahaṃ, bhante, dve nānāvattukā thullaccayāpattiyo āpajjīṃ. Sambahulā nānāvattukā thullaccayāpattiyo āpajjīṃ, tā tumhamūle paṭidesemī”ti vatvā tena “passasi, āvuso, tā āpattiyo”ti vutte “āma, bhante, passāmī”ti vatvā puna tena “āyatīṃ, āvuso, saṃvareyyāsī”ti vutte “sādhu suṭṭhu, bhante, saṃvarissāmī”ti vattabbaṃ.

**398.** Adesanāgāminiyāṃ, anāpattiñca desitaṃ;  
Nānā saṃvāsanissīmaṭṭhitānaṃ catupañcahi;  
Manasā pakatattānaṃ, nānekāti na desayeti.

### 43. Chandadānaniddeso

**Chandadānādīti** –

**399.** Bheriṃ ghaṇṭiṃ patāletvā, kammappatte samāgate;  
Saṅghe hareyya chandaṃ vā, pārisuddhiṃ pavāraṇaṃ.

**400.** Ekaṃ bhikkhuṃ upaggamma, nisīditvā ukkuṭikaṃ;  
Añjaliṃ paggaṇhitvāna, dade chandaṃ vicakkhaṇo.

**401.** (Ka) “chandaṃ dammi, chandaṃ me hara, chandaṃ me ārocehī”ti vattabbaṃ.

(Kha) pārisuddhiṃ dentena “pārisuddhiṃ dammi, pārisuddhiṃ me hara, pārisuddhiṃ me ārocehī”ti vattabbaṃ.

**402.** Pārisuddhippadānena, sampādeti uposathaṃ;  
Saṅghassa attano cāpi, sesakammaṃ vibādhati.

**403.** Chandadānena saṅghassa, dvayaṃ sādheti nattano;  
Tasmā chandaṃ dadantena, dātabbā pārisuddhipi.

**404.** Hareyyeko bahūnampi, paramparā na hāraye;  
Paramparāhaṭṭā chanda-pārisuddhi na gacchati.

**405.** Sabbūpacāraṃ katvāna, evaṃ deyyā pavāraṇā. “Pavāraṇaṃ dammi, pavāraṇaṃ me hara, pavāraṇaṃ me ārocehi, mamatthāya pavārehi”ti.

**406.** Ārocetvātha so saṅghaṃ, pavāreyyevamāgato. “Itthannāmo, bhante, saṅghaṃ pavāreti diṭṭhena vā sutena vā parisankāya vā, vadatu taṃ saṅgho anukampaṃ upādāya, passanto paṭikarissatī”ti.

**407.** Gahetvā pārisuddhiṃ vā, chandaṃ vāpi pavāraṇaṃ;  
Hārako saṅghamappatvā, vibbhameyya mareyya vā.

**408.** Sāmaṇerādibhāvaṃ vā,  
Paṭijāneyya nāhaṭṭā;  
Patvā saṅghaṃ tathā heyya,  
Āhaṭṭā hoti hārako.

409. Saṅghappatto pamatto vā, sutto nārocayeyya vā;  
Anāpattiva sañcicca, nārocentassa dukkaṭanti.

#### 44. Uposathaniddeso

Uposathoti –

410. Dube uposathā cātu-ddaso pannaraso iti;  
Suttuddesamadhiṭṭhāna-pārisuddhivasā tayo.

411. Suttuddesova saṅghassa, adhiṭṭhānauposatho;  
Puggalasseva sesānaṃ, pārisuddhiuposatho.

412. Pubbakicce ca karaṇe, pattakalle samānite;  
Suttaṃ uddisati saṅgho, pañcadhā so vibhāvito.

413. Vināntarāyaṃ saṅkhepe-nuddeso vinivārito;  
“Therova issaro dvīsu, uddesvettha tīsu vā;  
Visadesū”ti vuttattā, avattantepi vaṭṭati.

414. Āgaccheyyumaṃ yadi samā, uddisante va thokikā;  
Uddiṭṭhaṃ yaṃ suuddiṭṭhaṃ, sotabbamavasesakaṃ.

415. Uddiṭṭhamatte sakalā-yekaccāyuṭṭhitāya vā;  
Pārisuddhiṃ kareyyesaṃ, santike bahukātha ce;  
Katvā sabbavikappesu, pubbakiccaṃ punuddise.

416. Pannarasovāsikānaṃ, itarānaṃ sacetaro;  
Samānetarenuvattantu, purimānaṃ sacedhikā;  
Purimā anuvattantu, tesāṃ sesepyayaṃ nayo.

417. Pāṭipadovāsikānaṃ, itarānaṃ uposatho;  
Samathokānaṃ sāmaggī, mūlaṭṭhā dentu kāmato.

418. Bahi gantvāna kātabbo, no ce denti uposatho;  
Deyyānicchāya sāmaggī, bahūsu bahi vā vaje.

419. Pāṭipadegantukānaṃ, evameva ayaṃ nayo;  
Sāveyya suttaṃ sañcicca, assāventassa dukkaṭaṃ.

420. Sammajjituṃ padīpetuṃ, paññāpetuṃ dakāsaṃ;  
Na kareyya tathā kallo, mahātherena pesito.

421. Sammajjitvā padīpetvā, paṭṭhapetvā dakāsaṃ. Gaṇaṇattīṃ ṭhapetvevaṃ, kattaṃbo tīhuposatho. “Suṇantu me āyasmantā, ajjuposatho pannaraso, yadāyasmantānaṃ pattakallaṃ, mayaṃ aññaṃaññaṃ pārisuddhiuposathaṃ kareyyāma”ti.

422. Ekamaṃ cīvaraṃ katvā, nisīditvā ukkuṭikaṃ,. Therena añjalīṃ tevamaṃ, paggayha samudīriyā. “Parisuddho ahaṃ āvuso, parisuddhoti maṃ dhārethā”ti, vade yāvataṭīyakaṃ.

423. Samattapubbārambhena, te navenevamīriyā. “Parisuddho ahaṃ bhante, parisuddhoti maṃ



dhārethā’’ti, vade yāvatatīyakam.

**424.** Dvīsu therena kattabbaṃ, katvevamīriyo navo. ‘‘Parisuddho ahaṃ āvuso, parisuddhoti maṃ dhārehī’’ti tikkhattuṃ vattabbo.

**425.** Navena thero tikkhattuṃ, evamassa udīriyo;  
‘‘Parisuddho ahaṃ bhante, parisuddhoti maṃ dhārethā’’ti.

**426.** Pubbakiccaṃ samāpetvā, adhiṭṭheyyevamekako. ‘‘Ajja me uposatho pannarasoti vā cātuddasoti vā adhiṭṭhāmī’’ti vattabbaṃ, no cedhiṭṭheyya dukkaṭaṃ.

**427.** Yattha vasanti cattāro, tayo vā yadī vā duve;  
Pārisuddhiṃ haritvāna, ekekassitarītare;  
Taṃ taṃ uposathaṃ kayiruṃ, siyā āpatti dukkaṭaṃ.

**428.** Vagge samagge vaggoti, saññino vimatissa vā;  
Dukkaṭaṃ karoto bheda-dhippāyena thullaccayaṃ;  
Vagge samaggenāpatti, samaggo iti saññino.

**429.** Ukkhittassa gahaṭṭhassa, sesānaṃ sahadhammināṃ;  
Pārājikassābhābassa, sikkhānikkhittakassa ca.

**430.** Nisinnaparisāyañca, sabhāgāpattiko tathā;  
Chandena parivutthena, pātimokkhaṃ na uddise.

**431.** Adesayitvānāpannaṃ, nāvikatvāna vematiṃ;  
Nuposathepi vā kātuṃ, posatho na ca kappati.

**432.** Aṭṭhitoposathāvāsā, na vaje tadahū vinā;  
Antarāyaṃ va saṅghaṃ vā-dhiṭṭhātuṃ sīmameva vāti.

#### 45. Pavāraṇāniddeso

**Pavāraṇāti –**

**433.** Dvinnaṃ tiṇṇaṃ catunnañca, aññamaññappavāraṇā;  
Ekassa ca adhiṭṭhānaṃ, sesā saṅghappavāraṇā.

**434.** Pubbakicce ca karaṇe, pattakalle samānite;  
Ṭhapetvā ñattiṃ saṅghena, kattabbevaṃ pavāraṇā.

‘‘Suṇātu me bhante saṅgho, ajja pavāraṇā pannarasī, yadī saṅghassa pattakallaṃ, saṅgho pavāreyyā’’ti.

**435.** Ekamaṃ cīvaram katvā, nisīditvā ukkuṭikaṃ;  
Therena añjaliṃ saṅgho, paggayha samudīriyo.

**436.** ‘‘Saṅghaṃ, āvuso, pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmi. Dutiyampi...pe... tatiyampi, āvuso, saṅghaṃ pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmi’’ti.

437. Pavārentesu theresu, nisajjukkuṭikaṃ navo;  
Pavāreti sayama yāva, ukkuṭikova acchatu.

438. Pubbārambhaṃ samāpetvā, navo saṅghamudīraye.

439. “Saṅghaṃ, bhante, pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmi. Dutiyampi...pe... tatiyampi, bhante, saṅghaṃ pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmi”ti.

440. Dānena dhammasākacchā, kalahehi ca rattiyā;  
Tevācīkāya okāse-sati khepitabhāvato;  
Antarāye dasavidhe, ñattiṃ vatvānurūpato.

441. “Suṇātu me bhante saṅgho, manussehi dānaṃ dentehi, dvīhi bhikkhūhi dhammaṃ sākacchantehi, kalahaṃ karontehi yebhuyyena ratti khepitā. Sace saṅgho tevācīkaṃ pavāressati, appavāritova saṅgho bhavissati, athāyaṃ ratti vibhāyissati. Ayaṃ rājantarāyo, ayaṃ corantarāyo, ayaṃ agyantarāyo, ayaṃ udakantarāyo, ayaṃ manussantarāyo, ayaṃ amanussantarāyo, ayaṃ vāḷantarāyo, ayaṃ sarīsapantarāyo, ayaṃ jīvitantarāyo, ayaṃ brahmacariyantārāyo. Sace saṅgho tevācīkaṃ pavāressati, appavāritova saṅgho bhavissati, athāyaṃ brahmacariyantārāyo bhavissati. Yadi saṅghassa pattakallaṃ, saṅgho dvevācīkaṃ, ekavācīkaṃ, samānavassikaṃ pavāreyyā”ti.

442. Pavāreyyānurūpena, yathāṭhapitañattiyā;  
Āgaccheyyumaṃ yadi samā, ādikā cettha āhare.

443. Evaṃ ticatuvaggo ca, ñattiṃ vatvā pavāraye. “Suṇantu me āyasmantā, ajja pavāraṇā pannarasī, yadāyasmantaṇaṃ pattakallaṃ, mayaṃ aññaṃaññaṃ pavāreyyāma”ti.

444. Ekaṃsaṃ cīvamaṃ katvā, nisīditvā ukkuṭikaṃ;  
Therena añjaliṃ tevaṃ, paggayha samudīriyā.

445. “Ahaṃ, āvuso, āyasmante pavāremi diṭṭhena vā sutena vā parisāṅkāya vā, vadantu maṃ āyasmantā anukampaṃ upādāya, passanto paṭikarissāmi. Dutiyampi...pe... tatiyampi ahaṃ, āvuso, āyasmante pavāremi diṭṭhena vā sutena vā parisāṅkāya vā, vadantu maṃ āyasmantā anukampaṃ upādāya, passanto paṭikarissāmi”ti.

Navenāpi “ahaṃ, bhante, āyasmante pavāremi diṭṭhena vā sutena vā parisāṅkāya vā, vadantu maṃ āyasmantā anukampaṃ upādāya, passanto paṭikarissāmi. Dutiyampi...pe... tatiyampi ahaṃ, bhante, āyasmante pavāremi diṭṭhena vā sutena vā parisāṅkāya vā, vadantu maṃ āyasmantā anukampaṃ upādāya, passanto paṭikarissāmi”ti.

446. Dvīsu therena kattabbaṃ, navo katvevamīriyo.

447. “Ahaṃ, āvuso, āyasmantaṃ pavāremi diṭṭhena vā sutena vā parisāṅkāya vā, vadatu maṃ āyasmā anukampaṃ upādāya, passanto paṭikarissāmi. Dutiyampi...pe... tatiyampi ahaṃ, āvuso, āyasmantaṃ pavāremi diṭṭhena vā sutena vā parisāṅkāya vā, vadatu maṃ āyasmā anukampaṃ upādāya, passanto paṭikarissāmi”ti.

Navenāpi “ahaṃ, bhante, āyasmantaṃ pavāremi diṭṭhena vā sutena vā parisāṅkāya vā, vadatu maṃ āyasmā anukampaṃ upādāya, passanto paṭikarissāmi. Dutiyampi...pe... tatiyampi ahaṃ, bhante, āyasmantaṃ pavāremi diṭṭhena vā sutena vā parisāṅkāya vā, vadatu maṃ āyasmā anukampaṃ upādāya,

passanto paṭikarissāmī’'ti.

448. Pubbakiccaṃ samāpetvā, adhiṭṭheyyevamekako. “Ajjā me pavāraṇā cātuddasīti vā pannarasīti vā adhiṭṭhāmī’'ti vattabbaṃ.

449. Yasmim̐ vasanti vā pañca, cattāro vā tayo duve;  
Pavāraṇaṃ haritvāna, ekekassitarītare.

450. Taṃ taṃ pavāraṇaṃ kayirum̐,  
Siyā āpatti dukkaṭaṃ;  
Sesā uposathe vuttā,  
Gāthāyo cettha āhare.

451. Pavāriteva saṅghamhi, pārisuddhiuposathaṃ;  
Kareyya chinnavasso vā, avuttho vānupagato.

452. Cātumāsiniyā cāpi, kate saṅghenuposathe;  
Vutthavassā pavāreyyum̐, sace appatarā siyunti.

#### 46. Saṃvaraniddeso

**Saṃvaroti** –

453. Cakkhusotādibhedehi, rūpasaddādigocare;  
Abhijjhādomanassādi-ppavattiṃ vinivāraye.

454. Niggaṇheyya sakaṃ cittaṃ, kiṭṭhādiṃ viya duppasum̐;  
Satimā sampajāno ca, care sabbiriyāpatheti.

#### 47. Suddhiniddeso

**Suddhīti** –

455. Desanā saṃvaro eṭṭhipaccavekkhaṇa bhedato;  
Suddhī catubbidhā pātimokkhasaṃvarasammatam̐;  
Desanāya visuddhattā, **desanāsuddhi** vuccati.

456. “Na punevaṃ karissa’'nti, cittādhiṭṭhānasamvarā;  
Vutto **saṃvarasuddhīti**, sujjhātindriyasamvarō.

457. Pahāyānesanaṃ dhammenuppādentassa eṭṭhiyā;  
Suddhattā **eṭṭhisuddhīti**, vuttamājīvanissitaṃ.

458. Yoniso paṭisaṅkhāya, cīvaraṃ paṭisevati;  
Evamādiyathāvutta-paccavekkhaṇasujjhanā;  
**Paccavekkhaṇasuddhīti**, vuttaṃ paccayanissitanti.

#### 48. Santosaniddeso

**Santosoti** –

459. Appena anavajjena, santuṭṭho sulabhena ca;  
Mattaññū subharo hutvā, care saddhammagāraṇavo.
460. Atītaṃ nānusocanto, nappajappamanāgataṃ;  
Paccuppanna yāpento, **santuṭṭhoti** pavuccatīti.

#### 49. Caturārakkhaniddeso

##### Caturakkhāti –

461. Buddhānussati mettā ca, asubhaṃ maraṇassati;  
Ārakattādinārahaṃ, sammā sāmañca buddhato.
462. Sammāsambuddhāiti vānussati yā punappunaṃ;  
Navabhede bhagavato, **buddhānussati** sā guṇe.
463. Sīmaṭṭhasaṅge sīmaṭṭhadevatāsu ca issare;  
Jane gocaraḡāmamhi, tatthupādāya mānuse.
464. Sabbasattesu sukhitā, hontāverātiādinā;  
Paricchijja paricchijja, bhāvanā **mettabhāvanā**.
465. Vaṇṇasaṅṭhānaokāsa-disato paricchedato;  
Vavatthapetvā kesādi-koṭṭhāse anupubbato.
466. Nātisīghaṇca saṅikaṃ, vikkhepaṃ paṭibāhayaṃ;  
Paṇṇattiṃ samatikkamma, muñcantassānupubbato.
467. Vaṇṇaāsayaṅṭhāna-gandhokāsehi bhāvanā;  
Paṭikkūlāti koṭṭhāse, uddhumātādivatthusu;  
Gahetvā asubhākāraṃ, pavattā bhāvanāsubhaṃ.
468. “Maraṇaṃ me bhavissati, jīvitaṃ ucchijjissati;  
Maraṇaṃ maraṇaṃ vā”ti, bhāvayitvāna yoniso.
469. Vadhakassevupaṭṭhānā, sampattīnaṃ vipattito;  
Upasaṃharato kāyabahuśādhāraṇā tathā.
470. Āyudubbalato kālavavatthānassabhāvato;  
Addhānassa paricchedā, bhāvanā **marāṇassatīti**.

#### 50. Vipassanāniddeso

##### Vipassanāti –

471. Nāmarūpaṃ pariggayha, tato tassa ca paccayaṃ;  
Hutvā abhāvato**niccā**, udayabbayapīlanā.
472. **Dukkha** avasavattittā, **anattāti** tilakkhaṇaṃ;  
Āropetvāna saṅkhāre, sammasanto punappunaṃ;  
Pāpuṇeyyānupubbena, sabbasaṃyojanakkhayanti.

## Nigamanakathā

473. Adhisīlādhicittānaṃ, adhipaññāya sikkhanā;  
Bhikkhukiccamato khuddasikkhāyaṃ samudāhaṭā.
474. Mahato kittisaddassa, yassa lokavicāriṇo;  
Parissamo na sambhoti, mālutasseva niccaso.
475. Tena **dhammasirīkena**, tambapaṇṇiyaketunā;  
Therena racitā dhammavinayaññūpasasitā.
476. Ettāvatāyaṃ niṭṭhānaṃ, khuddasikkhā upāgatā;  
Pañcamattehi gāthānaṃ, satehi parimāṇatoti.

Khuddasikkhā niṭṭhitā.

Namo tassa bhagavato arahato sammāsambuddhassa

## Khuddasikkhā-purāṇaṭīkā

### Ganthārambhakathā

Yo ciraṃ dīghamaddhānaṃ, viditvā dukkhitāṃ jaṇaṃ;  
Tathāpi nāvabujjhantamanukampāya codito.

Bodhāya paṇidhiṃ katvā, patto sambodhimuttamaṃ;  
Tassa pāde namassitvā, dhammaṃ saṅghaṅca sādhukaṃ.

Pubbācariyapādesu, ṭhapetvā sīsamattano;  
Therena **dhammasirinā**, thirasīlena yā katā.

“Ādito upasampannasikkhitabba”ntiādīnā;  
**Khuddasikkhā** samāseṇa, tassā atthavinicchayaṃ.

Likhissāmi hitatthāya, ādikammikabhikkhunaṃ;  
Tattha yuttaṃ gahetabbamayuttaṃ tujjhitabbakanti;

### Ganthārambhakathāvaṇṇanā

(Ka) etthāha – katamā khuddasikkhā, kathaṃ sikkhitabbā, kasmā sikkhitabbā, ke sikkhanti, ke sikkhitasikkhāti? Vuccate – adhisīlādhicittaadhipaññāvasena tisso sikkhā, ganthavasenettha saṅkhipitvā vuttattā taddīpano gantho “khuddasikkhā”ti vuccati, atha vā “khuddaṃ anelakaṃ madhupaṭala”ntiādīni viya sikkhākāmānaṃ madhuratāya khuddā ca tā sikkhā cāti khuddasikkhā, atha vā “khuddaputtamhi samaṇa posa ma”ntiādīsu viya bahuvidhattāpi khuddā ca tā sikkhitabbato sikkhā cāti khuddasikkhā. Adhisīlasikkhā panettha cārittavārittavasena duvidhampi sīlaṃ yathānusiṭṭhaṃ paṭipajjamānena tappaṭipakkhe kilese tadaṅgappahānavasena pajahantena sikkhitabbā, adhicittasikkhā pana yathāvuttesu ārammaṇesu abhiyogakaraṇavasena jhānapaṭipakkhānaṃ nīvaraṇagaṇānaṃ vikkhambhanappahānaṃ kurumānena sikkhitabbā, adhipaññāsikkhā pana yathānurūpaṃ samucchavedavasena sānusaye kilese samucchindantena sikkhitabbā.

Kasmā sikkhitabbāti ettha –

Jātiādīhi dukkhehi, anekehi upaddutaṃ;  
Khandhalokaṃ jahitvāna, pattuṃ khemaṃ puraṃ sivaṃ.

Kalyāṇaputhujjanena saha satta sekkhā sikkhanti. Arahanto sikkhitasikkhā.

Ye vītamohā munipuṅgavassa;  
Sissesu aggā muninā pasatthā;  
Te tīsu sikkhāsu samattasikkhā;  
Tato pare kena samattasikkhāti.

**Āditoti** ettha ādimhiyevāti attho, ādito paṭṭhāyāti vā. Upasampanna ca upasampannāya ca sikkhitabbaṃ **upasampannasikkhitabbaṃ**. Saha mātikāya **samātikam**. Pubbe vuttappakāraṃ khuddasikkhaṃ pavakkhāmi ādarena, pakārena vā vakkhāmi ratanattayaṃ vanditvāti attho. Apica thero **āditoti** vacanena saddhāpabbajitānaṃ kulaputtānaṃ ālasiyadosena appaṭipajjantānaṃ aññādosena aññathā paṭipajjantānaṃ saṃvegaṃ janeti. Kathaṃ? Atidullabhaṃ khaṇasamavāyaṃ paṭilabhitvā taṅkhaṇaṃ na kusītena vā niratthakakathāpasutena vā vītināmetabbaṃ, kiṃ kātābbaṃ? Ādito paṭṭhāya nirantameva tīsu sikkhāsu ādaro janetabboti. Etthāha – kiṃ taṃ ratanattayaṃ nāma, yaṃ vanditvā thero khuddasikkhaṃ pavakkhatī? Vuccate – buddharatanaṃ dhammaratanaṃ saṅgharatanaṃ imāni tīni ratanāni. Tāni hi ratijanaṇaṭṭhena “ratanāni”ti vuccanti. Apica –

“Cittīkataṃ mahagghaṇca, atulaṃ dullabhadassanaṃ;  
Anomasattaparibhogaṃ, ratanaṃ tena vuccatī”ti. (dī. nī. aṭṭha. 2.33; saṃ. ni. aṭṭha. 3.5.223;  
khu. pā. aṭṭha. 6.3; su. ni. aṭṭha. 1.226; mahāni. aṭṭha. 50; udā. aṭṭha. 45) –

Imissā gāthāya vasena ratanatho veditabbo.

## Mātikāvaṇṇanā

(Kha-ja) idāni “samātika”nti vuttattā mātikam tāva dassetuṃ “**pārājikā ca cattāro**”tiādi āraddhaṃ. Sabbasikkhānaṃ pana mūlabhūtattā adhisīlasikkhāva paṭhamaṃ vuttā. “Sīle patiṭṭhāyā”ti (suṃ. ni. 1.1.23, 192; peṭako. 22; mi. pa. 2.1.9) hi vuttaṃ. Tatrāpi mahāsāvajjattā, mūlacchejjavasena pavattanato ca sabbapaṭhamaṃ jānitabbāti pārājikāva paṭhamaṃ vuttāti. Idāni yathānikkhittāni mātikāpadāni paṭipāṭiyā vitthāretvā dassetuṃ “pārājikā ca cattāro”ti paṭhamapadaṃ uddhaṭṭaṃ, tassāyamattho – **pārājikā**ti parājita parājayamāpannā, sikkhāpadaṃ atikkamitvā teneva āpattiṃ āpajjitvā, tāya vā parājayamāpādītānametaṃ adhivacanaṃ, te pana cattāroti vuttaṃ hoti.

### 1. Pārājikaniddesavaṇṇanā

**1-2.** Idāni te dassetuṃ “**maggattaye**”tiādi āraddhaṃ. Tattha manussāmanussatiracchānagatānaṃ vasena tisso itthiyo, tayo ubhatobyañjanakā, tayo paṇḍakā, tayo purisāti pārājikavatthubhūtānaṃ nimittānaṃ nissayā dvādasamattā honti, tesam vaccamaggappassāvamaggamukhamaggavasena tayo maggā. Tattha manussitthiyā tayo, amanussitthiyā tayo, tiracchānagatitthiyā tayoti nava, tathā manussaubhatobyañjanakādīnaṃ. Manussapaṇḍakādīnaṃ pana vaccamaggamukhamaggavasena dve dve katvā cha, tathā manussapurisādīnanti sabbesaṃ vasena tiṃsa maggā honti. Te sabbe pariggahetvā idha “**maggattaye**”ti vuttaṃ, tasmim maggattayeti attho. **Anikkhittasikkhoti** bhikkhubhāvato cavitukāmatācittena yathālakkaṇaṃ apaccakkhātasikkhoti attho. **Santhathanateti** vatthādīsu yena kenaci santhate vā asanthate vā. **Allokāseti** maggattayassa pakativātena asamphuṭṭhappadesa. **Nimittanti** aṅgajātaṃ. **Samsanthataṃ vā asanthataṃ vāti** attano aṅgajātaṃ vatthādīnaṃ aññātarena paṭicchannaṃ vā appaṭicchannaṃ vā. **Upādiṇṇanti** anaṭṭhakāyappasādaṃ. Vuttappakāre maggattaye pavesanto cuto pārājikoti sambandho. Naṭṭhakāyappasādaṃ pana pīlakaṃ vā cammakhilaṃ vā lomam vā pavesantassa dukkaṭṭaṃ, manussānaṃ pana jīvamānakasarīre akkhināsākaṇṇacchiddavatthikosesu satthakādīhi

katavaṇe vā methunarāgena tilabījamattampi aṅgajātaṃ pavesantassa thullaccayaṃ, avasesasarīresu upakacchakādīsu ca dukkaṭaṃ. Tiracchānagatānaṃ hatthiassagonagadrabhaoṭṭhamahimsādīnaṃ nāsāya thullaccayaṃ, tathā tesam vatthikosesu. Sabbesampi tiracchānagatānaṃ akkhikaṇṇavaṇesu dukkaṭaṃ, tathā tesam avasesasarīresupi.

Idāni pavesanaṃ nāma na kevalaṃ attupakkameneva hoti, bhikkhupaccatthikādīnaṃ pana vasena parūpakkamenāpi hoti, tatthāpi sevanacitte sati pārājiko hotīti dassanattamaṃ “**atha vā**”tiādi vuttaṃ. Tassattho – yo bhikkhu pavesanapaviṭṭhaṭṭhitauddhāraṇakkhaṇesu sādiyati, tasmim̐ khaṇe sevanacittaṃ upaṭṭhapeti, sopi pārājiko hoti. Yo pana bhikkhu sabbaso asādiyanto āsīvisamukkaṃ aṅgarakāsuñca paviṭṭhaṃ viya maññati, so nipparādho hoti. Ettha ṭhitaṃ nāma sukkavissatṭhisamayappavatti.

Paṭhamamaṃ.

**3-4.** Idāni dutiyaṃ dassetaṃ “**ādiyeyyā**”tiādimāha. “**Ādiyeyyā**”tiādīnaṃ padānaṃ “**adinnaṃ** theyyacittena bhava pārājiko”ti iminā sambandho. **Ādiyeyyā**ti āramādim̐ abhiyuñjitvā yo bhikkhu gaṇheyya, so bhava pārājikoti attho. Evaṃ sesesupi. **Hareyyā**ti vetanena vā mittabhāvena vā aññassa bhaṇḍaṃ haranto puna theyyacitte uppanne “sīse bhāraṃ theyyacitto āmasatī”tiādīnaṃ gaṇheyyāti attho. **Avahareyyā**ti “upanikkhittaṃ bhaṇḍaṃ ‘dehi me bhaṇḍa’nti vuccamāno ‘nāhaṃ gaṇhāmī’”tiādīnaṃ avahareyya. **Iriyāpathaṃ kopeyyā**ti “sahabhaṇḍahāraṃ nesaṃ”ti teneva purisena taṃ netuṃ tassa gamanapathaṃ vāretvā aññena maggena taṃ santajjtvā neti, evaṃ nentassa tassa purisassa paṭhamapāde thullaccayaṃ, dutiyapāduddhāre pārājikaṃ. “Thalaṭṭhaṃ bhaṇḍaṃ theyyacitto āmasatī”tiādīnaṃ **ṭhānā cāveyya**. Parikappitaṭṭhānaṃ vā suṅkaghātaṃ vā atikkāmento **saṅketamaṃ vītināmeyya**. Yaṃ kiñci parapariggahitaṃ sassāmikaṃ bhaṇḍaṃ tehi sāmikehi kāyena vā vācāya vā na dinnanti **adinnaṃ**.

Idāni na imināva ākārena avahārako pārājiko hoti, aññathāpi hotīti dassetaṃ “**atha vā**”tiādi vuttaṃ. Theyyāvahārako ca balāvahārako ca kusāvahārako ca paṭicchannāvahārako ca parikappāvahārako ca bhava pārājikoti sambandho. Tattha **theyyāvahāro** nāma sandhicchedādīhi vā kaṃsakūṭamānakūṭatūlakūṭādīhi vā vañcetaṃ gahaṇaṃ. Pasayhāvahāro **balāvahāro**. Kusasaṅkamaṇaṃ katvā parakoṭṭhāsaggahaṇaṃ **kusāvahāro**. Parabhaṇḍaṃ paṃsuādīnaṃ paṭicchādetvā sāmikesu apassitvā gatesu paccāgantvā gahaṇaṃ **paṭicchannāvahāro**. **Parikappāvahāro** pana duvidho bhaṇḍokāsavasena. Tattha “sāṭako ce, gaṇhissāmī, suttañce, na gaṇhissāmī”ti bhaṇḍaṃ parikappetvā andhakāre pasibbakaṃ gaṇhāti. Tattha ce sāṭako hoti, uddhāreyeva pārājikaṃ. Sace suttaṃ hoti, rakkhati, puna “sutta”nti ñatvāpi “yaṃ laddhaṃ, taṃ gahetabba”nti uggaṇhanto uddhāreyeva pārājikaṃ, ayaṃ **bhaṇḍaparikappo**. Okāsaparikappo gabbhadvārappamukhavihārādīnaṃ vasena paricchedaṃ karoti “sace maṃ etthantare passanti, dassāmī, no ce passanti, gaṇhitvā gacchāmī”ti, tassa taṃ parikappitaparicchedaṃ atikkamantassa padavārena pārājikaṃ veditaṃ, ayaṃ **okāsaparikappo**.

Idāni imasmim̐ adinnādāne vinicchayanayaṃ dassetaṃ “**bhaṇḍakālagghadesehī**”tiādi vuttaṃ. **Etthā**ti adinnādāne. **Nicchayoti** vinicchayo kātabboti attho. Tattha kenaci bhikkhunā “mayā idaṃ nāma bhaṇḍaṃ theyyacittena gahita”nti vutte vinayadharena sahasāva taṃ āpattim̐ anāropetvā tassa bhaṇḍassa sāmikaassāmikabhāvaṃ upaparikkhitvā yadi sassāmikaṃ, tassa bhaṇḍassa agghavasena āpattiyā kāretabbo. Sace nirālayakāle gahitaṃ, pārājikena na kāretabbo, ayaṃ bhaṇḍavasena vinicchayo.

**Kāloti** avahārakālo. Tadeva hi bhaṇḍaṃ kadāci mahagghaṃ hoti, kadāci appagghaṃ, tasmā yasmim̐ kāle avahaṭaṃ, tasmim̐ kāle yo tassa aggho, tena agghena āpattiyā kāretabbo, ayaṃ kālavasena vinicchayo.

**Agghoti** bhaṇḍaggho. Navabhaṇḍassa hi yo aggho, so pacchā parihāyati, tasmā sabbadā bhaṇḍaṃ pakatiagghavaseneva na kāretabbaṃ, ayaṃ agghavasena vinicchayo. **Desoti** avahāradeso. Bhaṇḍuṭṭhānadese hi bhaṇḍaṃ appagghaṃ hoti, aññattha mahagghaṃ, tasmā yasmim̐ dese bhaṇḍaṃ

avahaṭaṃ, tasmimyeva dese agghena kāretabbo, ayaṃ desavasena vinicchayo.

Paribhogenapi sātakādikassa bhaṇḍassa aggho parihāyati, tasmā tassa paribhogavasena parihīnāparihīnabhāvo upaparikkhitabbo, ayaṃ paribhogavasena vinicchayo.

Dutiyam.

5. Idāni tatiyaṃ dassetuṃ “**manussaviggaha**”ntiādi āraddhaṃ. Tattha **manussaviggahanti** paṭisandhiviññāṇena saddhiṃ uppannaṃ kalalarūpaṃ ādiṃ katvā pakatiyā vīsativassasatāyukassa sattassa yāva maraṇakālā etthantare anupubbena vuddhippattro attabhāvo, eso manussaviggaho nāma, evarūpaṃ manussaviggahanti attho. **Ciccāti** vadhakacetanāvasena sañcetevā pakappetvā abhivitaritvā vītikkamoti attho. **Jivitā vā viyojeyeti** vuttappakāraṃ manussaviggahaṃ kalalakālepi tāpanamaddanehi vā bhesajjasampadānena vā tato vā uddhampi tadanurūpena upakkamena santativikopanavasena yo jivitā viyojeyya, so cuto bhaveti sambandho. Kiñca bhiiyo – “**satthahāraṇakam vā**”tiādi vuttaṃ. Ettha haratīti hāraṇakam, kiṃ harati? Jīvitam, haritabbanti vā hāraṇakam, upanikkhipitabbanti attho, satthañca taṃ hāraṇakāñcāti **satthahāraṇakam**. **Assāti** manussaviggahassa. Yathā manussaviggaho icchicchitakkhaṇe taṃ asiādīsatthaṃ paṭilabhati, tathā sayam **marañacetano** marañādhippāyo hutvā upanikkhipeyya. Sopi cuto bhaveti attho. Etena thāvarappayogaṃ dasseti.

6-7. Idāni “maraṇavaṇṇaṃ vā saṃvaṇṇeyyā”tiādividhiṃ dassetuṃ “**gāheyya marañūpāyaṃ, vadeyya maraṇe guṇa**”nti vuttaṃ. Tattha “satthaṃ vā āhara, viṣaṃ vā khāda, rajjuyā vā ubbandhitvā kālaṃ karohi”tiādinā nayena marañatthāya upāyaṃ gāheyya. Marañasaṃvaṇṇanā panettha bahuvidhā “kāyena saṃvaṇṇeti, vācāya kāyavācāya dūtena lekhāya vā saṃvaṇṇeti”ti vuttattā. Tattha **kāyena saṃvaṇṇeti** nāma kāyena viññāpeti. “Yo papāte papatanādīni katvā marati, so dhanam vā labhati, yasaṃ vā labhati, saggam vā gacchatī”tiādinā nayena saṃvaṇṇeti, āpatti dukkaṭassa. Tassa vacanaṃ sutvā koci “marissāmi”ti dukkham vedanaṃ uppādeti, thullaccayaṃ. Marati ce, pārājikaṃ. Evaṃ sesesupi. **Dūtena saṃvaṇṇanāyaṃ** pana dūtassa sāsanam ārocāpeti “evaṃ ārocehi”ti, “yo evam marati, so dhanam vā labhatī”ti sabbaṃ purimasadisameva. **Lekhāya saṃvaṇṇeti** nāma giripabbatapurāñādilekham likhati, “yo evam marati”tiādi vuttanayameva. Etthāpi yo marañūpāyaṃ vā gāheyya, maraṇe vā guṇam vadeyya, so cuto bhaveti sambandho.

Idāni pana imassa manussaviggahassa chabbidhe payoge dassetuṃ “**payogā**”tiādi āraddhaṃ. Sāhatthikanissaggikañattikathāvaraiddhimaya vijjāmayānaṃ vasena tassa manussaviggahassa chappayogāti adhippāyo. Tattha **sāhatthikoti** sayam mārentassa kāyena vā kāyappaṭibaddhena vā paharaṇam. **Nissaggikoti** dūre ṭhitaṃ māretukāmassa kāyādīhi ususattiyantapāsāñādīnaṃ nissajjanaṃ. **Āṇattikoti** “asukam nāma mārehi”ti aññaṃ āṇāpentassa āṇāpanam. **Thāvaroti** opātakkaṇaṇam, apassenasaṃvidhānaṃ, asiādīnaṃ upanikkhipanaṃ, taḷākādīsu visasampayojanaṃ, rūpūpahāroti evamādi. Kammavipākajāya iddhiyā payojanaṃ **iddhipayogaṃ**. Māraṇatthāya vijjānaṃ parijappanaṃ **vijjāmayoti**.

Idāni imesu chasu payogesū āṇattiyam saṅketavisāṅketataṃ dassetuṃ “**kālavatthāvudhiriyāpathā**”tiādimāha. Tattha **kāloti** pubbaṇhasāyanhādikālo ca yobbanathāvāriyādikālopi ca. Imesu yaṃ kiñci kālam niyamevā “imasmiṃ nāma kāle mārehi”ti āṇatto sace tasmimyeva kāle māreti, āṇattikkhaṇeyeva pārājikaṃ. Sace niyamitakālato pure vā pacchā vā māreti, āṇāpako muccati. **Vatthūti** māretabbo puggalo. Sace āṇatto tameva māreti, āṇāpakassa āṇattikkhaṇeyeva pārājikaṃ. Atha aññaṃ māreti, āṇāpako muccati. Evaṃ sesesupi vuttanayeneva vinicchayo veditabbo. **Āvudhanti** asiādi. **Iriyāpathoti** māretabbassa gamanaṃ vā nisajjā vāti evamādiko. **Kiriyāvisesoti** vijjhanaṃ vā chedanaṃ vā bhedanaṃ vā sūlāropanaṃ vāti evamādiko. **Okāsoti** gāmo vā vanaṃ vā geḥam vāti evamādiko. Imesu yathā yathā vadhako āṇatto, tathā tathā kate āṇāpakassa āpatti, aññathā kate visāṅketo hoti. **Āṇattiyam** pana ayaṃ viseso “adhiṭṭhāyati adhiṭṭhahitvā āṇāpeti ‘evaṃ vijjha, evaṃ pahara, evaṃ ghātehi’”ti vuttāya pāḷiyā labbhatīti nātabbo.



Tatiyaṃ.

**8-9.** Idāni catutthaṃ dassetuṃ “**jhānādibheda**”ntiādīmāha. Tassattho – “jhānaṃ vimokkho samādhi samāpatti nāṇadassanaṃ maggabhāvanā phalacchikiriyā kilesappahānaṃ vinīvaraṇatā cittassa suññāgāre abhiratī”ti evaṃ vuttaṃ uttarimanussadhammaṃ attani natthitāya nosantaṃ “mayi atthī”ti attani vā taṃ “ahaṃ ettha sandissāmi”ti attānaṃ vā tatha upanetvā dīpento cuto bhava. **Koṭṭhāsaṃ vāti** ettha “jhānalābhī, vimokkhalābhī, samādhilābhī, samāpattilābhīmhi”ti evamādinā nayena koṭṭhāsato vāti attho. **Ekekaṃ vāti** “paṭhamassa jhānassa lābhī, dutiyassa jhānassa lābhīmhi”ti evamādinā nayena ekekaṃ vāti attho. “Atītabhave sotāpannomhi”ti vadato atītabhavaṃ sandhāya kathitattā pārājikaṃ natthi, tasmā “**paccuppannabhavassita**”nti vuttaṃ, tassa paccuppannabhavanissitaṃ katvāti attho. **Aññāpadesarahitanti** “yo te vihāre vasati, so bhikkhu paṭhamassa jhānassa lābhī”tiādīnā nayena aññāpadesaṃ vināti attho. Evaṃ dīpento hi thullaccayamāpajjati. **Dīpentoti** “paṭhamam jhānaṃ samāpajjīṃ, samāpajjāmi, samāpanno, paṭhamassa jhānassa lābhīmhi, vasīmhi, sacchikataṃ assā”ti evamādinā nayena dīpentoti attho. “Adhigato”ti māno adhimāno, so yassa natthi, so **anadhimāniko**. Kena evaṃ dīpentoti ce? Taṃ dassetuṃ “**kāyena vācā**”tiādi vuttaṃ, kāyena vā vācāya vā tadubhayena vāti attho. **Viññattipatheti** yatha ṭhito manussajātiko gahaṭṭho vā pabbajito vā tassa vacanaṃ pakatisotena sutvā samanantarameva “imaṃ nāma esa vadatī”ti jānāti, tatha ṭhatvā dīpento cuto bhava, na devabrahmādīsu aññatarena ñātetī attho.

Catutthaṃ.

**10.** Idāni catunnampi sādharmaṇavinicchayaṃ vattaṃ “**pārājikete cattāro**”tiādīmāha. Tatthāyaṃ saṅkhepo – **cattāropi ete** pārājikā “ekakammaṃ ekuddeso samasikkhatā”ti evaṃ vuttasaṃvāsassa abhabbatāya **asaṃvāsā, yathāpure** pubbe gihikāle ca anupasampannakāle ca asaṃvāsikā, evaṃ pacchā pārājikaṃ āpannāpi asaṃvāsātī. Kiñca bhīyyo – **abhabbā bhikkhubhāvāya** puna tena attabhāvena upasampadāya avatthutāya upasampannā bhavitumpi abhabbātī attho. Kiṃ viyāti ce? **Sisacchinno jīvituṃ**, yathāpi sīsacchinno tena attabhāvena puna jīvituṃ abhabbo, evamime cattārotī adhippāyo.

**11.** Idāni imesu catūsu pārājikesu ye pariyāyāṇattīhi sambhavanti, te dassetuṃ “**pariyāyo cā**”tiādi vuttaṃ. Tatha **pariyāyoti** maraṇādhīppāyassa kāyapayogo vā vacīpayogo vā. Tasmā “yo īdise muhutte satthaṃ vā āharitvā viṣaṃ vā khāditvā sobbhādīsu vā papatitvā marati, so dhanam vā labhati, yasaṃ vā labhatī”tiādīnā nayena maraṇam abhinandanto “idaṃ sutvā yo koci maratū”ti yo pariyāyena vadati, taṃ sutvā sace koci tathā marati, pārājikaṃ. Niyamitena pana yaṃ sandhāya vuttaṃ, tasseva maraṇe pārājikaṃ. **Āṇatti** pana vuttatthāyeva. **Tatiye** manussaviggahapārājike labbhatīti sambandho. **Dutiye pana** adinnādāne āṇatti eva labbhati, na pariyāyoti attho. Kasmā naṃ pariyāyena nāpajjatīti? Yathā manussaviggahe “maraṇavaṇṇam vā saṃvaṇṇeyyā”ti vuttaṃ, tathā idha adinnādāne “vaṇṇam vā saṃvaṇṇeyyā”ti avuttattā. **Sesesūti** paṭhamacatutthesu pariyāyāṇattidvayaṃ na labbhatīti attho.

**12.** Idāni catūsipi yathāsambhavaṃ āngabhedaṃ dassetuṃ “**sevetukāmatācitta**”ntiādi vuttaṃ. Tatha **methunadhammassāti** methunadhammapārājikassa. **Budhāti** vinayadharā.

**13. Manussasanti** manussasantakatā. Etena petatiracchānagatapariggahesu anāpattīti dīpitaṃ hoti. **Tathāsaññīti** manussasantakavasena parapariggahitasaññīti attho. **Vatthuno garutāti** pañcamāsakaṃ vā atirekapañcamāsakaṃ vā tadagghanakaṃ bhaṇḍam vā hotīti attho. **Avahāro cāti** pañcavīsatiyā avahāresu yena kenaci avahāro hotīti attho. **Adinnādānahetuyoti** adinnādānapārājikassa etāni pañca āngānīti adhippāyo.

**14. Pāno mānussakoti** manussajātikapāno. Tasmim pāne **pānasaññitā. Ghātacetanāti** vadhakacetanā. **Payogoti** taṃsamuṭṭhito sāhatthikādīnaṃ channaṃ payogānaṃ aññatarapayogo. **Tena** payogena maraṇam. **Pañcete vadhahetuyoti** manussaviggahapārājikassa pañca āngānīti attho.

**15. Asantatāti** uttarimanussadhammassa attani asantatā cāti attho. **Pāpamicchatāyārocanāti** iminā yo kevalaṃ pāpamicchataṃ vinā mandattā momūhattā bhaṇati, tassa anāpattīti dīpitaṃ hoti. **Tassāti** yassa āroceṭi, tassa manussajātītā ca. “Yo te vihāre vasati, so bhikkhu arahā” tiādīnā (pari. 160, 336) **nāññāpadeso ca. Tadevāti** tadā eva taṅkhaṇeyeva jānaṇaṃ. **Asantadīpaneti** uttarimanussadhammārocanapārājiketī attho.

**16.** Idāni “pārājikā ca cattāro” ti ettha ca-saddena saṅgahitehi saddhiṃ samodhānetvā dassetuṃ “**asādhāraṇā cattāro**” tiādī vuttaṃ. Tattha ubbhajāṇumaṇḍalikā vajjappaṭicchādikā ukkhittānuvattikā atthavattukāti ime cattāro bhikkhunīnaṃ bhikkhūhi asādhāraṇā nāma. Etāsu **ubbhajāṇumaṇḍalikā** nāma yā kāyasamsaggarāgena avassutā teneva rāgena avassutassa manussapurisassa akkhakānaṃ adho, jāṇumaṇḍalānaṃ kapparaṇaṅca upari yena kenaci sarīrāvayavena āmasanādiṃ sādīyati, tassā adhivacanaṃ. Yā pana bhikkhunī aññissā bhikkhuniyā pārājikasaṅkhātāṃ vajjaṃ jānaṃ paṭicchādeti, sā **vajjappaṭicchādikā** nāma. Samaggena pana saṅghena ukkhittaṃ bhikkhuṃ yā bhikkhunī yaṃdiṭṭhiko so hoti, tassā diṭṭhiyā gahaṇavasena anuvattati, sā **ukkhittānuvattikā** nāma. Yā pana kāyasamsaggarāgena tintā tathāvidhasseva purisassa hatthaggaṇaṃ vā saṅghāṭikaṇṇaggaṇaṃ vā sādīyati, kāyasamsaggasaṅkhātassa asaddhammassa paṭisevanatthāya purisassa hatthapāse santiṭṭhati vā, tattha ṭhatvā sallapati vā, saṅketāṃ vā gacchati, purisassa āgamaṇaṃ vā sādīyati, kenaci vā paṭicchannokāsaṃ pavisati, hatthapāse ṭhatvā kāyaṃ upasaṃharati, ayaṃ **atthavattukā** nāmāti veditabbā.

**Abhakkā ekādasāti** ettha paṇḍako theyyasaṃvāsako titthiyapakkantako tiracchānagato mātughātako pitughātako arahantaghātako bhikkhunidūsako saṅghabhedako lohituppādako ubhatobyañjanakoti ime ekādasa abhakkapuggalā nāma. **Vibhantā bhikkhunīti** yadā bhikkhunī vibbhamitukāmā hutvā setavatthaṃ vā kāsāyameva vā gihinivāsanaṅkārena nivāseti, tadā pārājikamāpannā nāma hoti, puna upasampadaṃ na labhati, sā ca pārājikāti attho. **Mudupiṭṭhiko** nāma kataparikkammāya mudukāya piṭṭhiyā samannāgato. So ettāvātā na pārājiko, atha kho yadā anabhiratiyā pīḷito attano aṅgajātaṃ attano mukhamaggavaccamaggesu aññataraṃ paveseti, tadā pārājiko hoti.

**17-18. Lambīti** aṅgajātassa dīghattā evaṃ vutto. Sopi yadā anabhiratiyā pīḷito attano aṅgajātaṃ attano mukhe vā vaccamagge vā paveseti, tadā pārājiko hoti. **Mukhena gaṇhantoti** ettha yo anabhiratiyā pīḷito parassa suttassa vā pamattassa vā aṅgajātaṃ attano mukhena gaṇhāti, so cāti attho. **Tatthevāti** parassa aṅgajātevāti attho. Yo anabhiratiyā pīḷito parassa aṅgajātaṃ kammaniyāṃ disvā attano vaccamaggena tassa upari nisīdati, taṃ attano vaccamaggaṃ paveseti, so cāti attho. Ete cattāro anulomikā methunassāti sambandho. Kathamiti ce? Magge maggappavesanasadisatāya, na ubhinnaṃ rāgavasena sadisabhāvūpagatānaṃ dvayaṃdvayasamāpattisadisatāya. **Idhāgatā cattāroti** methunadhammādivasena pārājikā cattāro cāti evaṃ samodhānato catuvīsati pārājikāti attho.

Etthāha – mātughātakapitughātakaarahantaghātakā tatiyapārājikaṃ āpannā, bhikkhunidūsako lambīdayo cattāro paṭhamapārājikaṃ āpannāyevāti katvā kuto catuvīsati? Adhippāyo panettha atthi, mātughātakādayo hi cattāro idha anupasampannāyeva adhippetā, lambīdayo cattāro kiñcāpi paṭhamapārājikena saṅgahitā, yasmā ekena pariyāyena methunadhammaṃ appaṭisevinopi honti, tasmā visuṃ vuttāti. Pārājikavinicchayo.

Pārājikaniddesavaṇṇanā niṭṭhitā.

## 2. Saṅghādisesaniddesavaṇṇanā

**19.** Idāni saṅghādisesaṃ pakāsetuṃ “**garukā navā**” tiādī āraddhaṃ. **Garukāti** saṅghādisesā idha adhippetā, aññattha pana pārājikāpi saṅgayhanti. Kasmā “terasā” ti avatvā “navā” ti vuttanti ce? Vīṭikkamakkhaṇeyeva āpajjitabbattā paṭhamāpattikā vuttā, yāvattiyakā pana cattāro saṅghādisesā saṅghāyattattā cirena āpajjantīti na vuttā. Tattha **mocetukāmatāti** mocetukāmatāyāti attho

“alajjitā” tiādīsu viya. Iminā pana nayena mocanassādo mucanassādo muttassādo methunassādo phassassādo kaṇḍūvanassādo dassanassādo nisajjanassādo vācassādo gehasitapemaṃ vanabhaṅgiyanti ekādasa assādā vuttā, tesu ekaṃyeva mocanassādaṃ gahevā sesā paṭikkhittā honti.

Tesaṃ assādānaṃ vasena evaṃ vinicchayo veditabbo – mocetuṃ assādo **mocanassādo**. Mocanassādacetanāya nimitte upakkamati, muccati, saṅghādiseso. Na muccati ce, thullaccayaṃ. **Mucanassāde** sace attano dhammatāya mucamānaṃ assādeti, na upakkamati, anāpatti. Sace mucamānaṃ assādento upakkamitvā moceti, saṅghādiseso. Attano dhammatāya mutte assādo **muttassādo**. Etthāpi upakkamassa natthitāya anāpatti. Evaṃ sabbattha. Methunassādena itthiṃ gaṇhantassa muttepi anāpatti, ayaṃ **methunassādo**. **Phassassādo** duvidho ajjhattiko bāhiro cāti. Tattha ajjhattike tāva attano nimittaṃ “thaddhaṃ mudukanti jānissāmī” ti vā lolabhāvena vā kīḷāpayato sace muccati, anāpatti. Bāhiraphassassāde kāyasaṃsaggarāgena mātugāmaṃ phusato ālingato ca mutte anāpatti. **Kaṇḍūvanassāde** daddukacchādīnaṃ vasena khajjamānaṃ nimittaṃ kaṇḍūvanassādena kaṇḍūvato muttepi anāpatti. **Dassanassāde** mātugāmassa anokāsaṃ upanijjhāyato muttepi anāpatti. **Nisajjanassāde** mātugāmena saddhiṃ raho nisinnassa muttepi anāpatti. Vācāya assādo **vācassādo**. Tena assādena mātugāmaṃ methunappaṭisaṃyuttāhi vācāhi obhāsantassa muttepi anāpatti. **Gehasitapeme** mātādīnaṃ mātādīpemaṃ ālinganādiṃ karontassa muttepi anāpatti. **Vanabhaṅge ca** santhavakaraṇatthāya itthiyā pesitaṃ pupphādivanabhaṅgasaññitaṃ paṇṇākāraṃ “itthannāmāya nāma idaṃ me pesita” nti assādena āmasantassa muttepi anāpatti. Etesu pana mocanassādavaseneva upakkamantassa āpatti, sesānaṃ vasena anāpattīti veditabbaṃ.

**Sukkassāti** “nīlaṃ pītakaṃ lohitaṃ odātaṃ takkavaṇṇaṃ dakavaṇṇaṃ telavaṇṇaṃ khīravaṇṇaṃ dadhivaṇṇaṃ sappivaṇṇa” nti (pārā. 237) evaṃ āgatesu dasasu vaṇṇesu yassa kassaci sukkassāti adhippāyo. **Upakkammāti** “ajjhatarūpe moceti, bahiddhārūpe moceti, ajjhatabhahiddhārūpe moceti, ākāse kaṭṭhaṃ kampaṇaṃ moceti” ti (pārā. 237) evaṃ vuttasu catūsu upāyesu aññatarena upāyena “rāgūpatthambhe moceti, vaccūpatthambhe moceti, passāvūpatthambhe moceti, vātūpatthambhe moceti, uccālingapāṇakadaṭṭhūpatthambhe moceti” ti evaṃ vuttasu pañcasu kālesu kismiñci kāle aṅgajāte kammaniyaṃ patte “ārogyatthāya moceti, sukhatthāya moceti, bhesajjathāya, dānatthāya, puññatthāya, yaññatthāya, saggatthāya, bījathāya, vīmaṃsatthāya, davatthāya moceti” ti (pārā. 237) evaṃ vuttasu dasasu adhippāyesu yena kenaci adhippāyena hatthādīsu yena kenaci upakkamitvāti attho. **Vimocayanti** antamaso yaṃ ekā khuddakamakakkhikā piveyya, tattakampi mocentoti attho. **Aññatra supinantenāti** yā supinante sukkavissatthi hoti, taṃ ṭhapetvāti attho. **Samaṇoti** yo koci upasampanno. **Garukanti** saṅghādisesaṃ. **Phuseti** āpajjeyyāti attho.

Sukkavissatthisikkhāpadaṃ paṭhamam.

**20.** Idāni kāyasaṃsaggaṃ dīpetuṃ “**itthisaññī**” tiādī āraddhaṃ. Tattha **itthisaññīti** tadahujātāyapi manussitthiyā itthisaññīyeva hutvāti attho. Sace tattha vematiko vā paṇḍakapurisatiracchānagatasaññī vā hoti, thullaccayaṃ, tathā itthiyā kāyena kāyappaṭibaddhāmasane ca kāyappaṭibaddhena kāyāmasane ca yakkhīpetīpaṇḍakānaṃ kāyena kāyāmasane ca. Purisatiracchānagatitthīnaṃ pana kāyena kāyāmasane pi dukkaṭaṃ, tathā yakkhīādīnaṃ kāyena kāyappaṭibaddhādīsu ca. Matitthiyā pana thullaccayaṃ. **Kāyasaṃsaggarāgavāti** iminā mātupemādiṃ mokkhādhippāyañca paṭikkhipati. **Samphusantoti** kāyasaṃsaggarāgena upakkamma antamaso lomenapi manussitthiṃ samphusantoti atthasambandho. Iminā yo itthiyā ālingatopi kāyena na vāyamati, kevalaṃ phassaṃyeva anubhavati, tassa anāpattīti dīpitaṃ hoti.

Kāyasaṃsaggasikkhāpadaṃ dutiyam.

**21.** Idāni duṭṭhullavācaṃ pakāsetuṃ “**tathā suṇanti**” ntiādī āraddhaṃ. Tattha **tathāti** itthisaññī. Manussitthiṃ suṇantinti sambandho. **Suṇantinti** iminā paṭibalāyapi itthiyā aviññattipathe ṭhitāya dūtena vā paṇṇena vā ārocentassa duṭṭhullavācāpattina hotīti dīpitaṃ hoti. **Viññuñcāti** iminā yā mahallikāpi

bālāpi eḷamūgāpi asaddhammappaṭṭisaṃyuttaṃ katham na jānāti, sā idha nādhippetāti dasseti. Vaccamaggapassāvamaggānaṃ vasena maggaṃ vā methunaṃ vā ārabbhāti sambandho. Duṭṭhullavācāya rāgo duṭṭhullavācārāgo, tena **duṭṭhullavācārāgena**. Taṃ assādentō **obhāsetvā** duruttavacanaṃ vatvā garukaṃ phuseti attho.

Katham dve magge ārabbhā pasamsati garahati? Tattha pasamsāyapi tāva “itthilakkhaṇena subhalakkhaṇena samannāgatāsī”ti vadati, na tāvasīsaṃ eti. “Tava vaccamaggo ca passāvamaggo ca subho susaṅghāno dassanīyo, īdisena nāma itthilakkhaṇena subhalakkhaṇena samannāgatāsī”ti vadati, sīsaṃ eti, saṅghādiseso hotīti attho. Garahaṇe pana “sikharanīsi, sambhinnāsī, ubhatobyañjanāsī”ti imāni tīṇi suddhāniyeva sīsaṃ enti vaccamaggapassāvamaggānaṃ niyatavacanattā accoḷārikattā ca. Aññāni pana “animittāsī, nimittamattāsī”tiādīni maggānaṃ niyatavacanattā methunena ghaṭetvā vuttāni eva sīsaṃ enti. Methunappaṭṭisaṃyutte “dehi me, arahasi me dātu”ntiādīhi pana sīsaṃ na eti, “methunadhammaṃ dehi”tiādīnā methunadhamme ghaṭiteyeva saṅghādiseso. Itthiyā vaccamaggapassāvamagge ṭhapetvā adhakkhakaṃ ubbhajāṇumaṅgalaṃ ādissa vaṇṇādibhaṇane thullaccayaṃ, tathā yakkhīpetīpaṇḍakesu vaccamaggapassāvamagge methunepi. Imesaṃ pana yakkhīādīnaṃ adhakkhakādīke vuttappakāre padese duṃkkaṭaṃ, tathā itthiyādīnaṃ ubbhakkhake adhojāṇumaṅgale kāyappaṭṭibaddhe cāti.

Duṭṭhullavācāsikkhāpadaṃ tatiyaṃ.

**22.** Idāni attakāmapāricariyaṃ dassetuṃ “**vatvā**”tiādi vuttaṃ. Tattha **vatvāti** duṭṭhullobhāsane vuttappakāraṃ itthiṃ itthisaññīyeva hutvā vatvāti attho. **Attakāmupaṭṭhānavaṇṇanti** ettha methunadhammasaṅkhātena kāmena upaṭṭhānaṃ kāmupaṭṭhānaṃ, attano atthāya kāmupaṭṭhānaṃ attakāmupaṭṭhānaṃ, attanā vā kāmītaṃ icchitanti attakāmaṃ, sayam methunarāgavasena patthitanti attho, attakāmañca taṃ upaṭṭhānañcāti attakāmupaṭṭhānaṃ, tassa vaṇṇo attakāmupaṭṭhānavaṇṇo, taṃ attakāmupaṭṭhānavaṇṇaṃ. “Etadaggaṃ, bhagini, pāricariyānaṃ yā mādisaṃ sīlavantaṃ kalyāṇadhammaṃ brahmacāriṃ etena dhammena paricareyyā”ti evaṃ vatvāti sambandho. **Methunarāginoti** iminā gilānapaccayādīhi upaṭṭhānassa vaṇṇaṃ bhaṇato anāpattīti dīpitaṃ hoti. **Vācā methunayuttenāti** ettha methunayutteneva vācāya methunayācane garukaṃ hoti, na aññathāti adhippāyo.

Attakāmapāricariyasikkhāpadaṃ catutthaṃ.

**23.** Idāni sañcarittaṃ dassetuṃ “**paṭiggahetvā**”tiādi āraddhaṃ. Tattha **paṭiggahetvāti** itthiyā vā purisena vā ubhinnaṃ mātādīhi vā “bhante, itthannāmaṃ itthiṃ vā purisaṃ vā evaṃ bhaṇāhi”ti vutto tesam vacanaṃ “sādhū”ti vā “hotū”ti vā “bhaṇāmi”ti vā yena kenaci ākārena vacībhedam katvā, sīsakampanādīhi vā sampaṭicchitvāti attho. **Sandesanti** ettha pana itthī dasavidhā māturakkhitā piturakkhitā mātāpiturakkhitā bhāturakkhitā bhaginirakkhitā ñātirakkhitā gottarakkhitaṃ dhammarakkhitā sārakkhā saparidaṇḍāti. Dasa bhariyāyo dhanakkitā chandavāsiniṃ bhogavāsiniṃ paṭavāsiniṃ odapattakiniṃ obhaṭacumbaṭakā dāsī ca bhariyā ca kammakārī ca bhariyā ca dhajāhaṭā muhuttikā cāti.

Tāsu māturakkhitā bhikkhuṃ paṇiṇati “gaccha, bhante, itthannāmaṃ brūhi ‘homi itthannāmassa bhariyā dhanakkitā...pe... muhuttikā cā’”ti, ayaṃ itthiyā sandeso nāma. Sace māturakkhitāya mātāpitābhātābhaginiādayo bhikkhuṃ paṇiṇanti “gaccha, bhante, itthannāmaṃ brūhi ‘hotu itthannāmassa bhariyā dhanakkitā...pe... muhuttikā cā’”ti, ayampi itthiyā sandesoyeva nāma. Evaṃ piturakkhitādisupī nayo netabbo. Puriso bhikkhuṃ paṇiṇati “gaccha, bhante, itthannāmaṃ māturakkhitāya brūhi...pe... saparidaṇḍam brūhi ‘hotu kira itthannāmassa bhariyā dhanakkitā...pe... muhuttikā cā’”ti, ayaṃ purisassa sandeso nāma. Sace purisassa mātāpitābhātābhaginiādayo bhikkhuṃ paṇiṇanti “gaccha, bhante, itthannāmaṃ māturakkhitāya brūhi...pe... saparidaṇḍam brūhi ‘hotu itthannāmassa bhariyā dhanakkitā...pe... muhuttikā cā’”ti, ayampi purisassa sandesoyeva nāma, añṇapananti attho.

**Vīmaṃsitvā**ti ettha vuttappakārena sāsanaṃ gahetvā tassā itthiyā vā purisassa vā tesam avassārocanakānaṃ mātāpitābhātābhaginiādīnaṃ vā ārocetvāti attho. **Haranti** yattha pahito, tattha gantvā tassā itthiyā vā purisassa vā āroceti, sā itthī vā puriso vā “sādhū”ti sampañcchatu vā, mā vā, lajjāya vā tuṅhī hotu, puna āgantvā tassā itthiyā vā purisassa vā haranto garukaṃ phuseti sambandho. Ettāvata “paṭiggaṇhati vīmaṃsati paccāharatī”ti vuttaṃ aṅgattayaṃ sampāditaṃ hoti. Imāya tivaṅgasampattiyā saṅghādiseso, ito yehi kehici dvīhi aṅgehi thullaccayaṃ, ekena dukkaṭaṃ. Yakkhīpeti paṇḍakesu aṅgattayenapi thullaccayameva, ekena vā dvīhi vā dukkaṭanti.

Sañcarittasikkhāpadaṃ pañcamaṃ.

24. Idāni kuṭikārasikkhāpadaṃ āvi kātuṃ “**saṃyācitaparikkhāra**”ntiādi āraddhaṃ. Tatrāyaṃ saṅkhepattho – “vāsiṃ detha, pharasuṃ dethā”tiādīnaṃ sayam pavattitayācanāya gahitaparikkhāraṃ **saṃyācitaparikkhāraṃ** padabhājane vuttanayena saṅghaṃ tikkhattuṃ yācitvā laddhabhikkhūhi vā saṅgheneva vā tattha gantvā sārambhānārambhasaparikkamanāparikkamanabhāvaṃ ñatvā **adesitavattukam** “kuṭi nāma ullittā vā hoti avalittā vā ullittāvalittā vā”ti (pārā. 349) evaṃ vuttalakkaṇaṃ **kuṭim**. “Tatridaṃ pamāṇaṃ, dīghaso dvādasa vidatthiyo sugatavidatthiyā, tiriyaṃ sattantarā”ti (pārā. 348) evaṃ **vuttapamāṇātikantaṃ**, “mayhaṃ vāsāgāraṃ esā”ti evaṃ attā uddeso etissāti attuddesā, taṃ **attuddesaṃ** katvā **garuṃ** saṅghādisesaṃ phuseti sambandho. Ayaṃ panettha vinicchayo – adesitavattukam pamāṇātikantaṃ kunthakipillikādīnaṃ āsaye katattā sārambhaṃ dvīhi balībaddehi yuttana sakaṭena gantuṃ asakkuṇeyyatāya aparikkamanaṃ ullittādibhedam kuṭim attano vasanattāya karonto vā kārāpento vā “idāni niṭṭhānaṃ gamissatī”ti paṭhamapiṇḍadāne thullaccayaṃ, dutiyapiṇḍadānena lepe ghaṭite dve ca saṅghādisese dve ca dukkaṭāni, sace desitavattukāyeva vā pamāṇātikantāyeva vā hoti, ekaṃ saṅghādisesaṃ dve ca dukkaṭāni āpajjatīti.

Kuṭikārasikkhāpadaṃ chaṭṭhaṃ.

25. Idāni vihārakārasikkhāpadaṃ dassetuṃ “**mahallaka**”ntiādi āraddhaṃ. Tattha **mahallakanti** sassāmikabhāvena saṃyācituṃ mahantabhāvo etassa atthi, yasmā vā vatthuṃ desāpetvā pamāṇātikamenāpi kātuṃ vaṭṭati, tasmā pamāṇamahantatāyapi mahallako, taṃ mahallakaṃ vihāraṃ vā katvāti attho. Ettha pana adesitavattukabhāvena eko saṅghādiseso, sesaṃ anantarasadisameva. Idha ca tattha ca vāsāgāraṃ ṭhapetvā uposathāgāraṃ vā jantāgharaṃ vā aggisālaṃ vā bhavissatīti evamādinā nayena karontassa anāpatti.

Vihārakārasikkhāpadaṃ sattamaṃ.

26. Idāni amūlakasikkhāpadaṃ pakāsetuṃ “**amūlakenā**”ntiādi āraddhaṃ. Tattha **amūlakenā**ti yaṃ codakena cuditakamhi puggale adiṭṭhaṃ asutaṃ aparisaṅkitaṃ, idaṃ etesaṃ dassanasavanaparisaṅkāsaṅkhātānaṃ mūlānaṃ abhāvato amūlakaṃ, tena amūlakena vatthunāti sambandho. Tattha **adiṭṭhaṃ** nāma attano pasādacakkhunā vā dibbacakkhunā vā adiṭṭhaṃ. **Asutaṃ** nāma tatheva kenaci vuccamānaṃ na sutam. **Aparisaṅkitaṃ** nāma cittaṃ aparisaṅkitaṃ, taṃ pana diṭṭhasutamutavasena tividham. Tattha bhikkhuṅca mātugāmaṅca tathārūpe ṭhāne disvā “addhā imehi kata”nti vā “karissanti”ti vā parisaṅkati, idaṃ **diṭṭhaparisaṅkitaṃ** nāma. Andhakāre paṭicchannokāse vā bhikkhussa ca mātugāmassa ca vacanaṃ sutvā dutiyassa atthibhāvaṃ ajānanto pubbe vuttanayena parisaṅkati, idaṃ **sutaparisaṅkitaṃ** nāma. Dhuttehi itthīhi saddhiṃ paccantavihāresu pupphagandhasurādīhi anubhavivā gataṭṭhānaṃ disvā “kena nu kho idaṃ kata”nti vīmaṃsanto tatra kenaci bhikkhunā gandhādīhi pūjā katā hoti, bhesajjattāya aritṭhaṃ vā pītaṃ, so tassa gandham ghāyivā “ayaṃ so bhavissatī”ti parisaṅkati, idaṃ **mutaparisaṅkitaṃ** nāma. Evaṃ tividhāya parisaṅkāya abhāvena aparisaṅkitaṃ attho.

**Codentoti** “pārājikaṃ dhammaṃ āpannosi, assamaṇosi, asakyaputtiosī”tiādīhi vacanehi sayam codentoti attho. Evaṃ codentassa vācāya vācāya saṅghādiseso. **Codāpento vā**ti attanā tassa samīpe

thatvā aññaṃ bhikkhuṃ āṇāpetvā codāpento tassa āṇattassa vācāya vācāya garuṃ phuseti attho. Atha sopi cāvanādhīppāyena “mayāpi diṭṭhaṃ atthi”tiādīnā nayena codeti, dvinnampi vācāya āpatti. **Vatthunā antimena cāti** bhikkhuno anurūpesu ekūnavīsatiyā pārājikesu aññatarenāti attho. **Cāvetunti** brahmacariyā cāvetuṃ, yo suddhaṃ vā asuddhaṃ vā katūpasampadaṃ puggalaṃ suddhadiṭṭhiko samāno cāvanādhīppāyena codeti vā codāpeti vā, tassa saṅghādisesoti adhippāyo. **Suṇamānanti** iminā parammukhā dūtena vā paṇṇena vā codeti. Codentassa na ruhatīti dīpitaṃ hoti. Parammukhā pana sattahi āpattikkhandhehi vadantassa dukkaṭaṃ.

Amūlakasikkhāpadaṃ aṭṭhamaṃ.

27. Idāni aññabhāgiyasikkhāpadaṃ dassetuṃ “**aññassa kiriya**”ntiādīmāha. Tattha **aññassa kiriyanti** aññassa khattiyādiṭṭhikassa pārājikassa vītikkamasāṅkhātaṃ kiriyāṃ disvāti sambandho. **Tena lesenāti** “dasa lesā jātileso nāmaleso gottaleso līngaleso āpattilesso pattalessso cīvaraleso upajjhāyaleso ācariyaleso senāsanalessso”ti (pārā. 394) evaṃ vuttessu dasasu lesesu yo tasmīṃ puggale dissati, tena lesena tadaññaṃ puggalaṃ brahmacariyā cāvetuṃ antimavatthunā codento garukaṃ phuseti attho. Tattha aññampi vatthuṃ lissati silissati vohāramatteneva īsakaṃ allīyatīti lesso, jātiyeva lesso **jātileso**. Esa nayo sesapadesupī. Lesena codento kathaṃ codeti? Añño khattiyajātiko iminā codakena pārājikaṃ dhammaṃ ajjhāpajjanto diṭṭho hoti, so aññaṃ attano verīṃ khattiyajātikaṃ bhikkhuṃ passitvā taṃ khattiyajātillesaṃ gahetvā evaṃ codeti “khattiyo mayā diṭṭho pārājikaṃ dhammaṃ ajjhāpajjanto, tvampi khattiyo pārājikaṃ dhammaṃ āpannosī”ti vā “so tvaṃ khattiyo, nāñño, pārājikaṃ dhammaṃ ajjhāpannosī”ti vā codeti. Evaṃ nāmalesādayopi veditabbā.

Aññabhāgiyasikkhāpadaṃ navamaṃ.

28. Ettāvata “garukā navā”ti uddiṭṭhe vitthārato dassetvā idāni tesu āpannesu paṭipajjanākāraṃ dassetuṃ “**chādeti jānamāpanna**”ntiādi vuttaṃ. Tassāyaṃ piṇḍattho – yo bhikkhu “ayaṃ itthannāmā āpattī”ti āpattivasena vā “idaṃ bhikkhūnaṃ na vaṭṭatī”ti evaṃ vatthivasena vā **jānamāpannaṃ** āpattim yāva **chādeti, tāva tena** bhikkhunā akāmā **parivāso** vasitabboti. **Careyyāti** mānattaṃ samādāya vaseyya. Kittakaṃ divasanti ce? Cha rattiyo. Mānattavāso pana saṅgheyeva, na gaṇe, na puggale, tena vuttaṃ “**saṅghe**”ti. **Parivutthoti** “tayo kho upāli pārivāsikassa bhikkhuno ratticchedā saḥavāso vipavāso anārocanā”ti (cūlava. 83) evaṃ vuttaṃ ratticchedaṃ akatvā parivutthoti attho. Tattha **saḥavāsoti** pakatattena bhikkhunā saddhiṃ ekacchanne udakapātaṭṭhānabbhantare vāso. **Vipavāso** nāma aññaṃ pakatattaṃ bhikkhuṃ vinā vāso. **Anārocanāti** āgantukādīnaṃ anārocanā. Etesu tīsu ekenāpi ratticchedo hoti eva. Ettha pana upacārasīmagatānaṃ ārocetabbāṃ, na bahi ṭhitānaṃ, bahi ṭhitānampi sace saddaṃ suṇāti, passati, dūraṃ vā gantvā ārocetabbameva, anārocentassa ratticchedo ceva vattabhede dukkaṭaṅca hoti. Ajānantasseva upacārasīmaṃ pavisitvā gacchanti ce, ratticchedova hoti, na vattabhedo.

**Ciṇṇamānattanti** “cattāro kho, upāli, mānattacārikassa bhikkhuno ratticchedā saḥavāso vipavāso anārocanā ūne gaṇe caraṇa”nti (cūlava. 92) evaṃ vuttaṃ ratticchedaṃ akatvā ciṇṇamānattaṃ pariniṭṭhitamānattanti attho. Ettha pana saḥavāsādayo parivāse vuttappakārā eva. “Ūne gaṇe caraṇa”nti ettha gaṇo cattāro vā atirekā vā bhikkhū, tasmā sacepi tīhi bhikkhūhi saddhiṃ vasati, ratticchedo hotiyeva, “sace pana tena tesāṃ atthibhāvaṃ disvā ārocite pakkamanti, ūne gaṇe caraṇadoso na hotī”ti (cūlava. aṭṭha. 97) **aṭṭhakathāsu** vuttaṃ kira. **Abbheyyāti** taṃ bhikkhuṃ vīsatiṅgaṇo saṅgho abbheyya sampāciccheyya, abbhānakammavasena osāreyyāti attho. Sace ekenapi ūno vīsatiṅgaṇo bhikkhusaṅgho taṃ bhikkhuṃ abbheyya, so ca bhikkhu na abbhito, te ca bhikkhū gārayhā, dukkaṭaṃ āpajjantīti attho.

29. Idāni yathā chādītā āpatti channā hoti, taṃ pakāraṃ dassetuṃ “**āpatti**”tiādi vuttaṃ. Tatthāyaṃ padayojanā – āpattitā ca anukkhittatā ca anantarāyatā ca pahuttatā ca āpattinukkhittaanantarāyapahuttatāyo, etāsu catūsu tathāsaññitā ca chādetukāmo hutvā chādanā cāti evaṃ dasahaṅgehi aruṇuggamamhi channā hotīti. Ettha pana āpattiādīsu catūsu āpattisaññitā ca

anukkhittasaññitā ca anantarāyasaññitā ca pahuttasaññitā cāti evaṃ saññāvasena yojetvā aṭṭhaṅgāni gahetabbāni, **chādetukāmoti** idamekaṃ, **chādanāti** idamekanti evaṃ dasa.

Etesu pana ādito paṭṭhāya ayaṃ vinicchayo – “āpatti ca hoti āpattisaññī cā”ti ettha yaṃ āpanno, sā terasannaṃ aññatarā hoti, sopi ca tattha garukāpattisaññīyeva hutvā jānanto chādeti, channā hoti. Sace tattha anāpattisaññī vā aññāpattisaññī vā vematiko vā hoti, acchannāva hoti. Tividhaṃ pana ukkhepanīyakammaṃ, tena akato anukkhitto. So ce pakatattasaññī hutvā chādeti, channā hoti. Sace apakatattasaññī chādeti, acchannā hoti. Apakatattena pana pakatattasaññināpi apakatattasaññināpi chāditaṃ acchādītameva hotīti. **Anantarāyikoti** yassa dasasu rājacoraaggiudakamanussāmanussavālasarīsapajīvitabrahmacariyantarāyesupi ekopi natthi, so ce anantarāyikasaññī hutvā chādeti, channā hoti. Sace so andhakārabhīruko anantarāye eva vāḷādiantarāyasaññī hutvā chādeti, acchannāva hoti. **Pahūti** yo sakkoti sabhāgabhikkhuno samīpaṃ gantuñceva ārocituñca, so ce pahusaññī hutvā chādeti, channā hoti. Yo pana apahu hutvā pahusaññī, pahu vā apahusaññī hutvā chādeti, acchannāva hotīti.

**Aruṇuggamamhīti** ettha purebhattaṃ vā āpattiṃ āpanno hoti pacchābhattaṃ vā, yāva aruṇaṃ na uggacchati, tāva ārocetabbā. Sace pana aruṇabbhantare satakkhattumpi chādetukāmatā uppajjati, acchannāva hoti. Ārocento pana sabhāgasāṅghādīsesaṃ āpannassa ārocentuṃ na vaṭṭati. Sace āroceti, āpatti pana āvikatā hoti, ārocanapaccayā pana aññaṃ dukkaṭaṃ āpattiṃ āpajjati. Iminā aññaṃpi vatthusabhāgāpattiṃ ārocentuṃ na vaṭṭatīti dīpito hoti. Ārocentena pana “ahaṃ tava santike ekaṃ āpattiṃ āvi karomī”ti vā “ācikkhāmī”ti vā “ārocemī”ti vā “ekaṃ āpattiṃ āpannabhāvaṃ jānāhi”ti vā “ekaṃ garukāpattiṃ āvi karomī”ti vā ādinā nayena vattabbaṃ, ettāvataṃ acchannāva hoti. Sace “lahukāpattiṃ ārocemī”ti vadati, channāva hotīti. Saṅghādīsesavinicchayo.

Saṅghādīsesaniddesavaṇṇanā niṭṭhitā.

### 3. Cīvaraniddesavaṇṇanā

**30.** Evaṃ garuke sikkhitabbākāraṃ dassetvā idāni cīvaresu dassetuṃ “**cīvara**”nti uddhaṭaṃ. Tattha jātito cha cīvarāni (mahāva. 339; pārā. aṭṭha. 2.462-463; kaṅkhā. aṭṭha. kathinasikkhāpadavaṇṇanā), tāni kānīti ce, taṃ dassetuṃ “**khomā**”tiādi āradhamaṃ. Tattha **khomaṃ** nāma khomavākasuttehi kataṃ vatthaṃ. **Sāṇaṃ** nāma sāṇavākehi kataṃ vatthaṃ. **Bhaṅgaṃ** nāma khomasuttādīhi pañcahi missetvā kataṃ vatthaṃ. Pātekkamaṃ vākamayameva vāti vadanti. **Kambalaṃ** nāma manussalomaṃ vāḷalomaṃ ṭhapetvā lomehi vāyitvā kataṃ vatthaṃ. **Chaḷetanīti** cha etāni. Saha anulomehīti **sānulomāni**. Jātito pana kappiyāni cha cīvarānīti vuttaṃ hoti.

**31.** Idāni tesamaṃ anulomāni dassetuṃ “**dukūla**”ntiādi vuttaṃ. Tattha (mahāva. aṭṭha. 305) **dukūlaṃ** sāṇassa anulomaṃ vākamayattā. **Paṭṭuṇṇanti** paṭṭuṇṇadese pāṇakehi sañjātavattaṃ. Somāradese, cīnadese jātaṃ **somāracīnajaṃ** paṭanti sambandho. Imāni tīṇipi koseyyassa anulomāni pāṇakehi katasuttamayattā. **Iddhijanti** ehibhikkhūnaṃ puññiddhiyā nibbattacīvaraṃ. Taṃ pana khomādīnaṃ aññatarāṃ hoti. Kapparukkhehi nibbattaṃ jāliniyā devakaññāya anuruddhattherassa dinnavatthādikaṃ **devadinnamaṃ**. Tampi khomādīhi nibbattavattasadisattā channampi anulomaṃ hotiyeva kappāsikassa vā, iddhijampi tatheva veditabbaṃ. **Tassa tassāti** khomādīkassa. **Anulomikanti** anurūpaṃ.

**32-33.** Evaṃ jātito sānulomāni cha cīvarāni dassetvā idāni tesu adhiṭṭhānādikaṃ vidhānaṃ dassetuṃ “**ticīvara**”ntiādi vuttaṃ. Ettha (kaṅkhā. aṭṭha. kathinasikkhāpadavaṇṇanā; mahāva. 358) dhiṭṭhānato pubbe ticīvaraṃ nāma pātekkamaṃ natthi saṅghāṭīdippahonakassa paccattharaṇādivasenaṃpi adhiṭṭhātuṃ anuññātattā. Tasmā “**ticīvaraṃ adhiṭṭheyya na vikappeyyā**”ti ettha “imaṃ saṅghāṭī”nti evaṃ nāme gahite “adhiṭṭhāna”micceva vattabbaṃ, “vikappemī”ti pana na vattabbanti adhippāyo. Evaṃ sesesupi. Mukhapuñchanañca nisīdanañca **mukhapuñchananisīdanamaṃ**. **Kaṇḍucchādinti**

kaṇḍuppaṭicchādiṃ adhiṭṭheyya, na vikappeyyāti sambandho. **Etthāti** imesu navasu cīvaresu. **Ticīvaranti** ticīvarādhiṭṭhānanayena adhiṭṭhitaticīvaram. **Vinā** aladdhasammutiko bhikkhu avippavāsasammualaddhatṭhāne ekāhampi hatthapāsam vijahitvā na vaseyyāti attho. “Na bhikkhave cātumāsam nisīdanena vippavasitabbaṃ, yo vippavaseyya, āpatti dukkaṭassā”ti **khuddakakkhandhake** (cūlava. 263) vuttattā cātumāsam nisīdanam vinā na vaseyyāti attho.

**34.** Idāni adhiṭṭhānavidhiṃ dassetuṃ “**imaṃ saṅghāṭi**”ntiādi vuttaṃ. Tattha **miccadhiṭṭhayeti** iti adhiṭṭhaye, “imaṃ saṅghāṭiṃ adhiṭṭhāmī”ti evaṃ saṅghāṭiṃ adhiṭṭhayeti attho. **Ahatthapāsametanti** dūre ṭhitam pana ṭhapitokāsam sallakkhetvā sace ekaṃ, “eta”nti, bahūni ce, “etānī”ti vatvā adhiṭṭhayeti atthasambandho. **Sesesupi ayam nayoti** yathā “imaṃ saṅghāṭiṃ adhiṭṭhāmī”ti vuttaṃ, evaṃ “imaṃ uttarāsaṅgam, imaṃ kaṇḍuppaṭicchādiṃ adhiṭṭhāmī”ti evaṃ attano nāmeneva vatvā sammukhāpi parammukhāpi vuttanayena adhiṭṭhātabbanti vuttaṃ hoti.

**35.** Idāni sace pubbe adhiṭṭhitam ticīvaram nisīdanam vassikasāṭikam kaṇḍuppaṭicchādīti imesu chasu cīvaresu aññataram cīvaram atthi, puna tathāvidham cīvaram adhiṭṭhahitvā pariharitum icchantena “dve pana na vaṭṭanti”ti (pārā. aṭṭha. 2.469; kaṅkhā. aṭṭha. kathinasikkhāpadavaṇṇanā) vuttattā pubbe adhiṭṭhitam paccuddharitvā adhiṭṭhātabbanti dassetuṃ “**adhiṭṭhahanto**”tiādi vuttaṃ, tam uttānameva. **Pattādhiṭṭhahane tathāti** “imaṃ pattaṃ, etaṃ patta”nti evaṃ nāmamattameva viseso. Sesam tādīsamevāti attho.

**36. Etaṃ imaṃ va saṅghāṭiṃ samseti** ettha sace antogabbhe vā sāmantavihāre vā hoti, ṭhapitaṭṭhānam sallakkhetvā “etaṃ saṅghāṭiṃ adhiṭṭhāmī”ti vācā bhinditabbā, sace hatthapāse hoti, “imaṃ saṅghāṭi”nti tesam tesam nāmavasena vācā bhinditabbāti attho. Paccuddhārepi eseva nayo. Ettha pana “dve cīvarassa adhiṭṭhānā kāyena vā adhiṭṭheti, vācāya vā adhiṭṭheti”ti (pari. 322) vuttattā saṅghāṭiādikam hatthena gahetvā “imaṃ saṅghāṭiṃ adhiṭṭhāmī”tiādinā nayena cittaena ābhogam katvā kāyavikāram karontena kāyena adhiṭṭhātabbam, yena kenaci sarīravayavena aphasantassa na vaṭṭati. Vācāya adhiṭṭhahantena vacībhedaṃ katvāva adhiṭṭhātabbam. Tathā pattepi. **Vidūti** paṇḍito.

**37-8.** Idāni tesam pamāṇaparicchedam dassetuṃ “**saṅghāṭi pacchimantenā**”tiādi vuttaṃ. Tattha dīghato muṭṭhipaṇcakatō (pārā. aṭṭha. 2.469; kaṅkhā. aṭṭha. kathinasikkhāpadavaṇṇanā) paṭṭhāya “tatridam sugatassa sugatacīvarappamāṇam, dīghaso nava vidatthiyo sugatavidatthiyā, tiriyaṃ cha vidatthiyo”ti (pāci. 548) evaṃ vuttasugatacīvarūnāpi vaṭṭati. Tiriyaṃ pana muṭṭhittikam. Ca-saddena atirekampi vaṭṭatīti attho. Uttarāsaṅgassapi etadeva pamāṇanti tam dassetuṃ “**tathā ekamsikassāpi**”ti vuttaṃ. Antaravāsakassa pana “pārupanepi hi sakkā nābhiṃ paṭicchādetu”nti (pārā. aṭṭha. 2.469) **aṭṭhakathā**vacanato “**dvihattho vā**”ti vuttaṃ.

**39. Nisīdanassa dīghenāti** ettha (pāci. 531 ādayo; pāci. aṭṭha. 531; kaṅkhā. aṭṭha. nisīdanasikkhāpadavaṇṇanā) **nisīdananti** santhatasadisam santharitvā ekasmiṃ ante vuttappamāṇena dvīsu ṭhānesu phāletvā katāhi tīhi dasāhi yuttassa parikkhārasetaṃ nāmaṃ.

**40. Kaṇḍuppaṭicchādi** (pāci. 538; mahāva. 354; pāci. aṭṭha. 537; kaṅkhā. aṭṭha. kaṇḍuppaṭicchādisikkhāpadavaṇṇanā) nāma yassa adhonābhiubbhajāṇumaṇḍalam kaṇḍu vā piḷakā vā assāvo vā thullakacchu vā ābādho, tassa paṭicchādanatthāya anuññātam cīvaram. Gāthāyo suviññeyyāva.

**41. Aḍḍhateyyāvāti** (pāci. 544) ettha tato uddham na vaṭṭatīti attho.

**42. Etthāti** saṅghāṭito paṭṭhāya yāva vassikasāṭikā, tāva dassitacīvaresūti attho. **Taduttarinti** tato tesam cīvarānam vuttappamāṇato uttarim karontassa chedanapācitti hotīti pāṭhaseso, tam atirekam chinditvā puna pācittiyam desetabbanti attho. **Paccattharaṇamukhacoḷāti** ettha “anujānāmi, bhikkhave, yāva mahantaṃ paccattharaṇam ākaṅkhati, tāva mahantaṃ paccattharaṇam kātu”nti (mahāva. 353) vuttattā paccattharaṇassa pamāṇaparicchedo natthi,. Mukhapuñchanacoḷassa pana



ukkaṭṭhavasena vā antimavasena vā pamāṇaparicchedo na vutto, tasmā tampi appamāṇikaṃ. Tena vuttaṃ “**akaṅkhitappamāṇikā**”ti, icchitappamāṇikāti attho. Yāva ekaṃ dhovīyati, tāva aññaṃ paribhogatthāya icchitabbanti dvepi vaṭṭanti.

**43. Na dīpanti** kattha na dīpitaṃ? Aṭṭhakathāsu. Kasmāti ce? “Tena kho pana samayena bhikkhūnaṃ paripuññaṃ hoti ticīvaraṃ, attho ca hoti parissāvanehipi thavikāhipi. Bhagavato etamatthaṃ ārocesuṃ. Anujānāmi, bhikkhave, parikkhāracōḷaka”nti (mahāva. 357) bahūnaṃ pattathavikaparissāvanādīnaṃ saṅgahavasena vuttattā pāṭekkaṃ nidhānamukhanti. Yasmā pana bhagavatā “yaṃ yaṃ labbhati, taṃ taṃ iminā vidhānena adhiṭṭhahitvā puna yena yena parissāvanādīnā attho hoti, taṃ taṃ katvā gaṇhantū”ti anukampāya anuññātaṃ, tasmā vikappanupagapacchimaṭṭhavarappamāṇaṃ thavikampi paṭaparissāvanampi bahūnīpi ekato katvā “imāni cīvarāni parikkhāracōḷāni adhiṭṭhāmi”ti vatvā adhiṭṭhātumpi vaṭṭatiyeva. Tasmā vuttaṃ “**tathā vatvā**”ti, “parikkhāracōḷa”nti vatvāti attho. **Vikappiyanti** vikappanupagaṃ.

**44. Ahatakappānanti** (mahāva. 348) ekavāraṃ dhovitaḷkānaṃ.

**45. Utuddhaṭānanti** ututo dīghakālato uddhaṭānaṃ, katavatthakiccānaṃ pilotikānanti vuttaṃ hoti. **Sesāti** uttarāsaṅgaantaravāsakā. Paṃsu viya kucchitabhāvaṃ paṭikkūlabhāvaṃ ulati gacchatīti paṃsukūlaṃ, cōḷakhaṇḍānametaṃ nāmaṃ, tasmīṃ **paṃsukūle** yathārucīti attho. Kasmāti ce? “Anujānāmi, bhikkhave, ahataṇaṃ dussānaṃ ahatakappānaṃ diguṇaṃ saṅghāṭiṃ ekacciyāṃ uttarāsaṅgaṃ ekacciyāṃ antaravāsakaṃ, utuddhaṭānaṃ dussānaṃ catugguṇaṃ saṅghāṭiṃ diguṇaṃ uttarāsaṅgaṃ diguṇaṃ antaravāsakaṃ, paṃsukūle yāvadatthaṃ, pāpaṇike ussāho karaṇīyo”ti vuttattā, tasmā susānādīsu patitapaṃsukūle ca antarāpaṇe patitapilotikacīvare ca paṭaparicchedo natthi, paṭasatampi vaṭṭatīti siddhaṃ.

**46.** Idāni “anujānāmi, bhikkhave, chinnakaṃ saṅghāṭiṃ chinnakaṃ uttarāsaṅgaṃ chinnakaṃ antaravāsaka”nti (mahāva. 345) vatvā puna “tena kho pana samayena aññatarassa bhikkhuno ticīvare kayiramāṇe sabbaṃ chinnakaṃ nappahoti. Bhagavato etamatthaṃ ārocesuṃ. Anujānāmi, bhikkhave, dve chinnakāni ekaṃ acchinnakanti. Dve chinnakāni ekaṃ acchinnakaṃ nappahoti. Anujānāmi, bhikkhave, dve acchinnakāni ekaṃ chinnakanti. Ekaṃ chinnakaṃ nappahoti. Anujānāmi, bhikkhave, anvādhikampi āropetuṃ. Na ca, bhikkhave, sabbaṃ acchinnakaṃ dhāretabbaṃ, yo dhāreyya, āpatti dukkaṭassā”ti (mahāva. 360) evaṃ vuttavidhānaṃ dassetuṃ “**tīsū**”tiādi āraddhaṃ. Tassa attho – tīsū cīvaresu yaṃ chinditvā sibbituṃ sabbapacchimappamāṇaṃ pahoti, taṃ chinditabbaṃ. Sabbesu pana appahontesu anvādhikaṃ ādiyeyyāti. Tattha **anvādhi** nāma anuvātaṃ viya saṃharitvā cīvarassa upari saṅghāṭiākārena āropetabbaṃ. Āgantukapattantipi vadanti. Idaṃ pana appahonake anuññātaṃ. Sace pahoti, na vaṭṭanti, chinditabbameva. **Anādiṇṇanti** anāropitaṃ anvādhikaṃ. **Na dhāreyyāti** ticīvarādhiṭṭhānavasena adhiṭṭhahitvā na dhāretabbanti adhippāyo.

**47-8.** Idāni udositasikkhāpadanayaṃ dassetuṃ “**gāme**”tiādi vuttaṃ. Ettha pana sace gāmo (pārā. 478; pārā. aṭṭha. 2.477-478; kaṅkhā. aṭṭha. udositasikkhāpadavaṇṇanā) ekassa rañño vā bhojakassa vā vasena ekakulassa hoti, pākārādīnā parikkhittattā ekūpacāro ca, evarūpe gāme cīvaraṃ nikkhipitvā tasmīṃ gāme yathārucitattāṇe vasituṃ labbhati. Sace so gāmo aparikkhitto, yasmīṃ ghare cīvaraṃ nikkhittaṃ hoti, tasmīṃ ghare vasitabbaṃ, tassa vā gharassa samantato hatthapāsā na vijahitabbaṃ.

Sace so gāmo vesālikusinārādayo viya nānārājūnaṃ vā bhojakānaṃ vā hoti, vuttappakārena parikkhitto ca, evarūpe gāme yasmīṃ ghare cīvaraṃ nikkhittaṃ, tasmīṃ ghare vā vatthabbaṃ. Yassā vīthiyā taṃ gharaṃ hoti, tassā vīthiyā tassa gharassa sammukhāṭṭhāne sabhāye vā nagaradvāre vā vatthabbaṃ, tesam sabhāyadvārānaṃ hatthapāsā vā na vijahitabbaṃ. Sace aparikkhitto, yasmīṃ ghare nikkhittaṃ, tattha vā tassa hatthapāse vā vatthabbaṃ.

Nīvesanādayo hammiyapariyosānā gāmaparikkhepato bahi sanniviṭṭhāti veditabbā. Itarathā tesam

gāmaggaṇeṇeva gahitattā gāmassa ekakulanānākulaekūpacāranānūpacāratāvaseneva vinicchayo vattabbo siyā. Nivesanādīnaṃ vaseneva **pāḷiyam** (pārā. 478 ādayo) attho vibhatto, na gāmasena. Udositavinicchayo ayaṃ nayo vuttoyeva.

**Nivesaneti** ettha sace ekakulassa nivesanaṃ hoti parikkhittaṇca, antonivesane cīvaraṃ nikkhipitvā antonivesane vatthabbaṃ. Aparikkhittaṇce hoti, yasmim̄ gabbhe cīvaraṃ nikkhittaṃ, tasmim̄ vatthabbaṃ, tassa gabbhassa hatthapāsā vā na vijahitabbaṃ. Sace nānākulassa hoti parikkhittaṇca, yasmim̄ gabbhe cīvaraṃ nikkhittaṃ, tasmim̄ gabbhe vatthabbaṃ, sabbesaṃ sādharmaṇadvāramūle vā tesam̄ gabbhadvāramūle vā tesam̄ gabbhadvāramūlānaṃ vā hatthapāsā na vijahitabbaṃ. Aparikkhittaṇce hoti, yasmim̄ gabbhe cīvaraṃ nikkhittaṃ, tasmim̄ gabbhe vatthabbaṃ, hatthapāsā vā na vijahitabbaṃ.

**Udositoti** yānādīnaṃ bhaṇḍānaṃ sālā. **Pāsādoti** dīghapāsādo. **Hammiyanti** muṇḍacchadanapāsādo. **Nāvā** pana thalaṃ āropetvā nikkhittāpi hoti, samudde ʘhitāpi. Sace ekakulassa nāvā hoti, antonāvāya cīvaraṃ nikkhipitvā antonāvāya vatthabbaṃ. Nānākulassa nāvā hoti nānāgabbhā nānāovarakā, yasmim̄ ovarake cīvaraṃ nikkhittaṃ, tasmim̄ vatthabbaṃ, cīvarassa hatthapāsā vā na vijahitabbaṃ.

**Aṭṭoti** paṭirājādīnaṃ paṭibāhanatthaṃ iṭṭhakāhi kato bahalabhittiko catupaṇcabhūmiko patissayaviseso. **Māloti** ekakūṭasaṅgahito caturassapāsādo. Imesu pana udositādīsu mālapariyosānesu nivesane vuttanayeneva vinicchayo veditabbo. Nivesananti pana udositādīnaṃ vasena akatāya patissayavikatiyā adhivacanam̄.

**Ārāmo** nāma pupphārāmaphalārāmādiko. Sace ekakulassa ārāmo hoti parikkhitto ca, antoārāme cīvaraṃ nikkhipitvā antoārāme vatthabbaṃ. Sace aparikkhitto, cīvarassa hatthapāsā na vijahitabbaṃ. Sace nānākulassa ārāmo hoti parikkhitto ca, dvāramūle vā vatthabbaṃ, dvāramūlassa hatthapāsā vā na vijahitabbaṃ. Aparikkhitto ce, cīvarassa hatthapāsā na vijahitabbaṃ.

**Sattho** nāma jaṅghasatthasakaṭasatthānaṃñataro. Sace ekakulassa sattho hoti, satthe cīvaraṃ nikkhipitvā purato vā pacchato vā sattabbhantarā na vijahitabbā, passato abbhantaram̄ na vijahitabbaṃ. **Abbhantaram̄** nāma aṭṭhavīsatihattham̄ hoti. Sace gacchanto sattho sakaṭe vā bhagge, goṇe vā naṭṭhe antarā chijjati, yasmim̄ koṭṭhāse cīvaraṃ nikkhipitabbaṃ, tattha vasitabbaṃ. Sace nānākulassa hoti, satthe cīvaraṃ nikkhipitvā cīvarassa hatthapāsā na vijahitabbaṃ.

**Khettakhalesu** ārāme vuttasadisova vinicchayo. **Dumeti** rukkhāmūle. Sace ekakulassa rukkhāmūlam̄ hoti, yaṃ majjhanhikakāle samantā chāyā pharati, tasmim̄ ʘhāne aviraḷe padese tassa chāyāya phuṭṭhokāsassa anto eva nikkhipitabbaṃ. Sace viraḷasākhassa pana rukkhassa ātapena phuṭṭhokāse ʘhapeti, aruṇuggamane sace so bhikkhu tassa hatthapāse na hoti, aññasmim̄ vā ʘhāne tassa chāyāyapi hoti, nissaggiyaṃ hotiyeva. Nānākulassa ce hoti, cīvarassa hatthapāsā na vijahitabbaṃ.

**Ajjhokāse** pana viṅjhāṭavādīsu araṇṇesupi samuddamajjhe macchabandhānaṃ agamanapathesu dīpakesupi cīvaraṃ ʘhapetvā tato samantā sattabbhantare padese yattha katthaci vasitabbaṃ. Sace sattabbhantarato kesaggamattampi atikkamitvā aruṇam̄ uṭṭhapeti, nissaggiyaṃ hoti.

Ettha pana **pāḷiyam** “gāmo ekūpacāro nānūpacāro” tiādīna (pārā. 477) avisesena mātikaṃ nikkhipitvāpi gāmanivesanaudositakhettadhaññakaraṇaārāmavihārānaṃ ekūpacāranānūpacāratā “gāmo ekūpacāro nāma ekakulassa gāmo hoti parikkhitto ca aparikkhitto cā” tiādīna (pārā. 478) parikkhittāparikkhittavasena vibhattā. Aṭṭamālapāsādahammiyanāvāsatharukkhāmūlaajjhokāsānampi evaṃ avatvā “ekakulassa aṭṭo hoti, nānākulassa aṭṭo hoti” tiādīna (pārā. 484) nayena ekakulanānākulavasena ca ante “ajjhokāso ekūpacāro nāma agāmake araṇṇe samantā sattabbhantarā ekūpacāro, tato paraṃ nānūpacāro” ti (pārā. 494) ca evaṃ ekūpacāranānūpacāratā vibhattā. Tasmā gāmādīsu parikkhittaṃ ekūpacāram̄, aparikkhittaṃ nānūpacāraṇti ca aṭṭādīsu yaṃ ekakulassa, taṃ ekūpacāram̄ nānākulassa nānūpacāraṇti ca gahetabbaṃ. Ajjhokāsapade vuttanayena gahetabbaṃ.

**Bhikkhusammutiyāññatrāti** yaṃ gilānassa bhikkhuno cīvaraṃ ādāya pakkamituṃ asakkontassa ñattidutiyaena kammaṃ avippavāsasammuti dīyati, taṃ ṭhapetvāti attho. Laddhasammutikassa pana yāva rogo na vūpasammati, tasmīṃ vūpasante añño vā kuppati, anāpattiyeva.

**49.** “Anujānāmi, bhikkhave, kaṇḍuppaṭicchādiṃ yāva ābādhā adhiṭṭhātuṃ, tato paraṃ vikappetuṃ. Vassikasāṭhikaṃ vassānaṃ cātumāsāṃ adhiṭṭhātuṃ, tato paraṃ vikappetu’nti (mahāva. 358) vuttattā rogapariyantā kaṇḍuppaṭicchādi, vassānapariyantā vassikasāṭhikāti attho. **Sesāti** ticīvarādayo kālavasena **apariyantikāti** attho.

**50.** Paccattharaṇādittayaṃ sadasampi adasampi rattampi arattampi ādiṇṇakappampi anādiṇṇakappampi labbhatīti attho. **Nisīdananti** nisīdanañca rattamānādiṇṇakappañca labbhatīti adhippāyo. Paccattharaṇaparikkhāramukhapuñchanacoḷāni pana nīlampi pītakampi lohitaṃ pupphadasādikaṃ vaṭṭanti, tasmā “**sadasampi**”tiādi vuttam. Evarūpaṃ pana nivāsetuṃ vā pārūpituṃ vā na vaṭṭati, kevalaṃ paccattharaṇādivasena adhiṭṭhānamattaṃ kātuṃ vaṭṭati.

**51.** Ticīvaraṃ kaṇḍuppaṭicchādi vassikasāṭhikāti idaṃ pana **sesacīvarapañcakaṃ** adasaṃ rajitaṃyeva kappati, tañca ādiṇṇakappamevāti attho. **Sadasaṃva nisīdananti** idaṃ pana pubbe “sadasampi”ti ettha vuttattā adasampi nisīdanaṃ vaṭṭatīti sammohanivāraṇatthaṃ vuttanti vadanti.

**52. Anadhiṭṭhitanti** ticīvarādivasena anadhiṭṭhitam. **Anissaṭṭham** nāma aññesaṃ avissajjitaṃ, taṃ pana vikappetvā paribhuñjitabbanti attho.

Idāni vikappanupagassa pamānaṃ heṭṭhimaparicchena dassetuṃ “**hatthadīgha**”ntiādimāha. Tattha “anujānāmi, bhikkhave, āyāmena aṭṭhaṅgulaṃ sugataṅgulaena caturaṅgulavittathaṃ pacchimaṃ cīvaraṃ vikappetu’nti (mahāva. 358) vuttattā dīghato ekahatthaṃ puthulato upaḍḍhahatthaṃ vikappetabbanti adhippāyo.

**53. Ticīvarassāti** vinayaticīvarassa, na dhutaṅgaticīvarassa. Tassa pana imesu navasu cīvarattayameva labbhati, na aññaṃ labbhati. **Sabbametanti** sabbam adhiṭṭhānavidhānañca pariharaṇavidhānañcāti attho. **Parikkhāraḷoḷiyo sabbanti** ticīvarādikaṃ navavidhampi cīvaraṃ. **Tathā vatvāti** “parikkhāraḷoḷa”nti vatvā. **Adhiṭṭhatīti** adhiṭṭhāti. Kiṃ pana ticīvaraṃ parikkhāraḷoḷam adhiṭṭhātuṃ vaṭṭatīti? Āma vaṭṭati, “parikkhāraḷoḷam nāma pāṭekkaṃ nidhānamukhametanti ticīvaraṃ parikkhāraḷoḷam adhiṭṭhahitvā paribhuñjituṃ vaṭṭati. Udositasikkhāpade pana ticīvaraṃ adhiṭṭhahitvā pariharantassa parihāro vutto”ti **aṭṭhakathāyaṃ** (pārā. aṭṭha. 2.469) vuttam, tasmā ticīvaraṃ parikkhāraḷoḷam adhiṭṭhahantena paccuddharitvā puna adhiṭṭhātabbam.

**54.** Idāni etesaṃ adhiṭṭhānavijahanākāraṃ dassetuṃ “**acchedavissajjanagāhavibbhamā**”tiādi vuttam. Tattha **acchedoti** corādīhi acchindanaṃ. **Vissajjananti** aññesaṃ dānaṃ. Kathaṃ pana dinnam, kathaṃ gahitaṃ sudinnaṃ suggahitañca hotīti? Sace “idaṃ tuyhaṃ demi dadāmi dajjāmi oṇojemi pariccajāmi nissajjāmi vissajjāmi”ti vā “itthannāmassa demi...pe... vissajjāmi”ti vā vadati, sammukhāpi parammukhāpi dinnamyeva hoti. “Tuyhaṃ gaṇhāhi”ti vutte “mayhaṃ gaṇhāmi”ti vadati, sudinnaṃ suggahitañca. “Tava santakaṃ karohi, tava santakaṃ hotu, tava santakaṃ karissatī”ti vutte “mamasantakaṃ karomi, mama santakaṃ hotu, mama santakaṃ karissāmi”ti vadati, duddinnaṃ duggahitañca. Sace pana “tava santakaṃ karohi”ti vutte “sādhu, bhante, mayhaṃ gaṇhāmi”ti gaṇhāti, suggahitaṃ.

**Gāhoti** vissāsaggāho (pārā. aṭṭha. 1.131). So pana evaṃ veditabbo – “anujānāmi, bhikkhave, pañcahaṅgehi samannāgatassa vissāsaṃ gahetuṃ. Sandiṭṭho ca hoti, sambhatto ca, ālapito ca, jīvati ca, jānāti ca ‘gahite me attamaṃ bhavissatī’”ti (mahāva. 356). Tattha **sandiṭṭhoti** diṭṭhamattakamitto. **Sambhattoti** dalhamitto. **Ālapitoti** “mama santakaṃ yaṃ icchasi, taṃ gaṇheyyāsi, āpucchitvā gahaṇe kāraṇaṃ natthi”ti vutto. **Jīvati** anuṭṭhānaseyyāya sayitopi yāva jīvitindriyupacchedaṃ na pāpuṇāti.

**Gahite ca attamanoti** gahite ca tuṭṭhacitto. Evarūpassa santakaṃ “gahite me attamano bhavissatī” ti jānantena gahetuṃ vaṭṭati. Anavasesapariyādānavasena cetāni pañca aṅgāni vuttāni, vissāsaggāho pana tīhi aṅgehi ruhati. Kathaṃ? Sandiṭṭho jīvati gahite attamano, sambhatto jīvati gahite attamano, ālapito jīvati gahite attamanoti evaṃ.

Yo pana jīvati, na ca gahite attamano hoti, tassa santakaṃ vissāsabhāvena gahitampi puna dātabbam. Dadantena matakadhanaṃ tāva ye tassa dhane issarā gahaṭṭhā vā pabbajitā vā, tesam dātabbam. Yo pana paṭhamameva “suṭṭhu kataṃ tayā mama santakaṃ gaṇhantenā” ti vacībhedenā vā cittuppādamattena vā anumoditvā pacchā kenaci kāraṇena kupito, so paccāharāpetuṃ na labhati. Yopi adātukāmo, cittaena pana adhivāseti, na kiñci vadati, so pi puna paccāharāpetuṃ na labhati. Yo pana “mayā tumhākaṃ santakaṃ gahita” nti vā “paribhutta” nti vā vutte nādhivāseti, “paṭidehi” ti bhaṇati, so paccāharāpetuṃ labhati.

**Vibbhamāti** iminā bhikkhuniyāyeva adhiṭṭhānavijhanaṃ gahitaṃ hoti. Sā pana yadā vibbhamati, tadā assamaṇī hoti. Bhikkhu pana vibbhamantopi yāva sikkhaṃ na paccakkhāti, tāva bhikkhuyevāti adhiṭṭhānaṃ na vijahatīti. **Liṅgasikkhāti** liṅgaparivattanañca sikkhāpaccakkhānañcāti attho. **Sabbesūti** navasu cīvaressu. **Adhiṭṭhānaviyogakāraṇāti** adhiṭṭhānavijhanakāraṇā, imesu aññatarena adhiṭṭhānaṃ vijahatīti attho.

Kiñca bhiyyo (pārā. aṭṭha. 2.469) – ticīvarassa pana vinibbiddhachiddaṅca adhiṭṭhānavijhanaṃ karotīti attho. Tattha saṅghātiuttarāsāṅgānaṃ dīghantato vidatthippamāṇassa tiriyaṇtato aṭṭhaṅgulappamāṇassa padesassa orato kaniṭṭhaṅgulinakhapiṭṭhippamāṇakaṃ chiddaṃ adhiṭṭhānaṃ bhindati. Antaravāsakassa dīghantato vidatthippamāṇasseva tiriyaṇtato caturaṅgulappamāṇassa padesassa orato chiddaṃ adhiṭṭhānaṃ bhindati, parato pana na bhindati. Tasmā chidde jāte ticīvaram atirekacīvaram hoti, sūcikkammaṃ katvā puna adhiṭṭhātabbam. Itaresaṃ pana chiddena vijhanaṃ nāma natthi. Yo pana ticīvarepi dubbalatṭhāne paṭhamam aggaḷam datvā pacchā dubbalatṭhānaṃ chinditvā apaneti, adhiṭṭhānaṃ na bhijjati. Maṅḍalaparivattanepi eseva nayo. Yo pana ubho koṭiyo majjhe karonto sace paṭhamam chinditvā pacchā ghaṭeti, adhiṭṭhānaṃ vijahati, atha ghaṭetvā chindati, na vijahati. Rajakehi dhovāpetvā setakaṃ karontassāpi na vijahati eva.

**55.** Idāni akappiyacīvarāni dassetuṃ “**kusavākaphalakānī**” tiādi āradhamaṃ. Tattha **kusacīram** (mahāva. 371; mahāva. aṭṭha. ) nāma kuse ganthetvā katacīvaram. **Vākacīram** nāma tāpasānaṃ vakkalam. **Phalakacīram** nāma phalakāni sibbitvā katacīvaram. **Kesakambalanti** kesehi tantaṃ vāyitvā katakambalam. **Vālakambalanti** camaravālehi vāyitvā katakambalam. **Ulūkapakkhanti** ulūkasakuṇassa pakkhehi katanivāsanaṃ. **Ajinakkhipanti** salomaṃ sakhuraṃ ajinamigacammaṃ. Imesu sattasu vatthesu yaṃ kiñci dhārayato thullaccayanti attho. Yathā imesu thullaccayaṃ, tathā akkanāḷam nivāsentassa. **Akkanāḷam** nāma akkadaṇḍe vākādīhi ganthetvā katacīvaram. “Na bhikkhave akkanāḷam nivāsetabbam, yo nivāseyya, āpatti thullaccayassā” ti (mahāva. 371) hi vuttaṃ.

**56. Kadalerakakkadusse potthake cāpīti** ettha kadalierakaakkamakacivākehi katāni vatthāni evaṃ vuttānīti veditabbāni. Etesu potthakoyeva **pāliyaṃ** āgato, itarāni taggatikattā **aṭṭhakathāsu** paṭikkhittāni. Imesu catūsūpi dukkaṭameva. “Na bhikkhave naggiyaṃ titthiyasamādānaṃ samādiyitabbam, yo samādiyeyya, āpatti thullaccayassā” ti (mahāva. 370) vuttattā naggiyampi na kappati eva. Sabbameva nīlakaṃ **sabbanīlakaṃ**. Evaṃ sesesūpi. Ettha **nīlam** umāpupphavaṇṇam hoti. **Mañjetṭhakaṃ** mañjetṭhakavaṇṇameva. **Pītaṃ** kaṇikārapupphavaṇṇam. **Lohitaṃ** jayasumanapupphavaṇṇam. **Kaṇhakaṃ** addāriṭṭhakavaṇṇam.

**57. Mahāraṅgam** nāma satapadipitṭhivaṇṇam. **Mahānāmaṃ** nāma rattasambhinnavaṇṇam hoti. Padumapupphavaṇṇantipi vuttaṃ, mandarattanti attho. **Tirīṭaketi** rukkhatace. **Acchinnadīghadasaketi** sabbaso acchinnadasake ca majjhe chinnadasake cāti attho. Aññamaññaṃ saṃsibbitvā katadasaṃ **phaladasaṃ** nāma. Ketakapupphādipupphasadisāhi dasāhi yuttaṃ **pupphadasaṃ** nāma. Etesūpi

“potthake cāpī” ti ettha vuttaapi-saddena dukkaṭanti veditabbaṃ. **Tathāti** yathā etesu kadalidussādīsu pupphadasāvasānesu dukkaṭaṃ, tathā kañcukaveṭhanesupi yaṃ kiñci dhārentassa dukkaṭanti attho.

Etesu pana ayaṃ vinicchayo (mahāva. aṭṭha. 372) – sabbanīlakādīni rajanāni vametvā puna rajitvā dhāretabbāni, na sakkā ce vametuṃ, paccattharaṇādīni vā kāretabbāni, tipaṭṭacīvarassa majjhe vā dātabbāni. Acchinnadasakādīni dasā chinditvā dhāretabbāni. Kañcukaṃ vijaṭetvā rajitvā paribhuñjitabbaṃ. Veṭhanepi eseva nayo. Tirīṭakaṃ pādapuñchanāṃ kātappaṃ. **Sabbanti** imaṃ vuttappakāraṃ kusacīrādikaṃ akappiyacīvaraṃ acchinnacīvaro labhatīti attho. Vuttampi cetāṃ **parivāre**.

“Akappakataṃ nāpi rajanāya rattaṃ,  
Tena nivattho yena kāmāṃ vajeyya;  
Na cassa hoti āpatti,  
So ca dhammo sugatena desito;  
Pañhā mesā kusalehi cintitā” ti. (pari. 481);

Ayañhi pañho acchinnacīvarabhikkhuṃ sandhāya vutto, tasmā hi yaṃ kiñci akappiyacīvaraṃ nivāsetvā vā pārūpitvā vā acchinnacīvarakena aññaṃ pariyesitabbaṃ. Ettha pana “idha pana, bhikkhave, manussā nissīmagatānaṃ bhikkhūnaṃ cīvaraṃ denti ‘imaṃ cīvaraṃ itthannāmassa demā’ ti, anujānāmi, bhikkhave, sādituṃ, na tāva taṃ gaṇanūpagaṃ, yāva na hatthaṃ gacchatī” ti (mahāva. 259) vuttatā yāva āharitvā taṃ na dīnaṃ, “tumahākaṃ, bhante, cīvaraṃ uppanna” nti pahīṇitvā vā nārocitaṃ, tāva gaṇanaṃ na upeti, anadhiṭṭhitaṃ vaṭṭati. Pattepi eseva nayo. Ānetvā dinne vā ārocite vā pariḥāro natthi, dasāhaṃ adhiṭṭhātappaṃ. Cīvaravinicchayo.

Cīvaraniddesavaṇṇanā niṭṭhitā.

#### 4. Rajananiddesavaṇṇanā

58. Idāni tesāṃ cīvarānaṃ rajanavidhānaṃ dassetuṃ “**rajanāni cā**” ti vuttaṃ. Tattha “anujānāmi, bhikkhave, cha rajanāni mūlarajanaṃ khandharajanaṃ tacarajanaṃ pattarajanaṃ puppharajanaṃ phalarajana” nti (mahāva. 344) evaṃ bhagavatā anuññātattā “**chappakārāni anuññātāni satthunā**” ti vuttaṃ.

59. Tattha **mūleti** mūlarajaneti attho. Haliddiṃ vivajjiya sabbaṃ labbhanti sambandho. Evaṃ sesesupi. **Tuṅgahārako** nāma eko sakaṇṭakarukkho, tassa haritālavaṇṇaṃ khandharajanaṃ hoti. Gihiparibhuttaṃ pana allipattena ekavāraṃ rajituṃ vaṭṭati. Phalarajane akappiyaṃ nāma natthi, sabbaṃ vaṭṭatīti. Rajanavinicchayo.

Rajananiddesavaṇṇanā niṭṭhitā.

#### 5. Pattaniddesavaṇṇanā

60. Idāni bhājanavikatiṃ dassetuṃ “**patto cā**” ti uddhaṭaṃ. Ettha pana paṭhamagāthā suviññeyyā.

61. Dutiye “magadhanālidvayataṇḍulasādhita” nti vattabbe vibhattilopaṃ akatvā gāthābandhasukhatthaṃ “**magadhe nālidvayataṇḍulasādhita**” nti vuttaṃ, pacitanti attho. Ettha (pārā. 602; pārā. aṭṭha. 2.602; kañkhā. aṭṭha. pattasikkhāpadavaṇṇanā) **magadhanāli** nāma aḍḍhaterasapalaṃ gaṇhāti. **Odananti** ettha sabbappakārasampannaṃ avassāvitodanaṃ gahetabbaṃ. Odanassa catutthabhāgappamānaṃ nātighanaṃ nātitanukaṃ hatthahāriyamuggasūpañca ālopassa ālopassa anurūpaṃ yāva carimakālopappahonakaṃ macchamaṃsādibyañjanañca yo patto gaṇhāti, so ukkaṭṭho

nāmāti attho. Sappitelatakkarasakañjikādīni pana gaṇanūpagāni na honti, tāni hi odanagatikāneva honti, neva hāpetuṃ, na vaḍḍhetuṃ sakkonti. Evametaṃ sabbaṃ pakkhittaṃ sace pattassa heṭṭhimarājisamaṃ tiṭṭhati, suttana vā hīrena vā chindantassa suttassa vā hīrassa vā heṭṭhimantaṃ phusati, ayaṃ **ukkaṭṭho** nāma patto. Sace taṃ rājiṃ atikkamitvā thūpīkataṃ tiṭṭhati, ayaṃ **ukkaṭṭhomako** nāma patto. Sace taṃ rājiṃ na sampāpuṇāti, antogatameva hoti, ayaṃ **ukkaṭṭhukkaṭṭho** nāma patto.

**62.** “Majjhimo nāma patto nālikodanaṃ gaṇhātī”ti vuttatā “**majjhimo tassupaḍḍho vā**”ti vuttaṃ. Etthāpi vuttappakārena majjhimo majjhimomako majjhimukkaṭṭhoti pattattikaṃ veditabbaṃ. “Omako nāma patto patthodanaṃ gaṇhātī”ti (pārā. 602) vacanato “**tatopaḍḍho**”ti vuttaṃ. Magadhanāliyā upaḍḍhanālikodanañca tadūpiyaṃ sūpaṃ byañjanañca gaṇhāti, so **omako** nāma. Idhāpi omako omakomako omakukkaṭṭhoti pattattikaṃ veditabbaṃ. Imesu pana navasu pattesu ukkaṭṭhukkaṭṭho ca omakomako ca apatto. Etesu adhiṭṭhātabbakiccaṃ natthi, sesā satta pattā adhiṭṭhātabbā, vikappetabbā cāti attho.

**63. Atirekapattoti** (pārā. 601) anadhiṭṭhito avikappito. **Sakoti** sasantako. **Kappoti** kappiyo. Ayamevettha saṅkhepo – yo patto kākaṇikamattassāpi mūlassa dātabbassa natthitāya sako. Ayopatto pañcahi pākehi mattikāpatto dvīhi pākehi pakkattā kappo. So dasāhaparamaṃ kālaṃ anadhiṭṭhito avikappito dhāreyyoti.

**64. Acchedādayo** cīvare vuttappabhedāyeva. **Chiddenāti** (pārā. aṭṭha. 2.608; kaṅkhā. aṭṭha. pattasikkhāpadavaṇṇanā) ettha yassa pattassa mukhavaṭṭito heṭṭhā dvaṅgulappadese yena chiddena kaṅgusitthaṃ nikkhamati, tattakena chiddena bhijjati. Tasmim̐ pana ayacuṇṇādīhi paṭipākatike kate dasāhabbhantare puna adhiṭṭhātabbaṃ. **Pattādhiṭṭhānamujjhatīti** patto adhiṭṭhānaṃ ujjhati.

**65.** Idāni parihaṇavidhiṃ dassetuṃ “**pattaṃ na paṭisāmeyya sodaka**”ntiādi āradhamaṃ. Sodakaṃ (cūlava. 254) pattaṃ na paṭisāmeyya, ātape ca sodakaṃ pattaṃ na otapeti adhippāyo. **Na nidaheti** nirudakaṃ katvāpi atikālaṃ na nidaheti adhippāyo. **Bhūmyāti** bhūmiyaṃ. **Na ṭhapeti** taṭṭikācammakhaṇḍādīsu yena kenaci anatthatāya paṃsusakkharamissāya bhūmiyā na ṭhapeyyāti attho. **No ca laggayeti** etthapi nāgadantādīsu (cūlava. 254) yattha katthaci laggantassa dukkaṭameva.

**66. Miḍḍhanteti** (cūlava. 254; cūlava. aṭṭha. 254) miḍḍhapariyante. Sace pana parivattetvā tattheva patiṭṭhāti, evarūpāya vitthiṇṇāya miḍḍhiyā abbhantaraparichede ṭhapetuṃ vaṭṭati, na pariyaṇte. **Paribhaṇḍanteti** bāhirapasse katāya tanukamiḍḍhiyā anteti attho. **Añke vāti** (cūlava. 254) dvinnaṃ ūruṇaṃ majjhe. Ettha pana aṃsabaddhake aṃsakūṭe laggetvā añke ṭhapetuṃ vaṭṭati, na itarathā. **Ātapattaketi** chatte. Ettha bhattapūropi aṃsakūṭe laggitapattopi ṭhapetuṃ na vaṭṭati.

**67. Ucchiṭṭhodakaṃ** (cūlava. 255; cūlava. aṭṭha. 255) nāma mukhavikkhālanodakaṃ, taṃ patte niṭṭhubhitvā pattena na nīhareyyāti attho. Calakañca aṭṭhikañca **calakaṭṭhikaṃ**. Etesu yaṃ kiñci pattena nīharantassa dukkaṭaṃ. Pattaṃ paṭiggahaṃ katvā hatthaṃ dhovitumpi na labhati. Hatthadhovitavattadhovitaudakampi patte ākiritvā nīharituṃ na vaṭṭati. Anucchiṭṭhapattaṃ ucchiṭṭhahatthena gahetumpi na vaṭṭati. Hatthaṃ pana bahi dhovitvā gahetuṃ vaṭṭati. Macchamaṃsaphalāphalādīni khādanto yaṃ mukhena luñcitvā luñcitvā khādanti, taṃ vā tesam̐ aṭṭhiādikaṃ vā mukhato nīhaṭaṃ puna akhādītukāmo chaḍḍetukāmo patte ṭhapetuṃ na labhati. Siṅgiveranāḷikerakhaṇḍādīni khādantehi ḍaṃsitvā ḍaṃsitvā puna ṭhapetuṃ labhati. “Na bhikkhave pattahatthena kavāṭaṃ paṇāmetabbaṃ, yo paṇāmeyya, āpatti dukkaṭassā”ti (cūlava. 255) vuttatā yena kenaci sarīrāvayavena pattaṃ gahetvā ṭhito yena kenaci sarīrāvayavena kavāṭaṃ paṇāmetuṃ na labhati, tasmā “**pattahatthovā**”ti vuttaṃ. Aṃsakūṭe laggitvā ṭhitassa vaṭṭati.

**68. Bhūmiādhāra**keti ettha dantavallivettavākādīhi kate valayādhārake. **Dārudaṇḍādhāre**ti ekadārunā kataādhārake ca bahūhi daṇḍehi kataādhārake cāti attho. Tidaṇḍe na vaṭṭati. Etesu pana

susajjitesu ekam pattaṃ ṭhapetvāva tassupari ekam ṭhapetum vaṭṭati, tayo pana na vaṭṭanti. **Ekam nikkujjivāva bhūmiyanti** ettha bhūmiyaṃ kaṭasārakādīsu aññataraṃ pattharivā tassupari nikkujjivā vā ukkujjivā vā ekam ṭhapeyya, dve ṭhapetum na vaṭṭatīti adhippāyo. Dve pana ṭhapentena upari ṭhapitapattaṃ ekena passena bhūmiyaṃ phusāpetvā ṭhapetum vaṭṭatīti vadanti.

**69-70.** Idāni akappiyapatte dassetuṃ “**dārurūpiyasovaṇṇā**”tiādi āraddhaṃ. Tattha **maṇiveḷuriyāmayāti** (cūlava. 252; cūlava. aṭṭha. 252) **maṇīti** indanīlakabarakatādi. Sace gahaṭṭhā bhattage suvaṇṇarūpiyataṭṭakādīsu sūpabyañjanaṃ katvā upanāmenti, āmasitumpi na vaṭṭati. Ghaṭikaṭāhajā (cūlava. 255; cūlava. aṭṭha. 255) ca tumbakaṭāhajā ca **ghaṭitumbakaṭāhajā**. Ettha **tumbakaṭāhajānāma** alābu. Pattavinicchayo.

Pattaniddesavaṇṇanā niṭṭhitā.

## 6. Thālakaniddesavaṇṇanā

**71-2.** Idāni thālakesu kappiyākappiyavidhiṃ dassetuṃ “**thālakā cā**”ti padaṃ uddhaṭaṃ. Tattha **akappāti** dārumayādayo thālakā akappiyāti attho. Phalikathālakādayo (cūlava. aṭṭha. 252) gihisantakā vā saṅghasantakā vā kappiyā. **Ghaṭitumbakaṭāhajā** (cūlava. 255) tāvakālikā, tāsu bhuñjitvā chaḍḍetabbā, na pariharitabbāti adhippāyo. Thālakavinicchayo.

Thālakaniddesavaṇṇanā niṭṭhitā.

## 7. Pavāraṇāniddesavaṇṇanā

**73.** Idāni pavāraṇāvidhiṃ dassetuṃ “**pavāraṇā**”ti (pāci. 238-239; pāci. aṭṭha. 238-239; kankhā. aṭṭha. paṭhamapavāraṇāsikkhāpadavaṇṇanā) padaṃ uddhaṭaṃ. Tattha **iriyāpathenāti** ṭhānagamasayanānisajjanaṃ aññatarena iriyāpathenāti attho. Tato iriyāpathato aññena iriyāpathena anarittakam paribhuñjeyya ce, pācittiyanti attho. **Pācittinatirittakanti** pācitti anarittakam.

**74.** Idāni yehi aṅgehi pavāraṇā hoti, tāni aṅgāni dassetuṃ “**asana**”ntiādimāha. Tattha **asananti** etena avippakatabhojanatā vuttā, bhuñjamāno ca so puggalo hotīti attho. **Bhojanañcevatī** yaṃ bhuñjanto pavāreti, taṃ odano kummāso sattu maccho maṃsanti imesu aññataraṃ hotīti attho. **Abhihāroti** dāyako tassa taṃ bhattaṃ kāyena abhiharatīti attho, vācābhihāro pana na gahetabbo. **Samīpatāti** dāyako pavāraṇappahonakabhojanaṃ gahetvā aḍḍhateyyahatthappamāṇe okāse hotīti attho. **Kāyavācāpaṭikkhepoti** hatthapāse ṭhitena abhihaṭaṃ bhikkhaṃ kāyena vā vācāya vā paṭikkhipeyyāti attho. Ettha pana sace bhikkhu nisinno hoti, ānisadassa pārimantato paṭṭhāya, sace ṭhito, paṇhiantato paṭṭhāya, sace nipanno, yena passena nipanno, tassa pārimantato paṭṭhāya dāyakassāpi tathāvidhassa ṭhapetvā pasāritahatthaṃ yaṃ tassa āsannataraṃ aṅgaṃ, tassa vasena paricchedo kātabbo. **Pañca aṅgā pavāraṇāti** “**asanaṃ paññāyati, bhojanaṃ paññāyati, hatthapāse ṭhito abhiharati, paṭikkhepo paññāyati**”ti (pāci. 239; pari. 428) **pāliyaṃ** vuttehi imehi pañcahi aṅgehi pavāraṇā hotīti attho.

**75.** Idāni etesu pañcasu bhojanaṃ dassetuṃ “**odano**”tiādi vuttaṃ. Idāni odanādayo imehi nibbattāti dassetuṃ “**sāli**”tiādimāha. Tattha setarattakālabhedā sabbāpi kaṅgujātiyo **kaṅgūti** gahetabbā. Kālasatā **kudrūsavarakā**. Imesaṃ sattannaṃ dhaññānaṃ odano ca bhojjayāgu ca odano nāmāti attho.

**76.** Sāmākāditiṇaṃ (pāci. aṭṭha. 238-239) kudrūsake saṅghaṃ gatanti attho. Varakacorako varake saṅghaṃ gato, sāliyañceva nīvāro saṅghaṃ gato setattāti vadanti. Imesaṃ vuttappakāraṇaṃ sānulomānaṃ sattannaṃ dhaññānaṃ taṇḍule gahetvā “**yāguṃ pacissāmā**”ti vā “**bhattaṃ pacissāmā**”ti vā yaṃ kiñci sandhāya pacanti, sace uṇhaṃ vā sītaṃ vā bhuñjantānaṃ bhojanakāle gahitagahitaṭṭhāne odhi paññāyati, ayaṃ odano nāma, pavāraṇaṃ janeti. Yopi pāyāso vā ambilayāgu vā uddhanato otāritamattā abbhunhā āvijjhitvā pivitum sakkā, gahitokāsepi odhiṃ na dasseti, ayaṃ pavāraṇaṃ na

janeti. Usumāya pana vigatāya ghanabhāvaṃ gacchati, odhi paññāyati, puna pavāraṇaṃ janeti, pubbe tanukabhāvo na rakkhati. Bhatte pana udakakañjikakhīrādīni ākiritvā “yāguṃ gaṇhathā”ti vadanti, kiñcāpi tanukā hoti, pavāraṇaṃ janetiyeva tasmim yāguyā natthibhāvato. Sace pana pakkuthitesu udakādīsū pakkhipitvā pacitvā denti, yāgusaṅgahameva gacchati.

**77. Bhaṭṭhadhaññamayoti** sattavidhānīpi dhaññāni gahetvā kharapākabhajjitānaṃ tesam taṇḍule koṭṭetvā katacuṇṇakuṇḍakāni **sattu** nāma. Samapākabhajjitānaṃ pana ātapasukkhānaṃ vā taṇḍulānaṃ cuṇṇakuṇḍakāni sattusaṅkhyānaṃ na gacchanti. **Yavasambhavoti** aññehi pana muggādīhi **katakummāso** na pavāretīti adhippāyo. **Udakasambhavoti** iminā kakkātakasippikasambukādayopi saṅgahaṃ gacchanti. Sace yāgupānakāle ekasmiṃ bhājane ṭhapetvā macchamaṃsaṃ vā khādanti, te ce akhādanto aññaṃ pavāraṇappahonakaṃ paṭikkhipati, na pavāreti. Khāditepi sace mukhe avasiṭṭhaṃ natthi, tadā paṭikkhipantopi na pavāretiyeva. Sace patte avasiṭṭhaṃ atthi, mukhe natthi, tañce akhādītukāmo hoti, aññattha vā gantvā khādītukāmo, tasmim khaṇe paṭikkhipantopi na pavāretiyeva.

**78. Bhojananti** (pāci. aṭṭha. 238-239) pañcasu bhojanesu yaṃ kiñci bhojanaṃ. Kappiyaṃ vā akappiyaṃ vā bhuñjantoti sambandho. **Nisedhayanti** kāyenābhihaṭaṃ aṅgulicalanādīnā vā bhamukavikārena vā kuddhabhāvena olokena vā paṭikkhipanto kāyena vā “ala”nti vā “na gaṇhāmī”ti vā “mā ākirā”ti vā “apagacchā”ti vā ādinā nayena paṭikkhipanto vācāya vā nisedhayantoti attho. **Kappanti** kappiyabhojanameva paṭikkhipanto so pavāreti, akappiyamaṃsaṃ vā bhojanaṃ vā paṭikkhipanto na pavāreti. Kasmā? Tassa paṭikkhipitabbatṭhāne ṭhitattā. Sace kappiyabhojanaṃ bhuñjamāno akappiyaṃ paṭikkhipati, na pavāreti. Kasmā? Tassa paṭikkhipitabbato. Idāni missakanayaṃ dassetuṃ “**tannāmenā**”tiādi vuttaṃ. Tatrāyaṃ piṇḍattho – tannāmena vā imanti vā abhihaṭaṃ kappiyaṃ nisedhayaṃ pavāreyyāti. Kiṃ vuttaṃ hoti? Yo pana macchamaṃsamissaṃ (kañkhā. aṭṭha. paṭhamapavāraṇāsikkhāpadavaṇṇanā; pāci. aṭṭha. 238-239) yāguṃ byañjanaṃ vā āharitvā “macchaṃ gaṇhatha, maṃsaṃ gaṇhathā”ti vadati, taṃ paṭikkhipato pavāraṇā hoti. Sace “yāguṃ gaṇhatha, rasabyañjanaṃ gaṇhathā”ti vadati, taṃ paṭikkhipato pavāraṇā na hoti. Kasmā? Tassāpi atthitāya. Sace “imaṃ gaṇhathā”ti savatthukaṃ katvā deti, taṃ paṭikkhipato pavāraṇā hoti. Bhattamissakepi eseva nayo. Sace aññassa abhihaṭaṃ paṭikkhipati, pavāraṇā natthiyeva.

**79-80.** Idāni pavāraṇaṃ ajanente dassetuṃ “**lājā**”tiādi vuttaṃ. Ettha **lājā tamsattubhattānīti** (kañkhā. aṭṭha. paṭhamapavāraṇāsikkhāpadavaṇṇanā) lājā ca lājehi katasattubhattāni cāti attho. Macchamaṃsapūvesu pana pavāraṇā hoti, tasmā “**suddhakhajjako**”ti vuttaṃ. **Bhaṭṭhapiṭṭhanti** pubbe āmakāṃ pacchā bhajjitabbanti vuttaṃ hoti. Veḷuādīnaṃ vuttāvasesānaṃ bhattanti sambandho. **Rasayāgu raso** pakkayāgu. Maṃsādīhi amissitā **suddhayāgu**. Puthukāmayāṃ pana yaṃ kiñci pavāraṇaṃ na janeti.

**81. Vuṭṭhāyāti** (pāci. aṭṭha. 238-239) āsanā uṭṭhāya atirittaṃ na kātābanti sambandho. Sace pavāretvā āsanā na vuṭṭhāti bhikkhu, tassāpi atirittaṃ kātuṃ labhati. **Abhuttena ca bhojananti** yena pañcannaṃ bhojanānaṃ aññataraṃ bhojanaṃ antamaso kusaggenāpi na bhuttaṃ, tenāpi atirittaṃ na kātābanti attho. Yena pana aruṇuggamepi bhuttaṃ hoti, so ce apavārito āsanā vuṭṭhitopi majjhanhikasamayepi puna kiñci abhutvāpi kātuṃ labhati. **Yena yaṃ vā pure katanti** yena yaṃ vā pubbe kataṃ, tena tampi pacchā na kātābbaṃ. Aññena pana taṃ kātuṃ vaṭṭatīti vadanti.

**82.** Yaṃ phalaṃ vā kandamūlaṃ vā pañcahi samaṇakappehi katakappiyaṃ aññampi kappiyabhojanaṃ vā kappiyamaṃsaṃ vā, idaṃ kappiyaṃ nāma, vuttappakāraviparītaṃ akappiyaṃ nāma, tasmim atirittakaraṇaṃ na ruhati, yañca paṭiggahetvā na gahitaṃ, tasmimpi na ruhati, tena vuttaṃ “**kappiyaṃ gahitañcevā**”ti. **Uccāritanti** kappiyaṃ kāretuṃ āgatena bhikkhunā īsakampi ukkhittaṃ vā apanamitaṃ vāti attho. Hatthapāsato bahi ṭhitaṃ kātuṃ na vaṭṭati, tena vuttaṃ “**hatthapāsaga**”nti. **Atirittaṃ karontevanti** atirittaṃ karonto “**alametaṃ sabba**”nti vacībhedaṃ katvā **evaṃ bhāsātūti** attho. “Alametaṃ sabba”nti tikkhattuṃ vattābbaṃ, ayaṃ kira āciṇṇo. Vinayadharā kira pana “sakim eva vattābba”nti vadanti. **Alametaṃ sabbanti** idampi vo adhikaṃ, ito aññaṃ na lacchasīti attho.



**83. Anupasampannahatthaganti** kappiyaṃ karontena pana anupasampannassa hatthe ðhitāmyeva na kātabbāṃ, taṃ pana aññena bhikkhunā paṭiggahāpetvā tassa hatthe ðhitāṃ atirittāṃ katvā anupasampannassa dātuṃ vaṭṭati. Attanā āgantvā aññassa hatthe ca **pesayitvāpi kāretuṃ labbhateti** attho. **Taṃ** pana atirittakāraṃ ðhapetvā añño **sabbo** pavāritopi appavāritopi **bhuñjituṃ** labhatīti attho. Sace pavārito paribhuñjati, yathā akatena missāṃ na hoti, tathā mukhañca hatthañca suddhaṃ katvā bhuñjitabbāṃ. Gilānassa bhuttāvasesampi tassa “ājja vā sve vā khādissatī”ti āhaṅampi anatirittakataṃ bhuñjituṃ vaṭṭatīti. Pavāraṇāvinicchayo.

Pavāraṇāniddesavaṇṇanā niṭṭhitā.

## 8. Kālikaniddesavaṇṇanā

**84.** Idāni ye te cattāro kālikā muninā vuttā “yāvakālikāṃ yāmakālikāṃ sattāhakālikāṃ yāvajīvika”nti, te dassetuṃ “**kālikā cā**”ti padaṃ uddhaṅgaṃ. Tattha (pāci. 254-256; pāci. aṭṭha. 253-256) katame te kālikāti ce, te dassetuṃ “**yāvakālika**”ntiādimāha. Tesu aruṇuggamanato yāva ðhitamajjhanhikā bhuñjitabbato **yāvakālikāṃ**. Aruṇuggamanato yāva yāmāvasānā pipāsāya sati pipāsacchedanattāṃ pātabbato yāmo kālo assatī **yāmakālikāṃ**. Tena upasametabbe ābādhe sati yāva sattāhā paribhuñjitabbato **sattāhakālikāṃ**. Ābādhe sati yāvajīvaṃ pariharitvā bhuñjitabbato **yāvajīvikaṃ**.

**85.** Tesu yāvakālikāṃ dassetuṃ “**piṭṭhaṃ mūlaṃ phalaṃ khajja**”ntiādimāha. Ettha (pāci. 248-250; pāci. aṭṭha. 248-249) **piṭṭhakhādaniyaṃ** nāma sattannaṃ tāva dhaññānaṃ dhaññānulomānaṃ aparāṇānañca piṭṭhaṃ panasapiṭṭhaṃ labujapiṭṭhaṃ ambāṭakapiṭṭhaṃ sālapiṭṭhaṃ dhotakatālapitiṭṭhaṃ khīravallipiṭṭhañcāti evamādiṇi tesu tesu janapadesu pakatiāhārasena manussānaṃ khādaniyatthañca bhojanīyatthañca pharaṇakāni piṭṭhāni yāvakālikāni. Imināva lakkhaṇena **mūlakhādaniyā**dīsipi yāvakālikalakkhaṇaṃ veditabbāṃ, ativittārahayena saṃkhittaṃ. **Goraso** nāma khīradadhittakkaraso. **Dhaññabhōjananti** sānulomāni sattadhaññāni ca pañcavidhabhōjanañcāti attho. **Yāgusūpappabhutayoti** ettha pabhuti-saddena kandakhādaniyaṃ muḷālakhādaniyaṃ matthakakhādaniyaṃ khandhakhādaniyaṃ tacakhādaniyaṃ pattakhādaniyaṃ pupphakhādaniyaṃ aṭṭhikhādaniyaṃ niyyāsakhādaniyanti imāni saṅgahitānti veditabbāni.

Tatridaṃ mukhamattanidassanaṃ – bhisasaṅkhāto padumapuṇḍarīkakando piṇḍālumasaḷukaādayo vallikando ālūvakando tālakandoti evamādi **kandakhādaniyaṃ**. Padumamuḷālādayo **muḷālakhādaniyaṃ**. Tālahintālakuntālaketanañlikeraṇapūgarukkhakhajjūrādīnaṃ kaḷīrasaṅkhātā matthakā **matthakakhādaniyaṃ**. Ucchukhandho nīluppalarattuppalakumudasogandhikānaṃ pupphadaṇḍakānti evamādi **khandhakhādaniyaṃ**. **Tacakhādaniyaṃ** ucchutaco eva eko yāvakāliko, sopi saraso. Mūlakaṃ khārako caccu tambuko taṇḍuleyyakoti evamādi **pattakhādaniyaṃ**. Mūlakapupphaṃ khārapupphaṃ caccupupphaṃ tambukapupphanti evamādi **pupphakhādaniyaṃ**, asokapupphaṃ pana yāvajīvikaṃ. Labujapanasatṭhiādi **aṭṭhikhādaniyaṃ**. **Niyyāsakhādaniye** yāvakālikāṃ natthi. Ete vuttappakārā yāvakālikā hontīti attho.

**86.** Idāni “anujānāmi, bhikkhave, aṭṭha pānāni ambapānaṃ jambupānaṃ cocapānaṃ mocapānaṃ madhukapānaṃ muddikapānaṃ sālūkapānaṃ phārusakapāna”nti (mahāva. 300) evaṃ vuttaṃ aṭṭhavidhaṃ pānaṃ yāmakālikāṃ nāmāti dassetuṃ “**madhū**”tiādimāha. Tattha (mahāva. aṭṭha. 300) madhujāṃ muddikajāṃ sālūkajāṃ cocajāṃ mocajāṃ ambujāṃ jambujañcāti evamattho gahetabbo. Ettha **madhujāṃ** nāma madhukānaṃ jātirasena kataṃ, taṃ pana udakasambhinnameva vaṭṭati, suddhaṃ na vaṭṭati. **Muddikapānaṃ** nāma muddikā uduke madditvā parissāvetvā gahitaṃ. **Sālūkapānaṃ** nāma rattuppalanīluppālādīnaṃ kiṅjakkharehi kataṃ. Sesāni pākāṇeṃ. Ettha pana sace sayāṃ etāni yāvakālikavatthūni paṭiggahetvā uduke madditvā ātape ādiccapākena pacitvā parissāvetvā pānaṃ karoti, taṃ purebhāttameva kappati. Sace anupasampannena kataṃ labhati, tadahupurebhāttāṃ sāmisaṃpi vaṭṭati, pacchābhāttāṃ nirāmisaparibhogena yāva aruṇuggamanā vaṭṭati. Imāni aṭṭha pānāni

sītānīpi ādiccapākānīpi vaṭṭanti, aggipākāni pana na vaṭṭanti, tasmā “**naggisantatta**”nti vuttaṃ.

87. “Anujānāmi, bhikkhave, sabbaṃ phalarasaṃ ṭhapetvā dhaññaphalarasa”nti (mahāva. 300) vuttattā dhaññaphalaraso pana na vaṭṭati, tena vuttaṃ “**sānulomāni dhaññāni ṭhapetvā**”ti. “Anujānāmi, bhikkhave, sabbaṃ puppharasaṃ ṭhapetvā madhukapuppharasa”nti vuttattā madhukapuppharaso ādiccapāko vā hotu aggipāko vā, pacchābhattaṃ na vaṭṭati, tena vuttaṃ “**madhukapupphamaññatrā**”ti.

88. “Anujānāmi, bhikkhave, sabbaṃ pattarasaṃ ṭhapetvā ḍākarasa”nti vuttattā udakena pakkānampi yāvakālikapattānaṃ raso purebhattameva vaṭṭati, sītodakena madditānaṃ raso yāmakālikam. Tena vuttaṃ “**ṭhapetvā pakkadākaja**”nti. Yāvajīvikapaṇṇassa udakena pakkassa raso yāvajīviko hoti.

89. Idāni sattāhakālike dassetuṃ “**sappi**”tiādīmāha. Ettha (mahāva. 260) pana –

“Sappinonītatelāni, madhuphāṇitameva ca;  
Sattāhakālikā sappi, yesaṃ maṃsamavārita”nti. –

Pāṭho gahetabbo. Evaṃ pana gahite vasā telaggahaṇena gahitāva hoti “telam nāma tilatelam sāsapatelam madhukatelam eraṇḍatelam vasātela”nti (pārā. 623; pāci. 260) evaṃ **pāliyaṃ** vitthāritattā. Evaṃ pana aggahetvā vasā ca “madhuphāṇita”nti pāṭhe gahite yāvakālikabhūtā vasā sattāhakālikāti āpajjeyya, “yāni kho pana tāni gilānānaṃ bhikkhūnaṃ paṭisāyanīyāni bhesajjāni, seyyathidaṃ – sappi navanītaṃ telam madhu phāṇita”nti (pārā. 622) evaṃ pañceva bhagavatā sattāhakālikabhesajjāni anuññātāni, tato uttari chaṭṭhassa sattāhakālikabhesajjassa atthitāpi āpajjati, **bhesajjakkhandahepi** bhagavatā “anujānāmi, bhikkhave, vasāni bhesajjāni acchavasam macchavasam susukāvasam sūkaravasam gadrabhavasam kāle paṭiggahitaṃ kāle nippakkaṃ kāle saṃsaṭṭham telaparibhogena paribhuñjitu”nti (mahāva. 262) evaṃ sattāhakālikavasena vasam ananujānitvā tato nibbattatelameva anuññātaṃ, tasmā “madhuphāṇitameva cā”ti pāṭhe aggahite pāliyā aṭṭhakathāya ca virujjhati. Thereṇa pana uttaravīhāravāsīnaṃ khuddasikkhāya āgatanayena vuttaṃ. Tesam pana –

“Sappi navanītaṃ telam, madhu phāṇitapañcamam;  
Acchamacchavasādi ca, honti sattāhakālikā”nti. –

Evaṃāgataṃ. Ambhākaṃ pana viṣuṃ sattāhakālike āgataṭṭhānaṃ natthīti vadanti, upaparikkhitabbaṃ.

Idāni tesu sappim dassetuṃ “**yesaṃ maṃsapavārita**”nti vuttaṃ. “Sappināma gosappi vā ajikāsappi vā mahim sasappi vā. Yesam maṃsam kappati, tesam sappi, navanītaṃ nāma tesamyeva navanīta”nti (pārā. 623; pāci. 260) **pāliyaṃ** vuttattā navanītaṃ pana gahitanti na vitthāritaṃ, sappi pana purebhattaṃ paṭiggahitaṃ tadahu purebhattaṃ sāmīsampinirāmisampi vaṭṭati. Pacchābhattato paṭṭhāya sattāhaṃ nirāmisam paribhuñjitabbaṃ. Sattāhātikkame sace ekabhājane ṭhapitaṃ, ekaṃ nissaggiyaṃ. Sace bahūsu, vatthugaṇanāya nissaggiyapācittiyāni. Pacchābhattaṃ paṭiggahitaṃ sattāhaṃ nirāmisameva vaṭṭati. Sappi tāpentassa sāmāpāko na hoti, “navanītaṃ pana tāpentassa hi sāmāpāko na hoti, sāmāpakkena pana tena saddhim āmisam na vaṭṭati”ti ca “sace anupasampanno purebhattaṃ paṭiggahitanavanītena sappim katvā deti, purebhattaṃ sāmīsam vaṭṭati. Sace sayam karoti, sattāhaṃ nirāmisameva vaṭṭati”ti ca **samantapāsādikāyaṃ** (pārā. aṭṭha. 2.622) navanītamhiyeva sāmāpākatā vuttā, na sappimhi. Yaṃ pana **kaṅkhāvitaraṇiyaṃ** vuttaṃ “nibbattitasappi vā navanītaṃ vā pacituṃ vaṭṭati”ti, “taṃ pana tadahu purebhattampi sāmīsam paribhuñjituṃ na vaṭṭati”ti (kaṅkhā. aṭṭha. bhesajjasikkhāpadavaṇṇanā) ca, tattha yāvakālikavatthunā asammissam sudhotam navanītaṃ sandhāya “pacituṃ vaṭṭati”ti vuttaṃ. Sayampacitasattāhakālikena saddhim yadi āmisam bhuñjati, taṃ āmisam sayampakkasattāhakālikena missitaṃ attano yāvakālikabhāvaṃ sattāhakālikena gaṇhāpeti, tathā ca sati yāvakālikam apakkampi sayampakkabhāvaṃ upagacchatīti “sāmīsam paribhuñjituṃ na vaṭṭati”ti

vuttam. Yathā sayampakkasattāhakālikavasātelam sayambhajjitasāsapādiyāvajīvikavatthūnam telañca sāmisaṃ tadahu purebhattampi na vaṭṭati, tathā navanītasappīti veditabbaṃ. Vakkhati ca ācariyo

“Yāvakālikaādīni, saṃsaṭṭhāni sahattanā. Gāhāpayanti sabbhāva”nti ca,

“Teheva bhikkhunā pakkaṃ, kappate yāvajīvikam;  
Nirāmisāñca sattāham, sāmise sāmāpākatā”ti ca.

Yā pana **samantapāsādikāyaṃ** navanītamhi sāmāpākatā vuttā, sā takkādisammissam adhotanavanītam sandhāya vuttā. Tasmā viññūnam samantapāsādikāpi kañkhāvitaraṇīpi samenti, taṃ navanītam sandhāya vuttanti ācariyā vadanti. Idameva yuttam. Yadi sappimhi sāmāpākatā hoti, avassaṃyeva samantapāsādikāyaṃ vucceyya, tattha pana “sappi tāva purebhattam paṭiggahitam, tadahu purebhattam sāmisaṃpi nirāmisampi paribhuñjitum vaṭṭatī”ti (pārā. aṭṭha. 2.622) hi vuttam, na pacanavidhānam. Manussasappinavanītanam, aññesampi hatthiassādīnam akappiyamaṃsasappinavanītanam sattāhātikkame dukkaṭam. Kiṃ pana taṃ paribhuñjitum vaṭṭatīti? Āma vaṭṭati. Kasmā? Paṭikkhepābhāvā ca sabbaaṭṭhakathāsu anuññātattā ca. “Yesam maṃsam kappati, tesam sappi, navanīta”nti (pārā. 623) idaṃ pana nissaggiyavatthum dassetum vuttam, na aññesam vāraṇatthāya.

**90.** Idāni telam dassetum “**telam tilavaserandaṃmadhusāsapasambhava**”ntiādimāha. Ettha tilādīhi sambhavam nibbattam telanti sambandho. Ettha (pārā. aṭṭha. 1.100) pana purebhattam tile paṭiggahetvā katatelaṃ purebhattam sāmisaṃpi vaṭṭati, pacchābhattato paṭṭhāya savatthukappaṭiggahitattā anajjhoharaṇīyam. Pacchābhattam paṭiggahetvā katatelaṃ anajjhoharaṇīyam, sīsamakhanādīsū upanetabbaṃ. Eraṇḍamadhusāsapaṭṭhīni paṭiggahetvā sace tāni bhajjitvā telam karoti, tadahu purebhattampi sāmisaṃ na vaṭṭati, sāmāpākatā hoti. Sace abhajjitvā karoti, tadahu purebhattam sāmisaṃpi vaṭṭati, pacchābhattato paṭṭhāya nirāmisameva vaṭṭati, paribhuñjitabbavatthūnam yāvajīvikattā savatthukappaṭiggahāṇe doso natthīti. Telaggahaṇatthāya eraṇḍakaṭṭhiādīni paṭiggahetvā sattāham atikkāmayato dukkaṭam. Tathā pāḷiyam anāgatāni adassitāni kosambakakusumbhādīnam telāni.

Idāni madhuvikaṭṭam dassetum “**khuddābhamaramadhukari-makkhikāhi kata**”nti vuttam. Tattha (pārā. aṭṭha. 2.623) **khuddāti** khuddamakkhikā. **Bhamarāti** mahābhamaramakkhikā. Daṇḍakesu madhukarā **madhukarimakkhikā** nāma. Etāhi tīhi makkhikāhi kataṃ madhu nāmāti attho. “Madhu nāma makkhikāmadhū”ti **pāḷiyam** (pārā. 623; pāci. 260) vuttattā aññehi tumbaṭakādīhi kataṃ sattāhakālikam na hotīti veditabbaṃ.

Idāni phāṇitam dassetum “**rasādiucchuvikati, pakkāpakkā ca phāṇita**”nti āha. Pakkā ca apakkā ca rasādiucchuvikati phāṇitanti attho. Madhukapupphaphāṇitam purebhattam sāmisaṃ vaṭṭati, pacchābhattato paṭṭhāya sattāham nirāmisameva vaṭṭati. Tassa sattāhātikkame dukkaṭam. Ciñcaphāṇitañca ambaphāṇitañca yāvakālikameva.

**91.** Idāni etesu vasātelassa odissa anuññātattā taṃ visuṃ uddharitvā dassetum “**savatthupakkā sāmam vā**”tiādimāha. Sattavidhañhi (pārā. aṭṭha. 2.623) odissam nāma byādhodissam puggalodissam kālodissam samayodissam desodissam vasodissam bhesajjodissanti.

Tattha “anujānāmi, bhikkhave, amanussikābādhe āmakamaṃsam āmakalohita”nti (mahāva. 264) vuttam, idaṃ **byādhodissam** nāma. Ettha pana kālepi vikālepi kappiyākappiyamaṃsalohitam vaṭṭati. “Anujānāmi, bhikkhave, romanthakassa romanthana”nti (cūḷava. 273) evaṃ anuññātam **puggalodissam** nāma. “Anujānāmi, bhikkhave, cattāri mahāvikaṭṭāni dātum gūtham muttam chārikaṃ mattika”nti (mahāva. 268) evaṃ sappadaṭṭhakāle appaṭiggahitakam anuññātam **kālodissam** nāma.

Gaṇabhojanādi **samayodissam** nāma. Gaṇaṅgaṇūpāhanāni **desodissam** nāma. **Vasodissam** nāma “anujānāmi, bhikkhave, vasāni bhesajjāni”ti (mahāva. 262) evaṃ vasānāmena anuññātāṃ. Taṃ ṭhapetvā manussavasam sabbesam kappiyākappiyavasānaṃ telam taṃtadatthikānaṃ telaparibhogena paribhuñjituṃ vaṭṭati. **Bhesajjodissam** nāma “anujānāmi, bhikkhave, tāni pañca bhesajjāni”ti (mahāva. 261) evaṃ bhesajjanāmena vuttāni sappiādini pañca.

Yathā pana khīradadhiādīhi pakkatelaṃ pacchābhataṃ na vaṭṭati, na evamidam. Idam pana telam savatthukapakkampi vaṭṭati, taṃ dassetuṃ “savatthupakkā sāmaṃ vā”ti vuttaṃ. Vasam oloketvā “savatthupakkā”ti vuttaṃ. Sāmaṃ pakkā vāti attho. Yathā savatthukappaṭiggahitattā sāmampakkattā dadhiādīhi pakkatelaṃ attanā kataṃ purebhataṃ na vaṭṭati, na evamidam. Idam pana attanā savatthukapakkampi purebhataṃ pacchābhataṃ vaṭṭatīti attho. Ettha pana kāraṇūpacārena vasātelam “vasā”ti vuttaṃ.

**Kāleti** purebhataṃ kāle parehi vā attanā vā pakkāti attho. Pacchābhataṃ pana pacituṃ na vaṭṭati “kāle paṭiggahitaṃ kāle nippakkaṃ kāle saṃsaṭṭha”nti (mahāva. 262) vuttattā. Tasmā “kāle”ti vuttaṃ. Yo pana vikāle paṭiggahetvā vikāle pacitvā vikāle parissāvetvā paribhuñjati, so tīṇi dukkaṭāni āpajjati.

**Amānusāti** ettha (mahāva. 262) pana acchavasādīnaṃ anuññātattā ṭhapetvā manussavasam sabbesam akappiyamaṃsānaṃ vasā anuññātāti veditabbā. Maṃsesu hi manussahatthimaṃsādīni dasa maṃsāni paṭikkhittāni, vasā pana ekā manussavasā eva.

Anupasampanna (pārā. aṭṭha. 2.623) katanibbaṭṭitavasātelam purebhataṃ paṭiggahitaṃ purebhataṃ sāmisaṃ vaṭṭati, pacchābhataṃ paṭṭhāya sattāhaṃ nirāmisameva vaṭṭati. Yam panettha sukhumarajasadisam maṃsam vā nhāru vā aṭṭhi vā lohitaṃ vā, taṃ abbohārikaṃ. Sace sayam karoti, purebhataṃ paṭiggahetvā pacitvā parissāvetvā sattāhaṃ nirāmisameva paribhuñjitabbaṃ. Nirāmisaparibhogaṇi sandhāya idam vuttaṃ “kāle paṭiggahitaṃ kāle nippakkaṃ kāle saṃsaṭṭhaṃ telaparibhogena paribhuñjitu”nti (mahāva. 262). **Aññesanti** sappiādinaṃ. **Vatthunti** yāvakālikabhūtaṃ vatthum. Yāvakālikavatthūnaṃ vatthum na paceti sambandho.

**92.** Idāni yāvajīvikavikaṭiṃ dassetuṃ “**haliddī**”tiādī vuttaṃ. Tatthāyamanuttānapadattho (mahāva. 263; pāci. aṭṭha. 248-249) – **pañcamūlādikañcāpīti** ettha dvipañcamūlena saddhiṃ aññānīpi taggatikāni mūlabhesajjāni gahitānti nātābbaṃ.

**93-5.** Biḷaṅgādīni phalabhesajjāni. Tattha (mahāva. 263) **gotṭhaphalanti** madanaphalanti vadanti. Kappāsādīnaṃ paṇṇanti sambandho. Ime pana vuttapakārā mūlabhesajjaphalabhesajjapaṇṇabhesajjavasena vuttā sabbe kappiyā. Imesam pupphaphalapaṇṇamūlā sabbepi kappiyā yāvajīvikāyeva. Ṭhapetvā ucchuniyyāsam sabbo ca niyyāso sarasañca ucchujam taṃ ṭhapetvā sabbo ca tacoti sambandho.

**96.** Madhunā (pārā. aṭṭha. 2.623) amakkhitaṃ **suddhasitthañca**. Madhumakkhitaṃ pana sattāhakālikameva. **Yañca kiñcīti** odanaṃ maṃsam aṭṭhiādīnti attho.

**97.** “Yāni vā panaññānīpi atthi neva khādanīye khādanīyatthaṃ pharanti, na bhojanīye bhojanīyatthaṃ pharanti, tāni paṭiggahetvā yāvajīvaṃ pariharituṃ, sati paccaye paribhuñjituṃ, asati paccaye paribhuñjantassa āpatti dukkaṭassā”ti (mahāva. 263) vuttattā “**āhāratthamasādhentaṃ, sabbam taṃ yāvajīvika**”nti vuttaṃ.

**98.** **Sabbassāti** gilānassāpi agilānassapīti attho. **Kālikattayanti** yāvakālikaṃ vajjetvā avasesam sati paccaye vikāle kappatīti attho.

**99.** **Janayantubhoti** janayanti ubho. Kiṃ vuttaṃ hoti? Yāvakālikayāmakālikasaṅkhātā ubho kālikā

attano kalamatikkamitvā paribhuttā pācittim janayantīti attho. Kiñca bhiyyo (mahāva. 274; mahāva. aṭṭha. 274; kañkhā. aṭṭha. sannidhikāraśikkhāpadavañṇanā) – ubhopi panete akappiyakuṭiyam vuttā antovuttham dukkaṭaṇca, punadivase paribhuñjato sannidhim pācittiyaṇca janayantīti attho.

**100. Anāruḥeti** pāliyam anāgate manussasappiādīmhīti attho.

**101. Nissaṭṭhaladdhanti** (pārā. 624) vinayakammaṃ katvā puna laddhanti attho. **Vikappentassa sattāheti** sattāhabbhantare sāmaṇerassa “idaṃ sappiṃ tela”ntiādīnā nayena nāmaṃ gaheṭvā “tuyham vikappemī”ti vā “itthannāmassa vikappemī”ti vā sammukhāpi vā parammukhāpi vā vikappentassa anāpattīti sambandho. **Pāliyam** pana “anāpatti antosattāhe adhiṭṭheti, vissajjeti, nassati, vinassati, ḍayhati, acchinditvā gaṇhanti, vissāsaṃ gaṇhanti”ti (pārā. 625) ettakameva vuttam, “vikappemī”ti idaṃ pana natthi. Kiñcāpi natthi, atha kho “anadhiṭṭhite adhiṭṭhitasaññī nissaggiyam pācittiyam, avikappite vikappitasaññī nissaggiyam pācittiya”nti (pārā. 624) **āpattivāre** āgatattā therena dassitam. Tam dassentenāpi sace upasampannassa vikappeti, attano eva santakaṃ hoti, paṭiggahaṇampi na vijahati, tasmā upasampannavasena adassetvā anupasampannavasena dassitam. Tassa hi vikappite paṭiggahaṇampi vijahati, āpattipi na hotīti. **Adhiṭṭhatoti** abbhāñjanādīni adhiṭṭhahantassa anāpattīti attho. Sace pana sattāhabbhantare nirapekkho hutvā anupasampannassa pariccajati, pariccattattā anāpatti, itarassa ca appaṭiggahitattā ubhinnampi kāyikaparibhogo vaṭṭati. Anissaggiyattā pana bāhiraparibhogenā vaṭṭati. “Tāni paṭiggahetvā sattāhaparamaṃ sannidhikāraśikāraṃ paribhuñjitabbānī”ti (pārā. 623) evaṃ niyametvā anuññatattā vuttam “**aññassa dadatopi ca anāpatti**”ti.

**102. Sabbhāvanti** attano sabhāvaṃ. Yasmā gāhāpayanti, tasmā evamudīritanti vuttanti attho. Idāni vakkhamānaṃ sandhāya “**eva**”nti vuttam.

**103-5. Sattāhaṃ yāvajīvikanti** (mahāva. 305; mahāva. aṭṭha. kañkhā. aṭṭha. sannidhikāraśikkhāpadavañṇanā) sattāhakālikaṇca yāvajīvikañcāti attho. Kiṃ vuttam hoti? Sattāhakālikayāvajīvikadvayaṃ sesakālikasammissaṃ sambhinnarasaṃ katvā paribhuñjato sannidhipācitti hotīti udīritanti. Tadaḥ paṭiggahitaṃ tadahevāti attho. **Sesanti** sattāhakālikayāvajīvikadvayaṃ. **Itaranti** yāvajīvikaṃ. Pure paṭiggahitaṃ vā hotu, tadaḥ vā paṭiggahitaṃ, yāvajīvikaṃ sattāhakālikena sattāhaṃ kappatīti vedītabbamaṃ. “Yāvakālikena, bhikkhave, yāmakālikaṃ, sattāhakālikaṃ, yāvajīvikaṃ tadaḥ paṭiggahitaṃ kāle kappati, no vikāle. Yāmakālikena, bhikkhave, sattāhakālikaṃ, yāvajīvikaṃ tadaḥ paṭiggahitaṃ yāme kappati, yāmātikante na kappati. Sattāhakālikena, bhikkhave, yāvajīvikaṃ paṭiggahitaṃ sattāhaṃ kappati, sattāhātikkante na kappati”ti hi **bhesajjakkhandhake** (mahāva. 305) vuttam. Ettha pana “tadaḥ paṭiggahita”nti visesavacanassa natthitāya pure paṭiggahitampi vaṭṭatīti siddhanti. Kālikavinicchayo.

Kālikaniddesavañṇanā niṭṭhitā.

## 9. Paṭiggāhaniddesavañṇanā

**106.** Idāni “paṭiggāho”ti padaṃ vitthāretuṃ “**dātukāmābhīhāro cā**”tiādi āraddham. Tattha dātukāmassa abhīhāro **dātukāmābhīhāro**. Etena aññassa patte pakkhipituṃ ālulentassa phusitāni utṭhahitvā aññassa patte sace patanti, paṭiggahaṇam na ruhatīti dīpitaṃ hoti. **Eraṇakkhamanti** thāmamajjhīmena purisena ukkhipanakkhamaṃ, tato mahante paṭiggahaṇam na ruhati. **Tidhā denteti** kāyakāyappaṭibaddhanissaggiyānaṃ vasena tidhā dente. Tassa bhikkhuno kāyakāyappaṭibaddhehi **dvidhā gāhoti** attho. Pañcaṅgo evaṃ **pañcaṅgevaṃ**. Dātukāmābhīhāro ekaṃ, hatthapāso ekaṃ, eraṇakkhamatā ekaṃ, devamanussatiracchānagatesu ekena tidhā dānamekaṃ, dvidhā gāho ekanti evaṃ pañcaṅgāni honti.

**107.** Idāni yena kāyappaṭibaddhena paṭiggahaṇam na ruhati, tam dassetuṃ “**asamhāriye**”tiādīmaḥa. Khāṇuke (pāci. aṭṭha. 265) bandhitvā ṭhapitamañcādīmhi vā phalake vā

pāsāṇe vā asaṃhāriye na ruhatīti attho. **Tatthajāte** paduminipaṇṇe vā kiṃsukapaṇṇādimhi vā na vaṭṭati, **sukhume cīṅcāādīnaṃ paṇṇe** vā na ruhati, yañca majjhimapuriso sandhāretuṃ na sakkoti, tasmim̐ **asayhabhāre ca paṭiggaho na ruhatīti** attho.

**108.** Idāni paṭiggahaṇavijahanam̐ dassetuṃ “**sikkhāmarañjaliṅgehī**”tiādi āradham̐. Tatthāyaṃ piṇḍattho – sikkhāpaccakkhānena ca marañena ca liṅgaparivattanena ca “na taṃ dāni paribhuñjissāmī”ti vā “na puna paṭiggahetvā paribhuñjissāmī”ti vā evaṃ anapekkhavissajjanena ca corādīhi vā acchedā ca anupasampannassa dānā ca **gāho** paṭiggāho **upassammati** vijahatīti. Bhikkhuniyā pana sikkhāpaccakkhānassa abhāvā vibbhamanena ca vijahatīti gahetabbam̐.

### 109-110

. Idāni paṭiggahetvā paribhuñjitabbam̐ dassetuṃ “**appaṭiggahitaṃ sabba**”ntiādi vuttam̐. Tassattho (kaṅkhā. aṭṭha. dantaponasikkhāpada) – catukālikapariyāpannam̐ antamaso rajareṇumpi appaṭiggahetvā sabbam̐ paribhuñjato pācitti. Idāni appaṭiggahetvā paribhuñjitabbam̐ dassetuṃ “**suddhañca nātibahala**”ntiādi vuttam̐. Tattha **suddhañcāti** aññesaṃ rasena asammissam̐. Himodakasamuddodakādīsū paṭiggahaṇakiccaṃ natthi. Loṇaṅca assu ca **loṇassu**. Ettha loṇam̐ nāma sarīre uṭṭhitam̐. Etāni pana sabbāni avicchinnāneva kappanti, netarāni.

**111.** Idāni anaṅgalaggānīpi dassetuṃ “**gūthamattikamuttānī**”tiādimāha. **Tathāvidheti** tathāvidhe kāle, sappadaṭṭhakāleti attho. Aññesaṃ pana appaṭiggahitaṃ anaṅgalaggaṃ na vaṭṭati. Kasmā? “Anujānāmi, bhikkhave, yaṃ karonto paṭiggaṇhāti, sveva paṭiggaho kato, na puna paṭiggahetabbo”ti (mahāva. 268) vuttattā.

**112. Durūpacinṇeti** dupparāmaṭṭhe phalīkarukkhavallīādīṃ cālentassa vā āmisabharitabhājanam̐ appaṭiggahitaṃ parāmasantassa vā durūpacinṇadukkaṭam̐ hotīti attho. **Rajokinṇeti** bhikkhāya carantassa patte patitarajam̐ appaṭiggahetvā puna bhikkham̐ gaṇhato vinayadukkaṭam̐ hotīti attho. **Athuggahappaṭiggaheti** atha uggahappaṭiggāhe, attanā eva uggahetvā gahiteti attho. Akappiyakuṭiyam̐ antovutthe ca yattha katthaci bhikkhunā sayampakke ca attanā vā parena vā akappiyakuṭiyam̐ antopakke cāti sabbattha dukkaṭanti adhippāyo. Paṭiggāhavinicchayo.

Paṭiggāhaniddesavaṇṇanā niṭṭhitā.

## 10. Akappiyamaṃsaniddesavaṇṇanā

**113.** Idāni maṃsesu paṭipajjitabbākāram̐ dassetuṃ “**maṃsesu ca akappiya**”nti uddhaṭam̐. Akappiyamaṃsamhi dassite kappiyamaṃsam̐ dassitameva hoti pārisesanayena. **Uragassa cāti** ettha sabbopi urago na kappati.

**114.** Ettāvātā jātivasena dasavidhampi akappiyamaṃsam̐ dassetvā idāni kappiyamaṃsesupi akappiyavidhiṃ dassetuṃ “**uddissakatamaṃsañca, yañca appaṭivekkhita**”nti vuttam̐. Tattha pañcasu sahadhammikesu yassa kassaci yaṃ kiñci uddissa kataṃ **uddissakatam̐** nāma, taṃ pana jānitvā paribhuñjitum̐ sabbesampi na vaṭṭati, ajānantānam̐ anāpatti. Macchesupi eseva nayo. **Appaṭivekkhitanti** anupaparikkhitam̐, anāpucchitanti attho. “Na bhikkhave appaṭivekkhitvā maṃsam̐ paribhuñjitabbam̐, yo paribhuñjeyya, āpatti dukkaṭassā”ti (mahāva. 281) vuttam̐. Macchesu pana āpucchanaṅkiccaṃ natthi akappiyamacchānam̐ natthitāyāti vadanti. Idāni etesu āpattibhedam̐ dassetuṃ “**thullaccaya**”ntiādimāha. Taṃ sabbam̐ (kaṅkhā. aṭṭha. sannidhikāraṅkassikkhāpadavaṇṇanā) uttānameva.

**115.** Idāni na kevalam̐ imesaṃ manussādīnam̐ maṃsameva akappiyam̐, aṭṭhiādīnīpi akappiyānīti dassetuṃ “**aṭṭhipī**”tiādi vuttam̐. Tattha (mahāva. aṭṭha 281) **lomampesanti** lomampi esaṃ akappiyamaṃsavatthūnanti attho. **Sacittakam̐ vāti** etesu pana uddissakatameva sacittakam̐, sesā

acittakāti. Akappiyamaṃsavinicchayo.

Akappiyamaṃsaniddesavaṇṇanā niṭṭhitā.

### 11. Nissaggiyaniddesavaṇṇanā

**116-7.** Idāni accoḷārikānaṃ vasena dassetuṃ “**arūpiya**”ntiādi āraddhaṃ. Aññathāpi yutti pariyesitabbā. Tatthāyaṃ saṅkhepattho (pārā. 591; pārā. aṭṭha. 2.589; kaṅkhā. aṭṭha. jātarupasikkhāpadavaṇṇanā) – yo rūpiyena arūpiyañca parivatteyya, yo ca itarena ca arūpiyena rūpiyaṃ parivatteyya, tassa nissaggiyaṃ hotīti.

Idāni rūpiyañca arūpiyañca dassetuṃ “**idha rūpiya**”ntiādi āraddhaṃ. Ettha (pārā. 589; kaṅkhā. aṭṭha. jātarupasikkhāpadavaṇṇanā) **sajjhu siṅgīti sajjhūti** rajataṃ. **Siṅgīti** suvaṇṇaṃ. Tambalohādīhi vā dārūhi vā paññehi vā lākhāya vā rūpaṃ samuṭṭhāpetvā vā asamuṭṭhāpetvā vā kataṃ cammabījamayampiyaṃ yaṃ dese vohāraṃ gacchati, idaṃ **vohārūpagamāsakaṃ** nāma. Idamidha rūpiyanti adhippettaṃ. Vatthādi ca muttādi ca **vatthamuttādi**. **Itaranti** arūpiyaṃ kappiyavatthuñca dukkaṭavattuñca. Kiṃ vuttaṃ hoti? Vatthaṃ suttaṃ phālo paṭako kappāso anekappakāraṃ aparāṇṇaṃ sappi navanītaṃ telāṃ madhu phāṇitādibhesajjañcāti idaṃ **kappiyavatthu** nāma. Muttaṃ maṇi veḷuriyo saṅkhosilā pavāḷaṃ lohitaṅgo masāragallaṃ satta dhaññāni dāsī dāso khettaṃ vatthu pupphārāmaphalārāmādayoti idaṃ **dukkaṭavattu** nāma, tadubhayaṃ arūpiyaṃ nāmāti vuttaṃ hoti.

**118.** Ettāvata rūpiyaṃvohāraṃ dassetvā idāni kayavikkayaṃ dassetuṃ “**imaṃ gahetvā**”tiādimāha. Tattha **imanti** taṇḍulādikaṃ kappiyabhaṇḍaṃ **gahetvā** vā odanādiṃ **bhutvā vā** “**imaṃ** vatthādikaṃ kappiyabhaṇḍaṃ **dehi, imaṃ** rajanapacānādikaṃ **kara**, rajanakaṭṭhādima **naya, imaṃ** vā tava **dehi**, tvaṃ pana imañca imañca āhara, **kara, dehi**”ti evaṃ **kayavikkaye samāpanne nissaggi**ti sambandho.

**119.** Idāni pariṇāmasena āpattibhedāya dassetuṃ “**attano**”tiādi āraddhaṃ. Tatrāyaṃ piṇḍattho (pārā. 659; pārā. aṭṭha. 2.658; kaṅkhā. aṭṭha. pariṇatasikkhāpadavaṇṇanā) – saṅghassa vā aññassa vā nataṃ pariṇataṃ lābhaṃ labhitabbaṃ cīvarādiṃpaccayaṃ attano vā aññassa vā pariṇāmeyya, nissaggiyaādīni hontīti. Kathaṃ? Yo pana mātusantakampi saṅghassa pariṇataṃ attano pariṇāmeti, nissaggiyaṃ. Aññassa puggalassa pariṇāmeti, suddhikapācittiyaṃ. Aññassa saṅghassa vā cetiyassa vā pariṇāmeti, dukkaṭaṃ. Yo pana aññapuggalassa vā cetiyassa vā pariṇataṃ attano vā aññapuggalassa vā saṅghassa vā aññacetiyassa vā pariṇāmeti, tassāpi dukkaṭamevāti.

**120.** Yo pana **nissaggiṃ** nissajjitabbaṃ **anissajjitvā** vinayakammaṃ akatvā paribhuñjeyya, tassa **dukkaṭaṃ**. Yo vā parena vinayakammattāya **nissatṭhaṃ sakasaññāya** na dadeyya, tassāpi **dukkaṭaṃ**. **Aññathetaranti** ettha **aññathāti** theyyasaññāya sace na dadeyya, **itaraṃ** tassa agghavasena pārājikañca thullaccayañca dukkaṭaṃca hotīti attho. Nissaggiyavinicchayo.

Nissaggiyaniddesavaṇṇanā niṭṭhitā.

### 12. Pācittyaniddesavaṇṇanā

**121.** Idāni pācittiyāni dassetuṃ “pācittī”ti mātikāpadaṃ uddharitvā “**musāvādomasāvāde, pesuññaharaṇe**”tiādi vuttaṃ. Tattha musāvāde ca omasavāde ca pesuññaharaṇe ca pācitti vuttāti sambandho. Evaṃ sesesupi. Ettha pana “**adiṭṭhaṃ, asutaṃ, amutaṃ, aviññātaṃ, diṭṭhaṃ, suttaṃ, mutaṃ, viññāta**”nti (pāci. 3; pāci. aṭṭha. 3) pubbepi “**musā bhaṇissāmī**”ti cetetvā vacanakkhaṇeva “**musā bhaṇāmī**”ti jānitvā jānantasseva musābhaṇane pācitti nāma āpatti hotīti attho. Yassa bhaṇāti, so taṃ na suṇāti, āpatti na hoti (kaṅkhā. aṭṭha. musāvādasikkhāpadavaṇṇanā).

“**Omasavādo** nāma dasahi ākārehi omasati jātiyāpi nāmenapi gottenapi kammenapi sippenapi ābādhenapi liṅgenapi kilesenapi āpattiyāpi akkosenapī”ti (pāci. 15) evaṃ vuttehi dasahi ākārehi upasampannaṃ yo khumseti vambheti, ayaṃ omasati nāma, tassa pācittīti attho. Parammukhā bhaṇantassa dukkaṭaṃ, tathā pāḷiyāṃ anāgatehi “coro”ti vā “gaṇṭhibhedako”ti vā ādīhi bhaṇantassa. “Santi idhekacce khattiyā brāhmaṇā caṇḍālā”tiādīnā pariyāyena bhaṇantassa ca anupasampannaṃ bhaṇantassa ca sabbatthapi dukkaṭameva.

Piyakamyatāya vā bhedaḍhippāyena vā upasampannaṃ jātiādīhi omasantassa upasampannassa vacanaṃ sutvā tassa upasaṃharaṇaṃ **pesuññaharaṇaṃ** nāma. Etthāpi pariyāyavacanena ca anupasampannassa upasaṃharaṇena ca dukkaṭameva.

**Padasodhammoti** ettha “**dhammo** nāma buddhabhāsito sāvakabhāsito isibhāsito devatābhāsito atthūpasamhito dhammūpasamhito”ti (pāci. 46) evaṃ vuttaṃ saṅgītittayamāruḷhaṃ tipītakadhammaṃ padaanupadaanvakkharaanubyañjanavasena bhikkhuñca bhikkhuniñca ṭhapetvā anupasampannaṃ ekato vācentassa pācitti hotīti attho.

**Sāgāreti** yaṃ pana sabbantimena pariyāyena diyaḍḍhahatthubbedhena pākārādīnā parikkhittatā sabbaparicchinnañca yena kenaci vitānādīnā antamaso vatthenapi channattā sabbacchannañca senāsanam, tathārūpe senāsane ekūpacāraṭṭhāne anupasampannena saha vasantassa catutthadivasato paṭṭhāya nipajjanagaṇanāya ca anupasampannagaṇanāya ca devasikaṃ pācitti hotīti attho.

**Ujjhāpanakakhiyyaneti** ettha yo upasampannaṃ saṅghena sammataṃ senāsanapaññāpakam vā bhattuddesakam vā yāgubhājakam vā phalabhājakam vā khajjabhājakam vā appamattakavissajjakam vā maṅkukattukāmo chandena “itthannāmo senāsanam paññāpeti, bhattāni ca uddisati”ti vā vadanto aññaṃ upasampannaṃ ujjhāpeti tena avajānāpeti, yo pana tatheva vadanto upasampannassa santike tassa ayaṃ pakāsento khīyati, tasmīṃ ujjhāpanake ca khīyanake ca pācittidvayanti veditabbaṃ.

**122. Talasattianādara-kukkuccuppādanesu** cāti ettha yo bhikkhu upasampannassa paharaṇākāram dassento kāyaṃ vā kāyappaṭibaddhaṃ vā uccāreti, tassa pācittiyam. Sace viraddho pahāram deti, appaharitukāmatāya dukkaṭaṃ, tathā anupasampannesupi dukkaṭameva.

Upasampannena paññattena vuccamāno taṃ asikkhitukāmatāya vā tassa vacanaṃ asotukāmatāya vā yo anādariyaṃ karoti, tassa anādarakaraṇe pācittiyanti attho. Apaññattena vuccamānassa ca anupasampannena paññattena vā apaññattena vā vuccamānassa dukkaṭaṃ.

Upasampannassa “ūnavīsativasso maññe tvaṃ upasampanno, vikāle maññe tayā bhutta”ntiādīnā nayena sañcicca kukkuccam uppādentassa pācittiyam. Anupasampannassa uppādane dukkaṭaṃ.

**Gāmappavesanāpucchāti** ettha pana majjhanhikātikamanato paṭṭhāya yāva aruṇuggamanā **vikālo** nāma, etthantare sace sambahulā kenaci kammena gāmaṃ pavisanti, “vikāle gāmappavesanaṃ āpucchāmā”ti sabbehipi aññaṃaññaṃ āpucchitabbaṃ. Sace anāpucchā parikkhittassa parikkhepaṃ, aparikkhittassa upacāram atikkamanti, paṭhamapāde dukkaṭaṃ, dutiyapādudhdhāre pācittiyam. Āpadāsu anāpatti.

**Bhojane ca paramparāti** paramparabhojane ca pācittiyanti attho. Ettha pana pañcasu bhojanesu aññataram nāmaṃ gahetvā “odanena vā sattunā vā kummāsena vā maṃsena vā macchena vā nimantemi”tiādīnā nayena, yena kenaci vevacanena vā akappiyanimantanāya nimantitassa yena yena paṭhamaṃ nimantito, tassa tassa bhojanaṃ ṭhapetvā uppaṭipāṭiyā, avikappetvā vā paṭhamanimantanam parassa parassa kulassa pañcannaṃ bhojanānaṃ aññataram paribhuñjantassa paramparabhojane pācitti hoti. Gilānacīvaradānacīvarakālasamayesu anāpatti, tathā pañca bhojanāni ṭhapetvā sabbattha.



**123. Anuddharitvā gamane seyyanti** ettha dasavidhā seyyā bhisi cimilikā uttarattharaṇaṃ bhūmattharaṇaṃ taṭṭikā cammakhaṇḍo nisīdanāṃ paccattharaṇaṃ tiṇasanthāro paṇṇasanthāroti. Etesu yaṃ kiñci saṅghike vihāre guttasenāsane attano vassaggena gahitaṃ attanā vā santharivā, anupasampanna vā santharāpetvā taṃ divasaṃ gamikavasena pakkamanto neva sayāṃ uddhareyya na aññaṃ uddharāpeyya, yathā upacikādīhi na khajjeyya, evaṃ na ṭhapeyya, añña vā na uddharāpeyya, patirūpaṃ bhikkhuṃ vā sāmaṇeraṃ vā ārāmikameva vā anāpucchā vā gaccheyya, tassa parikkhittassa vihārassa parikkhepaṃ, aparikkhittassa dve leḍḍupāte atikkamantassa pācittiyāṃ. Maṇḍaparukkhamūlādiaguttasenāsane santharivā gacchantassa dukkaṭaṃ, tathā mañcapīṭhabhisikocchakesu, guttasenāsane pi dukkaṭameva.

**Senāsanāni vāti** ettha anuddharitvā gamaneti sambandho. Ettha pana mañco pīṭhaṃ bhisi kocchakanti catubbidhampi senāsaṃ vassānahemantānaṃ aṭṭhasu māsesu ajjhokāse vā ovassakamaṇḍape vā rukkhamañḍape vā sayāṃ santharivā vā anupasampanna santharāpetvā vā taṃ anuddharitvā vā anuddharāpetvā vā tassa senāsanassa dvinnaṃ leḍḍupātānaṃ atikkamane pācittiyāṃ. Sammuñjanīyādi sesaparikkhāresu dukkaṭaṃ.

**Itthiyāddhānagamane**ti ettha mātuḡāmena “gacchāma bhagini, gacchāma ayyā”ti evaṃ saṃvidahitvā “ajja vā sve vā parasuve vā”ti niyamitakālaṃ visaṅketāṃ akatvā dvāravisaṅketāṃ maggavisaṅketāṃ katvāpi gacchato gāmantare gāmantare pācittiyāṃ. Agāmake araññe addhajojane addhajojane āpatti.

**Ekekāya nisīdaneti** ettha eko ekāya itthiyā nisīdaneti attho.

**124. Bhimsāpaneti** ettha upasampanno upasampannaṃ bhimsāpetukāmo corakantāravāḷakantārādīni ācikkhati, bhayānakaṃ vā rūpasaddādiṃ dasseti, so bhāyatu vā mā vā, tassa payoge payoge pācittiyāṃ. Anupasampanne dukkaṭaṃ.

**Ākoṭaneti** pahāradāne. Upasampanno upasampannaṃ anattamaṃ hutvā sace uppalapattenapi pahāraṃ deti, pācittiyāṃ. Anupasampannaṃ gahaṭṭhassa vā pabbajitassa vā itthiyā vā purisassa vā antamaso tiracchānagatassāpi pahāraṃ deti, dukkaṭameva.

Anācāraṃ ācaritvā saṅghamaññe āpattiyā vā vatthunā vā anuyuñjijyamāno taṃ akathetukāmo “ko āpanno, kiṃ āpanno, kismiṃ āpanno”tiādīnā nayena aññehi vacanehi taṃ vacanaṃ paṭicchādentō so aññaṃ vadati, ayaṃ aññavādako, tasmīṃ **aññavādake** ca kañci vītikkamaṃ disvā “āvuso, idaṃ nāma tayā kata”nti vutte taṃ na kathetukāmo tuñhībhūto vā saṅghaṃ vihesatīti saṅghavihesako, tasmīṃ **vihesake** ca pācitti hotīti attho. Idha pana ñattidutiyena kammaṃ aññavādake ca vihesake ca āropite puna aññaṃ bhaṇantassa, vihesantassa pācitti. Anāropite dukkaṭanti veditabbaṃ.

**Duṭṭhullapakāsachādeti** ettha kiñcāpi “duṭṭhullā nāma āpatti cattāri ca pārājikāni terasa ca saṅghādisesā”ti (pāci. 399) vuttā, tathāpi idha saṅghādisesāva adhippetā. Tasmā saṅghasammutiṃ vinā bhikkhussa duṭṭhullaṃ āpattiṃ “ayaṃ asuciṃ mocetvā saṅghādisesaṃ āpanno”tiādīnā nayena vatthunā saddhiṃ āpattiṃ ghaṭetvā bhikkhuñca bhikkhuniñca ṭhāpetvā yassa kassaci anupasampannaṃ ārocantassa pācittiyāṃ. Thullaccayādiaduṭṭhullārocane dukkaṭaṃ. Duṭṭhullacchādanepi saṅghādisesova adhippeto. Yo pana bhikkhu bhikkhussa duṭṭhullaṃ āpattiṃ sayāṃ vā jānitvā aññesaṃ vā sutvā “imaṃ jānitvā codessanti sāressanti maṅkuṃ karissanti, nārocissāmī”ti dhuraṃ nikkhipati, tassa pācittiyāṃ. Dhuraṃ nikkhipitvā pacchā ārocitepi na rakkhati eva.

**Hāsodaketi** āṅgulipatodakena hāso ca uḍḍake hāso cāti evamattho veditabbo. Upasampanno upasampannaṃ hasādhippāyo kāyena kāyaṃ āmasati, āpatti pācittiyassa, ko pana vādo upakacchakādīsu ghaṭṭane. Anupasampanne dukkaṭaṃ, tathā bhikkhussa kāyappaṭibaddhāmasane ca nissaggiyena kāyappaṭibaddhāmasane ca. Ettha bhikkhunīpi anupasampannaṭṭhāne ṭhitā. **Uḍḍake hasanadhammo**

nāma uparigoppake uduke kīlādhippāyassa nimmujjanaummuujanaplavanādikaṃ. Idha **hāso** nāma kīlā vuccati.

**Nicchubhane vihārā**ti saṅghikā vihārā nikkadḍhaneti attho. Ettha pana yo kuddho hutvā upasampannaṃ hatthādīsu gahetvā vā “nikkhamā”ti vatvā vā yattakāni dvārāni ekena payogena atikkāmeti, tattha dvāragaṇanāya āpattiṃ aggahetvā payogassa ekattā ekā eva gahetabbā. Sace nānāpayogehi atikkāmeti, tattha dvāragaṇanāya gahetabbaṃ. Tassa parikkhāranikkadḍhane dukkaṭaṃ, tathā anupasampanne, tassa parikkhāranikkadḍhane ca. Alajjiādīsu pana anāpatti.

**Anupakhajja sayaneti** saṅghike vihāre “vuḍḍho”ti vā “gilāno”ti vā “saṅghena dinno”ti vā jānitvā mañcassa vā pīthassa vā pavisantassa vā nikkhamantassa vā upacāre seyyaṃ santharivā vā santharāpetvā vā “yassa sambādho bhavissati, so pakkamissatī”ti adhippāyena abhinisīdantassa ca abhinipajjantassa ca payogagaṇanāya pācittiyaṃ veditabbaṃ. Pācittiyavinicchayo.

Pācittyaniddesavaṇṇanā niṭṭhitā.

### 13. Samaṇakappaniddesavaṇṇanā

**125.** Bhūtānaṃ jātānaṃ nibbattānaṃ gāmo bhūtagāmo (pāci. 91; pāci. aṭṭha. 91; kaṅkhā. aṭṭha. bhūtagāmasikkhāpadavaṇṇanā). Samārambhoti chedanaphālanapacanādi, tasmim **bhūtagāmasamārambhe** bhūtagāmasamārambhahetu **pācitti** hotīti attho. **Katakappiyaṃ** (kaṅkhā. aṭṭha. bhūtagāmasikkhāpadavaṇṇanā) pana samaṇakappiyaṃ bhaveti sambandho. Samaṇānaṃ kappiyaṃ **samaṇakappiyaṃ**. Idāni yena kataṃ kappiyaṃ samaṇakappiyaṃ hoti, taṃ dassetuṃ “**nakhena vā**”tiādīmāha. “Anujānāmi, bhikkhave, pañcahi samaṇakappehi phalaṃ paribhuñjituṃ, aggiparijitaṃ satthaparijitaṃ nakhaparijitaṃ abījaṃ nibbaṭṭabījaññeva pañcama”nti (cūḷava. 250) hi vuttaṃ.

**126.** Idāni taṃ bhūtagāmaṃ dassetuṃ “**samūlā**”tiādīmāha. Tattha (pāci. 91; pāci. aṭṭha. 91) **sa**-iti so bhūtagāmo nāmāti attho, mūlabījādīhi pañcahi bījehi pabhāvito hotīti vuttaṃ hoti. Tattha **mūlabījaṃ** nāma haliddisiṅgiverādi. **Khandhabījaṃ** nāma assattho nigrodhoti evamādi. **Aggabījaṃ** nāma ajjukaphañjijakādi. **Phaḷubījaṃ** nāma ucchuvelūnaḷādi. “**Bījabījaṃ** nāma pubbaṇṇaṃ aparāṇṇaṃ, yāni vā panaññānīpi atthi bīje jāyanti bīje sañjāyanti, etaṃ bījabījaṃ nāmā”ti vuttaṃ. Idāni “bījagāmaḥbhūtagāmasamārambhā paṭivirato hotī”ti (dī. ni. 1.10, 195; ma. ni. 1.293, 411; 2.11; a. ni. 10.99; pu. pa. 179) vuttattā dhammānulomena āgataṃ bījagāmasamārambhaṃ dassetuṃ “**ārambhe dukkaṭa**”ntiādīmāha. Tasmā etaṃ paṭhamaṃ “kappiyaṃ karohī”ti bhūtagāmaparimocanaṃ kāretvā bījagāmaparimocanattaṃ puna kappiyaṃ kāretabbaṃ.

**127. Nibbaṭṭabījaṃ** (pāci. aṭṭha. 92; kaṅkhā. aṭṭha. bhūtagāmasikkhāpadavaṇṇanā) nāma ambapanasādi. **Nobījaṃ** nāma taruṇambaphalādi, etaṃ pana sabbaṃ akappiyampi vaṭṭatīti attho. **Kaṭāhabaddhabījāni** kapitthaphalādīni. **Bahiddhā vāpi kārayeti** kapālepi kātuṃ vaṭṭati, sace ekābaddhānīti attho. Kaṭāhamuttaṃ pana bhinditvā kāretabbaṃ.

**128.** Bhājane vā bhūmiyaṃ vā ekābaddhesu bījesu ekasmim bīje kappiye kate sabbesveva kataṃ bhaveti attho. Yathā ca bīje, evaṃ rukkhasahassaṃ vā ucchusahassaṃ vā chinditvā ekābaddhe katepi vinicchayo veditabbo.

**129.** Kappiyaṃ katvā nikkhitte bījagāme puna mūlapaṇṇāni sace jāyaruṃ, puna kappiyaṃ kāreyyāti attho. **Tadāti** mūle ca ankure ca jāteti attho.

**130. Udukasambhavoti** udakajāto. **Cetiyaḍḍisūti** ettha **ādi**-saddena gehappamukhapākāra vedikādīsu nibbattā gahitā. Nibbattadvattipattako bhūtagāmo, anibbattako aggabīje saṅgahaṃ gacchati. Bījampi yāva mūlaṃ vā paṇṇaṃ vā na nikkhamati, tāva bījagāmo, mūle

ca nikkhante paṇṇe ca harite jāte bhūtagāmovā hotīti attho.

**131. Makuḷanti** aphullaṃ. **Ahichattakaṃ** nāma rukkhe jātaṃ ahichattakaṃ.

**132.** Allarukkhe gaṇhatoti sambandho. **Tatthāti** allarukkhe chindato vāpīti sambandho.

**134.** “Imaṃ rukkhaṃ, imaṃ lataṃ, imaṃ kandaṃ chinda, bhindā”tiādinā nayena niyāmetvā bhāsituṃ na vaṭṭati. “Idaṃ, eta”nti avatvā kevalaṃ “rukkhaṃ chindā”tiādinā (pāci. aṭṭha. 92; kaṅkhā. aṭṭha. bhūtagāmahikkhāpadavaṇṇanā) nayena vattuṃ vaṭṭatīti. Samaṇakappavinicchayo.

Samaṇakappaniddesavaṇṇanā niṭṭhitā.

#### 14. Bhūminiddesavaṇṇanā

**136.** Idāni “anuḷānāmi, bhikkhave, catasso kappiyabhūmiyo ussāvanantikaṃ gonisādikaṃ gahapatiṃ sammuti”nti (mahāva. 295) evaṃ vuttā catasso kappiyabhūmiyo dassetuṃ “**sammutusāvanantā cā**”tiādimāha. **Yāsūti** kappiyabhūmisu (kaṅkhā. aṭṭha. sannidhikārasikkhāpadavaṇṇanā).

**137.** Idāni yattha kappiyakuṭi icchitabbā, taṃ dassetuṃ “**vāsattāyā**”tiādimāha. **Vāsattāyāti** iminā koṭṭhāgārābhattasālācetiyaḥarasammūñjanīmālakādi yaṃ yaṃ aññampi vāsattāyā kariyati, tattha tattha kappiyakuṭikaraṇakiccaṃ natthīti dīpitaṃ hoti. Bhojanasālā pana senāsanameva, tasmā tattha kātābbā evāti vadanti. **Saṅghikevekasantaketi** ettha ekasantako upasampannasantakova vedītabbo.

**138.** Idāni kattābbākāraṃ dassetuṃ “**gehe**”tiādimāha. Tattha saṅghassa vā ekassa vā gehe vihāre kariyamāne evaṃ **irayaṃ** “kappiyakuṭiṃ karoma, kappiyakuṭiṃ karomā”ti vā “kappiyakuṭi kappiyakuṭi”ti vā vadanto paṭhamiṭṭhakatthambhādiṃ ṭhāpeyya, evaṃ katā **ussāvanantikā** nāma, evaṃ udāharitavacanantikāti attho.

**139.** Yebhuyyena vā aparikkhitto, sakalopi vā aparikkhitto ārāmo “**gonisādi**”ti vuccatīti sambandho. Ettha pana senāsanesu parikkhittesupi ārāme aparikkhitte kappiyakuṭikaraṇakiccaṃ natthi. Sammutiṃ karonteḥi kataṃ pariyoṣitaṃ “imaṃ vihāraṃ aḍḍhayogaṃ pāsādaṃ hammiyaṃ guhaṃ tiṇakuṭikaṃ maṇḍapa”nti tesāṃ nāmaṃ gahetvā tassā kuṭiyā hatthapāse vā ṭhatvā, tassā anto vā pavisitvā vuttanayeneva ñattidutiyakammavācāya sammannitabbaṃ.

**140.** “Bhikkhuṃ ṭhapetvā aññehī”ti vacanato sesasahadhammikehipi devamanussehipi aññehi kappiyakuṭiyā atthāya dinno vā tesāṃ santako vā geho “**gahapatī**”ti **mato** ñātoti attho, saṅhasantakañca bhikkhusantakañca ṭhapetvā sabbesaṃ geho gahapatīti adhippāyo.

**141. Sappiādīhi missitanti** sappiādīhi pañcahi ca haliddisiṅgiverādiyāvajīvikena cāti attho. **Vajeyya antovutthattanti** ettha yāvakālikayāmakālikasaṅkhātāṃ purimakālikadvayaṃ saṅghikaṃ vā bhikkhussa vā bhikkhuniyā vā santakaṃ sayāṃ kappiyakuṭiyā vutthampi itarehi akappiyakuṭiyā vutthehi missitaṃ antovutthabhāvaṃ āgaccheyyāti attho.

**142. Tehevāti** akappiyakuṭiyaṃ vutthasappitelādīhi. **Sāmapākatanti** sāmāpakkabhāvaṃ gacchatīti attho.

**143-4.** Imā pana kappiyakuṭiyo yadā jahitavattukā honti, taṃ dassetuṃ “**ussāvanantikā**”tiādimāha. Sace thambhe vā bhittipāde vā parivattenti, yo yo ṭhito, tattha tattha

patiṭṭhāti, etenupāyena sabbesu parivattesupi na vijahitavattukāva hotīti attho. **Parikkhitte gonisādi** vijahitavattukā. **Sesā chadanavibbhamāti** chadanavināsā jahitavattukā hontīti adhippāyo. Bhūmivinicchayo.

Bhūminiddesavaṇṇanā niṭṭhitā.

### 15. Upajjhācariyavattaniddesavaṇṇanā

**145. Upajjhācariyeti** ettha (mahāva. 64, 67, 74, 78-79; cūlava. 375, 377; 379-382; mahāva. aṭṭha. 64, 67, 75, 76, 77) **ācariyo** nāma nissayācariyo pabbajjācariyo upasampadācariyo dhammācariyoti catubbidho. Etesu hi nissayantevāsikena yāva ācariyaṃ nissāya vasati, tāva sabbamācariyavattaṃ kātappaṃ. Pabbajjāupāsampadādhammantevāsikehi pana nissayamuttakehipi ādito paṭṭhāya yāva cīvararajanaṃ, tāva vattaṃ kātappaṃ. Anāpucchitvā pattadānādīmhi pana etesaṃ anāpatti. Etesu ca pabbajjantevāsiko ca upasampadantevāsiko ca ācariyassa yāvajīvaṃ bhāro, nissayantevāsiko ca dhammantevāsiko ca yāva samīpe vasati, tāvadeva. Suṭṭhu piyasīlo **supesalo**, sikkhākāmoti attho. **Dantakaṭṭhaṃ** dentena ekaṃsaṃ uttarāsaṅgaṃ karitvā mahantaṃ majjhimaṃ khuddakanti tīṇi dantakaṭṭhāni upanetabbāni. Tesu yaṃ tīṇi divasāni gaṇhāti, taṃ sallakkhetvā catutthadivasato paṭṭhāya tādisaṃyeva sammā ubhohi hatthehi dātappaṃ. Sace yaṃ vā taṃ vā gaṇhāti, yathāladdhaṃ upanetabbam. **Toyanti** sītañca uṇhañca udakaṃ upanetvā yaṃ tīṇi divasāni vaḷaṇjeti, catutthadivasato paṭṭhāya tādisaṃ upanetabbam. Sace dvepi vaḷaṇjeti, duvidhampi upanetabbam. Sace yāgu hoti, bhājanaṃ dhovivā upanetabbam.

**146. Patte vattaṃ careti** “yāguṃ pītassa udakaṃ datvā bhājanaṃ paṭiggahetvā nīcaṃ katvā sādhukaṃ aparighamsantena dhovivā paṭisāmetabba”nti (mahāva. 66, 78; cūlava. 376, 380) vuttaṃ patte vattaṃ careti attho. Gāmappavese vattaṃ careti evaṃ sabbattha. “Sace upajjhāyo vā ācariyo vā gāmaṃ pavisitukāmo hoti, nivāsaṃ dātappaṃ, paṭinivāsaṃ paṭiggahetabbaṃ, kāyabandhanaṃ dātappaṃ, sagaṇaṃ katvā saṅghāṭiyo dātappā, dhovivā patto sodako dātabbo”ti (mahāva. 66, 78; cūlava. 376, 380) idaṃ **gāmappavesane vattaṃ** nāma. “Sace upajjhāyo vā ācariyo vā pacchāsamaṇaṃ ākaṅkhati, timaṇḍalaṃ paṭicchādentena parimaṇḍalaṃ nivāsetvā kāyabandhanaṃ bandhitvā sagaṇaṃ katvā saṅghāṭiyo pārupitvā gaṇṭhikaṃ paṭimuñcitvā dhovivā pattaṃ gahetvā upajjhāyassa vā ācariyassa vā pacchāsamaṇena hotabba”ntiādinā (mahāva. 66, 78; cūlava. 376, 380) nayena vuttaṃ **gamane vattaṃ** nāma. “Nivattantena paṭhamataraṃ āgantvā āsanaṃ paññāpetabba”ntiādinā (mahāva. 66, 78; cūlava. 376, 380) nayena vuttaṃ **āgame vattaṃ** nāma. “Upajjhāyamhi vuṭṭhite āsanaṃ uddharitabbaṃ, pādodakaṃ pādapiṭhaṃ pādakathalikaṃ paṭisāmetabba”nti (mahāva. 66, 78; cūlava. 376, 380) evaṃ vuttaṃ **āsanādīsu vattaṃ** nāma. **Upāhanāya vattaṃ** nāma “upāhanā puñchitabbā, upāhanā puñchantena paṭhamaṃ sukkhena colakena puñchitabbā, pacchā allenā”tiādinā (cūlava. 357, 359) vuttaṃ. **Cīvare vattaṃ** nāma “sace cīvaraṃ sinnaṃ hoti, muhuttaṃ uṇhe otāpetabbaṃ, na ca uṇhe cīvaraṃ nidahitabba”ntiādinā (mahāva. 66, 78; cūlava. 376, 380) vuttaṃ.

**147. Paribhojanīyapānīya-vaccappassāvaṭṭhānisūti** ettha sace pānīyaṃ na hoti, pānīyaṃ upaṭṭhāpetabbaṃ. Sace paribhojanīyaṃ na hoti, paribhojanīyaṃ upaṭṭhāpetabbaṃ. Sace vaccakuṭi uklāpā hoti, vaccakuṭi sammajjitabbā. **Tathā** passāvaṭṭhāne evaṃ **vattaṃ** caritabbanti attho. “Vihāraṃ sodhenta paṭhamaṃ pattacīvaraṃ nīharitvā ekamantaṃ nikkhipitabba”ntiādinā nayena vuttaṃ **vihārasodhane vattaṃ** nāma. “Bhūmattharaṇaṃ otāpetvā sodhetvā papphoṭetvā atiharitvā yathāpaññattaṃ paññāpetabba”ntiādinā (mahāva. 66, 78; cūlava. 376, 380) vuttaṃ puna **paññāpane vattaṃ** nāma.

**148.** Idāni vihāraṃ sodhenta evaṃ sodhetabbanti taṃ dassetuṃ “**na papphoṭeyyā**”tiādimāha. Tassattho – vihāraṃ sodhento bhikkhu bhūmattharaṇādisayanāsaṇaṃ paṭivāte vā paṅgaṇe vā pānīyasāmantā vā na papphoṭeyyāti. **Paṅgaṇeti** bahūnaṃ sannipāte ṭhāne.

**149. Nhāneti** “sace upajjhāyo nahāyitukāmo hoti, nahānaṃ paṭiyādetabbaṃ. Sace sītena attho hoti, sītaṃ paṭiyādetabba”ntiadinā (mahāva. 66; cūlava. 376) vuttaṃ **nahāne vattaṃ** nāma, “upajjhāyassa gattato udakaṃ sammajjitabbaṃ, nivāsaṃ dātabba”ntiadinā (mahāva. 66; cūlava. 376) vuttaṃ **nahātassa kātabbaṃ** nāma. **Raṅgapāketi** “sace upajjhāyassa ācariyassa rajanaṃ pacitabbaṃ hoti, saddhivihārikena antevāsikena pacitabba”nti (mahāva. 66, 78; cūlava. 376, 380) vuttaṃ. **Dhovaneti** “sace upajjhāyassa ācariyassa cīvaraṃ dhovitaṃ hoti, saddhivihārikena antevāsikena dhovitaṃ, ussukkaṃ vā kātabba”nti (mahāva. 66, 78; cūlava. 376, 380) vuttaṃ. **Sibbaneti** “sace upajjhāyena ācariyena cīvaraṃ kātabbaṃ hoti, saddhivihārikena antevāsikena kātabba”nti (mahāva. 66, 78; cūlava. 376, 380) vuttaṃ. Cīvare theve ṭhite rajanto na vaje na pakkameyyāti attho. “Cīvaraṃ rajantena sādhukaṃ samparivattakaṃ samparivattakaṃ rajitabbaṃ, na ca acchinne theve pakkamitabba”nti (mahāva. 66, 78; cūlava. 376, 380) hi vuttaṃ.

**150. Ekaccassāti** ācariyupajjhāyānaṃ visabhāgassa anattakāmassa veripuggalassa. **Anāpucchāti** ācariyupajjhāyānaṃ anārocetvā. **Kiñcananti** yaṃ kiñci.

**151-2. Tassāti** ekaccassa. **Ninnetunti** nīharitum. **Kiccayaṃ parikammaṃ vāti** veyyāvaccam vā piṭṭhiparikammādirikammaṃ vā attanā tassa kātum vā tena attano kārapetum vāti evamattho veditabbo.

**153.** Sace ācariyupajjhāyā aññattha gatā honti, pariveṇaṃ gantvā apassantehi gāmaṃ pavisitum vaṭṭati. Gāmaṃ pavisanto sace passati, āpucchitabbamevāti vadanti. “Upajjhāyaṃ anāpucchā na disā pakkamitabbā”ti (mahāva. 66, cūlava. 376) hi vuttaṃ. Attano **kiccayaṃ** nāma antovihārepi attano pattapacanacīvarakammakesacchedanādi.

**154. Saṅghāyattakammāni** nāma parivāsamānattaabbhānatajjanīyaniyassapabbājanīyapaṭisāraṇīyaukkhepanādayo.

**155. Vuṭṭhānaṃ nesamāgameti** “sace upajjhāyo vā ācariyo vā gilāno hoti, yāvajīvaṃ upaṭṭhātabbo, vuṭṭhānaṃ āgametabba”nti (mahāva. 66; cūlava. 376) hi vuttaṃ. Upajjhācariyavattavinicchayo.

Upajjhācariyavattaniddesavaṇṇanā niṭṭhitā.

## 16. Vaccapassāvaṭṭhānikaniddesavaṇṇanā

**156.** Yathāvuḍḍhaṃ na kareyya vaccanti sambandho. Yathānupubbīyā labbhatīti sambandho. Imesu pana tīsu ṭhānesu yo yo paṭhamam āgacchati vuḍḍho vā navo vā, so so āgatapaṭipāṭiyā kātuñca nahāyituñca labbhatīti adhippāyo.

**157. Ubbhajitvāti** (cūlava. 373, 374) nivāsaṃ dūratova ukkhipitvā no paviseyya. Sahasā ca no paviseyyāti sambandho. “Bahī ṭhitena ukkāsitabba”nti ca “sādhukaṃ ataramānaṃ vaccakuṭi pavisitabbā”ti ca vuttatā ukkāsitvāva ataramāno paviseyyāti attho. “Na ubbhajitvā pavisitabbā, vaccapādukāya ṭhitena ubbhajitabba”nti (cūlava. 374) vacanato “**ubbhajeyya pādukāsveva saṅghito**”ti vuttaṃ.

**158.** Na kareyya ubhayaṃ **na kareyyubhayaṃ**.

**159. Kūpeti** (cūlava. 374) vaccakūpe. **Kaṭṭhanti** avalekhanakaṭṭhaṃ. Passāvadoṇiyā kheḷaṃ na kātabbanti attho. **Nāvalekheyya pharusenāti** phālitaṃ kaṭṭhena vā kharena vā gaṇṭhikena vā kaṇṭakena vā susirena vā pūtinā vā nāvalekhitabbanti attho. **Uhatañcāpīti** gūthamakkhitaṃ dhovayaṃ attanā vā

parena vā katanti adhippāyo.

**160. Ubbhajtīvā na nikkhameti** ettha “vaccapādukāya ʘhitena paṭicchādetabba”nti (cūḷava. 374) hi vuttaṃ, puna “ācamanapādukāyaṃ ʘhitena ubbhajitabba”nti (cūḷava. 374) ca vuttaṃ. “Capu capū”ti saddaṃ katvā nācameyyāti attho. Vaccappassāvaṭṭhānikavinicchayo.

Vaccappassāvaṭṭhānikaniddesavaṇṇanā niṭṭhitā.

### 17. Āpucchakaraṇaniddesavaṇṇanā

**161. Therenāti** saṅghattherena.

**162.** Tattha tattha sannipatitānaṃ sabbesaṃ vuḍḍho vuḍḍhataro, tasmim̐ **vuḍḍhatarāgame** puna āpucchanaṃ natthi. **Bhattage cānumodatoti** ettha dānapatinā yācitena daharena vuḍḍhena anāpucchitvā kathetuṃ vaṭṭatīti vadanti.

**163. Ekavihāra**keti ekovarake vuḍḍhena vasanto anāpucchā na sajjhāyeyyāti attho. **Uddesaṃ paripucchaṇca no dade**ti uddesaṃ vā paripucchaṃ vā no dadeyya.

**164.** Na vivareyya na thakeyya cāti sambandho. Dvāraṃ nāma mahāvaḷaṅgaṃ, tattha āpucchanaḱiccam̐ natthi.

**165.** Vuḍḍhena caṅkame caṅkamantopi yena vuḍḍho, tena parivattayeti sambandho. Āpucchakaraṇavinicchayo.

Āpucchakaraṇaniddesavaṇṇanā niṭṭhitā.

### 18. Nagganiddesavaṇṇanā

**166.** “Na tveva naggena āgantabbaṃ, yo āgaccheyya, āpatti dukkaṭassa”ti (pārā. 517) vuttatā (cūḷava. 261); “**naggo maggaṃ na vaje**”ti vuttaṃ.

**167. Paṭicchādīsūti** “tena kho pana samayena bhikkhū jantāgharepi udaekepi parikammaṃ kātuṃ kukkuccāyanti. Anujānāmi, bhikkhave, tisso paṭicchādiyo jantāgharappaṭicchādīm̐ udakappaṭicchādīm̐ vatthappaṭicchādī”nti evaṃ vuttāsu tīsu paṭicchādīsūti attho. **Du**veti etāsu tīsu paṭicchādīsū udakajantāgharappaṭicchādiyo parikamme kappantīti adhippāyo. **Vatthacchādīti** vatthappaṭicchādī. **Sabbatthāti** khādanīyasāyanīyādīsū sabbakammesu kappiyāti attho. Naggavinicchayo.

Nagganiddesavaṇṇanā niṭṭhitā.

### 19. Nhānakappaniddesavaṇṇanā

**168. Puratoti** (cūḷava. 372) therānaṃ purato upari vā na ca nhāyeyyāti attho.

**169-171. Kuṭṭatthambhataruṭṭāneti** ettha (cūḷava. 243; cūḷava. aṭṭha. 243) kuṭṭe vā thambhe vā tarumhi vā aṭṭānaphalake vā kāyaṃ na ghaṃsayeti attho. **Gandhabbahattho** nāma makkaṭahatthasadiṣo dāruādīm̐yo. **Kuruvindakasuttīyāti** kuruvindasuttīyā. Mallakena vā aññamaññaṃ vā. “Na bhikkhave viggayha parikammaṃ kārāpetabbaṃ. Yo kārāpeyya, āpatti dukkaṭassa”ti (cūḷava. 243) evaṃ vuttaṃ viggahaparikammaṃ sandhāya “**aññamaññaṃ vā**”ti vuttaṃ.

Idāni kappiyāni dassetuṃ “**kapāliṭṭhakakhaṇḍānī**”tiādīmāha. Sabbesaṃ vaṭṭatīti sambandho. Gilānassapi (cūḷava. aṭṭha. 243) agilānassapi imāni kapāliṭṭhakakhaṇḍādīni kāyaghaṃsane vaṭṭanti. **Puthupāṇīti** (cūḷava. 244) hatthaparikkammaṃ vuccati. Tasmā sabbesaṃ hatthena piṭṭhiparikkammaṃ kātuṃ vaṭṭati. **Akatamallakaṃ** nāma ekadāṭṭhimaṃ paricchinditvā kataṃ. Pāsāṇādayo pādaghaṃsane eva kappiyā. Nhānakappavinicchayo.

Nhānakappaniddesavaṇṇanā niṭṭhitā.

## 20. Avandiyāniddesavaṇṇanā

172. “Nānāsaṃvāsako vuḍḍhataro adhammavādī avandiyō”ti (cūḷava. 312; pari. 467) evaṃ vuttattā laddhinānāsaṃvāsako idha **nānāsaṃvāsako**. Pārivāsiyamūlāyapaṭṭikassanārahamaṇattārahamaṇattacāriabbhānārahā **garukaṭṭhāti** idha gahitā. Ime pana aññamaññiṃ yathāvuḍḍhaṃ vandanādīni labhanti, pakatattena avandanīyāti adhippāyo. Avandanīyavinicchayo.

Avandiyāniddesavaṇṇanā niṭṭhitā.

## 21. Cammaniddesavaṇṇanā

173. Idāni “anujānāmi, bhikkhave, sabbapaccantimesu janapadesu cammāni attharaṇāni eḷakacammaṃ ajacammaṃ migacamma”nti (mahāva. 259) evaṃ vuttacammāni dassetuṃ “**migājeḷakacammānī**”tiādīmāha. **Paribhuñjitunti** (mahāva. aṭṭha. 262) mañcādīsu yattha katthaci attharivā nīpajjituṃ vā nisīdituṃ vā vaṭṭantīti attho. Rohiteṇīpasadā ca kuruṅgā ca ca-saddena aññepi vālamigā migamātukādayopi migajātikā evāti adhippāyo.

### 174. Anuññātattayā aññanti –

“Makkaṭo kāḷasīho ca, sarabho kadalīmigo;  
Ye ca vālamigā keci, tesam cammaṃ na vaṭṭatī”ti. –

Ettha **vālamiga**ggahaṇena vuttāvasesā antamaso gomahiṃsādayo gahitāti veditabbā. **Thavikāti** upāhanakosakasatthakosakakuñcikasakāti veditabbā, na pattatthavikādayo. Cammavinicchayo.

Cammaniddesavaṇṇanā niṭṭhitā.

## 22. Upāhananiddesavaṇṇanā

175. **Guṇaṅguṇupāhanāti** (mahāva. aṭṭha. 245) catuṣaṭṭalato paṭṭhāya vuccati, na ekadvitipaṭṭalato paṭṭhāya “anujānāmi, bhikkhave, ekapalāsikaṃ upāhanaṃ, na bhikkhave diguṇā upāhanā dhāretabbā, na tiguṇā upāhanā dhāretabbā, na guṇaṅguṇupāhanā dhāretabbā, yo dhāreyya, āpatti dukkaṭassā”ti (mahāva. 245) vuttattā. “Anujānāmi, bhikkhave, omukkaṃ guṇaṅguṇupāhanaṃ, na bhikkhave navā guṇaṅguṇupāhanā dhāretabbā, yo dhāreyya, āpatti dukkaṭassā”ti (mahāva. 247) vuttattā “**navā**”ti vuttaṃ. Sabbatthāpi majjhimadesa gilānopi navam guṇaṅguṇupāhanaṃ na labhati, ekavārampi aññehi paribhuttaṃ omukkaupāhanasaṅkhātaṃ labhati, paccantimesu janapadesu gilāno navampi labhatīti veditabbam “anujānāmi, bhikkhave, sabbapaccantimesu janapadesu guṇaṅguṇupāhana”nti (mahāva. 259) avisesena vuttattā.

**Sabbassāti** gilānassāpi agilānassāpīti attho. Majjhimadesepi paccantimadesepi ārāme ārāmūpacāre gilānassāpi agilānassāpi “anujānāmi, bhikkhave, ajjhārāme upāhanaṃ dhāretu”nti (mahāva. 249)

vuttattā kappiyanti attho. **Sabbatthā**ti ārāmeṇi gāmeṇi. **Akallakassā**ti gilānassa. Ettha pana majjhimadesse gilānassa guṇaṅguṇūpāhanā paribhuttāva ārāmeṇi gāmeṇi vaṭṭati, paccantimadesse aparibhuttāpi. Majjhimadessepi paccantimadessepi bhagavatā gilānasseva upāhanā anuññātā “anujānāmi, bhikkhave, yassa pādā vā dukkhā, pādā vā phalitā, pādakhilo vā ābādho, upāhanaṃ dhāretu”nti (mahāva. 249) ca “anujānāmi, bhikkhave, gilānena bhikkhunā saupāhanena gāmaṃ pavisitu”nti (mahāva. 256) vuttattā ca. Majjhimadesse ca gilāno navaṃ guṇaṅguṇūpāhanaṃ dhāretuṃ yadi labhati, kathaṃ padesapaññatti hotīti? Sabbattha pana bhagavatā gilānasseva upāhanā anuññātā, tasmā majjhimadesse gilāno navaṃ guṇaṅguṇūpāhanaṃ labhatīti gahetabbanti vadanti.

**176-9.** Sabbāva nīlakā (mahāva. 246; mahāva. aṭṭha. 246) **sabbanīlakā**. Esa nayo sabbattha **odātakādīsūpi**. Odātaṃ pana neva pāliyaṃ, na aṭṭhakathāyaṃ paṭikkhittaṃ, anulomavasena pana idha paṭikkhittanti veditabbaṃ. **Mahāraṅgarattā** satapadipiṭṭhivaṇṇā. **Mahānāmarāṅgarattā** mandarattā. **Mañjeṭṭhikā** kaṇaverapupphavaṇṇā. Pupphalatādīhi vicittā **citrā**. **Nīlapītādivaddhikā**ti ettha **ādī-**saddena odātalohitamañjeṭṭhikamahāraṅgamahānāmarāṅgarattādivasena vaddhikā gahitā. Sīhabyagghuddājīnadīpīnaṃ cammeḥi cāti sambandho. **Kocīti** gilānopi agilānopi.

**180.** Sakalaṃ vā ekadesakaṃ vā rajanaṃ coḷena (mahāva. aṭṭha. 246) puñchitvā vaḷañjeyyāti attho. Khallakādikaṃ pana sabbaṃ hāritvā vaḷañjetabbaṃ. Upāhanavinicchayo.

Upāhananiddesavaṇṇanā niṭṭhitā.

### 23. Anolokyaniddesavaṇṇanā

**181. Itthiyāti** tadahujātāyapi dārikāya. Ādāse (cūḷava. 247) vā udakapatte vā attano mukhaṃ avalokeyya, assa dukkaṭanti sambandho. “Anujānāmi, bhikkhave, ābādhapaccayā ādāse vā udakapatte vā mukhanimittaṃ oloketu”nti (cūḷava. 247) vuttattāvaṇādīni vā “jiṇṇo nu khomhi, no vā”ti evaṃ āyusaṅkhāraṃ vā oloketuṃ vaṭṭati. Anolokiyavinicchayo.

Anolokyaniddesavaṇṇanā niṭṭhitā.

### 24. Añjanīniddesavaṇṇanā

**182.** Vaṭṭā vā aṭṭhasoḷasaṃsā vā maṭṭhā pupphalatādīhi acittakā añjanī vaṭṭatīti attho. **Tissopi** vaṭṭanti, ekāya vā dvīsu vā kathā eva natthīti adhippāyo. **Lekhāti** vaṭṭalekhā. **Bandhitunti** pidhānakabandhanatthaṃ.

**183. Rūpanti** sakuṇarūpādi. Yadi ca edisaṃ aññehi kataṃ labhati, ghaṃsitvā vā chinditvā vā yathā vā na paññāyati, tathā suttena veṭṭetvā vaḷañjetabbaṃ.

**184. Thavikāti** añjanithavikā. Añjanisalākāpi labbhatīti sambandho.

**185-6. Aṭṭhīti** (mahāva. 266; mahāva. aṭṭha. 264) manussaṭṭhiṃ ṭhapetvā avasesatthi. Visānadantesu akappiyaṃ nāma natthi. Āmalakakakkādīhi katā **phalamayā**. **Tammayāti** idha vutteheva nibbattā. Añjanīvinicchayo.

Añjanīniddesavaṇṇanā niṭṭhitā.

### 25. Akappiyasayaniddesavaṇṇanā

**187-9.** “Uccako āsandiko uppanno hoti, anujānāmi bhikkhave uccakampi āsandika”nti (cūḷava.



297) vacanato mañcassa upaḍḍhabhāgappamāṇena ekatobhāgena dīghampi sugataṅgulena atirekaṭṭhaṅgulapādakam idha **āsandīti** adhippetam, caturamsāsandiko pana pamāṇāṭikkantakopi vaṭṭati. **Tūlīti** pakatitūlikā. **Pallaṅkonāma** āharimehi vālehi katoti vutto. Tattheva “sīharūpādiṃ dassetvā kato pana vaṭṭatī”ti vadanti. **Paṭīkanti** setattharaṇam. **Gonacittakanti** ettha caturaṅgulādhikalomo kojavo “**gonako**”ti vuccati. “Anujānāmi, bhikkhave, kojava”nti (mahāva. 337) **cīvarakkhandhake** vuttattā caturaṅgulalomakam pakatikojavam vaṭṭati. Ratanacittam cittakam na vaṭṭati. **Paṭalīti** ghanapuppharattaattharaṇam. **Vikatīti** sīhabyagghādirūpavicitto uṇṇāmayattharaṇako. **Uddalomīti** ekatougatapuppham. **Ekantalomikāti** ubhatougatapuppham.

**Kuttanti** soḷasannaṃ nāṭakittihīnaṃ ṭhatvā naccanayoggaṃ uṇṇāmayattharaṇam. **Koseyyanti** ratanaparisibbitam koseyyasuttamayam paccattharaṇam. **Kaṭṭissanti** ratanaparisibbitam koseyyakaṭṭissamayam paccattharaṇam. Koseyyaṅca kaṭṭissaṅca ratanaparisibbitāneva na vaṭṭanti, suddhāni vaṭṭanti. **Hatthiassarathattharā** tesam upari attharaṇakaattharaṇāva. **Ajinappaveṇīti** ajinacammehi mañcappamāṇena sibbitvā katā pavenī, tena ca kadalīmīgacammaṃ setavatthassa upari pattharivā sibbitvā kataṃ pavarappaccattharaṇam kadalīmīgappavarappaccattharaṇam, tena ca atthataṃ **ajinappaveṇīkadalīmīgappavarappaccattharaṇatthataṃ**.

Setavitānampi heṭṭhā akappiyappaccattharaṇe sati na vaṭṭati, kappiyappaccattharaṇe sati vaṭṭati, rattavitānassa heṭṭhā kappiyappaccattharaṇe satipi na vaṭṭati eva. Sīsūpadhānaṃ pādūpadhānanti mañcassa ubhatolohitakam upadhānaṃ na vaṭṭati. Yam pana ekameva upadhānaṃ hoti, ubhosu antesu rattam vā padumavaṇṇam vā cittam vā, sace pamāṇayuttam, vaṭṭati, mahāupadhānaṃ pana paṭikkhattam.

**190. Āsandādittayāti** āsandī tūlī pallaṅkoti idaṃ tayaṃ nāmaṃ. “Anujānāmi, bhikkhave, ṭhapetvā tīṇi āsandiṃ pallaṅkam tūlikam sesakam gihivikaṭam abhinisīditum, na tveva abhinipajjitu”nti (cūlava. 314) hi vuttam. Sese gihisantake nisīditum labbhatīti attho. Yadi dhammāsane saṅghikampi gonakādiṃ bhikkhūhi anāṇattā āramikādayo sayameva paññapenti ceva nīharanti ca, etaṃ **gihivikaṭanihāram** nāma, iminā gihivikaṭanihārena vaṭṭati. **Bhattaggaṃ** nāma vihāre eva dānaṭṭhānaṃ.

**191.** Catunnaṃ pādānaṃ, tīsu passesu apassayānaṅca vasena **sattaṅgo**. Ekapassena yutto **pañcaṅgo**. Ime pana sattaṅgapañcaṅgā “anujānāmi, bhikkhave, uccakampi sattaṅga”nti (cūlava. 294) vuttattā pamāṇāṭikkantāpi vaṭṭanti. Tena vuttam “**uccapādakā**”ti. Tūlonaddhā mañcapīṭhā ghareyeva nisīditum kappantīti sambandho.

**192. Cīvaracchaviyoti** channaṃ cīvarānaṃ, channaṃ anulomacīvarānaṅca aññataracīvaracchaviyoti attho. **Sabbatthāti** mañcepi pīṭhepi bhattagepi antaragharepīti attho. Imāsam pana bhisīnaṃ pamāṇaparicchedopi natthi, mañcapīṭhādīnaṃ vasena anurūpaṃ sallakkhetvā pamāṇam kātabbam.

**193.** “Tūlikā uppannā hoti. Anujānāmi, bhikkhave, vijātetvā bimbohanaṃ kāmum, tīṇi tūlāni rukkhatūlam latātūlam poṭakitūla”nti (cūlava. 297) vuttattā tūlattayaṅca (cūlava. aṭṭha. 297; kaṅkhā. aṭṭha. tūlonandasikkhāpadavaṇṇanā) bimbohane vaṭṭati. Imehi tīhi tūlehi sabbesaṃ rukkhalatātīṇānaṃ tūlam anuññātanti veditabbam. Bhisiyam pana kiñci tūlam na vaṭṭatiyeva. **Bhisigabbhoti** bhisiyā vuttam colādiपाṅcakaṃ bimbohane anuññātanti sambandho. **Migapakkhinanti** sīhādīnaṃ sabbacatuppadānaṃ haṃsamorādīnaṃ sabbapakkhīnaṃ lomāni kappanti. Masūrake anuññātanti sambandho.

**194.** Idāni bhisiyam kappiyākappiyam dassetum “**manussaloma**”ntiādimāha. **Uṇṇāyanti** (cūlava. 297; cūlava. aṭṭha. 297) uṇṇābhisiyam manussalomaṃ na labbhatīti attho. Uṇṇābhisiyampi manussalomaṃ ṭhapetvā yesam kesaṅci pakkhicatuppadānaṃ lomaṃ vaṭṭatīti attho. **Paṇṇeti** paṇṇābhisiyāṅca pupphaṅca suddham tamālapattaṅca na labbham, avasesam yam kiñci paṇṇam labbhatīti attho. Tamālapattakampi aññehi missam vaṭṭatīti. Colāvākatīṇesu akappiyam nāma natthi. **Āsanaṅceva appaṭivekkhitam na labbhanti** āsanasāmaññāto pasāṅgena vuttam.

Akappiyasayanavinicchayo.

Akappiyasayaniddesavaṇṇanā niṭṭhitā.

## 26. Samānāsanikaniddesavaṇṇanā

**195.** Tiṇṇaṃ vassānaṃ antaraṃ **tivassantaraṃ**. “Anujānāmi, bhikkhave, tivassantarena saha nisīditu”nti (cūḷava. 320) hi vuttaṃ. Yo dvīhi vassehi (cūḷava. aṭṭha. 320) vuḍḍho vā navo vā, so tivassantaro nāma.

**196. Munīti** buddhamuni. **Sabbehevāti** anupasampannehipi.

**197. Antanti** pacchimaṃ. “Anujānāmi, bhikkhave, yaṃ tiṇṇaṃ pahoti, ettakaṃ pacchimaṃ dīghāsana”nti (cūḷava. 320) vuttattā yaṃ tiṇṇaṃ pahoti, etaṃ saṃhāriṃaṃ vā hotu asaṃhāriṃaṃ vā, tathārūpesu phalakakhaṇḍesupi nisīdituṃ vaṭṭati. **Dvinnanti** dvinnaṃ samānāsanikānaṃ. “Anujānāmi, bhikkhave, duvaggassa mañcaṃ duvaggassa pīṭha”nti (cūḷava. 320) vuttattā dve samānāsanikā saha nisīdituṃ labhanti. Aññehi asamānāsanikehi, anupasampannādīhi vā dve hutvāpi nisīdituṃ na labhanti. Samānāsanikavinicchayo.

Samānāsanikaniddesavaṇṇanā niṭṭhitā.

## 27. Asaṃvāsikaniddesavaṇṇanā

**198. Ukkhittoti** āpattiyā adassane, appaṭīkamme, pāpikāya diṭṭhiyā appaṭinissagge vā ukkhittakoti tividhopi idha ukkhitto gahito. **Anupasampannoti** iminā sikkhamānasāmaṇerasāmaṇerīsikkhāpaccakkhātakā gahitāti veditabbā. **Chinnamūlako** nāma antimavatthuṃ ajjhāpannako. **Nānāsaṃvāsoti** laddhinānāsaṃvāsako. “Nānāsīmāya ṭhitacattuttho kammaṃ kareyya, iddhiyā vehāse ṭhitacattuttho kammaṃ kareyya, akammaṃ na ca karaṇīya”nti hi vuttattā imepi “asaṃvāsikā”ti vuttā. Etesu pana ukkhittakehi saddhiṃ uposathādīni karonto pācittiyam āpajjati. Nissīmaṭṭhavehāsaṭṭhehi karontassa kammaṃ kuppati, dukkaṭaṇca hoti, itarehi dukkaṭaṃ. Asaṃvāsikavinicchayo.

Asaṃvāsikaniddesavaṇṇanā niṭṭhitā.

## 28. Kammaniddesavaṇṇanā

**199. Adhammakammanti** ettha kathaṃ adhammakammaṃ hotīti ce? Vuttañhetam bhagavatā “katamaṇca, bhikkhave, adhammakammaṃ? Ñattidutiye ce, bhikkhave, kamme ekāya ñattiyā kammaṃ karoti, na ca kammavācaṃ anussāveti, adhammakammaṃ. Dvīhi ñattīhi kammaṃ karoti, na ca kammavācaṃ anussāveti, adhammakammaṃ. Ekāya kammavācāya kammaṃ karoti, na ca ñattiṃ ṭhapeti, adhammakammaṃ. Dvīhi kammavācāhi kammaṃ karoti, na ca ñattiṃ ṭhapeti, adhammakamma”nti (mahāva. 387). Iminā nayena sesakammesupi vuttappakārena akatvā aññathā karaṇaṃ adhammakammanti veditabbam.

**Vaggenāti** vaggena saṅghena. Kathaṇca vaggam hotīti ce? Yāvatikā ca bhikkhū kammappattā, te anāgatā honti, chandārahānaṃ chando anāḥaṭo hoti, sammukhībhūtā paṭikkosanti, vaggakammanti imesu yena kenaci ekenapi aṅgena vaggam hoti.

**Samaggenāti** samaggena saṅghena. Katham samaggam hotīti ce? Yāvatikā ca bhikkhū kammappattā, te āgatā honti, chandārahānaṃ chando āḥaṭo hoti, sammukhībhūtā nappaṭikkosanti,

samaggakammanti evaṃ.

**Catutthanti** samaggena dhammikaṃ. Ettāvata “cattārimāni, bhikkhave, kammāni, adhammena vaggakammaṃ, adhammena samaggakammaṃ, dhammena vaggakammaṃ, dhammena samaggakamma”nti (mahāva. 384) evaṃ vuttāni cattāri kammāni pariggahitāni hontīti veditabbāni.

**200-202.** Dasavaggiko (mahāva. 388; kaṅkhā. aṭṭha. nidānavañṇanā) vīsativaggiko ca **dasavīsativaggiko**. Abbhānopasampadāppavāraṇā ṭhapetvā sabbakammesu kammappattoti sambandho. Evaṃ sesesupi. **Itaroti** vīsativaggo ca atirekavīsativaggo ca.

**203.** Idāni kammappatte ca chandārahe ca dassetuṃ “**catuvaggenā**”tiādi vuttaṃ. Tattha (pari. 488, 497; pari. 487-488) **pakatattā** nāma ye pārājikaukkhittaladdhināsaṃvāsakā na honti. **Pareti** ekasīmaṭṭhā pakatattā bhikkhū. Yadi pakatattā bhikkhūpi aññataraṃ gāmasīmaṃ vā nadīsamuddajātassarakhaṇḍasīmāsu vā aññataraṃ pavisitvā ṭhitā honti, neva kammappattā, na chandārahā. Na hi tesam chando vā pārissuddhi vā āgacchati aññasīmāyaṃ ṭhitattā. **Sesepīti** pañcavaggādikaraṇīyepīti attho.

**204.** Asaṃvāsagaṇapūraṃ vā katvā kataṃ kammaṃ kuppaṇca hoti, kārakānaṇca dukkaṇanti attho. “Yassa saṅgho kammaṃ karoti, taṃcatuttho kammaṃ kareyya, akammaṃ na ca karaṇīya”nti (mahāva. 389) vuttattā “**kammārahagaṇapūraṃ vā**”ti vuttaṃ. Idāni parivāsādikammānaṃyeva parisato vipattiṃ dassetuṃ “**garukaṭṭhagaṇapūraṃ vā**”ti vuttaṃ. Tampi anikkhittavattaṃ sandhāya vuttaṃ. Nikkhittavatto pana sabbattha gaṇapūraṃ hoti eva.

**205. Vāreyyāti** paṭikkhipeyya. “Anujānāmi, bhikkhave, adhammakamme kayiramāne paṭikkositu”nti (mahāva. 154) hi vuttaṃ. **Antarāye** satīti attho. “Adhammakammaṃ idaṃ, na metaṃ khamatī”ti evaṃ dve tayo aññamaññaṃ diṭṭhiṃ āvi kareyyunti attho. Yadi eko hoti, “na metaṃ khamatī”ti evaṃ adhiṭṭhānaṃ kareyyāti attho. Ettāvata ete nirāpattikā honti, antarāyā ca muccanti, kammaṃ pana adhammattā kuppameva. **Vārenteva tatodhikāti** ettha “anujānāmi, bhikkhave, catūhi pañcahi paṭikkosituṃ, dvīhi tīhi diṭṭhiṃ āvi kātuṃ, ekena adhiṭṭhātuṃ, “na metaṃ khamatī”ti (mahāva. 154) vuttattā cattāro vā pañca vā vārenti evāti attho.

**206.** Idāni yehi paṭikkhittaṃ hoti, te dassetuṃ “**kammārahā**”tiādi vuttaṃ. Tattha **khittacitta-**ggahaṇena ummattakopi gahitova. **Etesanti** ye vuttappakārā, tesam paṭikkhepo na ruhatīti attho.

**207.** Idāni yassa paṭikkhepo ruhati, taṃ dassetuṃ “**pakatattekasīmaṭṭha-**samaṃvāsabhikkhuno”ti vuttaṃ. Tassattho (mahāva. 394) – evarūpassa bhikkhuno paṭikkosanā antamaso ānantarassāpi ārocentassa ruhatīti. “Bhikkhussa, bhikkhave, pakatattassa samānasamvāsikassa samānasīmāyaṃ ṭhitassa antamaso ānantarikassapi bhikkhuno viññāpentassa saṅghamajjhe paṭikkosanā ruhatī”ti (mahāva. 394) vuttaṃ.

**208.** Sammukhā yadi paṭikkoseyyāti attho. **Tirokkhāti** parammukhā. Kāyasāmaggiṃ vā chandaṃ vā no dadeyya, dukkaṇanti attho. Kammavinicchayo.

Kammaniddesavaṇṇanā niṭṭhitā.

## 29. Micchājīvavivajjanāniddesavaṇṇanā

**209. Cuṇṇanti** sirīsacuṇṇādikanti attho. **Mattikāti** pakatimattikā vā pañcavaṇṇā vā suddhā kuṅkuṭṭhaādikā vā. **Kulasaṅghāti** etehi saṅghatānaṃ santike lābhāsāya kulasaṅghatthanti attho. Ettha pana imehi saṅghatānaṃ santike “kiñci labhissāmi”ti saṅghikaṃ vā puggalikaṃ vā dātuṃ na vaṭṭati

eva. Iminā pana nayena laddhaṃ pañcannampi sahadhammikānaṃ na vaṭṭati, micchājīvañca hoti.

**210-211.** Lābhāsāya dāyakānaṃ dārake ukkhipitvā paribhaṭabhāvo **pāribhaṭakatā**, tāya paribhaṭakatāya na jīvayeti sambandho. Sesesupi eseva nayo. Khettdāsi pesitassa gamanaṃ **pahēnakammaṃ**. Sāsanappaṭisāsanaharaṇaṃ **dūtakammaṃ**. Pesitassa gehato gehagamanāṃ **jaṅghapesaniyaṃ**. Lābhāsāya lañjadānamanuppādānaṃ. **Aññena vāpīti** āngavijjādīnā.

**212. Viññattīti** (pārā. 515 ādayo; pārā. aṭṭha. 2.515 ādayo) aññatakaviññattī. **Anesanāti** pubbe vuttena pupphadānādīnā paccayesaṇā. **Kuhanādīhīti** (vibha. 861; vibha. aṭṭha. 861; mahāni. 87) kuhanā lapanā nemittakatā nippesikatā lābhena lābhaṃ nijjīsanatāti imehi pañcahi vatthūhīti attho. Micchājīvavinicchayo.

Micchājīvavivajjanāniddesavaṇṇanā niṭṭhitā.

### 30. Vattaniddesavaṇṇanā

**213.** Idāni āgantukavattādīni dassetuṃ “**vatta**”nti mātikāpadaṃ uddhaṭaṃ. Parikkhittassa (cūlava. 356 ādayo; cūlava. aṭṭha. 357 ādayo) vihārassa parikkhepaṃ, aparikkhittassa dvīhi leḍḍupātehi paricchinnatṭhānaṃ patvā upāhanaṃ omuñcitvā nīcaṃ katvā papphoṭetvā upāhanaṃ daṇḍakena gahetvā chattaṃ apanāmetvā sīsaṃ vivarītvā sīse cīvaraṃ khandhe karītvā sādhukaṃ ataramānena ārāmo pavisitabboti attho.

**214. Puccheyya sayanāsananti** “katamaṃ me senāsaṇaṃ pāpuṇāti, kiṃ ajjhāvutthaṃ vā anajjhāvutthaṃ vā”ti evaṃ pucchitabbanti attho.

**215-6.** Mañcapīṭhādīdarubhaṇḍaṇca (cūlava. 360; cūlava. aṭṭha. 360) rajanabhājanādīmatikābhaṇḍaṇca. **Āpucchāti** bhikkhussa vā sāmaṇessa vā ārāmikassa vā “āvuso imaṃ jaggāhī”ti ārocetvāti attho. **Aññathāti** evaṃ akatvāti attho.

**217-8. Vuḍḍhāgantukassāti** ettha (cūlava. 358 ādayo; cūlava. aṭṭha. 359 ādayo) dūratova disvā yadi “vuḍḍho”ti jānāti, tasmīṃ anāgate eva āsanapaññāpanādivattaṃ kātabbanti attho. **Pādodappabhutīti** pādodakaṃ pādapīṭhaṃ pādakathalikaṃ upanikkhipitabbanti attho. Pānīyena āpucchanta sace sakiṃ ānītaṃ pānīyaṃ sabbaṃ pivati, punapi āpucchitabbo eva. **Paññāpeti** “etaṃ tumhākaṃ senāsaṇaṃ pāpuṇāti”ti evaṃ ācikkhitabbanti attho.

**219-20.** “Bhikkhācāragāmo ito dūre”ti vā “santike”ti vā “kālasseva piṇḍāya caritabba”nti vā “upaṭṭhāke caritabba”nti vā gocaro ācikkhitabbo. **Agocaroti** micchādīṭṭhikānaṃ vā gāmo, paricchinnabhikkhako vā gāmo, yattha ekassa vā dvīnaṃ vā bhikkhā dīyati, so ācikkhitabboti attho. **Katikanti** saṅghassa katikatṭhānaṃ. “Imaṃ kālaṃ pavisitabbaṃ, imaṃ kālaṃ nikkhamitabba”nti evaṃ pavesanikkhamanakālaṃ ācikkhitabbaṃ. Kesuci ṭhānesu amanussā vā vālā vā hoti, tasmā evaṃ ācikkhitabbameva. **Nisinnovāti** idaṃ āpattiabhāvamattadīpaṃ, utṭahitvāpi sabbaṃ kātuṃ vaṭṭateva. Vattavinicchayo.

Vattaniddesavaṇṇanā niṭṭhitā.

### 31. Vikappanāniddesavaṇṇanā

**221. Sammukhāyāti** (pāci. 374; pārā. aṭṭha. 2.469; kaṅkhā. aṭṭha. vikappanasikkhāpadavaṇṇanā) sammukhe ṭhitassāti attho. **Byattassāti** vikappanavidhānaṃ paccuddharaṇādīvidhānañca jānantassa. Abyatto pana “iminā mayhaṃ dinna”nti gahetvāpi gaccheyyāti attho. **Ekassāti** ekassa bhikkhussa.

**222. Nidhetumvāti** nidhetum eva, nissaggiyaṃ na hotīti attho. Paribhuñjītuṃ vā vissajjetuṃ vā adhiṭṭhātūṃ vā na vaṭṭatīti attho.

**224-5. Aparā sammukhā vāti** sammukhā vikappanā evāti attho. Imā dve vikappanā attanā eva vikappetvā parena paccuddharāpitattā sammukhā vikappanā evāti vuttā.

**227. Mittoti** daḷhamitto. **Sandiṭṭhoti** diṭṭhamatto nātidalhamitto. “Itarena ca pubbe vuttanayena ‘tisso bhikkhū’ti vā ‘tissā bhikkhunī’ti vā vattabbaṃ. Puna tena ‘ahaṃ tissassa bhikkhuno, tissāya bhikkhuniyā vā dammī’ti vikappetvā teneva ‘tissassa bhikkhuno, tissāya bhikkhuniyā santakaṃ paribhuñja vā vissajjehi vā yathāpaccayaṃ vā karohī’ti paccuddharitabba’nti evaṃ pāṭho gahetabbo.

**228. Dūrasantikattekatta-bahubhāvaṃ vijāniyāti** ettha dūrattañca santikattañca ekattañca bahubhāvañca vijānitvāti attho.

**229.** “Dasāhaparamaṃ atirekacīvaraṃ dhāretabba’nti (pārā. 462) vuttattā “**dasāhaṃ vā**”ti vuttaṃ. “Cīvarakālasamayo nāma anathate kathine vassānassa pacchimo māso, atthate kathine pañca māsā’nti (pārā. 649) vuttattā “**māsamekaṃ vā pañca vā**”ti vuttaṃ, māsaṃ vā ekaṃ pañca vā māseti attho. “Bhikkhuno paneva akālacīvaraṃ uppajjeyya, ākaṅkhamānena bhikkhunā paṭiggahetabbaṃ. Paṭiggahetvā khippameva kāretabbaṃ. No cassa pāripūri, māsaparamaṃ tena bhikkhunā taṃ cīvaraṃ nikkhipitabbaṃ ūnassa pāripūriyā satiyā paccāsāyā’nti (pārā. 499) vuttattā “**paccāsā sati māsaka**”nti vuttaṃ. **Nuppādayatīti** anadhiṭṭhitaṃ avikappitaṃ nissaggiṃ na janayatīti attho. Vikappanāviniṅchayo.

Vikappanāniddesavaṇṇanā niṭṭhitā.

### 32. Nissayaniddesavaṇṇanā

**230. Byattassāti** ettha kittāvatā byatto hotīti ce? Nissayamuccanakena pana sabbantimena dhammaparicchedena atthato ca byañjanato ca dve mātikā paguṇā vācuggatā kātabbā, pakkhadivasesu dhammassāvanatthāya suttantato cattāro bhāṇavārā, sampattānaṃ parisānaṃ parikathanatthāya andhakavindamahārāhulovādadharmakkhandhasadiso eko kathāmaggo, saṅghabhattamaṅgalāmaṅgalesu anumodanatthāya tisso anumodanā, uposathappavāraṇādivijānanatthaṃ kammākammavinicchayo, samaṇadhammakaraṇatthaṃ samādhivasena vā vipassanāvasena vā arahattapariyosānaṃ ekaṃ kammaṭṭhānaṃ ettakaṃ uggahetabbaṃ. Ettāvatā byatto nāma hoti cātudiso, itarathā abyatto.

**231.** Idāni nissayaggahaṇākāraṃ dassetuṃ “**ekaṃsa**”ntiādi vuttaṃ. Ettha (mahāva. 103) **āyasmato**ti āyasmantaṃ.

**232.** Idāni paṭippassaddhividhānaṃ dassetuṃ “**pakkante**”ntiādi vuttaṃ, “pañcimā, bhikkhave, nissayappaṭippassaddhiyo upajjhāyambhā. Upajjhāyo pakkanto vā hoti vibbhanto vā kālakato vā pakkhasaṅkanto vā āṇattiyeva pañcamī’nti (mahāva. 83), “chayimā, bhikkhave, nissayappaṭippassaddhiyo ācariyamhā. Ācariyo pakkanto vā hoti vibbhanto vā kālakato vā pakkhasaṅkanto vā āṇattiyeva pañcamī, upajjhāyena vā samodhānagato hoti’nti idaṃ pana ubhayaṃ idha dassitaṃ. Sace ācariyupajjhāyā sāmantavihāresupi aparikkhittesu leḍḍupātadvayabbhantare vasanti, nissayo na paṭippassambhati. Parikkhittesupi na paṭippassambhatīti eke. Ācariyā pana na icchanti. Kasmāti ce? Nissayaggahaṇappaṭippassaddhīnaṃ upacārasīmāya paricchinnattā. Leḍḍupātena upacārasīmāparicchedo pana aparikkhittesu eva labbhati, na parikkhittesu. Tasmā ācariyānaṃ vinicchayeva ṭhātabbaṃ.

**Pakkanteti** ettha (mahāva. aṭṭha. 83) sace ācariyo antevāsikaṃ anāmantetvāva upacārasīmaṃ atikkamati, nissayo paṭippassambhati. Sace upacārasīmaṃ anatikkamitvāva nivattati, na

paṭippassambhati. Ācariyaṃ anāmantetvā antevāsikassa gamanepi eseva nayo. Sace ācariyo katthaci gantukāmo antevāsikaṃ āpucchati, antevāsikopi “sādhu sādhu”ti sampaticchati, taṅkhaṇe eva paṭippassambhati. Evaṃ ācariyaṃ āpucchitvā antevāsikassa gamanepi. Dvīsupi antovihāreyeva ṭhitesu ācariyo vā antevāsikaṃ, antevāsiko vā ācariyaṃ anāpucchitvāva sace dve leḍḍupāte atikkamati, paṭippassambhati. Pakkhasaṅkante vā vibbhante vā kālakate vā taṅkhaṇeyeva paṭippassambhati. **Āṇatti** nāma nissayappaṇāmanā. Dassanasavanavasena duvidhaṃ **samodhānaṃ**.

### 233. Alajjinti ettha –

“Sañcicca āpattiṃ āpajjati;  
 Āpattiṃ parigūhati;  
 Agatigamaṇaṅca gacchati;  
 Ediso vuccati alajjipuggalo”ti. (pari. 359) –

Evaṃ vuttaṃ. “Na bhikkhave alajjinaṃ nissāya vatthabbaṃ. Yo vaseyya, āpatti dukkaṭassā”ti (mahāva. 120) hi vuttaṃ.

**234.** “Anujānāmi, bhikkhave, addhānamaggappaṭipannena bhikkhunā nissayaṃ alabhamānena anissitena vatthu”nti (mahāva. 121) vuttattā “**addhikassā**”ti vuttaṃ. Gilānupaṭṭhākassa ca yācitassāti sambandho. “Anujānāmi, bhikkhave, gilānupaṭṭhākena bhikkhunā nissayaṃ alabhamānena yāciyamānena anissitena vatthu”nti (mahāva. 121) hi vuttaṃ. **Sallakkhenta phāsukanti** phāsuvihāraṃ sallakkhenta. Idaṃ pana parihāraṃ (mahāva. aṭṭha. 121) sotāpannādiariyasāvako vā thāmagatasamathavipassanālābhī vā bālaputhujano vā na labhati. Yassa kho pana samathavipassanā taruṇā hoti, na thāmagatā, ayaṃ labhati. Asante nissayadāyake “yadā paṭirūpo nissayadāyako āgacchissati, tadā tassa nissāya vasissāmī”ti ābhogaṃ katvā yāva āsāḥhipuṇṇamā, tāva vasituṃ labhati. Sace pana āsāḥhimāse nissayadāyakaṃ na labhati, yattha atthi, tattha gantabbaṃ. Antovasse pana anissitena vatthuṃ na vaṭṭati. Sabhāge dāyake asante vasituṃ labbhatīti sabbapadesu yojanā kātābbā. Nissayavinicchayo.

Nissayaniddesavaṇṇanā niṭṭhitā.

### 33. Kāyabandhananiddesavaṇṇanā

**235. Akāyabandhanoti** kāyabandhanaṃ abandhitvāti attho. Tato paṭṭhāya cīvaraṃ pārupitabbaṃ, tato paṭṭhāya eva kāyabandhanaṃ bandhitabbaṃ. “Na bhikkhave akāyabandhanena gāmo pavisitabbo. Yo paviseyya, āpatti dukkaṭassā”ti (cūḷava. 278) hi vuttaṃ. **Tatthevāsatiyā gatoti** asatiyā gato yattha sarati, tattheva bandhitabbaṃ. Saritvā pana yāva na bandhati, tāva piṇḍāya carituṃ na vaṭṭati. Yadi antogāme sarati, kāyabandhane sati ekamante ṭhatvā bandhitabbaṃ, asati ce nikkhamitvā bandhitvā puna piṇḍāya pavisitabbanti vadanti.

**236.** “Anujānāmi, bhikkhave, dve kāyabandhanāni paṭṭikaṃ sūkarantaka”nti (cūḷava. 278) vuttattā “**duvidha**”nti vuttaṃ. Tattha **sūkarantaṃ** nāma kuñcikaḥkosakā viya ante susiraṃ katvā koṭṭitaṃ. **Rajju ca ekāti** ekavaṭṭā rajju ca. **Tadanulomikāti** tesam dvinnaṃ anulomikā.

**237. Macchakaṇḍakakhajjurī-pattā maṭṭhā ca paṭṭikāti** ettha (cūḷava. aṭṭha. 278) ete macchakaṇḍakādayo maṭṭhā vikārarahitā paṭṭikā ca tadantogadhāti adhippāyo. **Labbhā dasā catassoti** ekāya vā dvīsu vā tīsu vā kathā eva natthīti adhippāyo, tato paraṃ na vaṭṭati. **Antesūti** ubhosu antesu. **Guṇasuttakanti** diguṇasuttakaṃ.

**239. Makaramukhādinti ādi-**saddena deḍḍubhasīsaṃ gahitaṃ. **Ubhanteti** ubhosu antesu. Kassāti? Vidhassa. **Ghaṭakāti** ghaṭakato. **Lekhāti** lekhāya. Ghaṭakato ca lekhāya ca aññaṃ cittaṃ na kappatīti

attho.

**240. Deḍḍubhakanti** (cūlava. 278; cūlava. aṭṭha. 278) udakasappasirasadisam. **Murajanti** bahurajjūke ekato saṅkaḍḍhitvā ekāya rajjuyā palivethetvā katarajju. **Maddavīṇanti** pāmaṅgasadisam. **Kalābukanti** anekavaṭṭam. Etāni pana sabbāni na kappanti. **Dasāsu dve majjhimāti** murajam maddavīṇanti dve majjhimā eva. **Kappareti** kappantīti attho.

**241. Gaṇṭhiyo cāpīti** (cūlava. 279) cīvaragaṇṭhiyopi. Veḷuādimayā kappantīti pasaṅgena vuttam. Kāyabandhanavinicchayo.

Kāyabandhananiddesavaṇṇanā niṭṭhitā.

Paṭhamabhāṇavāram.

### 34. Pathavīniddesavaṇṇanā

**242.** Jātā (pāci. 86; pāci. aṭṭha. 86-88; kaṅkhā. aṭṭha. pathavīkhaṇanasikkhāpadavaṇṇanā) ajātāti duvidhā pathavīti attho. Idāni tadubhayaṃ dassetuṃ “**suddhamattikapamsukā**”tiādimāha. Tattha suddhamattikapamsukā ca adaḍḍhā ca bahumattikapamsukā ca cātumāsādhikovaṭṭhapamsumatikarāsi ca jātapathavīti sambandho. Ettha pana **adaḍḍhāti** uddhanapacanakumbhakārāvāpabhājanapacanaḍḍivasena tathā tathā adaḍḍhā. Ayaṃ pana visuṃ natthi, suddhapamsuādisu aññatarāva veditabbā. Suddhapamsu suddhamattikā yebhuyyenapamsu yebhuyyenamattikā atirekacātumāsādhikovaṭṭhamattikapamsupuñjā ca adaḍḍhā cāti ayaṃ sabbāpi **jātapathavīti** veditabbā.

**243. Dutiyāti** ajātapathavīti attho. **Vuttarāsīti** mattikarāsi ca pamsurāsi ca cātumāsomavaṭṭhako **ajātapathavīti** attho.

**244.** Idāni yebhuyyenamattikā yebhuyyenapamsukā yebhuyyenasakkharāti evaṃ vuttāsu kittāvatā yebhuyyatā hotīti taṃ dassetuṃ “**dve bhāgā**”tiādimāha. Tattha tīsu bhāgesu dve bhāgā mattikā yassā bhūmiyā, eṣā yebhuyyamattikāti sambandho. Upaḍḍhapamsuādayopi kappiyā eva akappiyabhāgassa anatikarato. “Yebhuyyenamattikā yebhuyyenapamsukā”ti (pāci. 86) hi vuttam, na “upaḍḍhamattikā, upaḍḍhapamsukā”ti. **Sesesupīti** yebhuyyapamsukādīsipi.

**245.** Jātasaññissa pācittīti sambandho. Dveḷhassa vimatissa dukkaṭam. Jāte ajātasaññissa anāpatti.

**246. Ekāyāpattiyā ekāti** sace sakim āṇatto divasampi khaṇati, āṇāpakassa ekā evāti attho. **Vācasoti** vācāya vācāyāti attho.

**247.** Ettha “jālehi aggi”nti vā vattum na vaṭṭati. Aniyamtvā pana “pokkharaniṃ khaṇa, pathaviṃ khaṇa, vāpiṃ khaṇa, āvāṭam khaṇa, kandaṃ khaṇā”ti vattum vaṭṭati.

**248. Edisanti** ettha aññampi evarūpaṃ kappiyavohāravacanaṃ vaṭṭatīti adhippāyo.

**249.** Kopetuṃ labbhanti sambandho, ghaṭṭādīhi gahetuṃ sakkuṇeyyakam **ussīṅcanīyakaddamaṃ**.

**251-2.** Udakasantike patitēti sambandho. Udaḍḍapattam pana sabbakālam kappiyameva, tasmā akappiyam dassetuṃ “**udakasantike**”ti vuttam. Pāsāṇe lagge raje ca navasoṇḍiyā patite raje cāti sambandho. Abbhokāsuṭṭhite vammike ca mattikākuṭṭe cāti attho, tathā etepi sabbe cātumāsādhikovaṭṭhā na kopetabbāti attho.

**253-5.** Bhūmiṃ vikopayaṃ thambhādiṃ gaṇhituṃ na ca kappatīti sambandho. **Dhārāyāti** passāvadhārāya. Padaṃ dassessāmīti sambandho.

**257. Sekoti** siñcanaṃ. Bhūmiyā allahatthaṃ ṭhapetvāti sambandho.

**258. Avase satīti** hatthadāhādīsu āpadāsūti attho. Pathavīvinicchayo.

Pathavīniddesavaṇṇanā niṭṭhitā.

### 35. Parikkhāraniddesavaṇṇanā

**259-260. Girikūṭanti** makaradantakaṃ. Sibbituñca chindituñca na vaṭṭatīti sabbattha yojanā. **Daṇḍeti** chattadaṇḍe.

**261.** Sibbituṃ vā pañjaraṃ vinandhituṃ vā thiratthaṃ chatte bandhituṃ daṇḍe lekhā vaṭṭatīti sambandho. Sace vuttappakāraṃ akappiyachattaṃ labhati, ghaṭakampi vālarūpampi chinditvā dhāretabbaṃ, lekhāpi ghaṃsetvā apañetabbā, suttakena vā daṇḍo veṭhetabbo.

**262.** Anuvātaṃ sandhāya “**ante vā**”ti vuttaṃ. Dvinnaṃ paṭṭānaṃ saṅghaṭitattḥānaṃ sandhāya “**paṭṭamukhe vāpī**”ti vuttaṃ. Varakasīsākārena sibbanāṃ sandhāya “**veṇikā**”ti ca satapadākārena sibbanāṃ sandhāya “**saṅkhalikāpi vā**”ti ca vuttaṃ. Satapadisadisāṃ aññaṃ vā sūcivikāraṃ na kappati, pakatisūcikkammaeva vaṭṭatīti attho. Pāḷikaṇṇikaādikaṃ cīvare na ca kappatīti sambandho.

**263-4.** Catukoṇāva (pārā. aṭṭha. 1.85) kappareti sambandho. **Agghikanti** agghiyaṃ cetiyasadisāṃ. **Etthāti** gaṇṭhipāsakapattē. **Koṇasuttā ca pīlakāti** na kevalaṃ catukoṇā gaṇṭhikapāsakapattāva kappanti, atha kho duviññeyyā koṇasuttapīlakā ca kappareti attho. **Gandhaṃ telam vāti** gandhaṃ vā telam vā.

**265. Rattanti** (pārā. aṭṭha. 1.85) rajitaṃ. **Aññaena vāti** muggarādinā vā. **Katvāti** ṭhapetvā. **Pahāre na ca muṭṭhināti** muṭṭhinā na pahāreyyāti attho.

**266-7.** Chattavaṭṭiyaṃ (pārā. aṭṭha. 1.85) lekhaṃ ṭhapetvā dhammakaraṇe lekhā na vaṭṭatīti sambandho. Kuñcikāya ca pippale ca maṇikā ca pīlakā ca na vaṭṭatīti sambandho. Tattha **maṇikāti** ekā eva vaṭṭamaṇikā. **Pīlakā** muttarājisadisā bahū.

**268-9. Mālādyaraṇiyanti** (pārā. aṭṭha. 1.85) araṇiyaṃ mālādi vaṇṇamaṭṭhaṃ na vaṭṭatīti sambandho. Evaṃ sabbattha. Tipusīsamaye pattamaṇḍale bhittikkammañca na vaṭṭatīti attho. **Hitvāti** ṭhapetvā. **Sūcisaṇḍāsako** (pārā. aṭṭha. 1.85) nāma sūciṃ ḍaṃsāpetvā ghaṃsituṃ kato dārumayo. “Anujānāmi, bhikkhave, makaradantakaṃ chinditu”nti (cūḷava. 253) vuttattā pattamaṇḍale makaradantakaṃ vaṭṭati, aññaṃ bhittikkammādivikārameva na vaṭṭati, tasmā girikūṭaṃ pattamaṇḍale ṭhapetvā avasese na vaṭṭatīti veditabbaṃ.

**272. Senāsaneti** (pārā. aṭṭha. 1.85) pāsādādisenāsaneti attho.

**273. Pumitthirūparahitanti** purisarūpaitthirūparahitanti attho. Parikkhāravinnicchayo.

Parikkhāraniddesavaṇṇanā niṭṭhitā.

### 36. Bhesajjaniddesavaṇṇanā

**274-5.** Sahadhammināṃ labbhaṃ bhesajjakaraṇanti sambandho. Na kevalaṃ pañcanaṃ



sahadhammikānaṃyeva bhikkhācariyaviññattisakehi bhesajjakaraṇaṃ labbhati, atha kho aparesampi pañcannaṃ labbhati, te dassento “**pitūna**”ntiādimāha. **Pitūnanti** mātāpitūnanti attho. Ye mātāpitāro jagganti upaṭṭhahanti, te **tadupaṭṭhākā** nāma. Bhikkhuṃ eva nissāya jīvanto **bhikkhunissitako** nāma. Pabbajjāpekkho “**bhaṇḍū**”ti vuccati.

**276.** Aparesampi dasannaṃ kātuṃ vaṭṭati, te dassetuṃ “**mahācūlapitā**”tiādimāha. Ettha (pārā. aṭṭha. 2.185-187) pana mahāpitā cūlapitā mahāmātā cūlamātā mahābhātā cūlabhātā mahābhaginī cūlabhaginīti imehi **aṭṭhahi** ādi-saddena pitubhaginiñca mātubhātikañca gahetvā dasa. Etesaṃ pana sakena bhesajjena kātabbaṃ. **Attaniye** ca asatīti pāṭhaseso.

**277.** Na kevalaṃca etesaṃ dasannaṃ, imehi sambandhānaṃ puttanattādīnaṃ yāvasattamā kulaparivaṭṭā kātuṃ vaṭṭatīti dassanattaṃ “**kuladūsanā**”tiādimāha. Aññopi (pārā. aṭṭha. 2.285-287) yo āgantuko vā coro vā yuddhaparājito vā issaro ñātakehi pariccatto vā gamiyamanusso vā gilāno hutvā vihāraṃ pavisati, sabbesampi apaccāsāntena bhesajjaṃ kātabbaṃ.

**278.** Mātā (pārā. aṭṭha. 2.185-187) pitā tadupaṭṭhāko bhikkhunissitako paṇḍupalāso veyyāvaccakaroti imesaṃ channaṃ anāmaṭṭhapiṇḍapāto avāritoti attho. Kiñca bhiyyo – dāmarikacorassa ca issariyassa ca dātumavāritoti attho.

**279. Tesanti** (pārā. aṭṭha. 2.185-187) gahaṭṭhānaṃ. **Sāsanogadhanti** ratanaparittaāñāṇāyaparittādi-parittaṃ bhaṇitabbanti attho.

**280.** “Āgantvā (pārā. aṭṭha. 2.185-187) sīlaṃ detu, dhammañca parittaṃca bhāsātū”ti kenaci pesitoti sambandho. **Dātuṃ vattunti** sīlaṃ dātuṃ, dhammañca parittaṃca vattuṃ labbhatīti attho. Bhesajjavinicchayo.

Bhesajjaniddesavaṇṇanā niṭṭhitā.

### 37. Uggahaniddesavaṇṇanā

**281. Dasabhedampīti** sace kenaci heṭṭhā dassitaṃ dasavidhaṃ ratanaṃ ānetvā “idaṃ saṅghassa vā cetiyassa vā navakammaṃ vā aññapuggalassa vā suttantikagaṇassa vā dammī”ti vutte “sādhū”ti sampaṭicchantassa dukkaṭaṃ hotīti attho.

**282-3.** Tesu dasavidhesu ratanesūti attho. **Dvīsūti** rajatajātarūpesu. Gaṇasaṅghapuggale (pārā. aṭṭha. 2.538-539) anāmasitvā “idaṃ hiraññasuvaṇṇaṃ cetiyassa dammi, navakammaṃ dammī”ti vutte na paṭikkhipeti attho. Kiṃ kātabbanti ce? Taṃ dassetuṃ “**vade**”tiādi vuttaṃ. “Ime evaṃ vadantī”ti kappiyakārānaṃ ācikkhitabbanti attho.

**284.** Na kevalaṃ hiraññasuvaṇṇādīkameva, aññampi khattavatthādīkaṃ akappiyaṃ na sampaṭicchitabbanti taṃ dassetuṃ “**khettaṃ vatthu**”ntiādimāha. Dāsapasuādīkaṃ **dāsapavādīkaṃ**. Sace hi koci “mayhaṃ sassasampādakaṃ mahātalākaṃ atthi, taṃ saṅghassa dammī”ti vadati, tañce saṅgho sampaṭicchati. Paṭiggahaṇepi paribhogepi āpattiyeva. Evaṃ sesesupi.

Kappiyena kamena gaṇheyyāti sambandho. “Khettaṃ dammī”ti vutte “na vaṭṭatī”ti paṭikkhipitvā “ito cattāro paccaye paribhuñjathā”ti vā “catupaccayaparibhogatthāya dammī”ti vā vadati ce, gahetabbam. Vatthumhipi eseva nayo. “Talākaṃ dammī”ti vutte paṭikkhipitvā “cattāro paccaye paribhuñjathā”ti vā “saṅgho udakaṃ paribhuñjissati, bhaṇḍakaṃ dhovissatī”ti vā ādinā nayena vutte sampaṭicchitabbam. “Dāsaṃ dammī”ti vutte paṭikkhipitvā “ārāmīkaṃ, veyyāvaccakaraṃ, kappiyakāraṃ dammī”ti vutte sampaṭicchitabbam. “Gomahiṃsaajelakādayo dammī”ti vutte paṭikkhipitvā “pañcagorasaparibhogatthāyā”ti vutte sampaṭicchitabbam. Edisaṃ gahaṇaṃ sandhāya

“paṭikkhipitvā gaṇheyā”ti vuttaṃ.

**285-6. Navamātikakedāratalākakiriyā** (pārā. aṭṭha. 2.238-239) **ca anave** pubbe kappiyavohārena paṭikkhipitvā gahitatalāke **mattikuddharāṇa**ñca bhinnatṭhāne pālibandho ca dubbalatṭhāne **āḷiyā thirakāro ca anave** kedāre purāṇabhāgato **atirekabhāggahāṇa**ñca **nave** kedāre **aparicchinnabhāge** “**sasse detha ettake**”ti **kaḥāpaṇuṭṭhāpana**ñcāpīti idaṃ sabbam bhikkhussa kātuṃ na vaṭṭati. Sace karoti, evamādikam **sabbesampi akappiyanti** attho.

**287-9.** Idāni taṃyeva akappiyam dassetum “**avatvā**”tiādi vuttaṃ. Tassattho (pārā. aṭṭha. 2.238-239) – yo pana “kasa, vappa” iccādikam avatvā “**ettikāya bhūmiyā ettako bhāgo deyyo**”ti bhūmiṃ vā patiṭṭhāpeti, “**ettake bhūmibhāge sassam kataṃ, ettakam gaṇhathā**”ti kassake vadante pamānagaṇhanattham daṇḍarajjubhi minati, khale ṭhatvā rakkhaṇādīni karoti, tasseva akappiyanti.

**290.** Bhaṇḍāgārikasīsenā pitusantakampi sace paṭisāmeyya, pācittiyanti attho.

**291-2. Pitūnanti** mātāpitūnaṃ. Sāṭakādikappiyam **vatthum**. “Paṭisāmetvā dehī”ti vutteti sambandho. Pātetvāna gate yasmā **ajjhārāmasikkhāpadavasena** (pāci. 505-506) palibodho, tasmā gopitum labbhanti attho.

**293-4. Sakam** vāsīādīparikkhārenti attho. Idaṃ ṭhānaṃ guttanti dassetabbaṃ. “**Ettha ṭhapethā**”ti pana na vattabbaṃ.

**295.** Ettha “**añño koci na pavisati, bhikkhūhi vā sāmaṇerehi vā gahitaṃ bhavissatī**”ti **saṅkantīti** attho. **Vatthumhīti** alaṅkāradīvatthumhīti attho. **Tādiseti** yādise vatthumhi naṭṭhe āsaṅkā hoti, tādisē vatthumhi naṭṭheti sambandho.

**296.** Idāni asaṅkitabbaṭṭhānaṃ dassetum “**vihārāvasathassanto**”tiādimāha. Vihārassa ca gharassa cāti attho. **Ratananti** dasavidham ratanaṃ. **Ratnasammatanti** sāṭakaveṭṭhanādikam. **Gahetvānāti** kappiyakārake asati attanāpi gahetvāna nikkhipeyyāti attho. **Maggeraññepīti** maggepi araṅṅepi. **Tādiseti** “**bhikkhūhi gahitaṃ bhavissatī**”ti āsaṅkitabbaṭṭhāne. **Patirūpaṃ kariyatīti** magge vā araṅṅe vā tādisam bhaṇḍam passitvā maggā okkamma nisīditabbaṃ, sāmikesu āgatesu taṃ ṭhānaṃ ācikkhitabbaṃ. Sace sāmike na passati, ratanasammatam paṃsukūlam gahetabbaṃ. Ratanañce hoti, tuṅṅhībhūtena gantabbanti attho. Ayam maggāraṅṅakesu paṭipattī. Vihārāvasathānaṃ pana anto tādisam disvā bhaṇḍakam muñcitvā “**ettha ettakā kaḥāpaṇā**”tiādinā nayena rūpena vā lañchanāya vā pilotikāya vā saṅṅānaṃ katvā nikkhipitabbaṃ, tato pakkamantena patirūpānaṃ bhikkhūnaṃ ācikkhitabbaṃ. Uggahavinicchayo.

Uggahaniddesavaṇṇanā niṭṭhitā.

### 38. Kuladūsanāniddesavaṇṇanā

**297.** “**Kulāni dūseti pupphena vā phalena vā cuṇṇena vā mattikāya vā dantakatṭhena vā veḷuyā vā vejjikāya vā jaṅghapesaniyena vā**”ti (pārā. 437) vuttattā tāni aṭṭha vatthūni dassetum “**puppha**”ntiādimāha. Imāya micchāpaṭipattiyā kulānaṃ aññesu sīlavantesu pasādam dūseti vināsetīti **kuladūsanam dukkaṭam** āpajjati. Taṃ pana attano santake ca parasantake ca veditabbaṃ.

**298.** Idāni imesu vatthūsu na kevalam kuladūsanadukkaṭameva āpajjati, thullaccayādīnīpi āpajjatīti dassetum “**thullaccaya**”ntiādimāha. Saṅghikam garubhaṇḍam issarena dentassa thullaccayanti sambandho. Senāsanatthāya niyamitam pana pupphādi garubhaṇḍam hoti. Saṅghassa vā aññassa vā santakam theyyacittena dentassa dukkaṭādīni hontīti pāṭhaseso, tassa bhaṇḍassa agghavasena

dukkaṭathullaccayapārājikāni hontīti attho.

**299-300. Sabbathāti** (pārā. aṭṭha. 2.431)

kappiyavohāraakappiyavohārapariyāyao bhāsanimittakammādīhi na vaṭṭatīti attho. Vatiādīni katvā **jaggituṅca. Attano paribhogatthanti** phalaparibhogattham. **Ropanādīnīti** ropāpanādīni. **Ādi-saddena** siñcāpanaocināpanādīni gahitāni. Kuddālakhaṇittivāsipharasuudakabhājanādīni āharitvā samīpe ṭhapanavasena nimittato ca kuddālakhaṇittādīni ca mālāvaccche ca gahetvā ṭhite “sāmaṇerādayo disvā ‘thero kārāpetukāmo’ ti āgantvā karontī” ti saññāya obhāsato ca “imaṃ rukkhaṃ jāna, imaṃ āvāṭaṃ jānā” ti ādikappiyavohārato ca “paṇḍitena mālāvaccchādayo ropāpetabbā, na cirasseva upakārāya samvattantī” ti ādipariyāyato ca ropanādīni labbhareti sambandho.

**301-2.** Idāni aṭṭhasu vatthūsu avasesāni dve vatthūni dassetuṃ “**vuttāva vejjikā jaṅghapesane**” ti vuttaṃ. Tattha **vejjikā** pubbe **vuttāva**, idāni jaṅghapesanādivinichchayaṃ vakkhāmīti attho. **Pitaroti** (pārā. aṭṭha. 2.436-437) mātāpitaro. **Bhaṇḍunti** pabbajjāpekkhaṃ. Bhikkhussa sakaṃ veyyāvaccakarañcāti ete ṭhapetvā kasivāṇijjādighikammesu dūtasāsanam haraṇe dukkaṭanti attho. Paṭhamaṃ sāsanaṃ aggahetvā puna taṃ disvā vā tassa santikaṃ gantvā vā vadatopi dukkaṭamevāti attho. Sāsanaṃ aggahetvā āgatānaṃ pana “bhante, tasmim gāme itthannāmassa kā pavattī” ti pucchiyamāne kathetuṃ vaṭṭati. Pucchitapañhe doso natthi.

**303. Evaṃ** kuladūsanena **uppannapaccayā**. “Pañcannampī” ti vuttattā anupasampanna katampi edisaṃ na vaṭṭati eva micchājīvattā. **Ātumāvattu** (mahāva. 303) cettha nidassanaṃ. Kiṃ viyāti ce, taṃ dassetuṃ “**abhūtārocānārūpa-sabyohāruggahādisā**” ti vuttaṃ. Tattha **uggahādisāti** etehi uppannapaccayasadisāti attho.

**304.** Idāni pupphādīni kesam dātuṃ vaṭṭanti, kesam dātuṃ na vaṭṭantīti taṃ dassetuṃ “**harāpetvā**” ti ādimāha. Pitūnaṃ (pārā. aṭṭha. 2.436-437) dātuṃ labbhatīti sambandho. Sesañātīnaṃ pattānaṃ eva. **Liṅganti** sivaliṅgaṃ.

**305. Tathā phalanti** phalampi mātāpitūnaṃ haritvāpi harāpetvāpi dātuṃ labbhatīti attho. Na kevalaṃ mātāpitūnaṃyeva, aññesampi dātuṃ labbhatīti dassetuṃ “**gilānāna**” ti ādimāha. **Saparasantakanti** ettha **paroti** attano vissāsaññātako eva adhippeto.

**306. Bhājenteti** saṅghassa phalapupphamhi bhājiyamāne sammatena deyyanti sambandho. Itarena asammatena apaloketvā dātābanti attho.

**307. Paricchijjāti** āgatānaṃ dātābanti phalavasena vā rukkhasasena vā paricchinditvāti attho. **Itarassāti** issarādikassa. **Katikam vatvāti** “imasmim rukkhe ettakāni phalāni labbhantī” ti evaṃ vatvā.

**308. Seseti** mattikādantakaṭṭhaveḷumhi (pārā. aṭṭha. 2.436-437). **Yathāvuttanayo evāti** ettha attano ca parassa ca santakaṃ kulasaṅgahatthāya dadato dukkaṭantiādīnā heṭṭhā vuttanayeneva vinichchayo veditabboti attho. **Paṇṇampīti** kiñcāpi pāḷiyam paṇṇadānaṃ na vuttaṃ, tathāpi kuladūsane pavesayeti attho. Kuladūsanavinichchayo.

Kuladūsananiddesavaṇṇanā niṭṭhitā.

### 39. Vassūpanāyikaniddesavaṇṇanā

**309-310.** Idāni vassūpagamaṃ dassetuṃ “**purimikā**” ti ādimāha. Tattha purimikā pacchimikā (mahāva. 184; mahāva. aṭṭha. 185) ceti dve vassūpanāyikāti attho. Ālayapariggāho vā vacībhedo vā vassūpanāyikāti pāṭhaseso. Idāni vattabbaṃ sandhāya “**ediso**” ti vuttaṃ. “Idha vassaṃ vasissāmī” ti

**cittuppādettha ālayo** (mahāva. aṭṭha. 203). Ālayapariggāho pana vaje vā satthe vā nāvāya vā vassaṃ upagantukāmassa tatha senāsanam alabhantassa labbhati, satthādīsu pana vassaṃ upagantum na vaṭṭatīti katvā. Yadi satthādīsu kavāṭabandham senāsanam labbhati, tatha upagantabham. Upagacchantena ca “idha vassaṃ upemī”ti tikkhattum vattabham. Vihāre pana vacībhedo vā kātabbo. Sace “idha vassaṃ vasissāmī”ti ālayo atthi, asatiyā pana vassaṃ na upeti, chinnavasso na hoti, pavāretuṅca labhati eva.

**311. Nopetukāmo āvāsaṃ, tadahūtikkameyya vāti pāṭhe** (mahāva. 186) atikkamantassa āvāsaṃ tadahu vassūpanāyikātipi attho. Āvāsaṃ atikkameyya vāti sambandho. **Jānaṃ vānupagacchatoti** ettha vihāre nisīditvāpi anupagacchato dukkaṭāpatti hotīti adhippāyo.

**312.** Chinnavasso (vajira. ṭī. mahāvagga 208) vā kenaci antarāyena paṭhamaṃ anupagato (mahāva. 185-186) vā dutiyaṃ upagaccheyyāti sambandho. **Temāsanti** purimaṃ vā temāsaṃ pacchimaṃ vā temāsaṃ. “Na bhikkhave vassaṃ upagantvā purimaṃ vā pacchimaṃ vā temāsaṃ avasitvā cārikā pakkamitabbā. Yo pakkameyya, āpatti dukkaṭassā”ti (mahāva. 185) hi vuttam.

**313-5.** “Anujānāmi, bhikkhave, sattannaṃ sattāhakaṇṭiyena appahitepi gantum, pageva pahite, ‘bhikkhussa bhikkhuniyā sikkhamānāya sāmaṇerassa sāmaṇeriyā mātuyā ca pitussa ca, gilānabhataṃ vā pariyesissāmi, gilānupaṭṭhākabhataṃ vā pariyesissāmi, gilānabhesajjaṃ vā pariyesissāmi, pucchissāmi vā upaṭṭhahissāmi vā’ti sattāhaṃ sannivatto kātabbo”ti (mahāva. 198) vuttatā **“mātāpitūnamatthāya...pe... upaṭṭhissa”**nti vuttam. Tatthāyaṃ saṅkhepo – “mātādīnaṃ gilānabhataṃ vā tadupaṭṭhākabhataṃ vā gilānānaṃ osadhaṃ vā esissaṃ pariyesissa”nti vā “te gilāne gantvā pucchissāmī”ti vā “upaṭṭhissa”nti vā pahitepi appahitepi sattāhakiccena gantum labhati.

Idāni sahadhammike eva sandhāya **“anabhirata”**ntiādi vuttam. “Visabhāgarūpaṃ disvā anabhirati, tato vūpakāsissaṃ, taṃ gahetvā aññattha gamissa”nti adhippāyena gantumpi labhatīti attho. Kukkucaṃ vinodanaṅca diṭṭhiṃ vivecanaṅca ahaṃ vā kareyyaṃ aññehi vā kāreyyanti sambandho. Parivāsamānattaādīhi vuṭṭhānaṃ vā garukā. **Ādi**-saddena sace saṅghena kammaṃ kataṃ hoti, tassa paṭippassaddhiyā anussāvanakaraṇādīsu ussukkaṃ kareyyanti gantum labhatīti attho. **Sattāhakiccenāti** sattāhakaṇṭiyena.

**316.** Dhammasavanattham nimantito evaṃ vajeti attho. **Garū** nāma ācariyupajjhāyā, tehi bhaṇḍadhovanakiccena pahitassa gantum vaṭṭatīti attho.

**317. Na bhaṇḍadhovana...pe... dassaneti** ettha (mahāva. aṭṭha. 199) etesupi na vajeti sambandho. **Labbhanti** ettha “ajjeva āgamiṣṣā”nti adūrago yadi na pāpuṇeyya, labbhanti sambandho. Kim vuttam hoti? “Ajjeva āgamiṣṣāmī”ti sāmantavihāraṃ gantvā puna āgacchantassa antarāmagge sace aruṇuṭṭhānaṃ hoti, vassacchedopi na hoti, ratticchedena dukkaṭampi nāpajjati vuttam hoti.

**318. Sesañātihīti** bhātubhaginīādīhi. Bhikkhunissitakena ca pahite sambandho. **Niddisitivāti** “āgacchantu bhādanā, icchāmi dānaṅca dātum dhammaṅca sotum bhikkhuṅca passitu”ntiādinā yaṃ kiñci niddisitivāva pesite gantum vaṭṭati. Kevalaṃ “āgacchantu bhikkhū, icchāmi bhikkhūnaṃ āgamaṇa”nti evaṃ aniddisitivā vutte gantum na labhatīti attho.

**319. Accharāye satattanoti** dasavidhesu antarāyesu ekasmimpi antarāye attano satīti attho. Saṅghasāmaggiyā vā vassacchede anāpattīti attho. Vuttañhetam “idha pana, bhikkhave, vassūpagato bhikkhu passati sambahule bhikkhū saṅghabhedāya parakkamante. Tatra ce bhikkhuno evaṃ hoti, ‘garuko kho saṅghabhedo vutto bhagavatā. Mā mayi sammukhībhūte saṅgho bhijjī”ti pakkamitabham, anāpatti vassacchedassā”ti (mahāva. 202). Evaṃ chinnavasso no pavārayeti attho.

**320. Rukkhasa susireti** ettha (mahāva. 204; mahāva. aṭṭha. 203) pana suddhe rukkhasusire eva na

vaṭṭati, mahantassa pana susirassa anto padaracchadanam kuṭīkam katvā pavisanadvāram yojetvā upagantum vaṭṭati. **Rukkhassa viṭapeti** etthāpi suddhaviṭapamatte na vaṭṭati, mahāvītape pana aṭṭakam bandhitvā vuttanayena kuṭīkam katvā upagantum vaṭṭati. **Chavakuṭi** nāma pāsāṇakuṭīkanti vadanti. Tīsu passesu pāsāṇe ussāpetvā upari pāsāṇena paṭicchannā.

321. Nāvādīsu pana upagato pavāretuñca labbhatīti sambandho. Vassūpanāyikavinicchayo.

Vassūpanāyikaniddesavaṇṇanā niṭṭhitā.

#### 40. Avebhaṅgiyaniddesavaṇṇanā

322-4. **Ārāmārāmavattūnīti** ettha (cūḷava. 321; cūḷava. aṭṭha. 321) **ārāmo** nāma pupphārāmo vā phalārāmo vā. Mañco pīṭham bhisi bibbohanādisayanāsanam. **Lohakumbhī**ādayo kāḷalohatambalohādīmayā. **Bhāṇako** udakacāṭi. **Pañcete avibhājjīyāti** bhājetvā na gahetabbā, gahitāpi saṅghasantakā evāti attho. Ettha pana ārāmo ārāmavattūti paṭhamam, vihāro vihāravattūti dutiyam, mañco pīṭham bhisi bibbohananti tatiyam, lohakumbhī...pe... nikhādananti catuttham, valli...pe... dārubhaṇḍam mattikabhaṇḍanti pañcamanti evam imāni rāsivasena pañca honti, sarupavasena anekāni honti. Honti cettha –

“Dvisaṅghāni dve honti, tatiyam catusaṅgham;  
Catuttham navakoṭṭhāsam, pañcamam aṭṭhabhedana”nti. (cūḷava. aṭṭha. 321);

325. “Pañcimāni, bhikkhave, avissajjīyāni na vissajjetabbāni saṅghena vā gaṇena vā puggalena vā, vissajjitānīpi avissajjitāni honti. Yo vissajjeyya, āpatti thullaccayassā”ti (cūḷava. 321) vuttatā **“bhājitāpi abhājitā”**ti vuttam. **Eteti** vuttappakārā pañcapi “garubhaṇḍāni”ti ca “avissajjīyāni”ti ca ca-saddena “avebhaṅgiyāni”ti ca vuccantīti attho.

326-8. Idāni purimesu tīsu rāsīsu sabbassa garubhaṇḍattā te anāmasitvā pacchimesu dvīsu rāsīsu ekaccassa agarubhaṇḍassāpi atthitāya tam dassetum ārabhantopi tesu dvīsu bahuvīsayam paṭhamam dassetum **“valliḍḍhabāhumattāpi”**tiādimāhāti nītabbam. Tassāyam saṅkhepo (cūḷava. aṭṭha. 321) – valli aḍḍhabāhumattāpi veḷu aṭṭhaṅgulāyatopi **tiṇādi muṭṭhimattampīti** ettha **ādi-saddena** muñjapabbajam saṅgaṇhāti, paṇṇam ekampi mattikā pākātā vā pañcavaṇṇā vā **sudhākaṅguṭṭhaādīkāti ādi-saddena** sajjulasajātīhiṅgulakādi vā tālapakkappamāṇāpi yehi kehici saṅghassa dinnā vā saṅghike tiṇakhettādimhi jātā vā rakkhitagopitabhūmibhāge uppannā tatthajātakā vā saṅghikā rakkhitā eva abhājjīyāti attho.

Idāni ye cettha bhājitabbā, te dassetum **“niṭṭhite”**tiādimāha, saṅghassa vā cetiyassa vā kamme niṭṭhite bhājjīyāti adhippāyo. Ettha pana yaṃ kiñci valliveḷutiṇapaṇṇamattikādi saṅghassa dinnam vā saṅghike tiṇakhettādimhi jātakam vā rakkhitagopitam garubhaṇḍam, tam saṅghakamme ca cetiyakamme ca niṭṭhite avasesam puggalikakammepi dātum vaṭṭati, agarubhaṇḍattā bhājitumpi labbhati. Senāsanatthāya rakkhitagopitameva garubhaṇḍam hoti, na itaram. Sīhaḷādīpe tumūlasomavīhāre saṅghassa pākavattampi tālapaṇṇam vikkiṇitvā karīyati. Kasmā? Na hi tattha paṇṇena attho atthi, sabbepi iṭṭhakacchannā pāsādādayoti. Evam aññatthāpi karīyati evāti vadanti.

329. Idāni lohahaṇḍādīsu ekantabhājetabbahaṇḍam dassetum **“pattādi”**tiādimāha. Ettha (cūḷava. aṭṭha. 221) pana **ādi-saddena** lohathālakatamba kuṇḍikā kaṭacchu saraka añjani añjanisalākākaṇṇamalāharaṇīsūcisāṇḍāsakattarayaṭṭhiādīni gahitāneva. **Tathāti** bhājjīyamevāti attho. Vīppakatañca avīppakatañca. **Pādagaṇhakanti** magadhanāḷiyā pañcanāḷiyā gaṇhanam.

331-2. **Anuññātavāsi** yaṃ sakkā sipāṭikāya pakkhipitvā pariharituntī vuttā. **Tacchitāniṭṭhitanti** vīppakataṃ. Yadi tacchitam, garubhaṇḍameva. **Dantam** pana atacchitañca aniṭṭhitañca bhājjīyameva.

Aniṭṭhitam mañcapādādikaṃ garubhaṇḍam. Idāni mattikabhaṇḍam dassetuṃ “**bhikkhūpakaraṇe**”tiādīmāha. Pattathālakakuṇḍikādibhikkhūpakaraṇe ca. **Pādaghaṭakoti** pādagaṇhanako ghaṭako ca mattikāmayo bhājiyo bhājetabboti attho. Saṅkathālakampi bhājiyameva.

**333-4.** Migacammādikaṃ kappiyacammaṃ bhājiyaṃ, sīhacammādikaṃ akappiyacammaṃ garubhaṇḍam. Tam pana bhūmattharaṇaṃ kātuṃ vaṭṭati. **Eḷacammaṃ** pana paccattharaṇagatikattā garubhaṇḍam hoti. Idāni imāni pana pañca cīvarapiṇḍapātabhesajjānaṃ atthāya parivattetuṃ na vaṭṭati, garubhaṇḍena pana garubhaṇḍaṇca thāvarena thāvarena thāvaremeva parivattetvā paribhuñjitabbānīti dassetuṃ “**garunā**”tiādīmāha. Tattha (cūḷava. aṭṭha. 321) **garunā**ti garubhaṇḍena garubhaṇḍaṇca thāvarena parivatteyyāti sambandho. **Thāvarena ca** thāvaremeva parivatteyya, na garubhaṇḍanti adhippāyo. Pañcasu koṭṭhāsesu pacchimattayaṃ garubhaṇḍam, purimadvayaṃ thāvaranti vedittabbaṃ. **Tathā katvā ca bhūñjatū**ti evaṃ parivattetvā tato ābhatam kappiyabhaṇḍam paribhuñjatūti attho. Kathaṃ nāyatīti ce? Vuttañhetam **parivāre-**

“Avissajjiyaṃ avebhaṅgiyaṃ, pañca vuttā mahesinā;  
Vissajjantassa paribhuñjantassa anāpatti,  
Pañhā mesā kusalehi cintitā”ti. (pari. 479);

Ettha pana garubhaṇḍena garubhaṇḍaṇca thāvarena thāvarena thāvaremeva parivattanavidhim sandhāya “vissajjantassa anāpatti”ti vuttaṃ. Puna tato nibbattaṇca catupaccayaṃ paribhuñjituṃ labbhatīti dīpetuṃ “paribhuñjantassa anāpatti”ti vuttaṃ. Ayaṃ imissā gāthāya adhippāyo. **Sesanti** (cūḷava. aṭṭha. 321) āramādi abhājiyanti attho. Avebhaṅgiyavinicchayo.

Avebhaṅgiyaniddesavaṇṇanā niṭṭhitā.

#### 41. Pakiṇṇakaniddesavaṇṇanā

**335-6. Sadvārabandhane ṭhāne...pe... sayanto dukkaṭam phuseti** evarūpe ṭhāne divā sayantenāti sambandho. **Sadvārabandhane** (pārā. 77; pārā. aṭṭha. 1.77) pana **ṭhāne** yena kenaci parikkhitte abbhokāsepi rukkhamaṇepi antamaso iminā lakkhaṇena yutte ākāsaṅgaṇe pi sayantena dvāram bandhitabbameva. **Viññumhi puriseti** bhikkhumhi vā sāmaṇere vā antamaso upāsakaārāmicēsupi aññatarasmim satīti attho. “Esa jaggissatī”ti **ābhogo cāpi kappatīti** kevalam bhikkhunim vā mātuḡamaṃ vā āpucchituṃ na vaṭṭati. **Savaseti** attano vase, abahusādhāraṇaṭṭhāneti attho. **Tam vinākāraṇanti** tam pubbe vuttappakāram dvārathakanaābhogakaraṇasaṅkhātāṃ ākāraṃ vināti attho. Acittakāpattikiriyāyaṃ saṅkhepo.

**337. Ratanānīti** muttādidasavidharatanāni. **Dhaññanti** sattavidham dhaññam.

**338. Sitthatelodatehīti** ettha (cūḷava. 246; cūḷava. aṭṭha. 246) pana yo madhusitthakatelena vā udakamissakatelena vā aññena kenaci vikārena vā kese osaṅṭheti, dantamayādīsu yena kenaci phaṇena vā kocchena vā hatthena vā phaṇakiccaṃ karonto aṅgulīhi vā osaṅṭheti, tassa dukkaṭam hotīti attho.

**339. Nekapāvuraṇāti** (cūḷava. 264) na ekapāvuraṇā. **Tuvaṭṭayunti** nipajjeyyūṃ. Kim vuttaṃ hoti? Yadi ekapāvuraṇā vā ekattharaṇā vā ekamañce vā tuvaṭṭeyyūṃ, na vaṭṭati, dukkaṭam hotīti vuttaṃ hoti. Ekamhi (cūḷava. aṭṭha. 264) vā bhājane na bhūñjeyyunti sambandho.

**340.** Caturaṅgulato (cūḷava. 282; cūḷava. aṭṭha. 282) ūnaṃ dantakaṭṭham na khādeyyāti sambandho. **Adhikaṭṭhaṅgulanti** aṭṭhaṅgulato adhikaṃ. **Tathāti** na khādeyyāti attho. Akallako (cūḷava. 289) lasuṇam na khādeyya.

**341.** Hīnehi (pāci. 31 ādayo) vā ukkaṭṭhehi vā jātiādīhi eva ukkaṭṭhaṃ vā hīnaṃ vā “caṇḍālosī”tiādīnā nayena **ujum vā** “santi vā idhekacce caṇḍālā, venā, nesādā”tiādīnā nayena **aññāpadesena** vā upasampannaṃ vā anupasampannaṃ vā akkosādhippāyaṃ vinā kevalaṃ **davādhippāyena vade, dubbhāsanti** attho.

**342.** Nakhe vā kese vā nāsalome (cūlava. 275) vā dīghe na dhārayeti sambandho. “Anujānāmi, bhikkhave, maṃsappamāṇena nakhe chinditu”nti (cūlava. 274) ca “anujānāmi, bhikkhave, dumāsikaṃ vā duvaṅgulaṃ vā”ti (cūlava. 246) ca vuttaṃ. **Na labbhaṃ vīsatiṃmaṭṭhanti** ettha ekanakhampi maṭṭhaṃ kātuṃ na vaṭṭati eva. “Na bhikkhave vīsatiṃmaṭṭhaṃ kārāpetabbaṃ. Yo kārāpeyya, āpatti dukkaṭṭassa (cūlava. 274). Anujānāmi, bhikkhave, malamattaṃ apakaḍḍhitu”nti (cūlava. 274) hi vuttaṃ. Tasmā nakhato malamattaṃ apakaḍḍhituṃ vaṭṭati. **Sambādhe lomahāraṇanti** ettha **sambādho** nāma ubho upakacchakā muttakaraṇaṇca. “Anujānāmi, bhikkhave, ābādhapaccayā sambādhe lomaṃ saṃharāpetu”nti (cūlava. 275) hi vuttaṃ.

**343. Yathāvuḍḍhanti** vuḍḍhapaṭiṇṇāyā laddhabbaṃ. **Na bādheyyāti** na vāreyya. **Saṅghuddiṭṭhaṃvāti** upāsakādīhi yathāvuḍḍhaṃ “ayyā paribhuñjantū”ti nissajjitvāva dinnāṃ senāsanādi. “Na bhikkhave uddissakatampi yathāvuḍḍhaṃ paṭibāhitabbaṃ. Yo paṭibāheyya, āpatti dukkaṭṭassa”ti (cūlava. 313) hi vuttaṃ. Adhotapādehi (cūlava. aṭṭha. 324) vā allapādehi vā nakkameti sambandho. **Sudhotapādakaṃ vāpīti** dhotapādeheva akkamitabbaṭṭhānaṃ. **Tathevāti** nakkameyya saupāhanoti attho. “Na bhikkhave adhotepi pādehi, allehi pādehi, saupāhanena senāsaṇaṃ akkamitabbaṃ. Yo akkameyya, āpatti dukkaṭṭassa”ti (cūlava. 324), hi vuttaṃ. “Anujānāmi, bhikkhave, paccattharivā nipajjitu”nti (cūlava. 324) vuttatā paribhaṇḍakatam bhūmiṃ vā bhūmattharaṇasenāsaṇaṃ vā saṅghikaṃ mañcapīṭhaṃ vā attano santakena paccattharaṇena paccattharivāva nipajjitabbaṃ.

**344. Saṅghāṭiyā na pallattheti** adhiṭṭhitacīvarena vihāre vā antaraghare vā pallatthikā na kātābbāti attho. Parikkammakataṃ (cūlava. aṭṭha. 324) **bhittiādiṃ** na apassaye. “Na bhikkhave parikkammakatā bhitti apassetabbā. Yo apasseyya, āpatti dukkaṭṭassa”ti (cūlava. 324) hi vuttaṃ. Tasmā setabhitti vā cittakammakatā vā bhitti na apassayitabbā. Na kevalaṃ bhittiyeva, parikkammakatā dvārakavāṭavāṭapānathambhādayopi na apassayitabbā. Etthapi lomagaṇanāya eva āpattiyo veditabbā. **Sante udake no na ācemeti** (cūlava. 373; cūlava. aṭṭha. 373) no na ācemetuṃ, udakasuddhiṃ akātuṃ na vaṭṭatīti attho. **Santeti** vacanena asante anāpattīti dīpeti.

**345. Akappiyasamādāneti** bhikkhuṃ vā sāmaṇerādike sesasahadhammike vā akappiye niyojenta dukkaṭṭameva. “Na, bhikkhave, pabbajitena akappiye samādapetabbaṃ. Yo samādapeyya, āpatti dukkaṭṭassa”ti (mahāva. 303) hi vuttaṃ. Sabhāgāya (mahāva. aṭṭha. 169) āpattiyā desanāyāti attho. Vatthusabhāgatā idha adhippetā, na āpattisabhāgatā. “Na bhikkhave sabhāgā āpatti desetabbā. Yo deseyya, āpatti dukkaṭṭassa”ti (mahāva. 169) ca “na bhikkhave sabhāgā āpatti paṭiggahetabbā. Yo paṭiggaṇheyya, āpatti dukkaṭṭassa”ti (mahāva. 169) ca vuttaṃ. Vatthusabhāgaṃ āpattiṃ āvi kātumpi na vaṭṭati, tena vuttaṃ “**āvikaṃme ca dukkaṭṭa**”nti. “Ahaṃ, āvuso, itthannāmaṃ āpattiṃ āpajjiṃ, taṃ ito vuṭṭahavitvā paṭikarissāmi”ti aññassa vacanaṃ āvikammaṇṇāma.

**346. Itarassa tūti** asuddhacittassa.

**347. Porisanti** (cūlava. aṭṭha. 284) purisappamāṇaṃ abhiruhituṃ vaṭṭatīti attho. “Anujānāmi, bhikkhave, sati karaṇīye porisaṃ rukkhaṃ abhiruhituṃ, āpadāsu yāvadattha”nti (cūlava. 284) hi vuttaṃ.

**348.** Parissāvanaṃ (cūlava. 259; cūlava. aṭṭha. 259) vinā aḍḍhayajanaṃ gacchantassa dukkaṭṭanti sambandho. “Addhānagamanaṃsamayo nāma aḍḍhayajanaṃ gacchissāmi bhuñjitabba”nti (pāci. 218) vuttaṃ, tasmā aḍḍhayajanaṃeva antimāṃ addhānanti veditabbaṃ. Bhikkhuniyā ca mātugāmena ca

**saṃvidhānasikkhāpade** “ekaddhānamaggaṃ paṭipajjeyya, antamaso gāmantarampī”ti (pāci. 182, 413) evaṃ viśesetvā vuttatā “kukkuṭasampāte gāme gāmantare gāmantare āpatti pācittiyassā”ti (pāci. 183, 414) vuttaṃ, na addhānalakkhaṇena. Yaḍi gāmantaraparicchedena addhānaṃ vuccati, gaṇabhojanasikkhāpadeḍi “addhānagamanaśamayo nāma gāmantarampi gačchissāmīti bhūñjitabba”nti vadeyya, na ca vuttaṃ. Tasmā “na bhikkhave aparissāvanakena addhāno paṭipajjitabbo. Yo paṭipajjeyya, āpatti dukkaṭassa. Sače na hoti parissāvanaṃ vā dhammakaraṇo vā, saṅghāṭikaṇṇopi adhiṭṭhātabbo iminā parissāvetvā pivissāmī”ti vuttaṭṭhānepi aḍḍhayojanavaseneva addhānaparicchedo veditabbo. Abhayagirivāsīnaṃ pana “dvigāvutavasena addhānaparicchedo”ti pāḷiyaṃ eva atthi. **Yācamānassāti** yācantaśsa. “Na ca bhikkhave addhānappaṭipannena bhikkhunā parissāvanaṃ yāciyamānena na dātabbaṃ. Yo na dadeyya, āpatti dukkaṭassā”ti hi vuttaṃ.

**349.** Aññatra ābādhappaccayā kaṇṇanāsādike sesaṅge dukkaṭanti sambandho. Ābādhe sati aṅguliādīni chindituṃ vaṭṭati. Aṅgajātaṃ vā bijāni vā chindituṃ na vaṭṭati eva. Attaghātane ca dukkaṭanti sambandho. “Na ca bhikkhave attānaṃ ghātetabbaṃ. Yo ghāteyya, āpatti dukkaṭassā”ti hi vuttaṃ.

**350.** “Na ca bhikkhave paṭibhānacittaṃ kārapetabbaṃ itthirūpakaṃ purisarūpakaṃ. Yo kārapeyya, āpatti dukkaṭassa. Anujānāmi, bhikkhave, mālakammaṃ latākammaṃ makaradantakaṃ pañcapāṭika”nti (cūḷava. 299) vuttatā “**cittapotthakarūpāni, na kare na ca kāraye**”ti vuttaṃ. **Bhuñjantanti** (cūḷava. aṭṭha. 316) vippakatabhojanaṃ. “Na bhikkhave vippakatabhojano bhikkhu vuṭṭhāpetabbo. Yo vuṭṭhāpeyya, āpatti dukkaṭassā”ti (cūḷava. 316) hi vuttaṃ.

**351. Yānānīti** vayhaṃ ratho sakaṭaṃ sandamānikādīni gilānassa abhiruhituṃ kappanti, siviko ca kappati. Evaṃ sabbattha. “Anujānāmi, bhikkhave, gilānassa yānaṃ, purisayuttaṃ hatthavaṭṭakaṃ, sivikaṃ pāṭaṅki”nti (mahāva. 253) hi vuttaṃ.

**352. Davanti** keḷiṃ. “Na bhikkhave buddhaṃ vā dhammaṃ vā saṅghaṃ vā ārabba davo kātabbo. Yo kareyya, āpatti dukkaṭassā”ti (pāci. 627) hi vuttaṃ. Tasmā “kiṃ buddho silakabuddho, udāhu paṭibuddho”ti vā “kiṃ dhammo godhammo ajadhammo”ti vā “kiṃ saṅgho ajasaṅgho migasaṅgho”ti vā evamādinā nayena yo davaṃ karoti, tassa dukkaṭanti veditabbaṃ. “Tumhākaṃ cīvamaṃ dassāma, pattaṃ dassāmā”tiādīnā nayena sāmaṇeraṃ vā upasampannaṃ vā aññassa antamaso dussīlassāpi parisabhūtaṃ attano upaṭṭhākakaraṇatthaṃ upalāḷane dukkaṭanti attho. “Na bhikkhave aññassa parisā apalāḷetabbā. Yo apalāḷeyya, āpatti dukkaṭassā”ti hi vuttaṃ.

**353.** Kāyaṃ (cūḷava. 411) vā ūruṃ vā nimittaṃ vā vivarivā bhikkhunīnaṃ na dassayeti sambandho. Kaddamudakādīnā tā bhikkhuniyo na siñceyyāti attho. Na kevalaṃ kaddamudakādikeneva, vippasannaudakarajanakaddamādīsipi yena kenaci osiñcantassa dukkaṭameva.

**354. Bālanti** ettha **bālo** nāma yo ovādaṃ gahetvā pātimokkhuddesakassa ārocetvā pāṭipade paccāharitabbanti na jānāti. **Gilāno** nāma yo ovādaṃ gahetvā uposathaggaṃ gantvā ārocetuñca paccāharituñca na sakkoti. **Gamiyo** nāma yo paṭidesaṃ gantukāmo.

“Na bhikkhave ovādo na gahetabbo. Yo na gaṇheyya, āpatti dukkaṭassā”ti (cūḷava. 414) ca “anujānāmi, bhikkhave, ṭhapetvā bālaṃ, ṭhapetvā gilānaṃ, ṭhapetvā gamikaṃ, avasesehi ovādaṃ gahetu”nti (cūḷava. 414) ca “na bhikkhave ovādo na paccāharitabbo. Yo na paccāhareyya, āpatti dukkaṭassā”ti (pāci. 415) ca vuttatā bhikkhunīhi terasiyaṃ vā cātuddasiyaṃ vā āgantvā “ayaṃ uposatho cātuddaso”ti vā “pannaraso”ti vā “kadā ayya uposatho”ti vā pucchite “cātuddaso”ti vā “pannaraso”ti vā “sve bhagini uposatho”ti vā ācikkhitabbaṃ. Tāhi bhikkhunīhi uposathadivase āgantvā “bhikkhunisaṅgho ayya bhikkhusaṅghassa pāde vandati, ovādūpasaṅkamanañca yācati, labhatu kira ayya bhikkhunisaṅgho ovādūpasaṅkamana”nti evaṃ yācitabbaṃ, taṃ vacanaṃ paṭiggahetvā uposathagge pātimokkhuddesakassa “bhikkhunisaṅgho, bhante, bhikkhusaṅghassa pāde vandati,



ovādūpasaṅkamaṇa yāceti, labhatu kira, bhante, bhikkhuniṅgho ovādūpasaṅkamaṇa’nti ācikkhitabbaṃ. Pātimokkhuḍḍesakenāpi sace tatha bhikkhunovādako atthi, ‘‘itthannāmo bhikkhu bhikkhunovādako sammato, taṃ bhikkhuniṅgho upasaṅkamatū’’ti vattabbaṃ. Sace natthi, ‘‘ko āyasmā ussahati bhikkhuniyo ovaditu’’nti pucchitvā sace atthi aṭṭhahaṅgehi samannāgato bhikkhu, taṃ tattheva sammannitvā vuttanayeneva ovādappaṭiggāhakassa ārocetabbaṃ. Yadi natthi koci bhikkhu bhikkhunovādako sammato, ‘‘pāsādikena bhikkhuniṅgho sampādetū’’ti vattabbaṃ. Tena bhikkhunā ‘‘sādhū’’ti sampaṭicchitvā pāṭipade bhikkhunīnaṃ ‘‘natthi koci bhikkhu bhikkhunovādako sammato, pāsādikena bhikkhuniṅgho sampādetū’’ti vattabbaṃ. Tāhipi ‘‘sādhū ayyā’’ti sampaṭicchitabbaṃ. Iminā nayena gaṇapuggalesupī vacanabhedo veditabbo.

**355. Lokāyatam** (cūlava. 286; cūlava. aṭṭha. 286) nāma vitaṇḍasatthaṃ. ‘‘Na bhikkhave āsittakūpadhāne bhuñjitabbaṃ. Yo bhuñjeyya, āpatti dukkaṭassā’’ti (cūlava. 264) vuttatā ‘‘**peḷāyapi na bhuñjeyyā**’’ti vuttaṃ.

**356.** Gihipārutam na pārūpeyya, gihinivāsanam na nivāseyyāti attho. ‘‘Na bhikkhave gihinivatthaṃ nivāsetabbaṃ hatthisoṇḍakaṃ macchavāḷakaṃ catukaṇṇakaṃ tālavaṇṇakaṃ satavalikaṃ. Yo nivāseyya, āpatti dukkaṭassā’’ti (cūlava. 280) hi vuttaṃ. Parimaṇḍalato aññathā pārūpanam, sabbametam **gihipārutam** nāma. Tam pana na pārūpetabbanti attho. **Samvelliyanti** ettha kaccham bandhitvā na nivāseyyāti attho. **Dāyanti** (cūlava. 283; cūlava. aṭṭha. 283) araṇṇam. Nālimpayeyyāti sambandho.

**357.** Vaḍḍhiṇca na payojaye, noñātake nappavārite na yāceti attho. **Aññassāti** ettha (cūlava. 420; cūlava. aṭṭha. 420) ‘‘tumhe paribhuñjathā’’ti niyametvā dinnam sahadhammikānampi dātum na vaṭṭati. Aggam gaḥetvā vā katipāham bhutvā vā puna dadeyyāti attho.

**358. Uddissa yācaneti** ettha (pāci. aṭṭha. 679) ‘‘amhākaṃ vihāre itthannāmena idaṇcīdaṇca kata’’nti vā ‘‘karissanti’’ti vā evaṃ uddissa rakkaṃ yācaneti attho. **Ñatvāñatvā vāti** evaṃ ‘‘amhehi yāciyamāna imesaṃ daṇḍessanti’’ti tesam daṇḍinaṃ ñatvā vā añatvā vāti attho. Tehi pana **daṇḍite so daṇḍo** uddissa yācantānaṃ **gīvāva** bhaṇḍadeyyam hoti evāti attho. ‘‘Iminā ca iminā ca idaṇca idaṇca kataṃ, ettakaṃ daṇḍam gaṇhathā’’ti **sayaṃ daṇḍāpane pana** assa daṇḍassa agghabhedena pārājikathullaccayaḍukkaṭā ñeyyāti attho.

**359.** Anathāya assa corassa bhāsiteti sambandho. Rājarājamahāmattādīhi **tassa corassa daṇḍam gaṇhante** assa bhikkhussa **tattakaṃ** gīvāti attho.

**360.** Vighāsam (pāci. 825-826) vā uccāram vā saṅkāram vā muttam vā pākāraḍḍānaṃ bahi chaḍḍeyya, dukkaṭanti attho. **Vaḷaṅje nāvalokiyāti** imināva avaḷaṅjanakāle nāvaloketvā chaḍḍetum vaṭṭatīti dīpeti. Na kevalam tattheva, atha kho harite vāpi vīhādināḷikerādiropime chaḍḍentassa dukkaṭamevāti attho.

**361. ‘‘Upahāram karomā’’ti vutteti** pucchiteti adhippāyo.

**362.** Kīḷatthaṃ (pāci. 979; pāci. aṭṭha. 978) kataṃ rājāgāram vā pokkharaniṃ vā uyyānaṃ vā cittāgāram vā āramam vā daṭṭhum gacchato pade pade dukkaṭanti attho.

**363.** Āsanena (cūlava. 364) nave na paṭibāheyya, uṅhe (mahāva. 67, 78, 79; cūlava. 376, 378, 380, 382) cīvaram na nidaheyya. **Gurunāti** ācariyādinā paṇāmito khamāpeyyāti sambandho.

**364. Āpattīhi ca sattahīti** (vajira. ṭī. pācittiya 26) sattahi āpattīhi bhikkhum parammukhā akkosanena ca ‘‘assaddho appasanno bījabhōjī’’tiādinā aññeneva vā akkosanena ca dukkaṭanti adhippāyo.

**365.** Saddhādeyyaṃ (mahāva. aṭṭha. 361) cīvaraṃ vā piṇḍapātaṃ vāti attho. “Na bhikkhave saddhādeyyaṃ vinipātetabbaṃ. Yo vinipāteyya, āpatti dukkaṭassā”ti (mahāva. 361) hi vuttaṃ. “Anujānāmi, bhikkhave, mātāpitūnaṃ dātu”nti (mahāva. 361) vuttatā **“labbhaṃ pitūna”**nti vuttaṃ.

**366.** Vassaṃvuttho aññatrāti sambandho, aññasmiṃ vihāreti attho. **Aññatoti** aññavihārato. “Na bhikkhave aññatra vassaṃvutthena aññatra cīvarabhāgo sādītabbo. Yo sādīyeyya, āpatti dukkaṭassā”ti (mahāva. 364) hi vuttaṃ. **Tesanti** tasmīṃ vihāre taṃ cīvaraṃ bhājetvā gaṇhituṃ yuttānaṃ bhikkhūnaṃ dhuraṇikkhepato hoti bhaṇḍagghena kāriyoti attho.

**367.** Saha antarena uttaroti **santaruttaro**, gāmaṃ na paviseyyāti attho. “Na bhikkhave santaruttarena gāmo pavisitabbo. Yo paviseyya, āpatti dukkaṭassā”ti (mahāva. 362) hi vuttaṃ. **Kallo vāti** agilāno. Saupāhano gāmaṃ na paviseyyāti sambandho. “Na bhikkhave cāmaribījanī dhāretabbā. Yo dhāreyya, āpatti dukkaṭassā”ti (cūlava. 269), “anujānāmi, bhikkhave, tisso bījaniyo vākamayaṃ usīramayaṃ morapiñchamaya”nti (cūlava. 269) ca vuttatā **“na dhāreyya cāmarīmakasabījani”**nti vuttaṃ. Makasabījanī pana dantavisāṇadārudaṇḍakāpi vaṭṭati.

**368.** Ārāmato bahīti sambandho. “Na bhikkhave chattaṃ dhāretabbaṃ. Yo dhāreyya, āpatti dukkaṭassā”ti, “anujānāmi, bhikkhave, gilānassa chatta”nti ca vuttatā agilāno ārāmato bahi na labhati, cīvaraguttiyādiatthāya agilānopi labhatīti attho.

**369.** **Gāheyya nubhatokājanti** na gāheyya ubhatokājaṃ. **Ekantarikakājanti** ekatokājañca antarakājañca. Sīsabhāro ca khandhabhāro ca kaṭibhāro ca **sīsakkhandhakaṭibhārā**. “Na bhikkhave ubhatokājaṃ haritabbaṃ. Yo hareyya, āpatti dukkaṭassā”ti (cūlava. 281), “anujānāmi, bhikkhave, ekatokājaṃ antarakājaṃ sīsabhāraṃ khandhabhāraṃ kaṭibhāraṃ olambaka”nti (cūlava. 281) ca vuttatā ubhatokājameva na vaṭṭati, sesāni vaṭṭantīti veditabbā.

**370.** **Anokāsakatanti** (mahāva. 153) yo paṭhamameva “karohi me āvuso okāsaṃ, ahaṃ taṃ vattukāmo”ti evaṃ akatokāsaṃ āpattiyā codeyya, tassa dukkaṭaṃ hotīti attho. **Tathāti** dukkaṭamevāti attho.

**371.** **Pakataṅgulena**, na sugataṅgulenāti attho.

**372.** Mūgabbatādiṃ (mahāva. 209; mahāva. aṭṭha. 209) titthiyabbaṃ yadi gaṇheyya, dukkaṭanti attho. **Ādi**-saddena govatakukkuravatādayo saṅgahitā. **Tathāti** (mahāva. 303; mahāva. aṭṭha. 303) nhāpitapubbako khurabhaṇḍaṃ yadi parihareyya, dukkaṭamevāti attho.

**373.** **Yaṃ kiñcīti** (kaṅkhā. aṭṭha. kuṭikārasikkhāpadavaṇṇanā) nhāpitatuṇṇakārakammādi yaṃ kiñci hatthakammanti attho. **Tadanusāratoti** hatthakammayācanānusāratoti attho. Sace evaṃ yācato hatthakammamūlameva deti, taṃ aññassa dāpetvā kāretuṃ vaṭṭatīti attho. Nikkammaṃ pana hatthakammavasena ayācitvāpi “ehi imaṃ karohi”ti kāretuṃ kappatīti attho. **Yaṃ kiñciparasantakanti** yaṃ kiñci dārutīṇādikāṃ aparasantakāṃ apariggahitaṃ āharāpetuṃ kappatīti adhippāyo.

**374.** **Gihīnanti** gihīnaṃ santakaṃ. **Gopaketi** rakkhake. Yattakaṃ deti, tattakaṃ gahetuṃ kappatīti attho. **Yathāparicchedanti** “divase divase ettakaṃ ucchunāḷikerāṃ ambapakkāṃ tumhe khādathā”ti paricchinditvā dinnameva tesu dentesu labbhatīti attho.

**375.** **Dvihāpajjeyyāti** dvīhi āpajjeyya. Katamehi dvīhīti ce, te dassetuṃ **“kāyavācāhī”**ti vuttaṃ, “dvīhākārehi āpattim āpajjati, kāyena āpajjati, vācāya āpajjati”ti (pari. 322) hi vuttaṃ. Kāyavācāhi āpattim āpajjanto ca chahi ākārehi āpattim āpajjati, tāni dassetuṃ **“alajjīñāṇakukkucapakatattā”**tiādīmāha. Ettha (pari. 295) pana akappiyabhāvaṃ jānanto eva vītikkamaṃ karonto **alajjitāya** āpajjati nāma. Kappiyākappiyaṃ ajānitvā āpajjanto **aññāṇatāya**.

Kappiyaṃ nu kho, no nu kho”ti saṃsaye uppanne tamabhivitaritvā vītikkamaṃ karonto **kukkuccapakatattā** āpajjati. Sahaseyyādiṃ āpajjanto **satiplavā**, satisammosāti attho. Acchamaṃsaṃ “sūkaramaṃsa”nti vā sūkaramaṃsaṃ “acchamaṃsa”nti vā khādanto **akappiye kappiyasaññitāya ca kappiye akappiyasaññitāya** ca āpajjatīti veditabbo.

**376.** Alajjitāya vā aññānatāya vā āpattiṃ kāyavācāhi chādayeti attho. **Eke vā** ekasmiṃ vā. **Liṅgeti** liṅgaparivattanato. Evaṃ catudhā āpattivuṭṭhānaṃ hotīti attho. Tiṇavatthāraḥasamathaabbhānādīnaṃ vasena **saṅghe** āpattiṃ vuṭṭhātīti veditabbaṃ nissajjanādīsu gaṇe. Ekassa santike vuṭṭhānaṃ pākaṭameva. “Yā āpattiyo bhikkhūnaṃ bhikkhunīhi asādhāraṇā, tāhi āpattihi anāpatti”ti (pārā. 69) vacanato liṅgaparivattane āpattivuṭṭhānaṃ ñātābbaṃ.

**377. Paccayadvayeti** cīvare ca piṇḍapāte ca. Na kevalaṅca ime eva, nimittakammampi na labbhateva, gāthābandhasukhatthaṃ pana na vuttaṃ. Tattha **nimittakammaṃ** nāma yaṃ kiñci paresaṃ paccayadānaṃyojanakaṃ kāyavacīkammaṃ. Khādanīyaṃ gahetvā gacchante disvā “kiṃ khādanīyaṃ labhitthā”tiadinā nayena tassa pavatti veditabbā. **Parikathā** nāma yathā yathā taṃ labhati, tathā tathā parivattetvā kathanāṃ. “Etarahi bhikkhū piṇḍapātena kilamanti”tiadinā nayena tassa pavatti veditabbā. **Obhāso** nāma paccayappaṭisaṃyuttakathā. **Viññatti** pana pākaṭā eva. **Tatīyeti** senāsane. Senāsane pana nimittobhāsaparikathā vaṭṭanti, viññatti eva ekā na vaṭṭati. Tattha **nimittakammaṃ** nāma upāsake disvā senāsanatthaṃ bhūmiparikammakaraṇādi. **Obhāso** nāma “upāsakā, tumhe kuhiṃ vasathā”ti “pāsāde, bhante”ti vutte “kiṃ bhikkhūnaṃ pāsādo na vaṭṭati”tiadikaṃ vacanaṃ. **Parikathā** nāma “bhikkhūnaṃ senāsaṃ sambādha”nti vacanaṃ. **Seseti** gilānapaccaye.

**378. Na ruhatīti** na hoti. **Accaye dānanti** accayadānaṃ. Pañcasu sahadhammikesu yena kenaci kālaṃ karontena “mamaccayena mayhaṃ parikkhāro upajjhāyassa hotu, ācariyassa hotu, aññassa vā kassaci hotu”ti vutte tesāṃ na hoti, tasmā vuttaṃ “na ruhatī”ti. **Saṅghasseva ca taṃ hotīti** yadi bhikkhusāmaṇerehi evaṃ vuttaṃ, tasmīṃ matepi bhikkhusaṅghasseva hoti, bhikkhunisikkhamānasāmaṇerehi ce vuttaṃ, tasmīṃ mate bhikkhunisaṅghassa taṃ hotīti attho. **Gihīnaṃ pana rūhatīti** gihīnaṃ pana accayadānaṃ eva sabbesaṃ ruhatīti vuttaṃ hoti.

**379. Upassayeti** bhikkhunivihāre. **Dāyajjoti** tassa parikkhārassa dāyajjo. **Sesepīti** sace bhikkhunisikkhamānasāmaṇeriyo bhikkhuvihāre kālaṃ karonti, tāsāṃ parikkhārānaṃ bhikkhusaṅghova dāyajjoti attho.

**380. Purimassevāti** ettha “imaṃ parikkhāraṃ netvā asukassa dehi”ti dīnaṃ purimasseva hotīti attho. “Asukassa dammī”ti dīnaṃ pana pacchimasseva hoti pariccajītvā dīnattā. Imaṃ vidhiṃ ñatvāva vissāsaṅgāhaṃ vā gaṇheyya, matakacīvaraṃ vā adhiṭṭheti sambandho. **Matakacīvaraadhiṭṭhānaṃ** nāma ghaṇṭiṃ paharivā kālaṃ ghoṣetvā thokaṃ āgametvā sace bhikkhū āgacchanti, tehi saddhiṃ bhājetabbāni, no ce āgacchanti, “mayhimāni cīvarāni pāpuṇanti”ti adhiṭṭhātābāni. Evaṃ adhiṭṭhite sabbāni tasseva honti, ṭhitikā pana na tiṭṭhati. Sace ekekaṃ uddharitvā “ayaṃ paṭhamabhāgo mayhaṃ pāpuṇāti, ayaṃ dutiyabhāgo”ti evaṃ gaṇhāti, gahitāni ca sugahitāni honti, ṭhitikā ca tiṭṭhati. Evaṃ pāpetvā gaṇhantenāpi adhiṭṭhitameva hoti.

**381.** Lohabhaṇḍe paharaṇiṃ ṭhapetvā sabbāṃ kappatī, dārubhaṇḍe ca dārujaṃ pattaṅca pādukaṅca, pallaṅkaṅca āsandiṅca ṭhapetvā sabbāṃ kappatī, mattikāmaye katakaṅca kumbhakārikaṅca ṭhapetvā sabbāṃ kappatīti attho. “Anujānāmi, bhikkhave, ṭhapetvā paharaṇiṃ sabbāṃ lohabhaṇḍaṃ, ṭhapetvā āsandiṃ pallaṅkaṃ dārupattaṃ dārupādukaṃ sabbāṃ dārubhaṇḍaṃ, ṭhapetvā katakaṅca kumbhakārikaṅca sabbāṃ mattikābhaṇḍa”nti (cūlava. 293) hi vuttaṃ. Ettha **katakanti** padumakaṇṇikākārena katamallakanti adhippetāṃ. Dhaniyasseeva sabbamattikāmayā kuṭi kumbhakārikanti. Pakiṇṇakavinicchayo.

Pakiṇṇakaniddesavaṇṇanā niṭṭhitā.

## 42. Desanāniddesavaṇṇanā

**382.** Bhikkhubhāvassa (pārā. aṭṭha. 2.198) yo cāgo, sā pārājikadesanāti attho. Vuttañhetam “visuddhāpekkhoti gihi vā hotukāmo upāsako vā hotukāmo ārāmiko vā hotukāmo sāmaṇero vā hotukāmo”ti (pārā. 198). Tasmā gihibhāvādikamyeva pārājikaṃ āpannassa visuddhi nāma, aññatarassa visuddhi eva natthi. “Chādeti jānamāpannaṃ, parivaseyya tāvatā”tiādinā nayena heṭṭhā vuttavidhiṃ sandhāya “**yathāvuttena vuṭṭhāna**”nti vuttaṃ.

**383.** Idāni vattabbataṃ sandhāya “**eva**”nti vuttaṃ.

**384. Paṭidesemīti ārocemi.** Etāni ahaṃ **etānāhaṃ.**

**386.** (Ka) yaṃ saṅgho gilānassa ticīvarena vippavāsasammutiṃ deti, taṃ aññatrāti attho.

(Kha) **akālacīvaraṃ** (pārā. 500) nāma “anattate kathine ekādasamāse uppannaṃ, atthate kathine sattamāse uppannaṃ, kālepi ādissa dīnaṃ, etaṃ akālacīvaraṃ nāmā”ti.

(Ga) **purāṇacīvaraṃ** (pārā. 505) nāma “sakiṃ nivatthampi sakiṃ pārutampī”ti vuttaṃ. **Aññātikā** nāma mātito vā pitito vā yāva sattamā kulaparivaṭṭā asambandhā. Nisīdanapaccattharaṇadhovāpane dukkaṭaṃ.

(Gha) **aññatra pārivattakāti** (pārā. 512) ettha harītakīkhaṇḍampi vaṭṭati. **Cīvaraṃ** nāma idha vikappanūpagapacchimato paṭṭhāya adhippetam.

(Ña) **aññatra samayāti** (pārā. 519) ettha “acchinnacīvaro vā hoti bhikkhu naṭṭhacīvaro vā”ti evaṃ vuttaṃ samayanti attho.

(Ca) “santaruttaraparamaṃ tena bhikkhunā tato cīvaraṃ sādītappa”nti (pārā. 524) vuttattā “**tatuttari**”ti vuttaṃ. Ettha pana “sace tīṇi naṭṭhāni honti, dve sādītabbāni. Dve naṭṭhāni, ekaṃ sādītappaṃ, ekaṃ naṭṭhaṃ, na kiñci sādītappa”nti (pārā. 524) vuttaṃ.

(Cha-ja) “kīdisena te (pārā. 529), bhante, cīvarena attho, kīdisaṃ te cīvaraṃ cetāpemi”ti evaṃ appavāritoti attho. **Vikappanti** viṣiṭṭhakappaṃ adhiḱavidhānaṃ āpannaṃ. Idha purimaṃ ekassa, dutiyaṃ bahūnaṃ vasena vuttaṃ, ettakaṃ nānattaṃ.

(Jha) **atirekatikkhattunti** ettha kenaci yaṃ kiñci akappiyavattumaṃ ānetvā “idaṃ kho me, bhante, āyasmantaṃ uddissa cīvaracetāpannaṃ ābhattaṃ, paṭiggaṇhatu āyasmā cīvaracetāpanna”nti vutte “na kho mayaṃ, āvuso, cīvaracetāpannaṃ paṭiggaṇhāma, cīvaraṇca kho mayaṃ paṭiggaṇhāma kālena kappiya”nti vattabbaṃ. Evaṃ vutte sace so “atthi koci kappiyakārako”ti vadati, cīvaratthikena ṭhapetvā pañca sahadhammike yo koci uddisitabbo “eso kho, āvuso, bhikkhūnaṃ veyyāvaccakaro”ti, ettakameva vattabbaṃ. Evaṃ vutte sace dāyako tassa hatthe akappiyavattumaṃ datvā “eso ayyassa cīvaraṃ cetāpetvā dassati”ti vatvā gacchati, taṃ upasaṅkamitvā dvattikkhattumaṃ codetabbo sāretabbo “attho me, āvuso, cīvarena”ti, ettakameva vattabbaṃ, “dehi me cīvara”ntiādinā na vattabbaṃ. Evaṃ tikkhattumaṃ codanāya taṃ cīvaraṃ labhati, iccetaṃ kusalaṃ. No ce labhati, chakkhattuparamaṃ tuṇḥībhūtena ṭhātabbaṃ, na āsane nisīditabbaṃ, na āmisamaṃ paṭiggahetabbaṃ, na dhammo bhāsītabbo. “Kiṃ kāraṇā āgatosī”ti vutte “jānāhi, āvuso”ti ettakameva vattabbaṃ. Sace nisajjādīni karoti, ṭhānaṃ bhañjati. Vattabhedadukkaṭaṇca āpajjatīti vadanti. Evaṃ pana appaṭipajjitvā atirekatikkhattumaṃ codanāya atirekachakkhattumaṃ ṭhānena sace nipphādeti, nissaggiyanti attho.

(Ña) **santhatam** (pārā. 544) nāma santharivā kataṃ hoti avāyimaṃ. Ekakosiyamaṃsunāpi ce missetvā karoti, nissaggiyaṃ.

(Ṭa) **suddhakāḷakānanti** (pārā. 547-549) aññehi amissitānanti attho. “Kāḷakam nāma dve kāḷakāni jātikāḷakam vā rajanakāḷakam vā”ti vuttam.

(Ṭha) **anādiyivā...pe... tulanti** (pārā. 554) ettha pana yattakehi eḷakalomehi kattukāmo hoti, tesu dve koṭṭhāsā kāḷakānam, eko odātānam, eko gocariyānam ādātāboti vinicchayo. Ekassāpi kāḷakalomassa atirekabhāge sati nissaggiyameva.

(Ḍa) **ūnakachabbassānīti** (pārā. 562) chabbassato orabhāge.

(Ḍha) nisīdanasanthataṃ (pārā. 567) pana kārāpentena purāṇasanthatassa ekapassato vaṭṭam vā caturassam vā chinditvā gahitaṭṭhānam yathā vidatthimattam hoti, evaṃ gahetvā ekadesam vā santharitabbaṃ, vijaṭetvā vā santharitabbaṃ.

(Ta) na kevalam dhovāpane (pārā. 578) eva nissaggiyam, rajanepi nissaggiyameva.

(Da) rūpiyapaṭiggahaṇasseva (pārā. 589) paṭikkhattatā paṭiggahitaparivattane dosam apassantā katākatādivasena anekavidham jātarūparivattanam karonti, tam sandhāya “**nānappakāraka**”nti vuttam.

**387-9.** Āpattiṃ desetvā pacchā kattabbaṃ dassetuṃ “**athā**”ti vuttam. **Gihim vadeti** sace tattha āgacchati ārāmiko vā upāsako vā, tam vadeyyāti attho. Evaṃ vutto **so** “iminā kiṃ āharāmi”ti ce vadeyyāti attho. **Avatvāmanti** “imaṃ vā imaṃ vā āharā”ti avatvāti attho. **Vadeti** “kappiyam ācikkhitabba”nti (pārā. 584, 589) vacanato “pabbajitānam sappi vā telam vā madhu vā phāṇitam vā vaṭṭatī”ti evaṃ ācikkhitabbaṃ, “imaṃ nāma āharā”ti na vattabameva. **Dvepeteti** dvepe ete rūpiyapaṭiggāhakaṇca rūpiyasabyohārikaṇcāti attho. **Aññenāti** antamaso ārāmikenāpi laddhabhāgo na kappati eva.

**390.** Antamaso (pārā. aṭṭha. 2.583-4) tannibattā rukkhacchāyāpi na kappatīti. **Nissaṭṭham paṭiladdhampīti** ettha yathā rūpiyasamvohāram katvā laddhavatthuto ābhataṃ na kappati, tathā kosiyamissakasanthatādittayampi na kappati. Na kevalam tasseva, aññesampi na kappateva “aññena kataṃ paṭilabhivā paribhuñjati, āpatti dukkaṭassā”ti (pārā. 545, 550, 555) vuttattā.

**391.** Evaṃ no ce labhetha, **so** ārāmikādiko “imaṃ chaḍḍehī”ti **samsiyo** vattabboti attho. Evampi no ce labheyya, **sammato** bhikkhu chaḍḍeyyāti attho.

**392.** Paṭiggahitarūpiyaṇca parivattitarūpiyaṇca sandhāya “**etānī**”ti vuttam. **Dutiyapatto** nāma “ūnapañcabandhanena pattena aññam navaṃ pattaṃ cetāpeyya, nissaggiya”nti (pārā. 612) vuttapatto. So ca etāni ca saṅghe nissaṭṭhum labbhareti sambandho. “Saṅghamajjhe nissajjitabbaṃ, bhikkhuparisāya nissajjitabba”nti (pārā. 584, 589) ca vuttattā na gaṇapuggalānam nissajjitum vaṭṭati. Sesāni pana tīṇi cīvarādivatthūni “nissajjitabbaṃ saṅghassa vā gaṇassa vā puggalassa vā”ti vuttattā (pārā. 463) saṅghādīnam nissajjitum vaṭṭati. **Bhāsantarenapīti** pāliyā vattum asakkontena damiḷabhāsādīsu aññatarāyapi nissajjitum vaṭṭatīti attho.

**393.** (Ka-ga) **nānappakārakam** nāma “cīvarapiṇḍapātasenāsanagilānapaccayabhesajjaparikkhārā, “antamaso cunṇapiṇḍopi dantakaṭṭhampi dasikasuttampī”ti (pārā. 595) **pāliyam** vuttam. **Cetāpitoti** (pārā. 613) yācitvā gahito.

**394.** **Sammannitvāna pattagāhakam saṅghassa pattantanti** (pārā. 614; kaṅkhā. aṭṭha. ūnapañcabaddhanasikkhāpadavaṇṇanā) ya antimam pattaṃ, tam tassa dāpayeti attho.

**395.** (Kha) **paridahitaṃ nissaggiyanti** ettha (pārā. 626-628; pārā. aṭṭha. 2.628) pana t̥hatvā vassikasāṭikāya pariyesanakkhettaṃ karaṇakkhettaṃ nivāsanakkhettaṃ adhiṭṭhānakkhettaṃ catubbidhaṃ khettaṅca kucchisamayo piṭṭhisamayoti duvidho samayo ca veditabbo. Kathaṃ? Gimhānamāsesu pacchimamāsassa purimo aḍḍhamāso **pariyesanakkhettaṃ**, pacchimo **karaṇakkhettaṅca nivāsanakkhettaṅca**, pariyesitumpi vaṭṭati, adhiṭṭhātuṃ pana na vaṭṭati. Vassikā pana cattāro māsā pariyesanādīnaṃ catunnampi khettaṃ. Ete eva pañca māsā **kucchisamayo** nāma. Itare satta māsā **piṭṭhisamayo**, tattha satuppādakaraṇaṃ na vaṭṭati.

(Ga) **acchinnanti** ettha “yo pana mama pattacīvarādīni vahanto mayā saddhiṃ carissatī”ti saññāya cīvaraṃ datvā puna sakasaññāya eva attano veyyāvaccamaṃ akarontaṃ disvā acchindati, so imaṃ āpattiṃ āpajjati. Kevalaṃ pariccajitvā dinnamaṃ gahetumeva na labhati.

(Gha) **suttaṃ viññāpetvā**ti ettha cīvarakārasamayādīsu cīvarasibbanādīnamatthāya suttaṃ viññāpetvāti attho. Aññathā suttaṃ viññāpetumeva na vaṭṭati. Viññattiyā eva laddhatantavāyehīti attho. Suttatantavāyānaṃ akappiyabhāve sati dīghato vidatthimatte, tiriyaṅtato hatthamatte vīte nissaggiyaṃ, ekato akappiyapakke dukkaṭaṃ.

(Ña) **vikappaṃ āpannanti** (pārā. 643) “idaṃ kho, āvuso, cīvaraṃ maṃ uddissa viyyati, āyataṅca karotha vitthataṅcā”tiādīnā adhikaṃ vidhānaṃ āpannanti attho.

(Ca) **acceka cīvaraṃ** (pārā. 649-650) nāma senāya gantukāmādīhi dinnamaṃ.

(Cha) **atirekachārattanti** (pārā. 654-655) chadivasato atirekaṃ. “Atthatakathinānaṃ vo, bhikkhave, pañca kappissanti, anāmantacāro asamādānacāro gaṇabhojanaṃ yāvadatthacīvaraṃ yo ca tattha cīvaruppādo, so nesaṃ bhavissatī”ti (mahāva. 306) vuttañisaṃsesu cīvaramāse asamādānacāraṃ t̥hapetvā sesānisamaṃsā labbhanti. Yadi asamādānacāro labbheyya, pāveyyakā bhikkhū vassaṃvutthā okapuññehi cīvarehi na bhagavantaṃ upasaṅkameyyuṃ, yasmā taṃ na labhanti, tasmā cīvaramāsepi ticīvaraṃ ādāya eva bhagavantaṃ upasaṅkamimsu. Tasmā veditabbaṃ asamādānacāraparihāraṃ atthatakathinā eva labhanti, na itareti vadanti.

**397.** (Kha) “ahaṃ, bhante, ekaṃ paṭidesanīyāpattiṃ, dve, sambahulā paṭidesanīyāpattiyo āpajji”nti imaṃ pana yesu potthakesu likhitaṃ, taṃ abhayagirivāsīnaṃ khuddasikkhāvasena dassitaṃ kira. Tattha “ahaṃ, āyasmā, sambahulā paṭidesanīyā āpattiyo āpanno, tāyo paṭidesemi. Ahaṃ, āyasmā, ekaṃ paṭidesanīyaṃ āpattiṃ āpanno, taṃ paṭidesemi”ti hi vuttaṃ. Amhākaṃ pana evaṃ desanāvīdhānaṃ natthi. “Gārayhaṃ, āvuso, dhammaṃ āpajjiṃ asappāyaṃ paṭidesanīyaṃ, taṃ paṭidesemi”ti (pāci. 553) vuttaṃ. **Samantapāsādikāyaṃ** (pāci. 553) “gārayhaṃ āvuso”tiādī paṭidesetabbākāradassana”nti vuttaṃ. **Kaṅkhāvitaraṇīyampi** (kaṅkhā. aṭṭha. paṭhamapaṭidesanīyasikkhāpadavaṇṇanā) “tassā desetabbākāro gārayhaṃ āvuso”tiādīnā nayena sikkhāpade dassitoyevā”ti vuttattā paṭhe āgatanayeneva desanāvīdhānaṃ veditabbaṃ. Sace dve honti, “gārayhe, āvuso, dve dhamme āpajjiṃ asappāye paṭidesanīye, te paṭidesemi”ti, “passatha, bhante, te dhamme”ti ca “gārayhe, āvuso, sambahule dhamme āpajjiṃ asappāye paṭidesanīye, te paṭidesemi”ti, “passatha, bhante, te dhamme”ti ca evaṃ yathānūrūpaṃ desanāvīdhānaṃ veditabbaṃ. Sesamaṃ vuttappakāramevāti.

**398.** **Adesanāgāminiyanti** (pari. 424 ādayo; pari. aṭṭha. 425) pārājikaṅca saṅghādisesaṅca na desayeti attho. **Anāpattiṅcā**ti anāpattiṃ eva “āpatti”nti na desaye. Lahukāpattiṃ pubbe desitaṃ puna na desayeti sambandho, nānāsaṃvāsaniṣṣimāṭṭhitānaṃ santike na desayeti attho. **Catupañcahīti** ettha samānavassikapavāraṇāyaṃ viya catūhi vā pañcahi vā ekato hutvā ekassa santike na desayeti attho. Dvinnamaṃ vā tiṇṇamaṃ vā vaṭṭati. Kathaṃ desetabbanti ce? Ekassa santike tīhipi ekato nisīditvā “ahaṃ, bhante, ekaṃ pācittiyāpattiṃ āpajjiṃ, taṃ tumhamūle paṭidesemi”ti evaṃ attanā āpannaāpattivasena vutte tena “passasi, āvuso, taṃ āpatti”nti evaṃ tikkhattuṃ vutte “āma, bhante, passāmi”ti vā “āmāvuso passāmi”ti vā vutte puna tena “āyatimaṃ saṃvareyyāthā”ti vā “saṃvareyyāsi”ti vā vutte

“sādhu sutṭhu saṃvarissāmī”ti vattabbaṃ, evaṃ desetabbaṃ. **Manasāti** vacībhedam akatvā kevalam citteneva na desayeti attho. **Apakatattānanti** antimavatthum ajjhāpanassa vā ukkhittakassa vā uposatho pavāraṇā vā ṭhapitā honti, tassa santike na desayeti attho. **Nānekāti** nānāpattiyo “ekā”ti vatvā na desayeti attho. Ekā pana “sambahulā”ti desitā hotīti. Desanāvinicchayo.

Desanāniddesavaṇṇanā niṭṭhitā.

### 43. Chandadānaniddesavaṇṇanā

**399.** Kammappatte saṅghe samāgateti sambandho. Etena saṅghe asamāgate chandadānaṃ na ruhatīti dīpitaṃ hotīti vadanti. Etthāyaṃ vicāraṇā – pañcabhikkhuke vihāre ekassa chandapārisuddhiṃ āharitvā sesānaṃ uposathādikaraṇaṃ anuññātaṃ **pāliyaṃ** (pari. 496-497) **aṭṭhakathāyañca** (pari. aṭṭha. 487-488). Tesu eko chandadāyako, eko chandahārako, te muñcitvā na ettha sannipatito saṅgho tiṇṇaṃ samūhabhāvato, tasmā asamāgatepi dātum vaṭṭati. Ārocentena pana samāgate eva ārocetabbaṃ. Idhāpi “**hareyyā**”ti vuttaṃ, na “**deseyyā**”ti. Tattha chandahārakena saddhiṃ kammappattānaṃ sannipāto veditabbo.

**400.** Idāni chandadānavidhiṃ dassetuṃ “**ekaṃ bhikkhu**”ntiādimāha (kaṅkhā. aṭṭha. nidānavāṇṇanā).

**401.** (Ka) “chandaṃ dammī”ti ettakameva alaṃ, “hara, ārocehī”ti imehi kiṃpayojananti ce? Vuccate – “anujānāmi, bhikkhave, tadahuposathe pārisuddhiṃ dentena chandampidātuṃ, santi saṅghassa karaṇīya”nti (mahāva. 165) vuttattā bhagavato āṇaṃ karontena “**chandaṃ dammī**”ti vuttaṃ. “Chandahārako ce, bhikkhave, dinne chande antarāmagge pakkamati, anāhaṭṭova hoti chando”ti (mahāva. 165) vuttattā chandahārakassa aññassa apakkamanatthāya pārisuddhiṃ dentena “idaṃ karohi evā”ti ānāpentena “**chandaṃ me harā**”ti vuttaṃ. “Chandahārako ce, bhikkhave, dinne chande saṅghappatto sañcicca nāroceti, āhaṭṭova hoti chando, chandahārakassa āpatti dukkaṭṭassā”ti (mahāva. 165) vuttattā “yaditvaṃ sañcicca nārocassasi, āpattim āpajjissasi, ārocehi evā”ti tassa ācikkhanto “**ārocehī**”ti āhāti evamettha imesaṃ padānaṃ sappayojanātaṃ veditabbā. Evaṃ pārisuddhidānepīti.

**402. Sesakammanti** yadi saṅgho uposathagge aññaṃ apalokanādikammaṃ karoti, taṃ kammaṃ vibādhati, vikopetīti attho.

**403. Dvayanti** uposathañca sesakammañcāti attho. **Nattanoti** attano uposathaṃ na sampādeti.

**405.** “Ekaṃsaṃ uttarāsaṅgaṃ karitvā ukkuṭikaṃ nisīditvā”tiādikam (mahāva. 213) **sabbūpacāraṃ katvānāti** attho.

**406.** “Itthannāmena pavāraṇā dinnā”ti **ārocetvā**.

**408. Paṭijāneyya nāhaṭṭāti** (mahāva. 164-165, 213) pāṭhe na āhaṭṭāti **nāhaṭṭā**, āhaṭṭā na hotīti attho. **Tathā heyyāti** vibbhamanādīni kareyyāti attho.

**409.** Sutto vā nārocayeyya, āhaṭṭā hotīti sambandho. **Anāpattivāti** anāpatti eva. Chandadānavinicchayo.

Chandadānaniddesavaṇṇanā niṭṭhitā.

### 44. Uposathaniddesavaṇṇanā

**411. Suttuddeso** saṅghasseva. **Sesānanti** dvinnaṃ tiṇṇaṃ vā.

**412. Pubbakaraṇe pubbakicce, pattakalle samāniteti** sabbapaṭhamam kattabbaṃ **pubbakaraṇam**. Tadanantaram kattabbaṃ **pubbakiccaṃ** nāma. Ettha –

“Sammajjanī padīpo ca, udakaṃ āsanena ca;  
Uposathassa etāni, pubbakaraṇanti vuccati.

“Chandapārisuddhiutukkhānaṃ, bhikkhugaṇanā ca ovādo;  
Uposathassa etāni, pubbakiccanti vuccatī”ti –. (mahāva. aṭṭha. 168);

Evam **aṭṭhakathāyam** vuttanayena pubbakaraṇaṅca pubbakiccaṅca veditabbaṃ.

“Uposatho yāvatikā ca bhikkhū kammappattā,  
Sabhāgāpattiyo ca na vijjanti;  
Vajjanīyā ca puggalā tasmim na honti,  
Pattakallanti vuccatī”ti –. (mahāva. aṭṭha. 168);

Vuttavasena pattakalle samānitate, pajjiteti attho. “Pañcime, bhikkhave, pātimokkhuddesā. Nidānaṃ uddisitvā avasesaṃ sutena sāvetabbaṃ, ayaṃ paṭhamo pātimokkhuddeso. Nidānaṃ uddisitvā cattāri pārājikāni uddisitvā avasesaṃ sutena sāvetabbaṃ, ayaṃ dutiyo pātimokkhuddeso. Nidānaṃ uddisitvā cattāri pārājikāni uddisitvā terasa saṅghādisese uddisitvā avasesaṃ sutena sāvetabbaṃ, ayaṃ tatiyo pātimokkhuddeso. Nidānaṃ uddisitvā cattāri pārājikāni uddisitvā terasa saṅghādisese uddisitvā dve aniyate uddisitvā avasesaṃ sutena sāvetabbaṃ, ayaṃ catuttho pātimokkhuddeso. Vitthārenea pañcamo. Ime kho bhikkhave pañca pātimokkhuddesā”ti (mahāva. 150) vuttattā so suttuddeso pañcadhā vibhāvītōti attho.

**413. Vināntarāyanti** (mahāva. 150) rājantarāyādidasavidhaṃ antarāyaṃ vinā saṅkhepenuddeso vinivārito paṭikkhittoti attho. **Therovāti** saṅghattherova. **Etthāti** pañcasu uddesesu. “Dvīsu vā tīsu vā visadesu therova issaro”ti **aṭṭhakathāyam** vuttattā avattantepi antarāye saṅkhittena uddisitum vaṭṭatīti adhippāyo. Kattha vuttanti ce? “Yo tattha bhikkhu byatto paṭibalo, tassādheyya”nti (mahāva. 155) vuttapāliya **aṭṭhakathāyam** “yo tattha bhikkhu byatto paṭibaloti ettha kiñcāpi daharassāpi byattassa pātimokkho anuññāto, atha kho ettha ayamadhippāyo – sace saṅghattherassa pañca vā cattāro vā tayo vā pātimokkhuddesā nāgacchanti, dve pana akhaṇḍā suvisadā vācuggatā honti, therāyattova pātimokkho. Sace pana ettakampi visadaṃ kātuṃ na sakkoti, byattassa bhikkhuno āyattova hotī”ti attho vutto. Pāliyaṃpi vuttameva “tehi, bhikkhave, bhikkhūhi eko bhikkhu sāmanta āvāsā sajjukaṃ pāhetabbo ‘gaccha, āvuso, saṅkhittena vā vitthārenea vā pātimokkhaṃ pariyāpuṇitvā āgacchā””ti (mahāva. 163).

**414. Uddisante vāti** (mahāva. 172) pātimokkhe uddisiyamāne samā vā thokatarā vā yadi āgaccheyyūṃ, uddiṭṭhaṃ suuddiṭṭhaṃ, tehi saddhiṃ nisīditvā avasesakaṃ sotabbanti attho.

**415. Uddiṭṭhamatte** (mahāva. 172) **vā sakalāya vā ekaccāya** vā parisāya **vuṭṭhitāya** samā vā thokatarā vā yadi āgaccheyyunti sambandho. **Pārisuddhinti** pārisuddhiuposathaṃ. **Kareyyesanti** kareyya esaṃ, etesaṃ santiketī attho. **Bahukātha ceti** atha bahukā ce, puna āgatā bahukā ceti attho,. “Uddissamāne, uddiṭṭhamatte ekaccāya vuṭṭhitāya sakalāya vuṭṭhitāyā”ti (mahāva. 172) āgatesu sabbavikkappesu pubbakiccaṃ katvā puna ādito paṭṭhāya pātimokkhaṃ uddiseti attho.

**416. Itarānanti** āgantukānaṃ. **Sacetaroti** sace cātuddasikoti attho. **Samānetarenuvattantūti** samā vā unā vā itare āgantukā purimānaṃ āvāsikānaṃ anuvattantūti attho. **Sacedhikāti** āgantukā sace adhikā, **purimā** āvāsikā **anuvattantūti** attho. **Sesepyayaṃ nayoti** “āgantukānaṃ pannaraso hoti, āvāsikānaṃ cātuddaso”ti itarepi samathokā āgantukā āvāsikānaṃ anuvattantūtiādinā nayena vinicchayo veditabboti



attho.

**417. Mūlaṭṭhāti** āvāsikā. **Samathokānaṃ** āgantukānaṃ. **Sāmaggiṃ dentu kāmatoṭi** yadi icchanti, dentūti attho.

**418.** No ce denti, āgantukehi bahi gantvāna uposatho kātabboti attho. Anicchāya sāmaggī deyyāti sambandho.

**419.** “Na bhikkhave pātimokkhuddesakena sañcicca na sāvetabbaṃ. Yo na sāveyya, āpatti dukkaṭassā”tivuttattā (mahāva. 154) “**sāveyya sutta**”nti vuttaṃ. “Anujānāmi, bhikkhave, pātimokkhuddesakena vāyamituṃ kathaṃ sāveyyanti, vāyamantassa anāpattī”ti (mahāva. 154) vuttattā “**sañcicca assāventassa dukkaṭa**”nti vuttaṃ.

**420. Tathāti** dukkaṭanti attho. **Kalloti** agilāno. **Pesitoti** āṇatto. “Na bhikkhave therena āṇattena agilānena na sammajjitabbaṃ. Yo na sammajjeyya, āpatti dukkaṭassā”tiādi (mahāva. 159) vuttaṃ.

**421-3.** Idāni pārisuddhiuposathaṃ dassetuṃ “**sammajjitvā**”tiādi vuttaṃ. Añjaliṃ (mahāva. 168) paggayhāti sambandho. **Teti** avasesā dve evaṃ samudīriyā vattabbāti attho. Ekaṃsaṃ uttarāsaṅgādikaraṇavasena samattapubbārambhena te dve bhikkhū navena evamīriyā vattabbāti attho.

**424-5.** Idāni dvīhi kattabbaṃ dassetuṃ “**dvīsu therenā**”ti vuttaṃ.

**426.** Ettāvata “anujānāmi, bhikkhave, catunnaṃ pātimokkhaṃ uddisitu”nti (mahāva. 168) ca “anujānāmi, bhikkhave, tiṇṇaṃ pārisuddhiuposathaṃ kātu”nti (mahāva. 168) ca “anujānāmi, bhikkhave, dvinnaṃ pārisuddhiuposathaṃ kātu”nti (mahāva. 168) ca vuttaṃ saṅghuposathañca pārisuddhiuposathañca dassetvā idāni yattha eko bhikkhu viharati, tassa anuññātaṃ adhiṭṭhānuposathaṃ dassetuṃ “**pubbakicca**”ntiādimāha. Ettha ca **pubbakiccaṃ** nāma sammajjanādikaṃyeva.

**427.** Saṅghuposathapārisuddhiuposathaadhiṭṭhānuposathānaṃ vasena taṃ taṃ uposathaṃ yadi kayirunti sambandho.

**428.** Vagge (mahāva. 173) ca samagge ca “vaggo”ti saññino ca “vaggo nu kho, samaggo nu kho”ti evaṃ **vimatissa** ca dukkaṭaṃ, “nassantete vinassantete, ko tehi attho”ti evaṃ anāgatānaṃ bhikkhūnaṃ atthibhāvaṃ ñatvā **bhedādhippāyena** uposathaṃ karoto **thullaccayaṃ** hotīti attho. Tadubhayepi “samaggo”ti saññino anāpatti.

**429-430. Sesasahadhammikā** nāma bhikkhuṃ ṭhapetvā avasesā cattāro. **Abhabbassāti** ettha paṇḍakathēyyasaṃvāsaka titthiyapakkantaka tiracchānagata mātughātaka pitughātaka arahantaghātaka bhikkhunidūsaka saṅghabhedaka lohituppādakaubhatobyañjanakā abhabbā gahitā. Ettha pana nāgamāṇavakādayo tiracchānagatapakkhikāti veditabbā. Etesaṃ nisinnaparisāyañca pātimokkhaṃ na uddiseti sambandho.

**Tathāti** yo pana saṅgho sabhāgāpattiko, sopi na uddise, parivutthena chandenapi na uddiseti attho. Ettha pana catubbidhaṃ pārivāsiyaṃ parisapārivāsiyaṃ rattipārivāsiyaṃ chandapārivāsiyaṃ ajjhāsaya pārivāsiyanti.

Ettha pana bhikkhū kenacideva karaṇīyena sannipatitā meghādīhi upaddutā “anokāsā mayam, aññatra gacchāmā”ti chandaṃ avissajjetvāva utṭhahanti. Idaṃ **parisapārivāsiyaṃ**. Kiñcāpi parisapārivāsiyaṃ, chandassa pana avissaṭṭhattā kammaṃ kātuṃ vaṭṭati.

Punapi bhikkhūnaṃ “uposathādīni karissāma”ti rattim sannipatitvā dhammaṃ suṇantānaṃyeva aruṇo uggacchati. Sace “cātuddasikaṃ karissāma”ti nisinnā, “pannaraso”ti kātuṃ vaṭṭati. Sace pannarasikaṃ kātuṃ nisinnā, pātipade anuposathe uposathaṃ kātuṃ na vaṭṭati, aññaṃ pana saṅghakiccaṃ kātuṃ vaṭṭati. Idaṃ **rattipārivāsiyaṃ** nāma.

Puna bhikkhū “yaṃkiñcideva abbhānādikammaṃ karissāma”ti sannipatitā honti, tatreko nakkhattapāṭhako evaṃ vadati “ajja nakkhattaṃ dāruṇa”nti, te tassa vacanena chandaṃ vissajjetvā tattheva nisinnā honti. Athañño āgantvā “kiṃ nakkhattena, karoṭhā”ti vadati. Idaṃ **chandapārivāsiyañceva ajjhāsayaṃpārivāsiyañca**. Tasmim pārivāsiye puna chandapārisuddhiṃ anānetvā kammaṃ kātuṃ na vaṭṭati. Idaṃ sandhāya “**chandena parivutthenā**”ti vuttaṃ.

**431. Āpannamāpattiṃ** (mahāva. 169; mahāva. aṭṭha. 169) **adesayitvāna** vā “ahaṃ, āvuso, itthannāmāya āpattiyā vematiko, yadā nibbematiko bhavissāmi, taṃ āpattiṃ paṭikarissāmi”ti vatvā **vimaṭṭiṃ anāvikatvāna** vā “na ca bhikkhave anuposathe uposatho kātabbo aññatra saṅghasāmaggiyā”ti (mahāva. 183) vuttattā **anuposathepi vā kātuṃ na ca kappatīti** attho.

**432.** “Na ca bhikkhave tadahuposathe sabhikkhukā āvāsā abhikkhuko āvāso vā anāvāso vā gantabbo aññatra saṅghena aññatra antarāyā”ti (mahāva. 181) vuttattā “**aṭṭhitoposathāvāsā**”ti (mahāva. aṭṭha. 181) vuttaṃ. **Na vaje na gacche. Adhiṭṭhātum sīmameva vāti** sace vihāre uposathaṃ karonti, uposathādhiṭṭhānatthaṃ sīmāpi nadīpi na gantabbā. Sace panettha koci bhikkhu hoti, tassa santikaṃ gantuṃ vaṭṭati. Vissatṭhauposathāpi āvāsā gantuṃ vaṭṭati, evaṃ gato adhiṭṭhātumpi labhatīti. Uposathavinicchayo.

Uposathaniddesavaṇṇanā niṭṭhitā.

#### 45. Pavāraṇāniddesavaṇṇanā

**433.** “Anujānāmi, bhikkhave, pañcannaṃ saṅhe pavāretu”nti (mahāva. 215) vuttattā “**sesā saṅghappavāraṇā**”ti (mahāva. 215 ādayo) vuttā.

**434. Ajja pavāraṇāti** ettha (mahāva. 215 ādayo) pana cātuddasikāya pavāraṇāya “ajja pavāraṇā cātuddasi”ti pubbakiccaṃ kātappaṃ, pannarasiyaṃ “ajja pavāraṇā pannarasi”ti.

**437.** Theresu ukkuṭikaṃ nisajja pavārentesu sayāṃ pana navo yāva pavāreti, tāva ukkuṭikova acchatūti attho. “Na bhikkhave theresu ukkuṭikaṃ nisinnesu pavārayamānesu āsanesu acchitappaṃ. Yo accheyya, āpatti dukkaṭassa. Anujānāmi, bhikkhave, tadamantarā ukkuṭikaṃ nisīdituṃ, yāva pavāreti, pavāretvā āsane nisīditu”nti (mahāva. 211) hi vuttaṃ.

**440-2.** Evaṃ tevācikaṃpavāraṇaṃ dassetvā idāni dhevācikaekavācikasamānavassikappavāraṇāsu kattappaṃ dassetuṃ “**dānenā**”tiādīmāha. Tattha **dānenāti** dānena vā. **Dhammasākacchāti** iminā dhammakathāsuttasaṅgāyanāvinayavinicchayādayo gahitā. Dānena vā dhammasākacchāya vā kalahena vā rattiyā khepitaḥāvato tevācikāya okāse asati dasavidhe vā antarāye anurūpato uttīm ṭhapetvā pavāreyyāti sambandho.

Idāni yathānurūpato ṇatti ṭhapitā, taṃ dassetuṃ “**suṇātu me**”tiādīmāha. **Yathāṭhapitaṇattiyāti** ettha sabbasaṅghāhikāceṇattiṭhapitā, tevācikaḍhevācikaekavācikaṇaṃ vasena pavāretappaṃ, samānavassikappavāraṇāva ekā na vaṭṭati. Sace “saṅgho tevācikaṃ pavāreyyā”ti ṭhapitā, tevācika eva vaṭṭati, dhevācikaḍdayo na vaṭṭanti. “Dhevācikaṃ pavāreyyā”ti vutte dhevācikañca tevācikañca vaṭṭati, ekavācikasamānavassikā na vaṭṭanti. “Ekavācikaṃ pavāreyyā”ti vutte pana samānavassikaṃ ṭhapetvā sesā vaṭṭanti. “Samānavassika”nti pana vutte sabbāṃ vaṭṭatīti. **Ādike cettha āharetī** ettha pavāraṇāyapi pubbe uposathe vutte “yadi samā āgaccheyyu”ntiādike **vāre** āharetī attho.

443. Idāni vattabbaṃ sandhāya “eva”nti vuttaṃ. Tivaggo ca catuvaggo ca **ticatuvaggo**.

450. “Na bhikkhave sāpattikena pavāretabbaṃ. Yo pavāreyya, āpatti dukkaṭassā”ti (mahāva. 235) vuttattā sāpattikenapi vematikenapi pavāriyamāne āpattiṃ sarantenapi uposathe vuttanayena paṭipajjitabbaṃ. “Vagge samagge vaggoti-saññino vimatissa vā”tiādigāthāto paṭṭhāya yāva “antarāyaṃ va saṅghaṃ vā-dhiṭṭhātuṃ sīmaṃeva vā”ti avasānagāthā, tāva sesā uposathe vuttā gāthāyoti adhippetā.

451. **Pavārite cāti** (mahāva. 213 ādayo) paṭhamapavāraṇāya saṅghamhi pavāriteti adhippāyo. Ettha **avutthoti** pacchimikāya upagato apariniṭṭhitattā “avuttho”ti vuccati.

452. **Cātumāsini**ti kattikapuṇṇamī. Ettha **vutthavassā** nāma pacchimikāya upagatā. Pavāraṇāvinicchayo.

Pavāraṇānidhesavaṇṇanā niṭṭhitā.

#### 46. Saṃvaraniddesavaṇṇanā

453. **Cakkhusotādibhedehī**ti (dī. ni. 1.213, 454; ma. ni. 1.411; a. ni. 4.198; dha. sa. 1352-1354; mahāni. 196) cakkhusotaghānañivhākāyamanasaṅkhātehi chahi indriyehīti attho. **Rūpasaddādigocareti** rūpasaddagandharasaphoṭṭhabbadhammasaṅkhātesu chasu gocaresūti attho. Ettha pana hatthapādahasitakathitavilokitādibhedam subhākāram gahetvā ayoniso manasi karontassa abhijjhā uppajjati. “Anatthaṃ me acari, carati, carissati”tiādinā (pari. aṭṭha. 329) nayena paṭighanimittam gahetvā ayoniso manasi karontassa byāpādo uppajjati. Ettha pana itthipurisanimittam vā subhanimittādikaṃ kilesavatthubhūtam nimittam aggaṇhitvā diṭṭhe diṭṭhamattādinā paṭipajjitvā asubhanimittam yoniso manasikāram bahulīkarontassa abhijjhāya pahānaṃ hoti. “Anatthaṃ me acari, tam kutettha labbhā”tiādinā vā mettābhāvanādivasena vā yoniso manasi karontassa byāpādappahānaṃ hoti. Evamidam saṅkhepato rūpādīsū kilesānubandhanimittādiggāhaparivajjanalakkhaṇam indriyasamvarasīlanti vedītabbaṃ.

454. **Niggaṇheyyāti** nivāreyya;  
 “Yāni sotāni lokasmiṃ; (Ajitāti bhagavā),  
 Sati tesam nivāraṇam;  
 Sotānam samvaram brūmi;  
 Paññāyete pidhiyyare”ti – (su. ni. 1041);

Vuttattā “**satimā sampajāno vā**”ti vuttaṃ. Ettha pana catubbidham sampajāññaṃ sātthakasappāyagocaraasammohavasena. Saṃvaravinicchayo.

Saṃvaraniddesavaṇṇanā niṭṭhitā.

#### 47. Suddhiniddesavaṇṇanā

455. **Desanā samvaro eṭṭhi, paccavekkhaṇa bhedatoti** (pārā. aṭṭha. 2.585; visuddhi. 1.19) desanāsuddhi samvarasuddhi pariyetṭhisuddhi paccavekkhaṇasuddhīti evam catubbidhā suddhīti attho. Idāni tāhi suddhīhi visujjanake dassetuṃ “**pātimokkhasamvarasammata**”ntiādimāha.

456. “Puna evam na karissa”nti cittādhiṭṭhānasamvarā yasmā sujghati indriyasamvaro, tasmā indriyasamvaro “**samvarasuddhi**”ti vuttoti sambandho.

457. **Pahāyānesananti** anesanaṃ pahāya dhammena uppādentassa paccayeti pāthaseso.

**458.** “Paṭisaṅkhā yoniso cīvaram paṭisevāmi...pe... uppannānaṃ veyyābādhikānaṃ...pe... paramatāyā”ti (ma. ni. 1.23; a. ni. 6.58) ca evaṃ catūsūpi paccayesu yathāvuttapaccavekkhaṇasujjanāti attho. Ettha pana duvidhaṃ paccavekkhaṇaṃ paṭilābhakāle ca paribhogakāle ca. Paṭilābhakāle hi dhātuvasena vā paṭikkūlavasena vā paccavekkhitvā ṭhapitacīvarādīni tato uttari paribhuñjantassa anavajjova paribhogo, paribhogakālepi. Suddhivinicchayo.

Suddhiniddesavaṇṇanā niṭṭhitā.

#### 48. Santosaniddesavaṇṇanā

**459.** “Cattārimāni, bhikkhave, appāni ceva sulabhāni ca, tāni ca anavajjāni. Katamāni cattāri? Paṃsukūlaṃ, bhikkhave, cīvarānaṃ appaṅca sulabhaṅca, taṅca anavajjaṃ. Piṇḍiyālopo, bhikkhave, bhojanānaṃ appaṅca sulabhaṅca, taṅca anavajjaṃ. Rukkhamūlaṃ, bhikkhave, senāsanānaṃ appaṅca sulabhaṅca, taṅca anavajjaṃ. Pūtimuttābhesajjaṃ, bhikkhave, bhesajjānaṃ appaṅca sulabhaṅca, taṅca anavajjaṃ. Imāni kho, bhikkhave, cattāri appāni ceva sulabhāni ca, tāni ca anavajjāni”ti (a. ni. 4.27; itivu. 101) vacanato “**appenā**”tiādi vuttaṃ.

**Santuṭṭhoti** ettha yathālābhayathābalayathāsārūppasantosānaṃ vasena ekekasmim paccaye tayo tayo katvā catūsū paccayesu dvādasa santosā honti. **Mattaññūti** ettha (ma. ni. aṭṭha. 1.422; saṃ. ni. aṭṭha. 3.4.239; a. ni. aṭṭha. 2.3.16; itivu. aṭṭha. 28; dha. sa. aṭṭha. 124-134) cattāro mattā pariyesanamattā paṭiggahaṇamattā paribhogamattā vissajjanamattāti. Itarītarena yāpento **subhara** nāma. Santosavinicchayo.

Santosaniddesavaṇṇanā niṭṭhitā.

#### 49. Caturārakkhaniddesavaṇṇanā

**461-2. Asubhanti** asubhabhāvanā. Ime cattāro caturārakkhā nāmāti adhippāyo. Idāni te dassetuṃ “**ārakattādīnā**”tiādimāha. **Ārakattādīnāti** ettha ārakattā, arīnaṃ arānaṅca hatattā, paccayādīnaṃ arahattā, pāpakaraṇe rahābhāvāti imehi tāva catūhi kāraṇehi so bhagavā arahanti anussaritabboti attho. Vuttañhetam –

“Ārakattā hatattā ca, kilesārīna so muni;  
Hatasamsāracakkāro, paccayādīna cāraho;  
Na raho karoti pāpāni, araham tena vuccatī”ti. (pārā. aṭṭha. 1.1; visuddhi. 1.130);

Bhagavā pana sabbakilesehi suvidūravidūre ṭhito maggena savāsanakilesānaṃ hatattā, tasmā “**ārakattā araha**”nti vutto. Vuttañhetam –

“So tato ārakā nāma;  
Yassa yenāsamaṅgitā;  
Asamaṅgī ca dosehi,  
Nātho tenārahamaṃ mato”ti. (visuddhi. 1.125);

Bhagavatā pana sabbakilesārayo hatā, tasmā “**arīnaṃ hatattāpi araha**”nti vutto. Vuttañhetam –

“Yasmā rāgādīsāṅkhātā, sabbepi arayo hatā;  
Paññāsathena nāthena, tasmāpi arahamaṃ mato”ti. (visuddhi. 1.126);

Yaṃ panetaṃ

avijjābhavataṅhāmayanābhipuññābhisaṅkhārapuññābhisaṅkhāraāneñjābhisaṅkhārāraṃ jarāmarāṇanemi “āsavasamudayā avijjāsamudayo”ti (ma. ni. 1.103) vacanato āsavasamudayamayena akkkena vijjhitvā tibhavarathe yojitaṃ anādikālapavattaṃ saṃsāracakkaṃ, tassa bhagavato bodhirukkhamūle sammappadhānavīriyapādehi catupārisuddhisīlapathaviyaṃ patiṭṭhāya saddhāhatthena kammakkhayakarañāpharasuṃ gahetvā sabbe arā hatā. Tasmā “arānaṃ hatattā araha”nti vutto. Vuttañhetam –

“Arā saṃsāracakkassa, hatā ñāṇāsina yato;  
Lokanāthena tenesa, arahanti pavuccatī”ti. (visuddhi. 1.128);

Aggadakkhiṇeyyattā cīvarādīnaṃ paccayānaṃ uttamapūjāya ca yutto bhagavā, tasmā “paccayādīnaṃ arahattā ca araha”nti vuccati. Vuttañhetam –

“Pūjāvīsesaṃ saha paccayehi,  
Yasmā ayaṃ arahati lokanātho;  
Atthānurūpaṃ arahanti loke,  
Tasmā jino arahati nāmameta”nti. (visuddhi. 1.129);

Yathā loke keci paṇḍitamānino asilokabhayena raho pāpāni karonti, tathā bhagavā kadācīpi na karoti, tasmā “pāpakaraṇe rahābhāvā ca araha”nti vuccati. Vuttañhetam –

“Yasmā natthi raho nāma, pāpakammesu tādino;  
Rahābhāvena tenesa, arahaṃ iti vissuto”ti. (visuddhi. 1.130) –

Evam ārakattādīnā arahanti bhāvetabbaṃ.

Sammā sāmañca sabbadhammānaṃ buddhattā pana sammāsambuddho. **Sammāti** ñāyeneva, abhiññeyye dhamme abhiññeyyato pariññeyye dhamme pariññeyyato pahātabbe dhamme pahātabbato sacchikātabbe dhamme sacchikātabbato bhāvetabbe dhamme bhāvetabbato evāti attho. **Sāmañcāti** attanāva. Vuttañhetam –

“Abhiññeyyaṃ abhiññātaṃ, bhāvetabbañca bhāvitaṃ;  
Pahātabbaṃ pahīnaṃ me, tasmā buddhosmi brāhmaṇā”ti. (ma. ni. 2.399; su. ni. 563);

“Itipi so bhagavā arahaṃ sammāsambuddho vijjācaraṇasampanno sugato lokavidū anuttaro purisadammasārathi sathhādevamanussānaṃ buddho bhagavā”ti evaṃ vutte **navabhede bhagavato guṇe yā punappunaṃ** uppajjanato satiyeva **anussati**, pavattitabbaṭṭhānamhiyeva vā pavattattā saddhāpabbajitassa kulaputtassa anurūpā satīti anussati, buddhaṃ ārabba uppanā anussati **buddhānussati**, yā evaṃ navavidhena pavattā sati, sā buddhānussati nāmāti attho. Sabbākārena pana ācariyena buddhaghosena buddhānussati **visuddhimagge** (visuddhi. 1.123 ādayo) vuttā, atthikena pana tato paccāsīsitabbā.

**463-4.** Caturārakkhāya sāyampātaṃ bhāvetabbattā mettābhāvanaṃ dassentena therena sabbatthakammaṭṭhānabhāvanāvasena dassitāti veditabbā. Itarathā “attānaṃ upamaṃ katvā, na haneyya na ghātaye”ti (dha. pa. 129-130) vacanato sabbapaṭhamaṃ “ahaṃ sukhito homi, avero”tiādīnā nayena bhāvetvāva attāni cittaṃ niparibandhamānaṃ katvā pacchā ācariyupajjhāyādīsu kamena bhāvetabbā. Attāni pana appanā na hoti. Gocaragāmamhi issare janeti sambandho. **Tatthāti** (pārā. aṭṭha. 2.165) gocaragāme. Sīmaṭṭhasaṅghato paṭṭhāya **paricchijja paricchijjāti** attho. Evaṃ mettaṃ bhāvento bhikkhusaṅghe mettāya sahaṃvāsīnaṃ muducittaṃ janeti, athassa sukhasaṃvāsatā hoti. Sīmaṭṭhakadevatāsu mettāya mudukatacittāhi devatāhi dhammikāya rakkhāya susaṃvihitarakkho hoti. Gocaragāmamhi issarajane mettāya mudukatacittasantānehi issarehi dhammikāya rakkhāya

surakkhitaparikkhāro hoti. Tattha manusse mettāya pasāditacittehi tehi aparibhūto hutvā vicarati. Sabbasattesu mettāya sabbattha appaṭihatacāro hoti.

**465-6.** Vaṇṇato ca saṅghānato ca okāsato ca disato ca paricchato ca kesādikoṭṭhāse vavattapetvāti sambandho. Ettha **vaṇṇatoti** (visuddhi. 1.110) kesādīnaṃ vaṇṇato. **Saṅghānatoti** tesameva saṅghānato. **Okāsatoti** “ayaṃ koṭṭhāso imasmiṃ nāma okāse paṭiṭṭhito”ti evaṃ tassa tassa okāsato. **Disatoti** imasmiṃ sarīre nābhito uddhaṃ uparimā disā, adho heṭṭhimā disā, tasmā “ayaṃ koṭṭhāso imissā nāma disāyā”ti disā vavattapetabbā. **Paricchato**ti sabbhāgaparicchato visabhāgaparicchato dve paricchato. Tattha “ayaṃ koṭṭhāso heṭṭhā ca upari ca tiriyaṅca iminā nāma paricchato”ti evaṃ sabbhāgaparicchato vedittabbo. “Kesā na lomā, lomā na kesā”ti evaṃ amissakavasena visabhāgaparicchato.

Evaṃ pañcahi ākārehi vavattānākāraṃ dassetvā idāni manasi karontena evaṃ manasi kātabbanti taṃ dassetuṃ “**anupubbato**”tiādīmāha. Tattha **anupubbato**ti sajjhāyakaṇṇakālato paṭṭhāya “kesā nakhā”ti evaṃ ekantarikāya vā “lomā kesā”ti evaṃ uppaṭipāṭiyā vā na manasi kātabbaṃ, atha kho “kesā lomā”tiādīnā nayena anupaṭipāṭiyā manasi kātabbaṃ, anupaṭipāṭiyā manasi karontenāpi nātisīghaṃ nātisaṅkamaṃ manasi kātabbaṃ, bahiddhā puthuttārammaṇe cetaso vikkhepo paṭibāhitabbo. “Paṇṇattiṃ samatikkamma, muñcantassānupubbato”ti pāṭho gahetabbo. Evañhi sati bhāvanākkamena attho suviññeyyo hoti. “Kesā lomā”tiādipaṇṇattiṃ amanasikatvā paṭikkūlabhāvena evaṃ cittaṃ ṭhapetabbam. **Muñcantassānupubbato**ti yo yo koṭṭhāso āpāthaṃ nāgacchati, taṃ taṃ anupubbato muñcantassāti attho.

**467.** Idāni yathā paṭikkūlamanasikāro kātabbo, taṃ dassetuṃ “**vaṇṇaāsayasāṅghānā**”tiādīmāha. Etehi vaṇṇādīhi koṭṭhāsehi paṭikkūlāti bhāvanāti sambandho. Ettha (vibha. aṭṭha. 356; visuddhi. 1.178) kesā tāva vaṇṇatopi paṭikkūlā. Tathā hi yāgubhattādīsu kesavaṇṇaṃ kiñci disvā jigucchanti. Saṅghānatopi paṭikkūlā. Tathā hi rattim bhuñjantā kesasaṅghānaṃ makacivākādikaṃ chupitvā jigucchanti. Telamakkhanādivirahitānaṅca aggimhi pakkhittānaṅca gandho ativiya paṭikkūloti gandhatopi paṭikkūlā. Asuciṭṭhāne jātasūpeyyapaṇṇaṃ viya pubbalohitamuttakarīsapittasemhādīnissandena jātattā āsayatopi paṭikkūlā. Gūtharāsīmhi uṭṭhitakaṇṇikaṃ viya ekatimsakoṭṭhāsarāsīmhi jātattā okāsatopi paṭikkūlā. Uddhumātakaṃ vinīlakaṃ vipubbakaṃ vicchiddakaṃ vikkhāyitakaṃ vikkhittakaṃ hatavikkhittakaṃ lohitaṃ puḷavakaṃ aṭṭhikanti imesu uddhumātakādīsu vatthūsu asubhākāraṃ gahetvā pavattā bhāvanā vā asubhaṃ nāmāti attho.

**468.** Yaṃ panetaṃ arahantānaṃ vaṭṭadukkhāsamucchedaśāṅkhātāṃ samucchadamaraṇaṃ (visuddhi. 1.167), saṅkhārānaṃ khaṇabhaṅgasāṅkhātāṃ khaṇikamaraṇaṃ, “rukkho mato, lohaṃ mata”ntiādi sammutimaraṇaṅca, na taṃ idha adhippetam. Idha pana **maraṇanti** ekabhavapariyāpannaṃ jīvitindriyassa upacchedo adhippeto. Tampi kālamaraṇaṃ akālamaraṇanti duvidhaṃ hoti. Tattha kālamaraṇaṃ puññakkhayena vā āyukkayena vā ubhayakkhayena vā hoti, akālamaraṇaṃ upapīlakaupacchedakakammavasena. “Maraṇaṃ me bhavissati”ti vā “jīvitaṃ ucchijjissati”ti vā “maraṇaṃ maraṇa”nti vā yoniso bhāvayitvānāti sambandho.

**469-70.** Yassa pana ettāvātā upacārajjhānaṃ na uppajjati, tena vadhakapaccupaṭṭhānato sampattivipattito upasaṃharaṇato kāyabahusādhāraṇato āyudubbalato animittato addhānaparicchato khaṇaparittatoti imehi aṭṭhahi ākārehi maraṇaṃ anussaritabbaṃ, idāni te dassetuṃ “**vadhakassevupaṭṭhāna**”ntiādīmāha. Asiṃ ukkhipitvā sīsaṃ chindituṃ ṭhitavadhako viya maraṇaṃ paccupaṭṭhitamevāti bhāvanā maraṇassati nāmāti sambandho. Evaṃ sabbattha. Sabbaṃ ārogyaṃ byādhipariyosānaṃ, sabbaṃ yobbanam jarāpariyosānaṃ, sabbaṃ jīvitaṃ maraṇapariyosānaṃ, tasmā “ayaṃ yobbanādīkāyasampatti tāvadeva sobhati, yāva maraṇasāṅkhātā vipatti na bhavissati”ti evamādinā sampattivipattito ca, sattahākārehi upasaṃharaṇato maraṇaṃ anussaritabbaṃ yasamahattato puññamahattato thāmamahattato iddhimahattato paññamahattato paccekabuddhato

sammāsambuddhatoti. Tattha “idaṃ maraṇaṃ nāma mahāyasānaṃ mahāparivāraṇaṃ mahāsammatamandhātādīnaṃpi upari patati, kimaṅgaṃ pana mayhaṃ upari na patissatī”ti evaṃ yasamahattato,

“Jotiko jaṭilo uggo,  
Meṇḍako atha puṇṇako;  
Ete caññe ca ye loke,  
Mahāpuññāti vissutā;  
Sabbe maraṇamāpannā,  
Mādisesu kathāva kā”ti. –

Evaṃ puññamahattato,

“Vāsudevo baladevo, bhīmasenādayo mahā;  
Balā maccuvasaṃ pattā, mādisesu kathāva kā”ti. –

Evaṃ thāmamahattato,

“Mahāmoggallānādīnaṃ mahiddhikānaṃpi upari patati, mādisesu kathāva kā”ti evaṃ iddhimahattato, “sāriputtādīnaṃ mahāpaññānaṃpi upari patati, mādisesu kathāva kā”ti evaṃ paññamahattato. Evaṃ itaresampi paccekabuddhasammāsambuddhānaṃpi mahantabhāvaṃ cintetvā “tesampi upari maraṇaṃ patati, kimaṅgaṃ pana mayhaṃ upari na patissatī”ti evaṃ **upasaṃharaṇato** ca, “ayaṃ kāyo bahusādhāraṇo ajjhattikānaṃyeva anekasatānaṃ rogānaṃ bāhirānaṃ ahivicchikādīnañcā”ti **kāyabahusādhāraṇato** ca, “assāsapassāsapaṭibaddhaṃ jīvita”ntiadinā nayena **āyudubbalato** ca,

“Jīvitaṃ byādhi kālo ca,  
Dehanikkhepanaṃ gati;  
Pañcete jīvalokasmiṃ;  
Animittā na nāyare”ti. (saṃ. ni. aṭṭha. 1.1.20; jā. aṭṭha. 2.2.34) –

Evaṃ **kālavavatthānassa abhāvato** ca, “yo, bhikkhave, ciraṃ jīvati, so vassasataṃ jīvati appaṃ vā bhiyyo”ti (saṃ. ni. 1.145) vuttatā evamādinā nayena **addhānassa paricchedā**ca bhāvanā maraṇassati nāmāti attho. Khaṇaparittato ca maraṇassati bhāvetabbā.

“Jīvitaṃ attabhāvo ca,  
Sukhadukkā ca kevalā;  
Ekacittasamāyuttā,  
Lahu so vattate khaṇo”ti. (visuddhi. 1.176) –

Hi vuttaṃ. Caturārakkhavinicchayo.

Caturārakkhaniddesavaṇṇanā niṭṭhitā.

## 50. Vipassanāniddesavaṇṇanā

**471-2. Nāmarūpaṃ pariggayhāti** ettha (visuddhi. 2.662 ādayo) nāmarūpapariggahaṃ kātukāmena tāva ṭhapetvā nevasaññānāsaññāyatanānaṃ avasesesu yaṃ kiñci jhānaṃ samāpajjitvā vuṭṭhāya vitakkādīni jhānaṅgāni ca taṃsampayutte ca phassādayo dhamme lakkhaṇarasapaccupaṭṭhānapadaṭṭhānavasena paricchinditvā “sabbametaṃ ārammaṇābhimukhaṃ namanato namanatṭhena nāma”nti vavatthapetabbāṃ. Tato tassa paccayaṃ pariyesanto “hadayaavatthum nissāya vattatī”ti passati, puna

vatthussa paccayabhūṭāni ca upādārūpāni ca passivā “idaṃ sabbam ruppanato vikārāpattito rūpa”nti pariggaṇhāti. Puna tadubhayam “namanalakkhaṇam nāmaṃ, ruppanalakkhaṇam rūpa”nti evaṃ saṅkhepato nāmarūpaṃ vavatthapeti. Idaṃ sabbam samathayānikavasena vuttaṃ. Vipassanāyāniko pana catudhātuvavatthānamukhena bhūtopādāyarūpāni paricchinditvā “sabbametaṃ ruppanato rūpa”nti passati. Tato evaṃ paricchinnarūpassa cakkhādīni nissāya pavattamānā arūpadhammāpi āpāthamāgacchanti. Tato sabbepi te arūpadhamme namanalakkhaṇena ekato katvā “etaṃ nāma”nti passati. So “idaṃ nāmaṃ, idaṃ rūpa”nti dvedhā vavatthapeti. Evaṃ vavatthapetvā “nāmarūpato uddham añño satto vā puggalo vā poso vā devo vā brahmā vā natthi”ti passati.

Yathāhi aṅgasambhārā, hoti saddo ratho iti;  
Evaṃ khandhesu santesu, hoti sattoti sammuti. (saṃ. ni. 1.171);

Evameva pañcasu upādānakkhandhesu sati satto, puggaloti vā vohāramatto hotīti evamādinā nayena nāmarūpānaṃ yāthāvadassanasāṅkhātena diṭṭhivisuddhibhūtena ñāṇena nāmarūpaṃ pariggayhāti attho.

**Tato tassa ca paccayanti** puna tassa nāmarūpassa paccayaṃ pariggayhāti attho. Vuttanayena nāmarūpaṃ pariggaṇhitvā “ko nu kho imassa hetū”ti pariyesanto ahētuvāDavisamahētuvādesu dosaṃ disvā rogaṃ disvā tassa nidānasamuṭṭhānaṃ pariyesanto vejjo viya tassa hetuṅca paccayaṅca pariyesanto avijjā taṅhā upādānaṃ kammanti ime cattāro dhamme nāmarūpassa uppādapaccayattā “hetū”ti ca āhāraṃ upatthambhanassa paccayattā “paccayo”ti ca passati. “Imassa kāyassa avijjādayo tayo dhammā mātā viya dārakassa upanissayā honti, kammaṃ pitā viya puttassa janakaṃ, āhāro dhāti viya dārakassa sandhārako”ti evaṃ rūpakāyassa paccayapariggahaṃ katvā puna “cakkhuṅca paṭicca rūpe ca uppajjati cakkhuvīññāna”ntiadinā (saṃ. ni. 2.43) nayena nāmakāyassapi hetupaccayaṃ pariggaṇhāti.

Evaṃ pariggaṇhanto “atītānāgatāpi dhammā evameva pavattantī”ti sannitṭhānaṃ karoti. Tassa yā sā pubbantam ārabha “ahosiṃ nu kho ahaṃ atītāmadhānaṃ, na nu kho ahosiṃ, kiṃ nu kho, kathaṃ nu kho, kiṃ hutvā kiṃ ahosiṃ nu kho ahaṃ atītāmadhāna”nti pañcavidhā vicikicchā vuttā, yāpi aparantaṃ ārabha “bhavissāmi nu kho ahaṃ anāgatāmadhānaṃ, na nu kho, kiṃ nu kho, kathaṃ nu kho, kiṃ hutvā kiṃ bhavissāmi nu kho ahaṃ anāgatāmadhāna”nti pañcavidhā vuttā, yāpi etarahi vā pana paccuppannaṃ addhānaṃ ārabha “ajjhataṃ kathaṃkathī hoti, ahaṃ nu khosmi, no nu khosmi, kiṃ nu khosmi, kathaṃ nu khosmi, ayaṃ nu kho satto kuto āgato, so kuhiṃ gāmī bhavissatī”ti chabbidhā vicikicchā vuttā, tā sabbāpi pahīyanti. Evaṃ paccayapariggahaṇena tīsu addhāsu kaṅkham vitaritvā ṭhitaṃ ñāṇaṃ “kaṅkhāvitaraṇavisuddhī”tipi “dhammatṭhitiññāna”ntipi “sammādasana”ntipi vuccati.

Ettha pana tisso lokiyapariññā ñātapariññā tīraṇapariññā pahānapariññāti. Tattha “ruppanalakkhaṇam rūpaṃ, vedayitalakkhaṇā vedanā”ti evaṃ tesam tesam dhammānaṃ paccattalakkhaṇasallakkhaṇavasena pavattā paññā **ñātapariññā**nāma. “Rūpaṃ aniccaṃ, vedanā aniccā”tiadinā tesameva dhammānaṃ sāmāññalakkhaṇaṃ āropetvā lakkhaṇārammaṇikavipassanāpaññā **tīraṇapariññā** nāma. Tesu evaṃ pana dhammesu niccasaññādipajahanavasena pavattā lakkhaṇārammaṇikavipassanā **pahānapariññā** nāma. Tattha saṅkhārapariggahato paṭṭhāya yāva paccayapariggahā ñātapariññāya bhūmi. Kalāpasammasanato paṭṭhāya yāva udayabbayānupassanā tīraṇapariññāya bhūmi. Bhaṅgānupassanato paṭṭhāya pahānapariññāya bhūmi. Tato paṭṭhāya hi “aniccato anupassanto niccasaññam pajahati, dukkhato anupassanto sukhasaññam, anattato anupassanto attasaññam, nibbindanto nandiṃ, virajjanto rāgaṃ, nirodhento samudayaṃ, paṭinissajjanto ādānaṃ pajahatī”ti (paṭi. ma. 1.52) evaṃ pajahanto niccasaññādipahānasādhikānaṃ sattannaṃ anupassanānaṃ ādhipaccaṃ hoti. Iti imāsu pariññāsu saṅkhāraparicchadassa ceva paccayapariggahassa ca sādhitattā iminā yoginā ñātapariññā adhigatā hoti.





kilesavatthubhūtatāya “upakkilesā”ti vuttā, na akusalattā. Nikanti pana upakkilesa ceva kilesavatthu ca. Paṇḍito pana bhikkhu obhāsādīsu uppannesu vikkhepaṃ agacchanto “obhāsādayo dhammā na maggo, upakkilesavinimuttaṃ pana vīthipāṭipannaṃ vipassanāñāṇaṃ maggo”ti maggañca amaggañca vavatthapeti. Tassevaṃ “ayaṃ maggo, ayaṃ na maggo”ti ñatvā t̥hitaṃ ñāṇaṃ “**maggāmaggañāṇadassanavisuddhī**”ti vuccati.

Ito paṭṭhāya aṭṭhavidhassa ñāṇassa vasena sikhāppattaṃ vipassanāñāṇaṃ **paṭipadāñāṇadassanavisuddhi** nāma hoti. Udayabbayānupassanāñāṇaṃ bhaṅgānupassanāñāṇaṃ bhayatupaṭṭhānañāṇaṃ ādīnavānupassanāñāṇaṃ nibbidānupassanāñāṇaṃ muñcitukamyatāñāṇaṃ paṭisañkhānupassanāñāṇaṃ sañkhārupekkhāñāṇanti imāni aṭṭha ñāṇāni nāma. Etāni nibbattetukāmena yasmā upakkilesehi abhibhūtaṃ hutvā lakkhaṇappaṭivedhaṃ kātuṃ asamattaṃ hoti cittaṃ, tasmā punapi udayabbayameva passitabbaṃ. Udayabbayaṃ passantassa aniccalakkhaṇaṃ yathābhūtaṃ upaṭṭhāti, udayabbayappaṭipīlittā dukkhalakkhaṇaṃ “dukkhameva ca sambhoti, dukkhaṃ tiṭṭhati veti cā”ti (saṃ. ni. 1.171) passato anattalakkhaṇaṃ.

Ettha ca aniccaṃ aniccalakkhaṇaṃ, dukkhaṃ dukkhalakkhaṇaṃ, anattā anattalakkhaṇanti ayaṃ vibhāgo veditabbo. Ettha **aniccanti** khandhapañcakaṃ. Kasmā? Uppādavayaññathattabhāvā hutvā abhāvato vā. Aññathattaṃ nāma jarā, uppādavayaññathattaṃ aniccalakkhaṇaṃ, hutvā abhāvasañkhāto vā eko ākāravikāro. “Yadaniccaṃ taṃ dukkha”nti (saṃ. ni. 3.15) vacanato tadeva khandhapañcakaṃ dukkhaṃ. Kasmā? Abhiṇhaṃ paṭipīlittā. Abhiṇhappaṭipīlanākāro dukkhalakkhaṇaṃ. “Yaṃ dukkhaṃ tadanattā”ti vacanato tadeva khandhapañcakaṃ anattā. Kasmā? Avasavattanato. Avasavattanākāro anattalakkhaṇaṃ. Imānipi tīni lakkhaṇāni udayabbayaṃ passantasseva ārammaṇāni honti.

Punapi so rūpārūpadhammesu eva “aniccā”tiādinā vipassati, tassa sañkhārā lahuṃ lahuṃ āpāthaṃ gacchanti. Tato uppādaṃ vā t̥hitiṃ vā ārammaṇaṃ akatvā tesam̐ khayavayanirodhe eva passato sati santiṭṭhatīti idaṃ **bhaṅgānupassanāñāṇaṃ** nāma. Imassa uppādato paṭṭhāya assa yogino “yathā ime sañkhārā pañcakkhandhā bhijjanti, evaṃ aṭṭepi sañkhārā bhijjimsu, anāgatepi bhijjissanti”ti nirodhameva passato sati santiṭṭhati, tassa bhaṅgānupassanāñāṇaṃ āsevantaṃ bahulīkarontassa sabbabhavayonigatiṭṭhitasattāvāsesu sabbe sañkhārā jalitaṅgārakāsuādayo viya mahābhayaṃ hutvā upaṭṭhahanti. Etaṃ **bhayatupaṭṭhānañāṇaṃ** nāma. Tassa taṃ bhayatupaṭṭhānañāṇaṃ āsevantaṃ sabbe bhavādayo ādittaṅgārā viya, samussitakhaggā viya paccatthikā appaṭisaraṇā sādīnavā hutvā upaṭṭhahanti. Idaṃ **ādīnavānupassanāñāṇaṃ** nāma. Tassa evaṃ sañkhāre ādīnavato passantassa bhavādīsu sañkhārānaṃ ādīnavattā sabbasañkhāresu ukkaṇṭhanā anabhirati uppajjati. Idaṃ **nibbidānupassanāñāṇaṃ** nāma. Sabbasañkhāresu nibbindantassa ukkaṇṭhantassa sabbasmā sañkhāragatā muñcitukāmatā nissaritukāmatāva hoti. Idaṃ **muñcitukamyatāñāṇaṃ** nāma. Puna tasmā sañkhāragatā muñcituṃ puna te eva sañkhāre paṭisañkhānupassanāñāṇena tilakkhaṇaṃ āropetvā tīraṇaṃ **paṭisañkhānupassanāñāṇaṃ** nāma, yo evaṃ tilakkhaṇaṃ āropetvā sañkhāre pariggaṇhanto tesu anattalakkhaṇassa sudiṭṭhattā “attā”ti vā “attaniya”nti vā aggaṇhanto sañkhāresu bhayañca nandiñca pahāya sañkhāresu udāsino hoti majjhato, “aha”nti vā “mama”nti vā na gaṇhāti, sabbasañkhāresu udāsino majjhato tīsu bhavesu upekkhako, tassa taṃ ñāṇaṃ **sañkhārupekkhāñāṇaṃ** nāma. Taṃ panetaṃ sabbasañkhārappavattaṃ vissajjtvā nibbānaninnaṃ nibbānapakkhandam̐ hoti, no ce nibbānaṃ santato passati, punappunaṃ “anicca”nti vā “dukkha”nti vā “anattā”ti vā tividhānupassanāvasena sañkhārārammaṇameva hutvā pavattati.

Evaṃ tiṭṭhamānañca etaṃ animitto appaṇihito suññatoti tiṇṇaṃ vimokkhānaṃ vasena vimokkhamukhabhāvaṃ āpajjivā tiṭṭhati. Tisso hi anupassanā tīni vimokkhamukhānīti vuccanti. Ettha ca aniccato manasi karonto (paṭi. ma. 1.223-224) adhimokkhabahulo animittaṃ vimokkhaṃ paṭilabhati. Dukkhatto manasi karonto passaddhibahulo appaṇihitaṃ vimokkhaṃ paṭilabhati. Anattato manasi karonto vedabahulo suññatavimokkhaṃ paṭilabhati. Ettha ca **animitto vimokkhoti** animittākārena nibbānaṃ ārammaṇaṃ katvā pavatto ariyamaggo. So hi animittāya dhātuyā uppānattā animitto, kilesehi ca vimuttattā vimokkho. Eteneva nayena appaṇihitākārena nibbānaṃ ārammaṇaṃ katvā pavatto

appaṇihito, suññatākārena nibbānaṃ ārammaṇaṃ katvā pavatto suññatoti vedītabbo. Adhigatasāṅkhārupekkhassa kulaputtassa vipassanā sikkhāpattā hoti. Vuṭṭhānagāminivipassanāti etadeva. Etaṃ saṅkhārupekkhāñāṇaṃ āsevantaṃ bhāventassa tikkhatarā saṅkhārupekkhā uppajjati.

Tassa idāni maggo uppajjissatīti saṅkhārupekkhā saṅkhāre “aniccā”ti vā “dukkhā”ti vā “anattā”ti vā sammasitvā bhavaṅgaṃ otarati. Bhavaṅgā vuṭṭhāya saṅkhārupekkhāya āgatanayeneva aniccādiākārena manasi karitvā uppajjati manodvārāvajjanaṃ, tadeva manasi karoto paṭhamam javanacittaṃ uppajjati, yaṃ “parikamma”nti vuccati. Tadanantaraṃ tatheva dutiyam javanacittaṃ uppajjati, yaṃ “upacāra”nti vuccati. Tadanantarampi tatheva uppajjati javanacittaṃ, yaṃ “anuloma”nti vuccati. Idaṃ tesam paṭiyekkaṃ nāmaṃ. Avisesena pana tividhametaṃ āsevanantipi parikkamantipi upacārantipi anulomantipi vuccati. Idaṃ pana anulomañāṇaṃ saṅkhārārammaṇāya vuṭṭhānagāminiyā vipassanāya pariyoṣānaṃ hoti. Nippariyāyena pana gotrabhuññaṃeva vipassanāpariyoṣānanti vuccati. Tato paraṃ nirodhaṃ nibbānaṃ ārammaṇaṃ kurumānaṃ puthujjanagottaṃ atikkamaṇaṃ nibbānārammaṇe paṭhamasamannāhārabhūtaṃ apunarāvattakaṃ gotrabhuññaṃ uppajjati. Idaṃ pana ñāṇaṃ paṭipadāñāṇadassanavisuddhiṇca ñāṇadassanavisuddhiṇca na bhajati, antaraṃ abbohārikameva hoti, vipassanāsoṭe patitattā pana vipassanāti vā saṅkhyam gacchati. Nibbānaṃ ārammaṇaṃ katvā gotrabhuññaṃ niruddhe tena dinnasaññāya nibbānaṃ ārammaṇaṃ katvā diṭṭhisamyojanaṃ sīlabbataparāmāsasamyojanaṃ vicikicchāsamyojananti tīṇi samyojanāni samucchadavasena viddhamṣento sotāpattimaggo uppajjati. Tadanantaraṃ tasseva vipākabhūtāni dve tīṇi vā phalacittāni uppajjanti anantaravipākattā lokuttarānaṃ. Phalaparīyoṣāne panassa cittaṃ bhavaṅgaṃ otarati.

Tato bhavaṅgaṃ vicchinditvā paccavekkhaṇatthāya manodvārāvajjanaṃ uppajjati. So hi “iminā vatāhaṃ maggena āgato”ti maggaṃ paccavekkhati, tato “ayaṃ me ānisaṃso laddho”ti phalaṃ paccavekkhati, tato “ime nāma me kilesā pahīnā”ti pahīnakilese paccavekkhati, tato “ime nāma me kilesā avasiṭṭhā”ti uparimaggattayavajjhe kilese paccavekkhati, avasāne “ayaṃ me dhammo ārammaṇato paṭividdho”ti amataṃ nibbānaṃ paccavekkhati. Iti sotāpannaṃ ariyasāvakaṃ pañca paccavekkhaṇāni honti. Tathā sakadāgāmīnāgāmīnaṃ. Arahato pana avasiṭṭhakilesapaccavekkhaṇaṃ nāma natthi. Evaṃ sabbānīpi ekūnavāsati honti. Ukkatṭhaparicchedova ceso. Pahīnāvasiṭṭhakilesapaccavekkhaṇāhi sekkhānaṃ hoti vā, na vā. Evaṃ paccavekkhitvā so sotāpanno ariyasāvako tasmīmyeva vā āsane nisīno aparena vā samayena kāmarāgabyāpādānaṃ tanubhāvaṃ karonto dutiyamaggaṃ pāpuṇāti, tadanantaraṃ vuttanayena phalaṇca. Tato vuttanayena kāmarāgabyāpādānaṃ anavasesappahānaṃ karonto tatiyamaggaṃ pāpuṇāti, vuttanayena phalaṇca. Tato tasmīmyeva vā āsane nisīno aparena vā samayena rūparāgarūparāgamānauddhaccaavijjānaṃ anavasesappahānaṃ karonto catutthamaggaṃ pāpuṇāti, vuttanayena phalaṇca. Ettāvata cesa arahā nāma aṭṭhamo ariyapuggalo hoti mahākhīṇāsavo. Iti imesu catūsu maggesu ñāṇaṃ **ñāṇadassanavisuddhi** nāma.

Ettāvata pātimokkhasamvarasīlādīnaṃ vuttattā sīlavisuddhi ca mettāsubhādīnaṃ vuttattā cittavisuddhi ca nāmarūpariggahādīnaṃ vasena diṭṭhivisuddhikāṅkhāvitaraṇavisuddhimaggāmaggañāṇadassanavisuddhi paṭipadāñāṇadassanavisuddhi ñāṇadassanavisuddhiyo cāti satta visuddhiyo vuttā honti. Idaṃ vuttappakāraṃ paṭipadākkamaṃ sandhāya vuttaṃ “**pāpuṇeyyānupubbena, sabbasamyojanakkhaya**”nti. Ettha sakkāyadīṭṭhi vicikicchā sīlabbataparāmāso kāmarāgo paṭigho rūparāgo aruparāgo māno uddhaccaṃ avijjāti ime dasa dhammā **sabbasamyojanā** nāma. Etesu sakkāyadīṭṭhivicikicchāsīlabbataparāmāsā sotāpattimaggaṃ vā, kāmarāgapaṭighā dutiyamaggaṃ tanubhūtā hutvā tatiyena samugghātaṃ gacchanti, sesāni pañca catutthenāti. Evaṃ anupubbena sabbasamyojanakkhayaṃ arahattaṃ pāpuṇāti veditabbaṃ.

Vipassanāniddesavaṇṇanā niṭṭhitā.

**Nigamanakathāvaṇṇanā**

**473-5.** Adhisīlaadhicittānaṃ adhīpaññāya ca sikkhanā uttari bhikkhukiccaṃ nāma natthi yasmā, ato ayaṃ khuddasikkhā samudāhaṭā.

Kenāti ce? **Yassa** therassa **lokavicārino** loke vicarantassa mahato kittisaddassa parissamo **na sambhoti** na hoti, kiṃ viya? **Mālutasseva niccasso**, yathā niccaṃ vicarantassa mālutassa parissamo natthi, evaṃ vicarantassa kittisaddassa parissamo natthi, tena **dhammasirikena** samudāhaṭāti sambandho.

Ettāvatā ca –

Niṭṭhito khuddasikkhāya, samāsenā vinicchayo;  
Vitthāro pana etissā, sabbampi piṭakattayaṃ.

Tasmā vitthārakāmena, sakale piṭakattaye;  
Kattabbo sādaro ettha, itarena visesatoti.

Khuddasikkhāvinicchayo.

Khuddasikkhā-purāṇaṭīkā niṭṭhitā.

Namo tassa bhagavato arahato sammāsambuddhassa

## Khuddasikkhā-abhinavaṭīkā

### Ganthārambhakathā

Tilokatilakaṃ vande, saddhammāmatanimmitaṃ;  
Saṃsuṭṭhukatasambhattiṃ, jinaṃ janamanoramaṃ.

**Sāriputtaṃ** mahāsāmiṃ, nekasatthavisāradam;  
Mahāguṇaṃ mahāpaññaṃ, namo me sirasā garuṃ.

**Khuddasikkhāya ṭīkā** yā, purātanā samīritā;  
Na tāya sakkā sakkaccaṃ, attho sabbattha ñātave.

Tatonekaguṇānaṃ yo, mañjūsā ratanānava;  
**Sumaṅgalasanāmena**, tena paññavatā satā.

Ajjhesito yatindena, sadāraññānivāsīnā;  
Savinicchayametissā, karissāmatthavaṇṇanaṃ.

### Ganthārambhakathāvaṇṇanā

(Ka) etthāha – kimatthamāditovāyaṃ gāthā nikkhattā, nanu yathādhippetameva pakaraṇamārabhanīyanti? Vuccate – sappayojanattā. Sappayojanañhi taṃdassanaṃ tāya ratanattayappaṇāmābhidheyyakaraṇappakārappayojanābhidhānasandassanato. Tāni ca pana sappayojanāni anantarāyena ganthaparisamāpanādīppayojanānamabhinipphādanato. Tathā hi sotūnamattano ca yathādhippetatthanipphādanaṃ ratanattayappaṇāmākaraṇappayojanaṃ. Viditābhidheyyassa ganthassa viññūnamādarāṇīyatā abhidheyyakathanappayojanaṃ. Sotujanasamussāhajanaṃ karaṇappakārappayojanakathanappayojanaṃ. Vohārasukhatā pana

abhidhānakathanappayojanam.

Tattha **vanditvā ratanattayanti** iminā ratanattayappaṇāmo dassito, **khuddasikkhanti** iminā khuddabhūtānaṃ sikkhānaṃ idha paṭipādetabbatādīpanena abhidheyyaṃ, abhidheyyo ca nāmesa samuditena satthena vacanīyatthoti. Abhidhānañca pana imināva dassitaṃ tena atthānugatasamaññāparidīpanato. **Samātikanti** iminā karaṇappakāro, **khuddasikkhanti** iminā ca, tena khuddabhūtānaṃ sikkhānaṃ idha dassetabbabhāvappakāsanato. **Ādito upasampanna sikkhitabbanti** iminā payojanapayojanam pana imināva sāmattiyato dassitameva, tāsam sikkhitabbappakāsanena hi sikkhane sati tammūlikāya dīṭṭhadhammikasamparāyikatthanipphattiyā saṃsijjhanato. Pakaraṇappayojanānaṃ sādhanasādhiyalakkhaṇo sambandho tannissayadassaneneva dassitoyevāti ayamettha samudāyattho.

Ayaṃ panetthāvayavattho – ratanattayaṃ vanditvā khuddasikkhaṃ pavakkhāmīti sambandho. Ratijananatthena ratanāni, buddhadhammasaṅghānametaṃ adhivacanaṃ. Atha vā cittikatādīnā kāraṇena ratanāni, buddhādayova ratanāni. Tathā ca vuttaṃ –

“Cittikatam mahagghaṇca, atulam dullabhadassanam;  
Anomasattaparibhogam, ratanam tena vuccati”ti. (dī. ni. aṭṭha. 2.33; saṃ. ni. aṭṭha. 3.5.223;  
khu. pā. aṭṭha. 3; su. ni. aṭṭha. 1.226; udā. aṭṭha. 45; mahāni. aṭṭha. 50);

Tayo avayavā assāti tayaṃ, samudāyāpekkhaṃ ekavacanaṃ, avayavavinimuttassa pana samudāyassa abhāvato tīṇi eva ratanāni vuccanti. Ratanānaṃ tayaṃ **ratanattayaṃ**. **Vanditvāti** tīhi dvārehi namassitvā. “Tisso imā, bhikkhave, vandanā kāyena vandati, vacasā vandati, manasā vandati”ti (a. ni. 3.155) hi vuttaṃ. Tattha viññattiṃ anuppādetvā kevalaṃ ratanattayaguṇānussaraṇavasena manodvāre bahulappavattā kusalacetanā manodvāravandanā. Taṃ taṃ viññattiṃ uppādetvā pana pavattā kāyavacīdvāravandanā. Sikkhitabbāti sikkhā, adhisīlaadhicittaadhipaṇṇāvasena tisso sikkhā. Sikkhanañcettha yathākkamaṃ sīlādīdhammānaṃ saṃvaraṇavasena, ekārammaṇe cittacetāsikānaṃ samādhānavasena, ārammaṇajānanalakkhaṇappaṭivedhamaggapātubhāvapāpanavasena ca āsevanaṃ daṭṭhabbaṃ. Aññattha bahuvīdhā sikkhā, idha tu saṅkhepanayattā appakādiānekatthasambhavepi khudda-saddassa appakattovettha yuttataroti khuddā appakā sikkhāti khuddasikkhā. Idha pana khuddasikkhāppakāsako gantho tabbohārūpacārato itthilīṅgavasena “**khuddasikkhā**”ti vuccati yathā “varuṇānagara”nti. Taṃ **khuddasikkhaṃ**. **Pavakkhāmīti** kathessāmi.

Kīdisanti āha “**ādito upasampannasikkhitabba**”ntiādi. **Ādi**-saddoyamatthi avayavavacano yathā “sabbādīni sabbānāmāni”ti. Atthi apādānavacano yathā “pabbatādīni khettāni”ti. Tatthāvayavavācī kammaśādhano “ādiyatītyādī”ti. Itaro apādānasādhano “ādiyati etasmātyādī”ti. Tattha yo avayavavacano, tassedam gahaṇam, tasmā upasampannakkhaṇampi anto katvā ādībhūtā upasampannakkhaṇatoyeva paṭṭhāyāti evamettha attho daṭṭhabbo. **Eva**-saddo panettha sabbavākyānaṃ avadhāraṇaphalattā labbhati. To-paccayo avadhimhiyeva, na ādhāre. Tattha hi topaccaye ādhāre vattamāne ādimhiyeva majjhaantānaṃ avayavabhūte upasampannakkhaṇeyevāti attho bhavēyya, tathā sati avadhāraṇanicchayo niyamoti atthantarattā ādikkhaṇaniyamena majjhādayo nivattiyeyyūṃ. Apādānavacanassāpi gahaṇe avadhībhūto upasampannakkhaṇo nivattiyeyya “pabbatādīni khettāni”ti ettha ādībhūtapabbatapariccāgena khettaggahaṇam viyāti daṭṭhabbaṃ. **Ṭikāyaṃ** pana ādhāratthopi vutto, so yathāvuttadosam nātigacchati. Sabbattha “**ṭikāya**”nti ca vutte ettheva purāṇaṭṭikāyanti gahetabbaṃ. **Āditoti** iminā idaṃ dīpeti – atidullabhaṃ khaṇasamavāyaṃ labhitvā ālasiyadosena appaṭipajjantehi ca aññānadoseṇa aññathā paṭipajjantehi ca ahutvā ādito paṭṭhāya niranterameva tīsu sikkhāsu sammāpaṭipajjanavasena ādaro janetabboti.

Upasampanna upasampannāya ca sikkhitabbaṃ āsevitabbanti **upasampannasikkhitabbaṃ**, ekasesanayena upasampannatāsāmaññena vā upasampannāyapi ethevāvirodhoti upasampanna sikkhitabbanti samāso. Nanu adhisīlādayova sikkhitabbā, evaṃ sati kathaṃ pakaraṇam sikkhitabbattena

vuttanti? Nāyaṃ doso, sikkhāya sikkhitabbatte sati taddīpakaganthassāpi āsevitabbatā āpajjātī. Sukhaggahaṇattham vattabbavinicchayaṃ sakalampi saṅgahetvā mātikāya t̥apanato saha mātikāyāti **samātikam**. Tagguṇasaṃviññāṇoyam bahubbīhi tassa khuddasikkhāsankhātassa aññapadatthassa yo guṇo mātikāsankhātam viśesanaṃ, tassa idha viññāyamānattā. Sukheneva hi gahaṇam siyā mātikānusārena taṃ taṃ vinicchayaṃ oloketānaṃ saṃsayāpagamato.

### Mātikāvaṇṇanā

(Kha-ja) idāni “samātika”nti vuttattā mātikāpadāni tāva uddisitum “**pārājikā ca cattāro**”tiādi āraddham. Etthāha – tīsu sikkhāsu adhisīlasikkhāva kasmā paṭhamam vuttāti? Sabbasikkhānam mūlabhūtattā. “Sīle patiṭṭhāya naro sapañño, cittaṃ paññaṇca bhāvaya”nti (saṃ. ni. 1.23; peṭako. 22; mi. pa. 2.1.9) hi vuttam. Tatrāpi mahāsāvajjattā mūlacchejjavasena pavattanato sabbapaṭhamam jānitabbāti pārājikāva paṭhamam vuttāti veditabbam. Mātikāpadānam pana attho tassa tassa mātikāpadassa niddesavaseneva viññāyatīti na idha visum dassayissāma. Aviññāyamānam pana tattha tattheva pakāsayissāma.

Idāni uddiṭṭhapadānukkamena niddesaṃ ārabhanto “**pārājikā ca cattāro**”ti paṭhamam mātikāpadaṃ uddhari. Evamuparipi. Idāni pārājikāyo uddisitvā uddiṭṭhapadānukkamena niddesaṃ ārabhanto “**garukā navā**”ti dutiyam padaṃ uddharitīādīnā yathāyogaṃ vattabbam. Tattha sikkhāpadaṃ atikkamivā āpattiṃ āpannā puggalā tāya parājayantīti parājiyā. Teyeva **pārājikā** upasaggassa vuddhiṃ katvā ya-kārassa ka-kāraṇena. Te pana gaṇanaparicchedavasena cattāroti attho.

### 1. Pārājikaniddesavaṇṇanā

**1-2.** Idāni te dassetuṃ “**maggattaye**”tiādi āraddham. Evamuparipi yathāyogaṃ yojetabbam. Tattha **maggattayeti** ettha maggā ca nāma tiṃsa maggā. Manussāmanussatiracchānagatavasena hi tisso itthiyo. Tattha tiracchānagatāya ayaṃ paricchedo –

“Apadānam ahī macchā, dvipadānaṇca kukkuṭī;  
Catuppadānam majjārī, vatthu pārājikassimā”ti. (pārā. aṭṭha. 1.55);

Tāsam vaccapassāvamukhamaggavasena tayo tayo katvā nava maggā, tathā ubhatobyañjanakānam, purisānam pana vaccamukhamaggavasena dve dve katvā cha, tathā paṇḍakānanti tiṃsa. Tesam taye. Kīdiseti āha “**santhatasanthate**”ti. Santhate asanthateti padacchedo. Na santhatam asanthatam. Tasmim **asanthate**. Na-kāro ettha “**abrāhmaṇo**”tiādīsu viya payirudāse, taṃ kiriyāyuttassa tādisassa aññassa vatthuno vidhānena santhatassa vatthuno payirudāsanam pariccajanam payirudāsoti. Na pasajjappaṭisedhe, santhatam pasajja patvā tassa “**brāhmaṇo na bhavissatī**”tiādīsu viya na nisedhoti. Vā-saddo panettha vacanayuttibaleneva labbhati, tassa paliveṭhetvā, anto vā pavesetvā vatthādīnā kenaci paṭicchanne vā appaṭicchanne vāti attho. Tathābhūte **allokāse** pakativātena asamphuṭṭhe tintappadese. **Nimittanti** āngajātam. **Santi**tiādi tabbisesanam. **Santi** attaniyam. Saṃ-saddo hi attani attaniye ca vattati. **Santhatam asanthatanti** yathāvuttanayena paṭicchannam vā appaṭicchannam vā. **Upādiṇṇanti** anaṭṭhakāyappasādam. Kittakanti āha “**tilamattampī**”ti. Tilassa mattam sākallam yassa taṃ **tilamattam**. “Mattam sākallam nicchaye”ti hi nighaṇḍu. Etthāpi avayavena viggaho samudāyo samāsatto, tilabījappamāṇampīti vuttam hoti. Kim taṃ? Nimittam, pavesanam vā. **Api**-saddo sambhāvane, “**tilabījammattampī**”ti sambhāvīyati, adhike kā nāma kathāti idamettha sambhāvanam, evaṃbhūtam **saṃ** āngajātam yathāvutte maggattaye tilamattampi pavesanto bhikkhu **cuto** paribhaṭṭho, pārājiko nāma hoti sāsānatoti viññāyati gammadānattassa saddassa payogaṃ pati kāmācārattā. Kīdisoti āha “**anikkhittasikkho**”ti. Nikkhittasikkho pana abhikkhukattā pariccatto. Tattha nikkhittā ohitā pariccattā paccakkhātā sikkhā etenāti viggaho. Yathālakkaṇam na nikkhittasikkho anikkhittasikkho. Tattha cittakhetakālapayogapuggalavijānanavasena sikkhāpaccakkhānam ṇatvā tadabhāvena

apaccakkhānaṃ veditabbaṃ.

Tattha upasampannabhāvato cavitukāmatācittaṃ **cittaṃ** nāma. “Buddhaṃ paccakkhāmī”tiādīni “gihīti maṃ dhārehi, upāsako, ārāmiko, sāmaṇeroṭi maṃ dhārehi”ti “alaṃ me buddhenā”tiādīni cha khettpadāni **khettaṃ** nāma. “Paccakkhāmī”tiādīnā vutto vattamānakāloyeva **kālo** nāma. Yāya kāyaci bhāsāya vasena vācasikappayogova **payogo** nāma. Anummattādiko paccakkhāto ca manussajātiko sova **puggalo** nāma. Paccakkhātakassa vacanasamanantameva “ayaṃ ukkaṇṭhito”ti vā “gihibhāvaṃ patthayati”ti vā sotuno jānanaṃ **vijānanaṃ** nāmāti veditabbaṃ.

Tattha natṭhakāyappasādaṃ pana piḷakaṃ vā cammakhilaṃ vā lomamaṃ vā pavesantassa dukkaṭaṃ. Akkhināsakaṇṇacchiddavattikosesu, satthakādīhi katavaṇe vā methunarāgena nimittaṃ pavesantassa thullaccayaṃ. Avasesasarīresu upakacchakādīsu dukkaṭaṃ. Tiracchānagatānaṃ hatthiassagogaḍrabhaṭṭhamahiṃsādīnaṃ nāsāya thullaccayaṃ, vatthikose thullaccayameva. Sabbesampi tiracchānagatānaṃ akkhikaṇṇavaṇesu dukkaṭaṃ. Tathā avasesasarīre kāyasamsaggarāgena, methunarāgena vā jīvamānakapurisassa vatthikosamaṃ appavesanto nimittena nimittaṃ chupati, dukkaṭaṃ. Bahi nikkhantadantesu vāyamantassa pana thullaccayanti ayamettha savinicchayo atthavaṇṇanakkamo.

Idāni pavesanaṃ nāma na kevalaṃ attupakkameneva, parūpakkamenāpi hoti, tatrāpi sādīyantova cuto hotīti dassetuṃ “**atha vā**”tiādī vuttaṃ. Tattha **atha vāti** ayaṃ nipāto, nipātasamudāyo vā pakkhantarārambhe. Pavesanañca ṭhitañca uddhāro ca pavittṭhañca **pavesana...pe... pavittṭhāni**, itarītarayogadvando. Itarītarayogo nāma aññamaññatthopādānatāti pavesanādīni ṭhitādiatthānīpi hontīti **pavittṭha**-saddopi pavesanādiattho hoti, tatoyevettha tasmā bahuvacanasambhavo. Aññathā dvande avayavatthapadhānattā ekatthavācakāpi pavittṭha-saddā kathaṃ bahuvacanappasaṅgo. Samāhāre vā dvando. **Khaṇoti** kālaviseso. So ca yogavantānaṃ khaṇantaravinimutto natthīti pavesana...pe... pavittṭhāniyeva khaṇoti kammadhārayo, abhede bhedaparikkappanāya vā pavesana...pe... pavittṭhānaṃ khaṇoti chaṭṭhītappuriso. Tassa sādako, tasmīṃ vā sādako **pavesana...pe... sādako. Khaṇa**-saddo panettha paccekaṃ yojetabbo dvandasamāsattā, pavesanakālaṃ ṭhitakālaṃ uddhārakālaṃ pavittṭhakālaṃ, tasmīṃ vā sādīyantoti evamettha attho daṭṭhabbo. Evaṃ sevanacittapaccupaṭṭhānena sādako bhikkhu cutoti yojetabbaṃ. Tattha yathāvuttappadesassa antokaraṇaṃ **pavesanaṃ** nāma. Yāva uddharaṇārambhā nivattaṃ **ṭhitaṃ** nāma. **Aṭṭhakathāyaṃ** (pārā. aṭṭha. 1.58) pana mātugāmassa sukkavissatṭhiṃ patvā sabbathā vāyamato oramitvā ṭhitakālaṃ sandhāya “sukkavissatṭhisamayē”ti vuttaṃ. Yāva aggā nīharaṇaṃ **uddhāro** nāma. Yāva pavesanārahaṭṭhānā antokataṃ **pavittṭhaṃ** nāma.

Paṭthamaṃ.

**3-4.** Idāni dutiyaṃ dassetuṃ “**ādiyeyyā**”tiādīmāha. Tattha adinnaṃ theyyacittena ādiyeyya...pe... saṅketamaṃ vītināmāyē, pārājiko bhaveti sambandho. **Adinnanti** manussasāmīkehi kāyavācāhi na dinnamaṃ. **Theyyacittenāti** thenoti coro, tassa bhāvo theyyaṃ na-kārassa ya-kāraṃ katvā dvittena. Bhavanti etasmā abhidhānabuddhīti bhāvo, saddappavattinimittaṃ jātiḡuṇādi. Idha pana avaharaṇacittasaṅkhātamaṃ dabbamaṃ theyyaṃ. Theyyañca taṃ cittañcāti theyyacittaṃ, tena. **Ādiyeyyāti** ārāmādiṃ abhiyuñjivā gaṇheyya. **Hareyyāti** haranto gaṇheyya. **Avahareyyāti** upanikkhittaṃ bhaṇḍamaṃ “dehi me bhaṇḍa”nti vuccamāno “na mayā gahita”ntiādīni vadanto gaṇheyya. **Iriyāpathamaṃ kopeyyāti** bhaṇḍahārakassa gamanādiiriyāpathamaṃ vicchinditvā gaṇheyya. Kopamaṃ katvā gaṇhātīti hi etasmīṃ atthe “kopi”ti nāmādhātu. **Ṭhānā cāveyyāti** ṭhapitaṭṭhānato cāveyya. **Saṅketamaṃ vītināmāyēti** parikkappaṭṭhānaṃ vā suṅkaghātamaṃ vā atikkāmeyya.

Ettha ca ārāmādiabhiyuñjane, sāmīkassa vimatuppādanadhuranikkhepe, bhaṇḍahārakassa sīsabhārāmasanaphandāpanakhandhoropane, upanikkhitte “dehi me bhaṇḍa”nti codiyamānassa “nāhamaṃ gaṇhāmī”ti bhaṇanavimatuppādanadhuranikkhepe, thalaṭṭhassa theyyacittenāmasanaphandāpanaṭṭhānācāvane cāti catūsu paccekaṃ yathākkamaṃ dukkaṭathullaccayapārājīkāyo veditabbā. “Sahabhāṇḍahārakamaṃ nessāmī”ti

paṭhamadutiyapādasaṅkāmāne, parikappitasuṅkaghātāṭṭhānato paṭhamadutiyapādātikkāme cāti dvīsu paccekamaṃ kamena thullaccayapārājikāyo veditabbā. Ayamettha saviññāṇakāviññāṇakamissakattā nānābhaṅḍavasena yojanā. Ekabhaṅḍavasena pana sassāmikassa dāsassa vā tiracchānagatassa vā yathāvuttana abhiyogādīnā nayena ādiyanaharaṇādivasena yojanā daṭṭhabbā.

Apica imāni cha padāni vaṇṇayantena nānābhaṅḍaekabhaṅḍasāhatthikapubbappayogatheyyāvahārasaṅkhāte pañcapañcake samodhānetvā pañcavīsati avahārā dassatabbā chappadantogadhattā sabbesampi avahārānaṃ. Te pana avahārā yena kenaci abhiyogādīkāranānattamattena bhinnāti taṃvasena pañcapañcakaṃ nāma jātaṃ. Evaṃ saṃvaṇṇitaṅhi idaṃ adinnādānapārājikaṃ suvaṇṇitaṃ nāma hotīti daṭṭhabbamaṃ. Tattha purimāni dve pañcakāni “ādiyeyyā”tiādīnaṃ pañcannaṃ padānaṃ vasena labbhanti. Yaṃ panetaṃ “saṅketaṃ vītīnāmaye”ti chaṭṭhaṃ padaṃ, taṃ tatiyapañcamesu pañcakesu nissaggiyaparikappāvahārasena vojjetabbamaṃ.

Tattha sāhatthika-saddena upacārato taṃsahacaritapañcakaṃ gahetvā “sāhatthikañca taṃ pañcakañcā”ti vā “sāhatthikādi pañcaka”nti majjhepadalopavasena vā **sāhatthikapañcakaṃ**. Evamuparipi. Taṃ pana sāhatthiko āṇattiko nissaggiyo atthasādhako dhuranikkhepo cāti. Tattha sako hattho sahattho, sahatthena nibbatta **sāhatthiko**. Evaṃ **āṇattiko**. Suṅkaghātaparikappitokāsānaṃ anto ṭhatvā bahi nissajjanaṃ nissaggo, so eva **nissaggiyo**. Kālaṃ aniyametvā āṇattassa bhaṅḍaggahaṇato ca parassa telakumbhiyā pādagghanakaṃ telaṃ avassaṃ pivanakānaṃ upāhanādīnaṃ nikkhittānaṃ telapātanato ca puretameva pārājikasāṅkhātaṃ atthaṃ sādhetīti **atthasādhako**. So pana āṇāpanappayogo, upāhanādīnaṃ nikkhepappayogo ca. Ārāmābhiyoge ca upanikkhittabhaṅḍe ca tāvakālikabhaṅḍadeyyānamadāne ca dhurassa nikkhepo **dhuranikkhepo**.

Pubbappayogapañcakaṃ nāma pubbappayogo saḥappayogo saṃvidhāvahāro saṅketakammaṃ nimittakammanti. Tattha āṇāpanaṃ bhaṅḍaggahaṇato pubbatā **pubbappayogo** nāma. Ṭhānācāvanakhilasaṅkāmanappayogena saha vattamāno **saḥappayogo**. Saṃvidhāya sammantayitvā gatesu ekenāpi bhaṅḍe ṭhānā cāvite sabbesaṃ avahāro **saṃvidhāvahāro**. **Saṅketakammanti** pubbaṅḍādīkālaparicchedavasena sañjānanakaraṇaṃ. **Nimittakammaṃ** nāma saññuppādanatthaṃ akkhinikhaṇānādīkaraṇaṃ.

Theyyāvahārapañcakaṃ pana sayameva dassetaṃ “**atha vā**”tiādīmāha. Nanu ca chappadantogadhattā “sabbesampi avahārāna”nti vuttaṃ, evaṃ sati “**atha vā**”ti pakkhantaravasena visuṃ viya idaṃ pañcakaṃ kasmā vuttanti? Nanu avocumhā “yena kenaci abhiyogādīkāranānattamattena bhinnā”ti, eṭṭadisassa bhedassa sambhavato pakkhantaravasenāpi yujjati evaṃ vuttaṃ. Imassa pañcakassa visuṃ uddharitvā vacanaṃ pana pasiddhivasenāti daṭṭhabbamaṃ, kusa-saddena kusasaṅkāmanamadhippetamaṃ abhedopacārena. Theyyañca balañca kuso ca channañca parikappo ca **theyyā...pe... parikappaṃ**, dīgho sandhivasena. Tena avahārako pārājiko bhaveti sambandho. Yo pana paṭicchannena avahārako, so atthato paṭicchannassa avahārako hotīti dvandasamāsantogadhattepicassa virodhābhāvobhāvasādhano cāyamaṃ channa-saddo daṭṭhabbo. Tattha sandhicchedanādīni katvā vā tulākūṭamānakūṭakahāpanakūṭādīhi vañcetaṃ vā gaṇhanto **theyyāvahārako**. Balakkārena parasantakaṃ gaṇhanto **balāvahārako**. Kusamaṃ saṅkāmetvā gaṇhanto **kusāvahārako**. Tiṇapaṇṇādīhi yamaṃ kiñci paṭicchādetvā pacchā kassa paṭicchannassa avahārako **paṭicchannāvahārako**. Sāṭakādibhaṅḍavasena, gabbhadvārādiokāsavasena vā parikappetvā gaṇhanto **parikappāvahārako**. Ettha pana parikappitabhaṅḍaggahaṇe parikappitaparicchedātikkame ca pārājikaṃ veditabbamaṃ.

Idāni panettha vinicchayaṃ dassetaṃ “**bhaṅḍakālagghadesehī**”tiādi vuttaṃ. Ettha adinnādāne bhaṅḍaṅca kālo ca aggho ca deso ca tehi ca paribhogena ca vinicchayo kātāboti attho. Tattha avahaṭabhaṅḍassa sassāmikassāmikabhāvaṃ sassāmikepi sāmikānaṃ sālayanirālayabhāvañca upaparikkhitvā sālayakāle ce avahaṭamaṃ, bhaṅḍamaṃ agghāpetvā kātāboti vinicchayo **bhaṅḍena**



**vinicchayo.** Nirālayakāle ce avahaṭaṃ, pārājikaṃ natthi, sāmikesu puna āharāpentesu dātabbaṃ. Tadeva hi bhaṇḍaṃ kadāci mahagghaṃ, kadāci appagghaṃ, tasmā yasmim̐ kāle bhaṇḍaṃ avahaṭaṃ, tasmim̐yeva kāle yo tassa aggho, tena kātabbo vinicchayo **kālena vinicchayo.** Navabhaṇḍassa yo aggho, so pacchā parihāyati, tasmā sabbadā pakatiagghavasena akatvā kātabbo vinicchayo **agghena vinicchayo.** Bhaṇḍuṭṭhānadese bhaṇḍaṃ appagghaṃ hoti, aññattha mahagghaṃ, tasmā yasmim̐ dese bhaṇḍaṃ avahaṭaṃ, tasmim̐yeva dese agghena kātabbo vinicchayo **desena vinicchayo.** Paribhogena sātākādino bhaṇḍassa aggho parihāyati, tasmā tassa paribhogavasena parihīnāparihīnabhāvaṃ upaparikkhitvā kātabbo vinicchayo **paribhogena vinicchayo.**

Dutiyaṃ.

**5-7.** Idāni tatiyaṃ dassetuṃ “**manussaviggaha**”ntiādi āraddhaṃ. Tattha **manussaviggahaṃ** kalalato paṭṭhāya jīvamānakamanussajātikānaṃ sarīraṃ. **Cicca** pāṇoti saññāya saddhim̐yeva “vadhāmi na”nti vadhakacetanāya cetetvā pakappetvā. **Jīvitā vā viyojayeti** yo bhikkhu jātiunṇaṃsunā samuddhaṭatelaḥbandumattaṃ kalalarūpakāle tāpanādīhi vā tato vā uddhamapi tadanurūpena upakkamena rūpajīvitindriyopakkame sati tadāyattavuttino arūpajīvitassāpi voropanasambhavato ubhayajīvitā voropeyya. **Vā-saddo** vikappe. **Marañacetanoti** maraṇe cetanā yassa so marañādhippāyo. **Satthahārakanti** jīvitaṃ haratīti hāraṃ, satthañca taṃ hāraṃkācāti satthahāraṃ, taṃ. **Assa** manussaviggahassa. **Upanikkhipeti** samīpe nikkhippeyya vā. Etena thāvarappayogaṃ dasseti. **Gāheyya marañūpāyanti** “satthaṃ vā āhara, viṣaṃ vā khādā”tiādīnā nayena marañatthāya upāyaṃ gāhāpeyya vā. Etena āṇattippayogo dassito. **Vadeyya maraṇe guṇanti** kāyavācādūtalekhāhi “yo evaṃ marati, so dhaṇaṃ vā labhatī”tiādīnā nayena maraṇe guṇaṃ pakāseyya vā. Ubhayattha adhiḥkāravasena vā-saddo āharitabbo. So bhikkhu cutoti sambandho, sāsanaṭoti viññāyati.

Idāni panassa chabbidhe payogedassetuṃ “**payogā**”tiādīmāha. Tattha sāhatthi...pe... iddhivijjāmayā payogāti ime cha payogāti sambandho. Ka-kāralopena panettha “**sāhatthī**”ti vuttaṃ. Atha vā anekatthe anekataddhitasambhavena sahatthassāyaṃ payogo sāhatthīti padasiddhi veditabbā. Sāhatthi ca nissaggo ca āṇatti ca thāvaro cāti dvando. Iddhi ca vijjā ca, tāsamimeti **iddhivijjāmayā**, iddhimayo vijjāmayoti vuttaṃ hoti. **Payogāti** ime chappayogā nāma hontīti attho. Tattha sayāṃ mārentassa kāyena vā kāyappaṭibaddhena vā paharaṇaṃ **sāhatthiko** payogo. Dūre ṭhitaṃ māretukāmassa kāyādīhi ususattiādīnaṃ nissajjanaṃ **nissaggo**. “Asukaṃ nāma mārehī”tiādīnā āṇāpentassa āṇāpanaṃ **āṇatti**, opātakhaṇanaṃ apassenasaṃvidhānaṃ asiādīnaṃ upanikkhipanādi **thāvaro**. Māraṇatthaṃ kammavipākajāya iddhiyā payojanaṃ **iddhimayo**. Kammavipākajiddhi ca nāmesā rājādīnaṃ rājiddhiādayo. Tattha piturañño sīhaḥindassa dāṭhakoṭanena cūlasumanakuṭumbiyamāraṇe rājiddhi dāṭṭhabbā, tadatthameva athabbaṇādivijjāya parijappanaṃ **vijjāmayo** payogo.

Evaṃ chappayoge dassetvā tesu āṇattippayogassa niyāmake dassetuṃ “**kālā**”tiādi vuttaṃ. Tattha yathāvuttaṃ āṇattiṃ niyamenti saṅketavisaṅketatāvasena paricchindantīti **āṇattiniyāmakā**. Te pana kālo ca vatthu ca āvudhañca iriyāpatho cāti cattāro, tathā kiriyāviseso okāsoti gaṇanaparicchadavasena cha hontīti attho. Tattha **kālo** pubbaṇhādi yobbanādi ca. **Vatthu** māretabbo satto. **Āvudhaṃ** asiādi. **Iriyāpatho** māretabbassa gamanādi. **Kiriyāviseso** vijjhanādi. **Okāso** gāmādi. Yo hi “ajja, sve”ti aniyametvā “pubbaṇhe mārehī”ti vutto yadā kadāci pubbaṇhe māreti, natthi visaṅketo. Yo pana “pubbaṇhe”ti vutto majjhanhādīsu māreti, visaṅketo hoti, āṇāpakassa anāpatti. Evaṃ kālassa saṅketavisaṅketatāvasena niyāmakatā veditabbā. Imināva nayena vatthuādīsupi vinicchayo veditabboti.

Tatiyaṃ.

**8-9.** Idāni catutthaṃ dassetuṃ “**jhānādibheda**”ntiādīmāha. Tattha attani nosantaṃ attupanāyikañca paccuppanabhavassitañca aññāpadesarahitañca jhānādibhedaṃ koṭṭhāsaṃ katvā vā ekekaṃ katvā vā kāyena vā vācāya vā viññattipathe dīpento nādhimāniko ñāte cuto bhaveti sambandho.

Tattha **attani** sakasantāne **nosantaṃ** anuppannattāyeva avijjamānaṃ, ettha nosantoti atthe tappuriso. **Jhānādibhedanti** jhānaṃ ādi yassa “vimokkhasamādhī samāpatti nānadassana maggabhāvanā phalāsacchi kiriyākilesappahānavinīvaraṇatācittassa suññāgāre abhiratī” ti (pārā. 198) vuttassa so jhānādi, sova bhedo visesoti samāso. Taṃ jhānādibhedam uttarimanussadhammaṃ. **Attupanāyikanti** “ayaṃ mayi atthī” ti ārocanavasena attani upanīyati, “ahaṃ vā ettha sandissāmī” ti attā upanīyati ettha dhammeti vā attupanāyiko, jhānādibhedo, taṃ. **Paccuppannabhavassitanti** paccuppannabhavo nāma idāni vattamāno attabhāvo, tannissitoti samāso, so ca jhānādibhedoyeva, taṃ.

**Aññāpadesarahitanti** “yo te vihāre vasi, so bhikkhu paṭhamam jhānaṃ samāpajjī” tiādinā (pārā. 220) nayena aññassa apadeso, tena rahito cattoti tappurisasamāso, so rahito tenāti vā bahubbīhi, jhānādibhedova, taṃ. **Koṭṭhāsaṃ katvā vāti** “paṭhamam jhānaṃ dutiyam jhānaṃ samāpajjīm, paṭhamam jhānaṃ tatiyam jhānaṃ samāpajjī” ntiādinā nayena koṭṭhāsaṃ katvā vā. **Ekekaṃ katvā vāti** “paṭhamam jhānaṃ samāpajjīm, dutiyam jhānaṃ samāpajjī” ntiādinā nayena ekekaṃ katvā vā. Ettha ca ekanti thite vicchāyam dvittam. Ettha pana katvāti karaṇakiriyāya ekekavasena bhinnassa jhānādino atthassa sambandhanicchā vicchāti veditabbā. **Ṭikāyam** pana “koṭṭhāsaṃ vāti ettha ‘jhānalābhī, vimokkhalābhī, samādhilābhī, samāpattilābhīmhi” ti evamādinā nayena koṭṭhāsato vāti attho” ti ca “ekekaṃ vāti ‘paṭhamassa jhānassa lābhī, dutiyassa jhānassa lābhīmhi” ti evamādinā nayena ekekaṃ vāti attho” ti ca vuttam. So pāliyam aṭṭhakathāyañca avuttakkamoti veditabbo. **Kāyena vāti** hatthamuddādivasena kāyena vā. **Vācāti** ettha ya-kāro luttaniddiṭṭho “alajjitā” tiādīsu viya. **Viññattipatheti** kāyavacīviññattīnaṃ gahaṇayogye padese thātvaṭi ajjhāharitabbaṃ. **Dīpentoti** “iminā ca iminā ca kāraṇena ayaṃ dhammo mayi atthī” ti pakāsento. **Nādhimānikoti** appatte pattasaññitāsankhāto adhiko māno, so natthi etassāti nādhimāniko, bhikkhu. **Ñateti** viññunā manussa jātikena sikkhāpaccakkhāne vuttanayena viññāte sati cuto bhava sāsanaṭoti viññāyati. **Aññāpadesena** dīpayato pana thullaccayam. Ettha ca –

Dukkaṭam paṭhamasseva, sāmantaṃti vaṇṇitaṃ;  
Sesānaṃ pana tiṇṇampi, thullaccayamudīritanti.

Catuttham.

**10.** Idāni catunnampi cetesamasamvāsataṃ abhabbatañca dīpetum “**pārājikete**” tiādi āradham. Ete cattāro **pārājikā** puggalā **yathā pure** pubbe gihikāle, anupasampannakāle ca viya asaṃvāsāti sambandho. Saha vasanti yasmā sabbepi lajjino etesu kammādīsu na ekopi tato bahiddhā sandissatīti ekakammaṃ ekuddeso samasikkhatīti ime tayo saṃvāsā nāma. Tattha apalokanādikam catubbidhampi saṅghakammaṃ sīmāparicchinnehi pakatattehi bhikkhūhi ekato kattabbatā **ekakammaṃ** nāma. Tathā pañcavidhopi pātīmokkhuddeso ekato uddisittabbattā **ekuddeso** nāma. Paññattaṃ pana sikkhāpadaṃ sabbehipi lajjipuggalehi samaṃ sikkhitabbabhāvato **samasikkhatā** nāma. Natthi te saṃvāsā etesanti **asaṃvāsā**. “**Abhabbā**” tiādīsu **bhikkhubhāvāyāti** tumatthe sampadānavacanaṃ, tasmā yathā sīsacchinno jīvitum abhabbo, evaṃ cattārome puggalā bhikkhubhāvāya bhikkhū bhavitum abhabbāti attho.

**11.** Idāni pariyāyāṇattīhi sambhavante dassetum “**pariyāyo cā**” tiādimāha. Pariyāyo ca āṇatti ca tatiye manussaviggahe labhatīti sambandho. Tattha kāyādīhi yathāvuttehi “yo evaṃ marati, so dhanam vā labhatī” ti evamādiviññāpako byañjanabhūto kāyavacīpayogo pariyāyo. Iminā idaṃ dīpeti – yathā adinnādāne “ādiyeyyā” ti (pārā. 92) vuttattā pariyāyakathāya muccati, na idha evaṃ. “**Saṃvaṇṇeyyā**” ti (pārā. 172) pariyāyakayāyapi na muccatīti. “**Dutiye panā**” tiādīsu attho pākaṭoyeva. Evamuparipi pākaṭamupekkhissāma.

**12.** Idāni methunadhammādīnaṃ aṅgāni dassetum “**sevetū**” tiādimāha. **Sevetukāmatācittanti** methunaṃ sevetum kāmetīti sevetukāmo, tassa bhāvo nāma taṇhā, tāya sevetukāmatāya sampayuttaṃ cittanti tappuriso. **Methunadhammassāti** mithunānaṃ itthipurisānaṃ idanti methunaṃ, tameva

dhammoti methunadhammo. Idha pana upacāravasena pārājikāpatti methunadhammo nāma. Atha vā methunena jāto dhammo pārājikāpatti methunadhammo, tassa methunadhammassa methunadhammapārājikāpattiyā. **Aṅgadvayanti** aṅgānaṃ kāraṇānaṃ dvayaṃ. **Budhāti** vinayadharā viññuno.

**13. Manussasanti** manussānaṃ saṃ manussasaṃ, tadāyattavatthukā ca. Etena petatiracchānagatāyattaṃ nivatteti. **Tathāsaññīti** tathā tādīsā saññā tathāsaññā, sā assa atthīti tathāsaññī. Parāyattasaññitā cāti attho. Bhāvappadhānā ime niddesā, bhāvapaccayalopo vā “buddhe ratana”ntiādīsu (khu. pā. 6.3) viya. Evamuparipi īdīsesu. **Theyyacittanti** thenabhāvasaṅkhātaṃ cittaṅca. **Vatthuno garutāti** bhaṅḍassa pādaatirekapādārahabhāvena garutā ca. Ūnapañcamāsake vā atirekamāsake vā thullaccayaṃ. Māsake vā ūnamāsake vā dukkaṭaṃ. **Avahāroti** pañcavīsatiyā avahāraṇaṃ aññatarena avaharaṇañcāti ime pañca **adinnādānahetuyo** adinnādānapārājikāpattiyā aṅgāni.

**14. Pāṇo mānussakoti** manussajātisambandho pāṇo ca, pāṇoti hi vohārato satto, paramatthato pana jīvitindriyaṃ vuccati. **Pāṇasaññitāti** pāṇoti saññitā ca, ghātaṇaṃ ghāto, so eva cetanā **ghātacetanā**, “vadhāmi na”nti evaṃ pavattā sā ca, taṃsamuṭṭhito sāhatthikādīnaṃ channamaññataro **payogo** ca, **tena** payogena maraṇañcāti **ete** yathāvuttā **pañca vadhahetuyo** pāṇaghātāpajjitabbaāpattiyā aṅgānīti attho.

**15. Attani asantatāti** uttarimanussadhammassa santāne avijjamānatā ca. **Pāpamicchatāyārocanāti** yā sā “idhekacco dussīlo samāno ‘sīlavāti maṃ jano jānātu”tiādīnā (vibha. 851) nayena vuttā pāpaicchatāya samannāgatā, tāya uttarimanussadhammassa ārocanā ca. **Tassāti** yassa āroceti, tassa. **Manussajātītāti** manussānaṃ jāti yassa, tassa bhāvo manussajātītā, sā ca, **naññāpadesoti** na aññāpadeso aññāpadesābhāvo ca, **tadeva jānananti** taṅkhaṇaṃyeva vijānanañcāti imāni **pañca ettha asantadīpane** asmiṃ santāne avijjamānauttarimanussadhammappakāsananimitte pārājike **aṅgāni** hetuyoti attho.

**16.** Evaṃ tesamasamvāsātābhabbatādīni dassetvā idāni na te cattārova, atha kho santaññepīti te sabbepe samodhānetvā dassento “**asādhāraṇā**”tiādīmāha. Tattha **asādhāraṇāti** pārājikā dhammā adhippetā. Teneva cetha pulliṅganiddeso. Tasmā bhikkhunīnaṃ bhikkhūhi asādhāraṇā pārājikā dhammā cattāro cāti evamettha attho daṭṭhabbo. Upacāravasena tu ubbhajāṇumaṅḍalikādikā pārājikāpannā pariggayhanti. Tāsu yā avassutā avassutassa manussapurisassa akkhakānaṃ adho jāṇumaṅḍalānaṃ kapparaṇaṅca upari kāyasamsaggaṃ sādīyati, ayaṃ **ubbhajāṇumaṅḍalikā**. Yā pana aññissā bhikkhuniyā pārājikaṃ paṭicchādeti, sā **vajjappaṭicchādikā**. Yā ukkhittakaṃ bhikkhuṃ tassā diṭṭhiyā gahaṇavasena anuvattati, sā **ukkhittānuvattikā**. Kāyasamsaggarāgena tintassa hatthaggaṇaṃ saṅghāṭikaṇṇaggaṇaṃ kāyasamsaggaṭṭhāya purisassa hatthapāse ṭhānaṃ ṭhatvā sallapanāṃ saṅketagamaṇaṃ purisassāgamaṇasādīyanaṃ paṭicchannokāsavavisaṇaṃ hatthapāse ṭhatvā kāyopasaṃharaṇanti imāni aṭṭha vatthūni yassā avassutāya, sā **aṭṭhavatthukā** nāma.

**Abhabbakā ekādasa cāti** ettha paṇḍako theyyasamvāsako tithiyapakkantako tiracchānagato mātughātako pitughātako arahantaghātako bhikkhunidūsako saṅghabhedako lohituppādako ubhatobyañjanakoti ime abhabbā ekādasa ca. Tesu **paṇḍakoti** opakamikanapumsakapaṇḍakā ca paṇḍakabhāvapakke pakkhapaṇḍako ca idha adhippetā. Āsittausūyapaṇḍakānaṃ pana pabbajjā ca upasampadā ca na vāritā. Theyyasamvāsako pana līngatthenakādivasena tividho. Tattha sayam pabbajitattā līngamattaṃ thenetīti **līngatthenako**. Bhikkhuvassagaṇanādikaṃ samvāsam thenetīti **samvāsatthenako**. Sikkhaṃ paccakkhāya evaṃ paṭipajjantepi eseva nayo. Yathāvuttamubhayaṃ thenetīti **ubhayatthenako**. Ṭhapetvā pana imaṃ tividhaṃ –

Rājadubbhikkhakantāra-rogaveribhayena vā;  
Cīvarāharaṇatthaṃ vā, līngaṃ ādiyatiḍha yo.

Samvāsam nādhivāseti, yāva so suddhamānaso;

Theyyasaṃvāsako nāma, tāva esa na vuccatīti. (mahāva. aṭṭha. 110; kaṅkhā. aṭṭha. paṭhamapārājikavaṇṇanā);

Titthiyapakkantakādayo tu taṃtaṃvacanattānusārena veditabbā. Tiracchānagato pana ṭhapetvā manussajātikam avaseso sabbo veditabbo. Ime ekādasa puggalā bhikkhubhāvāya abhabbattā pārājikāpannasadisatāya “pārājikā”ti vuccanti. **Vibbhantā bhikkhunī**ti gihinivāsananivatthā bhikkhunī ca. Sā hi ettavatā pārājikā. Mudukā piṭṭhi yassa, so ca. So hi anabhiratiyā pīlito yadā attano āngajātaṃ attano vaccamukhamaggesu paveseti, tadā pārājiko hoti.

**17-18.** Lambamānamāngajātametassāti **lambī**. So yathāvuttesu pavesito pārājiko. **Mukhena gaṇhanto āngajātaṃ parassa cāti** yo anabhiratiyā pīlito parassa suttassa vā matassa vā āngajātaṃ mukhena gaṇhāti, so parassa āngajātaṃ mukhena gaṇhanto ca. **Tatthevābhiniṣīdatoti** yo anabhiratiyā pīlito tattheva parassa āngajāte vaccamaggena abhiniṣīdati, so cāti ete dvayaṃdvayasamāpattiyā abhāvepi magge maggappavesanahetu methunassa anulomikā cattāro ca. **Idhāgatā cattāro**ti idha khuddasikkhāyaṃ yathāvuttā methunadhammā pārājikādayo cattāro cāti **samodhānā** piṇḍikaraṇavasena catuvīsati pārājikā bhavantīti seso. Ettha ca gāthābandhavasena rassam katvā “**parājikā**”ti vuttaṃ. Etthāha – mātughātakādayo tatiyaṃ pārājikaṃ āpannā, bhikkhunīdūsako, mudupiṭṭhikādayo cattāro ca paṭhamapārājikaṃ āpannā evāti kuto catuvīsati? Vuccate – mātughātakādayo hi cattāro idha anupasampannā eva adhippetā. Mudupiṭṭhikādayo cattāro kiñcāpi paṭhamapārājikenā saṅgahitā, yasmā pana ekena pariyaṇena methunadhammaṃ appaṭisevino honti, tasmā visum vuttāti.

Pārājikaniddesavaṇṇanā niṭṭhitā.

## 2. Saṅghādisesaniddesavaṇṇanā

**19.** Vuṭṭhānassa garukattā **garukā**ti saṅghādisesā vuccanti. **Navāti** tesam gaṇanaparicchedo. Nanu “navā”ti kasmā vuttaṃ, “terasā”ti vattabbanti? Nāyaṃ doso, cirenāpajjitabbe cattāro yāvatatiyake ṭhapetvā vītikkamakkaṇeyeva āpajjitabbā paṭhamāpattikā vuccantīti. Idāni te dassetuṃ “**mocetukāmatā**”tiādi āradhamaṃ. Tattha **sukkassāti** āsayadhātunānattato nīlādivasena dasavidhe sukke yassa kassaci sukkassa. **Mocetukāmatāti** mocetukāmatāya, ya-kāro luttaniddiṭṭho. Iminā pana vacanena mocanassāda muccanassāda muttassādamehunassāda phassassāda kaṇḍuvanassāda dassanassāda nisajjanassāda vācassāda gehasitapema vanabhaṅgiya saṅkhātesu ekādasassādesu ekameva mocanassādaṃ dasseti.

Tattha mocanāya assādo sukhavedanā **mocanassādo**. Muccane attano dhammatāya muccane assādo **muccanassādo**. Evaṃ sabbattha sattamītappurisena attho daṭṭhabbo. Imehi pana navahi padehi sampayuttaassādasīsenā rāgo vutto. Gehanissitesu mātādīsu pemaṃ gehe sitaṃ pemanti **gehasitapemaṃ**, iminā sarūpeneva rāgo vutto. Santhavakaraṇattāya itthiyā pesitapupphādi **vanabhaṅgiyaṃ**, iminā ca vatthivasena rāgo vutto. Methunassādopi itthiyā gahaṇappayogena veditabbo. Sabbattheva ca pana cetanānimittipakkamamocane sati visaṅketābhāvo veditabbo. **Upakkamma** hatthādinā nimitte upakkamivā. **Aññātra supinantenāti** supinoyeva supinanto “kammameva kammanto”tiādīsu viya anta-saddassa tabbhāvavuttittā. Taṃ supinantaṃ vinā **vimocayaṃ** sukkaṃ vimocento **samaṇo** yo koci bhikkhu **garukaṃ** garukāpattisaṅkhātaṃ saṅghādisesaṃ **phuse** phuseyya, āpajjeyyāti vuttaṃ hoti. Ettha ca ajjhatarūpabahiddhārūpaubhayarūpaākāsekaṭikampanasaṅkhātesu catūsu upāyesu sati rāgūpatthambhādīsu ca kālesu yena kenaci āngajāte kammaññataṃ patte “ārogyatthāyā”tiādīsu yena kenaci adhippāyena adhippāyavatthubhūtaṃ yaṃ kiñci sukkaṃ mocanassādacetanāya eva nimitte upakkamma mocento saṅghādisesaṃ āpajjatīti sabbathā adhippāyo daṭṭhabbo.

Paṭhamo.

**20. Kāyasamsaggarāgavāti** kāye samsaggo, tasmim rāgo, so assa atthīti vantu, kāyasamsaggarāgasamaṅgīti attho. Samaṇo itthisaññīti sambandho. **Upakkammāti** kāyena vāyāmitvā. **Manussitthim samphusantoti** antamaso lomenapi parāmasanto garukaṃ phuseti yojanā. Manussabhūtā amatā itthī **manussitthī**. Tattha “kāyasamsaggarāgavā”ti iminā mātupemādiṃ, itthiyā gahitamokkhādhippāyaṅca paṭikkhipati. Itthiyā vematikassa, paṇḍakapurisatiracchānagatasaññissa ca thullaccayaṃ. Itthiyā pana kāyena kāyappaṭibaddhāmasane, kāyappaṭibaddhena kāyāmasane ca yakkhīpetīpaṇḍakānaṃ kāyena kāyāmasane ca purisatiracchānagatitthīnaṃ kāyena kāyāmasanepi dukkaṭaṃ, tathāyakkhīdānaṃ kāyena kāyappaṭibaddhādīsu ca. Matitthiyā pana thullaccayaṃ. Itthiyā pana phusiyamāno sevanādhippāyopi sace kāyena na vāyāmatī, anāpatti.

Dutiyo.

**21. Tathāti** itthisaññī. **Suṇantinti** viññattipathe ṭhatvā attano vacanaṃ suṇantiṅca. **Viññuñcāti** duṭṭhullāduṭṭhullasallakkaṇasamatthaṅca manussitthim. **Maggam vāti** vaccamaggapassāvamaggānaṃ vasena maggaṃ vā methunaṃ vā ārabbhāti sambandho. **Duṭṭhullavācārāgenāti** duṭṭhā ca sā asaddhammappaṭisaṃyuttatāya thūlā ca lāmakajanasādhāraṇatāyāti duṭṭhullā. Sāva puna vācā duṭṭhullavācā. Tassaṃ assādasampayutto rāgoti samāso, tena. **Obhāsivāti** vaṇṇāvaṇṇayācanādivasena asaddhamvacanaṃ vatvā. Asuṇantiyā pana dūtena vā paṇṇena vā ārocite anāpatti. Tattha dvinnaṃ maggānaṃ vasena vaṇṇāvaṇṇehi, methunayācanādīhi vā “sikharaṇīsi, sambhinnāsi, ubhatobyañjanakāsi”ti imesu tīsu aññātarena akkosavacanena vā obhāsantassa saṅghādiseso, adhakkhakaubbhajāṇumaṇḍalaṃ ādissa vaṇṇādibhaṇane thullaccayaṃ, tathā yakkhīpetīpaṇḍakānaṃ vaccamaggapassāvamagge ādissa vaṇṇādibhaṇane methunayācanādīsipi. Tesam pana adhakkhakaḍike dukkaṭaṃ, tathā manussitthīnaṃ ubbhakkhake adhojāṇumaṇḍale kāyappaṭibaddhe ca.

Tatiyo.

**22. Attakāmupaṭṭhānanti** methunadhammasaṅkhātena kāmena upaṭṭhānaṃ kāmupaṭṭhānaṃ. Attano atthāya kāmupaṭṭhānaṃ attakāmupaṭṭhānaṃ. Atha vā kāmīyatīti kāmam, attano kāmam attakāmam, sayam methunarāgavasena patthitanti attho. Attakāmaṅca tam upaṭṭhānañcāti attakāmupaṭṭhānaṃ. Tassa vaṇṇo guṇo, tam. **Vatvāti** “yadidaṃ kāmupaṭṭhānaṃ nāma, etadaggaṃ upaṭṭhānāna”nti kāmupaṭṭhāne vaṇṇam antamaso hatthamuddāyapi itthīti saññī pakāsetvāti attho. **Vācāti** vācāya yakāralopavasena. **Methunayuttenāti** methunayuttāya, līngavipallāsavasena tāya “arahasi tvam mayham methunaṃ dhammaṃ dātu”ntiādikāya methunadhammappaṭisaṃyuttāya vācāya methunayācane methunarāginoti sambandho. Methunerāgo, so assa atthīti **methunarāgī**, tassa. **Garuhotīti** garukāpatti hotīti attho. **Ma-kāro** padasandhikaro. Ettha pana paṇḍake paṇḍakasaññino thullaccayaṃ, tasmīyeva itthisaññino dukkaṭaṃ.

Catuttho.

**23.** Itthiyā vā purisassa vā sandesaṃ paṭiggahetvāti sambandho. **Itthiyā vāti** “dasa itthiyo māturakkhitā piturakkhitā”tiādīnā (pārā. 303) ca “dasa bhariyāyo dhanakkītā chandavāsīnī”tiādīnā (pārā. 303) ca vuttāya vīsatividhāya itthiyā vā purisassa vā taṃsambandhavasena tesam mātādīnaṃ vā. **Sandesanti** itthiyā vā purisena vā ubhinnaṃ mātādīhi vā “ehi, bhante, itthannāmaṃ itthim vā purisaṃ vā evaṃ bhaṇāhi”ti vuttaṃ jāyampatibhāvasannissitaṃ sandesavacanaṃ. **Paṭiggahetvāti** “sādhū”ti kāyena vā vācāya vā sampaṭicchitvā. **Vimamsivāti** yattha pesito, tesam adhippāyaṃ upaparikkhitvā vā upaparikkhāpetvā vā. **Haram paccāti** itthī vā puriso vā “sādhū”ti sampaṭicchatu vā, mā vā, yehi pesito, tesam paccāharanto vā harāpento vā, jāyampatibhāvo hotu vā, mā vā, akāraṇametam. Imāya tivaṅgasampattiyā saṅghādiseso ca, dvīhi aṅgehi paṇḍake ca aṅgattayenāpi thullaccayaṃ, ekena dukkaṭaṃ. Keci pana “haram pacchā”ti vipāṭham parikkappetvā “pacchā hara”nti yojenti, tam na sundaraṃ **paccāti** upasaggatā. Padassa upari atthe sajjento pakāseto gacchatīti hi **upasaggo** nāma, tasmā “pati ā”ti upasaggānaṃ “hara”ntimassa padassa upari bhavitabbanti.

Pañcama.

**24. Saṃyācitaparikkhāraṇti** saṃ attanā yācīto vāsīādiko parikkhāro yassā, taṃ.

**Adesitavattukanti** uttidutiyakammena adesitaṃ vatthu kuṭikaraṇappadeso yassāti viggaho, taṃ.

**Pamāṇātikkantanti** idāni majjhimassa purisassa tisso vidatthiyo sugatavidatthi nāma, tāya “dīghaso dvādasa vidatthiyo sugatassa vidatthiyā tiriyaṃ sattantarā”’ti (pārā. 348) evaṃ vuttappamāṇaṃ ekatobhāgenāpi atikkantā pamāṇātikkantāti taṃ tiriyaṃ catuhattasankhātahaṭṭhimappamāṇe sati dīghato vuttappamāṇato kesaggamattampi vaḍḍhetuṃ na vaṭṭati. Tato ūnake, dīghato ca vaḍḍhite ayaṃ kuṭisaṅkhaṃ na gacchatīti. “Mayhaṃ vāsāgāraṃ eta”’nti evaṃ attā uddeso etissāti **attuddesā**. **Kuṭinti** ullittādikaṃ kuṭiṃ katvāti sambandho. Tattha **ullittā** nāma anto uddhammukhaṃ littā. **Avalittā** nāma bahi adhomukhaṃ littā. Ubhayathā **ullittāvalittā**. **Katvāti** antobhūtakāritatthavasena kārapetvā vā.

Tatthāyaṃ vatthudesanakkamo – tena kuṭikāraṇena bhikkhunā kuṭivatthuṃ sodhetvā saṅghaṃ upasaṅkamtivā ekasamṃ uttarāsaṅgaṃ karitvā vuḍḍhānaṃ bhikkhūnaṃ pāde vanditvā ukkuṭikaṃ nisīditvā añjaliṃ paṇāmetvā **padabhājane** (pārā. 349) vuttanayena saṅghaṃ tikkhattuṃ yācivā sabbe vā saṅghapariyāpannā, saṅghena vā sammatā dve tayo bhikkhū tattha netabbā. Tehi ca kipillikādīhi soḷasaḥi upaddavehi virahitattā anārambhaṃ anupaddavaṃ dvīhi catūhi vā balibaddehi yuttana sakaṭena ekacakkaṃ nibbodakapataṇaṭṭhāne ekaṃ bahi katvā āviñchitū sakkuṇeyyatāya “saparikkamana”’nti sallakkhetvā sacepi saṅghappahonakā honti, tattheva, no ce, saṅghamajjhaṃ gantvā tena bhikkhunā yācītehi **padabhājane** (pārā. 50, 51) vuttāya ñattidutiyakammavācāya vatthu desetabbanti. Adesitavattukamṃ pamāṇātikkantaṃ kuṭiṃ karissāmīti sabbappayoge dukkaṭaṃ, idāni dvīhi piṇḍehi niṭṭhānaṃ gamissaṭīti paṭhamapiṇḍadāne thullaccayaṃ, dutiyadānena lepe saṅghaṭite sace adesitavattukā eva vā hoti, pamāṇātikkantā eva vā, eko saṅghādīseso, sārambhaaparikkamanatāya dve ca dukkaṭānīti sace ubhayavipannā, dve ca saṅghādīsesā dve ca dukkaṭānīti sabbamṃ ñeyyaṃ.

Chaṭṭho.

**25. Mahallakanti** sassāmikabhāvena saṃyācitakuṭīto mahantabhāvena, vatthuṃ desāpetvā pamāṇātikkamenāpi kātabbabbhāvena ca mahantatāya mahattaṃ lāti ādadātīti mahallako. Mahattalaka iti ṭhite ttassa lopo lassa ca dvittaṃ, taṃ. Vasanaṃ attho payojanaṃ **vasanatto**, tāya. Ettha pana adesitavattubhāve eko saṅghādīseso. Sesamṃ anantarasadīsameva. Idha ca tattha ca leṇaguhāṭīnakūṭipaṇṇacchadanagehesu aññataraṃ kārentassa ca kuṭimpī aññassa vāsathāya vāsāgāraṃ vā ṭhapetvā uposathāgārādīsū aññataratthāya karontassa ca anāpatti.

Sattamo.

**26. Amūlakena** antimena vatthunāti sambandho. **Amūlakenāti** dassanasāṅkhātassa, savanasāṅkhātassa, diṭṭhasutamutavasena pavattaparisaṅkāsāṅkhātassa ca mūlassa abhāvena natthi mūlametassāti amūlakaṃ, tena. Taṃ pana so āpanno vā hotu, no vā, etaṃ idha appamāṇaṃ. Tattha bhikkhuṇca mātugāmaṇca tathārūpe ṭhāne disvā parisāṅkati, ayaṃ **diṭṭhaparisaṅkā**. Andhakāre vā paṭicchanne vā bhikkhussa ca mātugāmassa ca vacanaṃ sutvā aññassa atthibhāvaṃ ajānanto parisāṅkati, ayaṃ **sutaparisaṅkā**. Dhuttānaṃ itthīhi saddhiṃ paccantavīhāresu pupphagandhasurādīhi anubhavitvā gataṭṭhānaṃ disvā “kena nu kho idaṃ kata”’nti vīmaṃsanto tattha kenaci bhikkhunā gandhādīhi pūjā katā hoti, bhesajjathāya ariṭṭhaṃ vā pītaṃ, so tassa gandhaṃ ghāyitvā “ayaṃ so bhavissati”’ti parisāṅkati. Ayaṃ **mutaparisaṅkā** nāma. **Antimena cāti** tato paraṃ vajjābhāvena ante bhavattā antimeneva. **Vatthunāti** bhikkhuno anurūpesu ekūnavīsatiyā pārājikesu dhammesu aññatarena pārājikena dhammena. **Ca-kāro** panettha avadhāraṇe, tena saṅghādīsesādīṃ nivatteti. Atha vā **ca-kāro** aṭṭhānapayutto.

Codento vā codāpentovācāti yojetabbo. **Cāvetunti** brahmacariyā cāvanatthāya. Etena ekaṃ cāvanādhīppāyaṃ gahetvā avasese akkosādhippāyavutṭhāpanādhīppāyādike sattādhīppāye paṭikkhipati.

**Suṇamānanti** idaṃ “codento”tiādīnaṃ kammaṇaṃ, iminā parammukhā codanaṃ paṭikkhipati. Parammukhā pana sattahi āpattikkhandhehi vadantassa dukkaṭaṃ. **Codentoti** “vatthusandassanā āpattisandassanā saṃvāsappaṭikkhepo sāmīcippaṭikkhepo”ti (pārā. aṭṭha. 2.385-386) saṅkhepato vuttānaṃ catunnaṃ codanānaṃ vasena sayamaṃ codento vā. **Codāpento vāti** parena yena kenaci codāpento vā. Tasmā yo bhikkhussa samīpe ṭhatvā “tvamaṃ methunaṃ dhammaṃ sevi, assamaṇosī”tiādīnā vatthusandassanavasena vā “tvamaṃ methunadhammāpattiṃ āpannosī”tiādīnā āpattisandassanavasena vā “assamaṇosi, natthi tayā saddhiṃ uposatho vā pavāraṇā vā saṅghakammaṃ vā, assamaṇosī”tiādīnā saṃvāsappaṭikkhepavasena vā abhivādanādisaṃvāse paṭikkhitte assamaṇoti kasmāti puṭṭhassa “assamaṇosī”tiādivacanehi sāmīcippaṭikkhepavasena vā antamaso hatthamuddāya eva vāpi etamatthaṃ dīpayato “karotu me āyasmā okāsaṃ, ahaṃ taṃ vattukāmo”ti evamaṃ okāse akārite vācāya saṅghādiseso ceva dukkaṭaṇca, okāsaṃ kāretvā codentassa pana saṅghādiseso vā daṭṭhabbo.

Aṭṭhamaṃ.

**27. Aññassāti** khattiyādi jātikassa parassa. **Kiriyanti** methunavītikkamasāṅkhātamaṃ kiriyamaṃ. **Tenāti** aññassa vītikkamasāṅkhātassa methunavītikkamasandassanena karaṇabhūtena. **Lesenāti** yassa jātiādayo tato aññampi vatthumaṃ lissati uddiṭṭhe vitthāraṃ silissati vohāramattenevāti jātiādayova “lesā”ti vuccanti, tena jātilesanāmalesādīnā lesena. **Aññanti** yo vītikkamanto diṭṭho, tato aparampi bhikkhumaṃ cāvetumaṃ antimena vatthunā codayanti sambandho. Kathamaṃ? Koci khattiyajātiyo vītikkamanto diṭṭho, tato aññaṃ attano verimaṃ khattiyajātikaṃ bhikkhumaṃ passitvā taṃ khattiyamaṃ jātilesamaṃ gahetvā “khattiyomaṃ mayā diṭṭho vītikkamanto, tvamaṃ khattiyomaṃ pārajikaṃ dhammaṃ āpannosī”ti codeti codāpeti vā. Evamaṃ nāmalesādayopi veditabbā. Sesā vinicchayakathā aṭṭhame vuttasadisāyeva.

Navamaṃ.

**28. Ettāvata** “garukā navā”ti uddiṭṭhe vitthārato dassetvā idāni tesu āpannesu paṭipajjitabbākāraṃ dassetuṃ “**chādeti jānamāpanna**”ntiādi vuttaṃ. Tattha yo bhikkhu attanā **āpannaṃ** saṅghādisesāpattiṃ āpattivāsena vā vatthuvāsena vā **jānaṃ** jānanto **yāvata** yattakāni ahāni **chādeti** paṭicchādeti, **tāvata** tattakāni ahāni tassa parivāso hotīti evamaṃ padasandhivasena attho veditabbo. Tattha paṭicchannaparivāso suddhantaparivāso samodhānaparivāsoti tividho parivāso. Tesamaṃ pana atisaṅkhepanayena mukhamattepi dassite vitthāravinicchayapavesopāyasambhavo siyāti mukhamattaṃ dassayissāma.

Tattha **paṭicchannaparivāso** nāma yathāpaṭicchannāya āpattiyā dātabbo, tasmā paṭicchannadivase ca āpattiyomaṃ ca sallakkhetvā sace ekāhappaṭicchannā hoti, “ahaṃ, bhante, sambahulā āpattiyomaṃ āpajjimaṃ ekāhappaṭicchannāyo”tiādīnā **khandhake** (cūḷava. 98-99) āgatanayena yācāpetvā “suṇātu me bhante saṅgho, ayaṃ itthannāmo bhikkhu sambahulā āpattiyomaṃ āpajji ekāhappaṭicchannāyo”tiādīnā **khandhake** āgatanayeneva kammavācaṃ vatvā parivāso dātabbo. Ekaṃ āpajjitvā “sambahulā”ti vinayakammaṃ karontassāpi puṭṭhātīti “sambahulā”ti vuttaṃ. Nānavatthukāsūpi eseva nayo. Atha dvīhādiṭṭhapaṭicchannā hontī, pakkhaatirekapakkhamāsaatirekamāsaṃvaccharaatirekasamaṃvaccharappaṭicchannā vā, “dvīhappaṭicchannāyo vā”tiādīnā vatvā yo yo āpanno hoti, tassa tassa nāmaṇca gahetvā yojanā katabbā.

Kammavācāpariyosāne ca sace appabhikkhuko āvāso hoti, sakkā ratticchedamaṃ anāpajjantena vasitumaṃ, tattheva “parivāsaṃ samādiyāmi, vattaṃ samādiyāmi”ti vattaṃ samādāya tattheva saṅghassa “ahaṃ, bhante, sambahulā saṅghādisesā āpattiyomaṃ āpajjimaṃ ekāhappaṭicchannāyo”tiādīnā ārocetvā puna āgatāgatānaṃ bhikkhūnaṃ ārocetvā pakatattena bhikkhūnā saddhiṃ ekacchanna saṅghavāso, tena ca vināvāso, āgantukādīnaṃ upacāragatānaṃ anārocānāti etesu ekenāpi ratticchedaṇca vattabhedaṇca akatvā parivatthabbaṃ.

Sace na sakkā hoti parivāsaṃ sodhetumaṃ, nikkhattavattena vasitukāmo hoti, tattheva saṅghamajjhe vā ekassa puggalassa vā santike “parivāsaṃ nikkhipāmi, vattaṃ nikkhipāmi”ti parivāso nikkhipitabbo.

Nikkhittakālato paṭṭhāya pakatattaṭṭhāne tiṭṭhati. Athānena paccūsasamaye ekena bhikkhunā saddhiṃ parikkhittassa vihārassa parikkhepato, aparikkhittassa parikkhepārahaṭṭhānato dve leḍḍupāte atikkamitvā mahāmagгато okkamma paṭicchannaṭṭhāne nisīditvā antoaruṇeyeva vattaṃ samādiyitvā ārocetabbaṃ. Sace bahi ṭhitānampi saddaṃ suṇāti, passaṭi vā, dūraṃ gantvāpi ārocetabbaṃ, anārocente ratticchedo ceva vattabhedadukkaṭaṇca. Sace ajānantasseva upacārasīmaṃ pavisitvā gacchanti, ratticchedova hoti, na vattabhedo. Aruṇe uṭṭhite tassa santike vattaṃ nikkhipitvā vihāraṃ gantabbaṃ. Evaṃ yāva rattiyo pūrenti, tāva parivatthabbaṃ. Ayaṃ tāva **paṭicchannaparivāso**.

**Suddhanto** duvidho cūlasuddhanto mahāsuddhantoti. Tattha yo “upasampadato paṭṭhāya yattakaṃ nāma kālaṃ ahaṃ suddho”ti jānāti, tattakaṃ apanetvā tato avasese rattiparicchede ekato katvā dātabbaparivāso **cūlasuddhanto**. Yo pana sabbaso rattipariyantam na jānāti nassarati, tattha ca vematiko, tassa dātabbo **mahāsuddhanto**. Āpattipariyantam jānātu vā, mā vā, akāraṇametam.

**Samodhānaparivāso** nāma tividho odhānasamodhāno agghasamodhāno missakasamodhānoti. Tattha yo niṭṭhitaparivāsopi vā niṭṭhitamānattopi vā anikkhittavatto aññaṃ āpattiṃ āpajjitvā purimāpattiya samā vā ūnatarā vā rattiyo paṭicchādeti, tassa mūlāya paṭikassanena te parivutthadivase ca mānattaciṇṇadivase ca odhunitvā makkhetvā purimāya āpattiya mūladivasaparicchede pacchā āpannaṃ āpattiṃ samodahitvā puna ādito paṭṭhāya dātabbaparivāso **odhānasamodhāno** nāma. Sace kassaci ekāpatti ekāhappaṭicchannā, dvīhappaṭicchannā, evaṃ yāva dasāhappaṭicchannā, tāsaṃ agghena samodhāya tāsaṃ dasāhappaṭicchannavasena avasesānaṃ ekāhappaṭicchannādīnampi dātabbaparivāso **agghasamodhāno** nāma. Yo pana nānavatthukā āpattiyo ekato katvā dātabbaparivāso **missakasamodhāno** nāma. Dānavidhi pana sabbattha **khandhake** (cūlava. 134 ādayo) āgatanayeneva veditabbo.

Evaṃ parivutthaparivāso bhikkhu **mānattaṃ** bhikkhūnaṃ mānanabhāvaṃ **cha rattiyo** akhaṇḍam katvā **careyya** kareyya, sampādeyyāti vuttaṃ hoti. Tattha saṅghena gaṇena puggalena kataṃ tena bhikkhunā saṅghamajjhe vattaṃ samādāpetvā “ahaṃ, bhante, sambahulā āpattiyo āpajji”ntiādīnā **khandhake** vuttanayena yācāpetvā tattheva vuttanayena mānattadānādayopi veditabbā. Imināpi vattaṃ nikkhipitukāmena ce vattaṃ nikkhipitvā catūhi pañcahi saddhiṃ parivāse vuttappakāraṃ padesaṃ gantvā purimanayeneva heṭṭhā vuttaṃ sahaṃvāsādiṃ antamaso catūhi ūnattā ūne gaṇe caraṇadosaṇca vajjetvā paṭipajjitabbaṃ. Appaṭicchannāpattikassa pana parivāsaṃ adatvā mānattameva dātabbaṃ. Evaṃ ciṇṇam kataṃ pariniṭṭhāpitaṃ mānattaṃ yena, **taṃ** bhikkhuṃ. Vīsati saṅgho gaṇo assāti **vīsatiṅgaṇo** dīgham katvā, so **saṅgho abhheyya** sampaṭiccheyya, abbhānakammavasena osāreyyāti vuttaṃ hoti, avheyyāti vā attho. Etthāpi samādānaārocānāyācānāni, kammavācā ca **khandhake** vuttanayena veditabbā.

29. Evaṃ tesu paṭipajjitabbākāraṃ dassetvā idāni chādanassa aṅgāni dassetuṃ “**āpatti**”tiādīmāha. Tattha na ukkhitto **anukkhitto**, natthi antarāyo assāti **anantarāyo**. Sakatthe ttipaccayavasena vā, pahuno bhāvo pahuttaṃ, taṃ assatthīti saddhādivasena vā pahutto. Anukkhitto ca anantarāyo ca pahutto cāti dvando, tesam bhāvo anukkhittādiguṇo anukkhitta...pe... pahuttatā. Āpatti ca anukkhitta...pe... pahuttatā ca **āpatti...pe... pahuttatāyo**. Ma-kāro padasandhijo. Tathā tena pakārena āpattiādisu catūsu āpattātipakārena saññī tathasaññī rassavasena. Tassa bhāvo **tathasaññitā**, yathāvuttaāpattādisaññitāti vuttaṃ hoti. **Ca-kāro** vuttasamuccayattho. Kamaṇaṃ patthanaṃ kāmo, chādetuṃ kāmo **chādetukāmo**. Iti yathāvuttā nava, **atha chādanā** cāti evaṃ dasa ca tāni aṅgāni cāti, tehi. **Aruṇuggamamhi** aruṇasaṅkhātassa paṭhamabālasūriyaraṃsino uggamane sati **channā** hoti, āpattīti seso.

Tatthāyamadhippāyo – yo bhikkhu rājacoraaggiudakamanussaamanussavālasarīsapajjīvitabrahmacariyantarāyānaṃ dasanamekassāpi natthitāya anantarāyiko samāno anantarāyikasaññī hutvā bhikkhuno santikaṃ gantuṇceva ārocetuṇca sakuṇeyyatāya pahu samāno pahusaññī hutvā tividhaukkhepanīyakammākaraṇena anukkhitto samāno anukkhittasaññī hutvā garukāpattīti saññī garukaṃyeva āpattiṃ chādetukāmo hutvā chādeti, tassāyaṃ



āpatti ca channā hotīti. Sace panettha anāpattisaññī vā hoti aññāpattikkhandhasaññī vā vematiko vā, acchannā honti. Ārocetena pana “mama ekāpattiṃ āpannabhāvaṃ jānāhi” tiādinā nayena ārocetabbam. Sace pana vatthusabhāgāpattikassa āroceti, tāva tappaccayā dukkaṭaṃ āpajjati.

Saṅghādisesaniddesavaṇṇanā niṭṭhitā.

### 3. Cīvaraniddesavaṇṇanā

**30.** “Khomañca koseyyañcā” tiādinā napuṃsakaviggahena dvande kate **khoma...pe... bhaṅgāni**. Tattha **khomanti** gacchajāti. Upacārato pana khomena khomasuttana vāyitanti taddhitena upacārena vā khomaṃ khomapaṭacīvaraṃ, tathā avasesāni. **Sāṇaṃ** sāṇavākasuttehi vāyitaṃ cīvaraṃ. **Bhaṅgaṃ** khomasuttādīni sabbāni ekaccāni vā vomissetvā vāyitacīvaraṃ. Vākamayameva vāti keci. **Kambalanti** manussalomaṃ vājalomañca ṭhapetvā sesalomehi vāyitaṃ. **Etānīti** khomādīni yathāvuttāni. Saha anulomehīti **sānulomāni**. Jātito kappiyāni **cha** cīvarāni bhavanti.

**31.** Idāni “**dukūla**” ntiādinā tesam anulomāni dasseti. Tattha **dukūlanti** dukūlasaṅkhātena kenaci vākavisesena vāyitaṃ cīvaraṃ. **Cevāti** samuccaye, so upari ākaḍḍhitabbo. **Paṭṭuṇṇanti** paṭṭuṇṇesu jātaṃ paṭṭuṇṇaṃ. Desavācino bahuvacanantāti bahuvacanena viggaho. Tathā somārā ca cīnā ca, tesu jātaṃ **somārācīnaṃ**. Imāni tīni pāṇakehi katasuttamayāni. Ehibhikkhūnaṃ puññiddhiyā jātaṃ **iddhijaṃ**, taṃ pana khomādīnaṃ aññataraṃ. **Devadinnanti** devehi dinnaṃ kapparukkhe nibbattaṃ cīvaraṃ. Tadeṭaṃ dukūlādi tassa tassa yathāvuttassa khomādīno anulomikaṃ hoti. Tattha lomāni anugataṃ anulomaṃ, yathā sesalomāni anugataṃ lomaṃ tadanukūlattā “anuloma” nti vuccati, tathā taṃjātiyakaṃ yesaṃ kesañci anukūlaṃ sabbampi ruḥhīvasena “anuloma” nti vuccati. Tameva **anulomikaṃ**, anukūlanti attho. Kathaṃ? Dukūlaṃ sāṇassa anulomaṃ, paṭṭuṇṇādīni tīni koseyyassa anulomāni, iddhijaṃ devadinnāñca khomādīnam anulomanti.

**32-3.** Evaṃ sānulomāni cīvarāni dassetvā idāni adhiṭṭhānādikaṃ dassetuṃ “**ticīvara**” ntiādimāha. Tattha avuttepi avassaṃ vattabbatāya sabbattha ca-saddo ajjhāharitabbo, ticīvarañca...pe... kaṇḍucchādīñca adhiṭṭheyya na vikappeyyāti sambandho. Tattha tīṇaṃ cīvarānaṃ samāhāro **ticīvaraṃ**. Parikkhārañca taṃ coḷaṅcāti **parikkhāraḷaṃ**. Vassassa yoggā vassikā, sāva sātīkā **vassikasātīkā**. Puñchatī anenāti puñchanaṃ, mukhassa puñchanaṃ mukhapuñchanaṃ. Nisīdanti etthāti nisīdanaṃ, mukhapuñchanañca nisīdanañca **mukhapuñchananisīdanaṃ**. Sayanasukhādīṃ paṭicca attharīyatīti paccattharaṇaṃ, tadeva **paccattharaṇakaṃ**. Kaṇḍuṃ chādetīti **kaṇḍucchādi**. **Adhiṭṭhaheti** “imaṃ saṅghāṭiṃ adhiṭṭhāmī” tiādinā navannaṃ nāmaṃ gahetvā adhiṭṭheyya. **Na vikappeyyāti** tassa tassa nāmaṃ gahetvā na vikappeyya, tassa tassa pana nāmaṃ aggahetvā “imaṃ cīvaraṃ tuyhaṃ vikappemi” ti vikappeyyāti adhippāyo. **Etthāti** imesu navasu cīvaresu. **Ticīvaranti** ticīvaranāmena adhiṭṭhitaṃ. Tathā hi adhiṭṭhānato pubbe visuṃ ticīvaraṃ nāma natthi saṅghāṭiādippahonakassa paccattharaṇādivasenāpi adhiṭṭhātuṃ anuññātattā. Taṃ **vinā ekāhaṃ** ekadivasampi. **Na vaseyyāti** aladdhasammutiko bhikkhu avippavāsasīmato aññattha vāsaṃ na kareyyāti attho. Evaṃ sati ticīvarañca nissajjitaṃ hoti, pācittiyañca āpattiṃ āpajjatīti dīpeti. Nisīdanaṃ vinā cātumāsaṃ na vaseyyāti sambandho. Catunnaṃ māsānaṃ samāhāro cātumāsaṃ, tameva **cātumāsaṃ**. Taṃ accantasamyogavasena.

**34.** Idāni “**ima**” ntiādinā “adhiṭṭheyyā” ti vuttamadhiṭṭhānaṃ dasseti. Saṅghāṭiṃ “imaṃ saṅghāṭiṃ adhiṭṭhāmī” ti adhiṭṭhaheti sambandho. Tattha **adhiṭṭhaheti** hatthapāse ṭhitaṃ evaṃ adhiṭṭheyya. **Ahatthapāsanti** hatthassa pāso samīpo hatthapāso, aḍḍhatteyyahatthabbhantaro. Dvādasahatthabbhantarotipi vadanti. Natthi hatthapāso etissāti ahatthapāsā, taṃ **etanti** adhiṭṭhaheti sambandho. Kiṃ vuttaṃ hoti? Antogabbhe vā uparipāsāde vā tadaheva gantvā nivattanayogge padese vā ṭhitaṃ cīvaraṃ sallakkhetvā “etaṃ saṅghāṭiṃ adhiṭṭhāmī” ti adhiṭṭheyyāti vuttaṃ hoti. Tato dūre ṭhitampi adhiṭṭhātabbantipi vadanti. **Sesesupīti** uttarāsaṅgādikaṇḍuppaṭicchādipariyantesupi avasesacīvaresu. **Ayam nayoti** ayameva nayo. Yathā saṅghāṭiyā, evaṃ “imaṃ uttarāsaṅgaṃ

adhiṭṭhāmī”tiādi vuttanayovāti vuttam hoti. Adhiṭṭhahantena pana hatthena gahetvā kāyavikāraṃ karontena “imaṃ saṅghāṭiṃ adhiṭṭhāmī”ti cittena ābhogaṃ katvā kāyena vā adhiṭṭhātabbāṃ, vacībhedaṃ katvā vācāya vā. Parikkhāraṃ nāma pāṭekkaṃ nidhānamukhanti ticīvaraṃ parikkhāraṃ adhiṭṭhātum vaṭṭatīti.

**35.** Idāni evaṃ adhiṭṭhahato aññaṃ laddhā adhiṭṭhātukāmena paccuddharitvā adhiṭṭhātabbanti dassetuṃ “**adhiṭṭhahanto**”tiādimāha. Tattha saṅghāṭi pabhuti ādi yassa taṃ **saṅghāṭippabhuti**. Etaṃ “adhiṭṭhahanto”ti etthāpi “adhiṭṭheyyā”ti etthāpi kammaṃ, “pubbacīvara”nti ettha pana visesaṃ hutvā tiṭṭhati. **Paccuddharitvā** pariccajivā. Parikkhāraṃ nāmena adhiṭṭhahitvā ṭhapitavattehi saṅghāṭiādinī karoti, niṭṭhite rajane ca kappe ca imaṃ parikkhāraṃ paccuddharitvā puna adhiṭṭhātabbāni. **Pattādhīṭṭhahāneti** pattassa adhiṭṭhāne. **Tathā**ti ca yathā cīvare, tathā pattepi adhiṭṭhānādikaṃ sabbanti attho. Ettha pana “imaṃ pattam, etaṃ patta”nti vā viseso.

**36.** Idāni paccuddhāraviddhiṃ dassetuṃ “**eta**”ntiādimāha. Tattha **imaṃ va** iti vā-saddo rassaṃ katvā niddiṭṭho, so iti-saddato paraṃ yojetabbo, tasmā “etaṃ saṅghāṭiṃ paccuddharāmī”ti vā “imaṃ saṅghāṭiṃ paccuddharāmī”ti vā saṃseti sambandho vedītabbo. **Samseti** vadeyya. **Evanti** yathā nāmena saṅghāṭi paccuddharitabbā, tathā uttarāsaṅgādīnti attho. **Vidūti** paccuddharetimassa kattupadaṃ, paññavāti attho. Sabbatthāpi dūrāsannatādī vuttanayena vedītabbā.

**37-8.** Idāni saṅghāṭiādināṃ channaṃ pamāṇaparicchedaṃ dasseti “**saṅghāṭi**”tiādinā. Pacchimo anto **pacchimanto**, tena, pacchimakoṭṭiyāti attho. **Dīghasoti** dīghato. Muṭṭhiyā sahitaṃ pañcakaṃ yassā sā muṭṭhipañcakā, liṅgavipallāsavasena pana **muṭṭhipañcako**. Muṭṭhi-saddenattha upacāravasena katamuṭṭhiko hatthova vutto. Sugatassa cīvarato ūnāti samāso. **Apīti** vuttasamuccaye, tena yathāvuttapacchimappamāṇā ca ayañca uttamappamāṇāti attho. “Pacchimantenā”ti idaṃ **muṭṭhittikañca tiriyaṃ**ti etthāpi anuvattetvā attho vedītabbo. **Ca**-saddo “uttamantena sugatacīvarūnāpi vaṭṭatī”ti idaṃ samuccinoti. Tattha idāni majjhimaṃ purisassa tisso vidatthiyo ekā sugatavidatthi, tāya vidatthiyā nava vidatthiyo dīghato sugatacīvarappamāṇaṃ, tiriyaṃ cha vidatthiyo, taṃ pana vaḍḍhahatthena dīghato terasa hatthā ekā ca vidatthi, tiriyaṃ nava hatthā honti. Taṃvasena ubhayattha ūnatā viññātabbā.

Uttarāsaṅgopi tattakovāti dassetuṃ “**tathā ekamsikassapi**”ti āha. Eko aṃso ekamsa, tattha kātabbanti taddhite **ekamsikaṃ**. “Antaravāsako”ccādinā nivāsanaṃ dasseti. Tattha antaraṃ majjhapadeso, antare majjhe kaṭippadeso vāso vatthaṃ antaravāso, soyeva **antaravāsako**. **Cāpīti** samudāyo, eko vā samuccayo. Aḍḍhena tatiyo bhāgo **aḍḍhateyyo**. Ettha dvinnāṃ hatthakoṭṭhāsānaṃ sampunṇānaṃ tatiyakoṭṭhāsasaṃsijjhane karaṇabhūtā aḍḍha-saddaniddiṭṭhā yā vidatthi, sāva tatiyoti niddiṭṭhoti upaḍḍhahatthasaṅkhāto tatiyo bhāgo aḍḍhateyyo. So ca nānantarena dvihatthatatiyatā labbhatīti dve hatthā, ekā ca vidatthi aḍḍhateyyo. Taṃsanniyogena panettha antaravāsakova aḍḍhateyyoti vedītabbo. Dve hatthā yassāti bāhiratthasamāso. Pārūpanenāpi sakkā nābhīṃ paṭicchādetunti “**dvihattho**”ti vuttam. **Vā**-saddo aḍḍhateyyaṃ vikappeti. Tiriyaṃ antoti chaṭṭhāpuriso, tiriyaṃ eva antoti vā kammadhārayo “gāmanto”tiādīsu viya.

**39.** “**Nisīdanassā**”tiādinā nisīdanacīvaraṃ dasseti. Ettha **nisīdanaṃ** nāma same bhūmibhāge eḷakalomāni uparūpari santharivā kañjikādīhi siñcitvā kato dvīsu ṭhānesu phālitattā tīhi dasāhi yutto parikkhāraviseso. **Vidatthī dveti** dve vidatthī. **Visālato** puthulato.

**40.** “**Kaṇḍuppaṭicchādī**”tiādinā kaṇḍuppaṭicchādīṃ dasseti. Tattha **kaṇḍūti** hi na atthato nānaṃ, taggahaṇena panettha piḷakassāvathullakacchābādhaṃ gayhati. Kaṇḍuṃ yathāvuttaṃ piḷakādīṃ paṭicchādetīti kaṇḍuppaṭicchādī. Paṭicchādanaṃ vā paṭicchādo, yathāvuttakaṇḍuyā paṭicchādo kaṇḍuppaṭicchādo, so assa atthīti kaṇḍuppaṭicchādī, tassa. **Tiriyaṃ** tiriyaṃ.

**41.** “**Vassikā**”tiādinā vassikasāṭikaṃ dasseti, taṃ suviññeyyaṃ.

42. Evaṃ pamāṇavantānaṃ pamāṇaṃ dassetvā vuttappamāṇātikame dosaṃ, kesañci pamāṇābhāvagaṇanābhāvañca dassetuṃ “**etthā**”tiādimāha. Tattha **etthā**ti vuttappamāṇavantesu cīvaresu. **Taduttari** tato vuttappamāṇato uttari nipātena uttari-saddena tappuriso. **Karontassa** sampādentassa. **Chedanapācittī**ti chedanena sahitā pācitti, atirekaṃ chinditvā pācittiyaṃ desetabbanti vuttaṃ hoti. Vuttappamāṇato pana atirekañca ūnakañca “parikkhāraḥ”nti adhiṭṭhātabbaṃ. Yena mukhaṃ puñchanti, taṃ mukhasambandhīti mukhassa ḥanti samāse dvando. Ākañkhitam icchitam pamāṇanti kammadhārayo. Tametesamatthīti **ākañkhitappamāṇikā**. Ettha ca ticīvarādīsu avuttepi gaṇanavibhāge paccattharaṇamukhapuñchanaparikkhāraḥ ṭhapetvā ādito paṭṭhāya chakkamekekameva vaṭṭati. Mukhapuñchanacoḷāni paccattharaṇāni ca bahūnipīti viññātabbaṃ.

43. **Gaṇanā**ti ettha napuṃsakassa itthivacanena yogābhāvā “na dīpitā”ti līgaṃ vipariṇāmetvā sambandhitabbaṃ, aṭṭhakathāyaṃ na pakāsītīti attho. Tiṇṇaṃ panetesam ukkaṭṭhaparicchedavaseneva vuttaṃ, vikappanūpagapacchimena pacchimappamāṇaṃ atthiyeva. Idāni yasmā tattha taṃ sabbaṃ na dīpitam, tasmā vikappanūpagathavikādi sabbaṃ ekaṃ “parikkhāraḥ”nti, bahūni ekato katvā “parikkhāraḥ”nti tipī vatvā adhiṭṭhātabbanti dassento “**tathā**”tiādimāha. Iminā parikkhāraḥ nāma pāṭekkaṃ nidhānamukhanti dasseti. **Thavikādiṃ** thavikā ādi yassa parissāvanādinoti samāso. Vikappassa upagaṃ **vikappiyaṃ**, tañca upari vakkhati.

44. Idāni tiṇṇaṃ cīvarānaṃ paṭibhāgaṃ dassetuṃ “**ahatā**”tiādi āraddhaṃ. Tattha ahatena navena adhotena kappam sadisaṃ ahatakappam, ekavāradhotam. Ahatañca ahatakappañca **ahatāhatakappāni**, vatthāni, tesam. Dve guṇā paṭalāni yassa sāti duguṇā. “Guṇo paṭalarāsīsū”ti hi abhidhānappadīpikā. **Duguṇā** dupaṭṭā, uttarasmim dehabhāge āsañjīyatīti **ukkarāsaṅgo**. Ekaccaṃ ekapaṭṭam assa atthīti **ekacci**, ekapaṭṭoti attho. Nipāto vā ekaccīti. **Tathā**ti samuccaye, antaravāsako cāti vuttaṃ hoti. Upamāyaṃ vā, yathā uttarāsaṅgo ekacciyo, evaṃ antaravāsakoti attho.

45. “Utū”ti anekautu gahitāti ututo dīghakālato uddhaṭā **utuddhaṭā**, tesam pilotikānanti attho. **Sesā**ti uttarāsaṅgantaravāsakā. Paṃsu viya kucchitam ulati pavattatīti **paṃsukūlam**, rathikāsūsānaśākaṅkārakūṭādīnaṃ yattha katthaci ṭhitam ḥakhaṇam, tasmim. Yā yā rucīti abyayībhāve **yathāru**ci, yāvadattham satapaṭṭampi vaṭṭatīti adhippāyo.

46. Idāni tīsu chinditvā kātuṃ appahontesu kātabbavidhiṃ dassetuṃ “**tīsu**”tiādimāha. Tattha ticīvarasamudāyato ekadesabhūtānaṃ dvinnamēkassa ca sañkhāguṇena niddhāriyamānattā **tīsū**ti niddhāraṇe bhummaṃ. Ekavacanassa bahvatthena yogābhāvato dvicīvarasañkhātābahvatthavasena vacanaṃ vipariṇāmetvā yāni pahonti, tāni dve vāpi chinditabbāni, yaṃ pahoti, taṃ ekaṃ vā chinditabbanti yojetabbaṃ. **Pahontī**ti pacchimacīvarappamānachinnakāni pahonti. **Apī**ti sambhāvane, tīsu kā kathāti attho. **Anvādhinti** āgantukapattam. Anu pacchā ādhīyatīti anvādhī, yaṃ cīvarassopari sañghāṭīkāreṇa āropetabbaṃ. **Anādiṇṇanti** anāropitam anvādhikam. **Na dhāreyyā**ti iminā yadi dhāreyya, dukkaṭanti dīpeti.

47-8. Idāni “ticīvaraṃ na vaseyya vinekāha”nti vuttānaṃ tiṇṇaṃ avippavāsalaḥkhaṇaṃ dassetuṃ “**gāme**”tiādinā **udositasikkhāpade** (pārā. 471 ādayo) vuttaparihāramāha. Tattha gāme vā...pe... vihāre vā ticīvaraṃ nikkhipitvāti sambandho. Tattha “paṭo daḍḍho”tiādisu viya avayavepi samudāyavohāravasena tīsu ekampi “**ticīvara**”nti vuttaṃ. **Bhikkhusammutiyaññatrā**ti sañghena gilānassa bhikkhuno dīyamānaṃ cīvarena vippavāsasammutiṃ vinā. **Vippavattuntī** ekūpacāranānūpacāragāmādito bahi, atha vā nivesanādīnaṃ, tattha ca gabbhōvarakānaṃ cīvarassa vā hatthapāsaṃ atikkamma cīvarena vippayutto hutvā vasituṃ. Ettha ca gāmādīnaṃ ekūpacāranānūpacāratā ekakulanānakulasantakassa gāmādino parikkhepassa, parikkhepokāsassa ca vasena satthaabbhokāsānaṃ sattabbhantaravasena ca veditabbā. Tattha eko abbhantaro aṭṭhavīsatiattho hoti. Ettha ca nivesanādīni gāmato bahi sannivīṭṭhānīti daṭṭhabbaṃ visuṃ gāmassa gahitattā, tathā udositādīhi aññaṃ nivesanaṃ.

Tattha **udosito** nāma yānādīnaṃ bhaṇḍānaṃ sālā. **Pāsādo** dīghapāsādo. **Hammiyaṃ**

muṇḍacchadanapāsādo. Nāvā ca aṭṭo ca māḷo ca ārāmo ca **nāvā...pe... ārāmaṃ**, tasmim. **Aṭṭo** nāma paṭirājādīnaṃ paṭibāhanatthaṃ iṭṭhakāhi kato bahalabhittiko catupañcabhūmiko patissayaviseso. **Māḷo** ekakūṭasaṅgahito caturassapāsādo. **Ārāmo** pupphārāmo vā phalārāmo vā. Sattho ca khettañca khalañcāti dvando. **Sattho** nāma jaṅghasattho vā sakaṭasattho vā. **Khalaṃ** vuccati dhaññakaraṇaṃ. **Dumo** nāma dumamūlaṃ chāyāya phuṭṭhokāso upacāravasena. **Abbhokāso** pana agāmake araññeva adhippeto.

49. Idāni “etaṃ...pe... saṅghāṭi”ntiādīnā navannameva paccuddhāro vutto, na pana tesam kālāparicchēdoti taṃ dassetuṃ “**rogā**”tiādi āraddhaṃ. Tattha devadatto dattoti nāmekadesenāpi nāmavohārato vassikasāṭikāva “sāṭikā”ti pakaraṇavasena gammamānatthattā vuttā. Kaṇḍuppaṭicchādīkā ca **rogavassānapariyantā**. Rogā ca vassānā ca māsā rogavassānā, te tadatikkamena paccuddharitabbatāya pariyantā yāsanti viggaho.

Kim vuttaṃ hoti? Vassikasāṭikā vassānamāsāṭikkame kattikapuṇṇamāya eva paccuddharitabbā. Tathā kaṇḍuppaṭicchādīkā ābādhesu vūpasantesūti vuttaṃ hoti. “Paccuddharitvā vikappetabbā”ti hi **aṭṭhakathāyaṃ** (pārā. aṭṭha. 2.469) vuttaṃ. Ettha pana keci ācariyā “paccuddharitvāti vassikasāṭikabhāvato apanetvā”ti vadimsu, taṃ na yujjati. Paccuddhāravīnayaṃ kammavisayeyeva paccuddhāra-saddassa diṭṭhattā, “cātumāsam adhiṭṭhātuṃ tato paraṃ vikappetu”nti (mahāva. 358) **pālī**vacanato ca. “Cātumāsam adhiṭṭhātu”nti ca catunnaṃ māsānaṃ adhiṭṭhānena saha accantasamyoḃo dassitoti na tena adhiṭṭhānabhedo viññāyati. Teneva **kurundaṭṭhakathāyampi** “vassānam cātumāsam adhiṭṭhātuṃ, tato paraṃ vikappetu”nti (mahāva. 358) vacanato kattikapuṇṇamāya eva paccuddharitvā hemante vikappetabbāti vuttaṃ. Tasmā “vassikasāṭikā vassānamāsāṭikkamenāpi kaṇḍuppaṭicchādī ābādhasūpasamenāpi adhiṭṭhānaṃ vijahatī”ti (kaṅkā. aṭṭha. kathinasikkhāpadavaṇṇanā) vuttaṃ. **Mātikāṭṭhakathāyampi** paccuddhāravasenāpi adhiṭṭhānaṃ vijahatīti evamattho gahetabbo. Evañhi sati sabbaṭṭhakathāyo samenti, yutti ca aviruddhā hontīti. **Tato paranti** paccuddhārato upari. **Vikappeyyāti** kaṇḍuppaṭicchādīṃ paccuddharitvā vikappeyya. Vassikasāṭikaṃ kattikapuṇṇamāyaṃ paccuddharitvā hemantassa paṭhamadivase vikappeyya, evaṃ asati dukkaṭanti adhippāyo. **Sesāti** apare satta cīvarāni sesā. Natthi pariyantaṃ vuttasādiso kālāparicchēdo etesanti **apariyantikā**.

50. Idāni paccattharaṇādīkaṃ cīvaracatukkaṃ sadasādīkaṃ vaṭṭati, nāparanti dassetuṃ “**paccattharaṇā**”tiādīmāha. Tattha parikkhāro ca mukhapuñchanañcāti dvando. Parikkhāramukhapuñchanaṃ eva coḷakanti kammadhārayo. Dvandasamāsante suyamānattā pana coḷaka-saddo parikkhāra-saddato ca paraṃ daṭṭhabbo “parikkhāraḷaka”nti. Taṃ pana sāmāññajotanāya visesepi avatṭhānato ṭhapetvā pañca cīvarāni parikkhāraḷanāmenādhiṭṭhitāni avasesam daṭṭhabbaṃ. Paccattharaṇāñca parikkhāramukhapuñchanaḷakañca **paccattharaṇa...pe... coḷakañca nisīdanañcāti** etaṃ cīvaracatukkaṃ sadasampi arattampi anādiṇṇakappampi labbhanti sambandho. **Sadasanti** saha yāhi kāhici dasāhīti sadasam. Sadasake labbhamāne adasampi labbhatevāti sadasampi adasampi pupphadasampīti ettha attho. **Pi-saddo** vuttāvuttasampiṇḍanatto. **Arattanti** nīlapītādirajanaṃ araṇṇitampi. **Pi-saddena** raṇṇitānīlapītādīkampi anādiṇṇakappampīti. Ādiṇṇo kappo yassa natthīti taṃ **anādiṇṇakappampi**. Pi-saddena ādiṇṇakappampi.

Nanu ca “na bhikkhave sabbanīlakāni cīvarāni dhāretabbāni”tiādīnā (mahāva. 372) sabbanīlakasabbapītakasabbalohitakacīvarāni sāmāññena paṭikkhittānīti kathamidam cīvaracatukkaṃ sadasādīkaṃ vaṭṭati, kathañca anādiṇṇakappampi vaṭṭatīti? Vuccate – “tena kho pana samayena aññataro bhikkhu kusacīraṃ nivāsetvā”tiādīnā **uppannavatthūsu** (mahāva. 371) “na bhikkhave kusacīraṃ...pe... titthiyaddhajo dhāretabbo. Yo dhāreyya, āpatti thullaccayassā”tiādīnā (mahāva. 371) uppannavatthuvāseneva nivāsanapārūpanasañkhātadhāraṇassa paṭikkhittattā ca tattheva **aṭṭhakathāyañca** (mahāva. aṭṭha. 372) “sabbanīlakādīni rajanaṃ dhovitvā puna rajitvā dhāretabbāni, na sakkā ce honti dhovituṃ, paccattharaṇāni vā kātabbāni, dupaṭṭacīvarassa vā majjhe dātabbāni, acchinnadasadīghadasāni dasā chinditvā dhāretabbāni, kañcukaṃ labhitvā phāletvā rajitvā paribhuñjitum vaṭṭati, veṭhanepi eseva nayo”ti nivāsanapārūpanavaseneva dhāraṇaparibhogānaṃ vuttattā ca

**dubbaṅṅakaraṇasikkhāpade** (pāci. aṭṭha. 368) “yaṃ nivāsetuṃ vā pārupituṃ vā sakkā hoti, tadeva cīvaranti veditabba”nti pañcannaṃyeva kappabinduno anuññātattā ca ticīvarakaṇḍuppaṭicchādivassikasāṭikasaṅkhātāni pañca cīvarāni kāyaparihāriyāneva adasāni asabbanīlakādīni kappiyarajanarajitāni ādiṇṅakappāniyeva honti, na niyāmena nivattitāni parāni cattārīti cīvaracatukkameva sadasādikaṃ anādiṇṅakappampi vaṭṭatīti.

**51.** Sesacīvarapañcakaṃ adasaṃyeva rajitaṃyeva ādiṇṅakappaṃva kappatīti yojanā. **Rajitanti** kappiyarajanaena rajitaṃ. Nisīdanassa yathāvuttenatthēna sabbattha adasatthaṃ nisedhetuṃ “**sadasaṃva nisīdana**”nti vuttaṃ. Sati hi sambhave byabhicāre ca visesaṃ sātthakaṃ hoti.

**52.** Idāni anadhiṭṭhite anissaṭṭhe ca kā pavattīti taṃ dassetuṃ “**anadhiṭṭhita**”ntiādimāha. Tattha **anadhiṭṭhita**nti ticīvarādivasena anadhiṭṭhitaṃ. **Anissaṭṭhanti** yassa kassaci dānalakkhaṇena adinnaṃ. **Vikappetvā paribhuñjeyeti** vakkhamānanayena ekabahubhāvaṃ, sannihitāsannihitabhāvaṃca sallakkhetvā vikappetvā paccuddharitvā paribhuñjeyya. Vakkhamānanayena pana viññāyatīti “paccuddharitvā”ti na vuttaṃ.

Idāni “vikappetvā”ti vuttaṃ kīdisaṃ taṃ heṭṭhimantena vikappiyanti āha “**hatthā**”tiādi. Tattha hattho dīghena yassa taṃ **hatthadīghaṃ**. **Tatoti** tasmā hatthato. Upaḍḍho hatthassa dutiyo bhāgo vidatthisaṅkhāto vitthārena yassa taṃ **upaḍḍhavitthāraṃ**.

**53.** Idāni yathāvuttavidhānaṃ tecīvarikasseva vasena, aparo pana aññathā paṭipajjatīti taṃ dassetuṃ “**ticīvarassā**”tiādimāha. Tattha nāmenādhiṭṭhitāni tīṇi cīvarāni etassāti **ticīvaro**. Tassa vinayatecīvarikassāti attho, na parikkhāraḷaṇāmena adhiṭṭhitacīvarassa. Vinayatecīvarikassa pana udositasikkhāpade vuttaparihāro natthi. **Parikkhāraḷiyoti** parikkhāraḷamaṃ atthīti ṇikena ya-kāro. **Sabbanti** sakalaṃ navavidhampi cīvaraṃ. **Tathā vatvāti** ekabahubhāvaṃ, sannihitāsannihitabhāvaṃca ṇatvā “imaṃ parikkhāraḷaṃ adhiṭṭhāmī”tiādinā vatvā. **Adhiṭṭhatīti** adhiṭṭhātīti.

**54.** Adhiṭṭhitacīvaraṃ pana paribhuñjato kathaṃ adhiṭṭhānaṃ vijahatīti taṃ dassento “**acchedā**”tiādimāha. Tattha acchedo ca vissajjanaṃca gāho ca vibbhamo cāti dvando. **Acchedo** nāma corādīhi acchinditvā gahaṇaṃ. **Vissajjanaṃ** paresaṃ dānaṃ. **Gāho** vissāseṇa gahaṇaṃ. **Vibbhamo** sikkhaṃ appaccakkhāya gihibhāvūpagamaṃ. Tadāpi tassa aññassa dāne viya cīvarassa nirālayabhāvena pana pariccāgoti. **Tikāyaṃ** pana bhādiso bhikkhuyevāti adhiṭṭhānaṃ na vijahatīti atthaṃ vikappetvā bhikkhuniyā gihibhāvūpagamaṃ vuttaṃ, taṃ na gahetabbaṃ, kāraṇaṃ panettha ambhākaṃ garūhiyeva **sāratthadīpaniyaṃ** (sārattha. ṭī. 2.469) “bhikkhuniyā ‘hīnāyāvattanēnā’ti visesetvā avuttattā bhikkhuniyā hi gihibhāvūpagamaṃ adhiṭṭhānavijahaṇaṃ visuṃ vattabbaṃ natthi tassā vibbhamanēneva assamaṇībhāvato”ti vuttaṃ. Nanu ca bhikkhuno appaccakkhātasikkhassa gihibhāvūpagamaṇena adhiṭṭhānavijahaṇena nirālayabhāvo kāraṇabhāvena vutto, evaṃ sati parivattalīngassa natthi nirālayabhāvoti kathamassa adhiṭṭhānaṃ vijahatīti? Saccametāṃ, tathāpi buddhamataññūhi aṭṭhakathācariyehi **aṭṭhakathāyaṃ** (pārā. aṭṭha. 1.69) “yaṃ panassa bhikkhubhāve adhiṭṭhitaṃ ticīvaraṃca patto ca, taṃ adhiṭṭhānaṃ vijahati, puna adhiṭṭhātabba”nti vuttattā natthettha dosoti.

**Māraṇalīngasikkhāti** uttarapadalopena upacārena vā līngaparivattanaṃ sikkhāpaccakkhānaṃca “līngasikkhā”ti ca vuttaṃ. Iti ete aṭṭha sabbesu navasu cīvaresu adhiṭṭhānassa viyogo vippavāso, tassa kāraṇā hontīti pāṭhaseso. Ticīvarassa pana na kevalaṃ imeyeva aṭṭha, vinividdhachiddaṃca adhiṭṭhānaviyogakāraṇanti līngavacanaṃca parivattetvā yojetabbaṃ. Tattha abbhantare ekassapi tantuno abhāvena vinividdhaṃ vinivijhitvā gatachiddaṃkaniṭṭhaṅgulīnakhapitṭhippamāṇaṃ **vinividdhachiddaṃ**. Tattha saṅghāṭiyā ca uttarāsaṅgassa ca dīghantato vidatthippamāṇassa, tiriyaṇtato aṭṭhaṅgulappamāṇassa, antaravāsakassa pana dīghantato vidatthippamāṇasseva tiriyaṇtato caturāṅgulappamāṇassa padessa orato chiddaṃ adhiṭṭhānaṃ bhindati, sūcikammaṃ katvā puna adhiṭṭhātabbaṃ. Sūcikammaṃ karontena ca chinditvā dubbalatṭhānāpanayanena chiddaṃ adassetvā

kātabbamaṃ.

**55.** Idāni akappiyāni dassetuṃ “**kusā**”tiādi vuttaṃ. Tattha kusā ca vākā ca phalakāni ca, tesamaṃ cīrāni **kusa...pe...cīrāni**. Tattha kusena ganthetvā kataṃ kusacīraṃ. Tathā vākena ganthetvā kataṃ vācacīraṃ, tāpasānaṃ vakkalaṃ. Phalakasaṅṭhānāni phalakāni sibbitvā kataṃ phalakacīraṃ. **Kesavāla**janti kesehi ca vālehi ca jātaṃ vāyitaṃ kambalanti sambandho. **Ulūkapakkhājīnakkhipeti** ulūkānaṃ kosiyasakuṇānaṃ pakkhaṃ pakkhena kataṃ nivāsanañca ajīnakkhipaṃ salomaṃ sakhuraṃ ajīnamigānaṃ cammañca dhārayato thullaccayanti sambandho.

**56. Kadalerakakkadussesūti** kadaliyo ca erako ca akko ca, tesamaṃ dussāni vatthāni, tesu ceva makacivākehi kate **potthake cāpi** dukkaṭaṃ. Nimittatthe cetamaṃ bhummaṃ. Kadalidussādisaddena taṃdhāraṇamadhippetamaṃ, tasmā taṃdhāraṇanimittaṃ dukkaṭaṃ hotīti attho. Evaṃ sabbattha. “Nīlako cā”tiādinā dvando. Sabbā nīlaka...pe... kaṇhakāti kammadhārayo. Nīlādivaṇṇayogena vatthamaṃ nīlādi. **Nīlakaṃ** umāpupphavaṇṇamaṃ. **Mañjetṭhamaṃ** mañjetṭhikavaṇṇamaṃ. **Pītaṃ** kaṇikārapupphavaṇṇamaṃ. **Lohitaṃ** jayasumanapupphavaṇṇamaṃ. **Kaṇhakaṃ** addāriṭṭhakavaṇṇamaṃ. Sabba-saddo panettha paccekamaṃ yojetabbo.

**57. Mahā...pe... ratteti** mahāraṅgo ca mahānāmarāṅgo ca, tehi ratte. Etthāpi puna suyyamānaṃ sabbasaddamanuvattiyaṃ, “sabbamahāraṅgaratte”tiādinā attho veditabbo. Iminā ca asabbanīlakādi kappiyarajanarajitaṃ paribhuñjantassa natthi dosoti dīpeti. Tattha mahāraṅgo satapadipiṭṭhivaṇṇo. Mahānāmarāṅgo sambhinnavaṇṇo, so pana paṇḍupalāsavaṇṇo hoti, padumavaṇṇotipi vadanti. **Tirīṭaketi** taṃ nāmaka rukkhatace. **Acchinnadīghadasaketi** sabbaso acchinnattā acchinnā ca majjhe chinnattā dīghā ca sā dasā ca vatthakoṭi yassāti aññapadatthasamāso. **Phalapupphadaseti** aññamaññaṃ saṃsibbitvā katā phalasadisā dasā “phalā”ti vuccanti, ketakādi pupphasadisāni “pupphāni”ti ca, phalā ca pupphā ca dasā yassa, phalasadise dase, pupphasadise dase cāti attho. **Veṭṭhaneti** sisaveṭṭhane. **Tathāti** iminā sabbanīlakādīsu dukkaṭaṃ atidisati. **Sabbanti** kusacīrādikaṃ sakalaṃ. Acchinnaṃ cīvaraṃ yassa so labhatīti sambandho.

Cīvaraniddesavaṇṇanā niṭṭhitā.

#### 4. Rajananiddesavaṇṇanā

**58.** Mūlañca khandho ca taco ca pattañca phalañca pupphañca, tesamaṃ pabhedoti chaṭṭhītappuriso. Atha vā pabheda-saddassa kammaśādhante tāniyeva pabhedoti kammadhārayo, tato. Rajanti etehīti **rajanāni**, mūlādīni. “Anujānāmi, bhikkhave, cha rajanāni mūlarajana”ntiādinā (mahāva. 344) bhagavatā anuññātattā vuttaṃ “**rajanā chappakārāni, anuññātāni satthunā**”ti.

**59. Mūleti** mūlarajane haliddiṃ vivajjiya sabbamaṃ labbhanti sambandho. Evaṃ sabbattha. Mañjetṭhi ca tuṅgahārako cāti dvando. Allī-saddena nīlī-saddena ca tesamaṃ gacchajātīnaṃ pattāni gahitāni upacārena, tathā lodda-saddena kaṇḍula-saddena ca taco, kusumbha-saddena kiṃ suka-saddena ca pupphāni. Teneva ca tāni napuṃsakāni. **Tuṅgahārako** nāma eko kaṇṭakarukkho, tassa haritālavaṇṇamaṃ khandharajanaṃ hoti. Allipattena ekavāraṃ gihparibhuttaṃ rajitamaṃ vaṭṭati. Phalarajane sabbampi vaṭṭati.

Rajananiddesavaṇṇanā niṭṭhitā.

#### 5. Pattaniddesavaṇṇanā

**60. Ayopatto** nāma ayasā kāḷalohena nibbatta patto. **Jātiyā** ukkaṭṭhādīnaṃ sāmāññavasena. **Pamāṇatoti** paricchato. Tayo pattāti pāṭhaseso.

61. “Magadhesū”ti vattabbe **magadheti** vacanavipallāsena vā “paccāsā satī”tiādīsu viya su-saddalopena vā vuttaṃ. **Nālidvayaṭaṇḍulasādhanti** ettha magadhāpekkhopi nāli-saddo dvaya-saddena samāso hoti gammadattāti nāliyā dvayaṃ nālidvayaṃ. Tattha magadhanāli nāma aḍḍhaterasapalā hoti. Ettha ca aḍḍhaterasapalāni māsānanti vadanti. Nālidvayena pamitā ṭaṇḍulā sukoṭṭitaparissuddhā anupahatapurāṇasālitaṇḍulā nālidvayaṭaṇḍulā, tehi sādhitāṃ pacitanti attho. **Odananti** sammā sampāditāṃ avassāvitodanaṃ. **Sūpanti** odanassa catutthabhāgappamāṇaṃ nātighanaṃ nātitanukaṃ hatthahāriyaṃ sabbasambhārasankhataṃ muggasupaṃ. **Byañjanañca tadūpiyanti** tassa odanassa upiyaṃ anurūpaṃ yāva carimālopappahonakaṃ macchamaṃsādībyañjanañca ukkaṭṭho gaṇhātīti sambandho.

62. **Tassāti** yathāvuttaodanādino. **Upaḍḍhoti** upaḍḍhaṃ nālikodanādi assa atthīti upaḍḍho. **Eva-**kārena atirekaṃ nivatteti. **Tatoti** yathāvuttanālikodanādito. Ukkaṭṭhato ukkaṭṭho ca omakomako ca apattoti yojanā. Omakato omako **omakomako**. Iminā puna pattadvayadassanena pamāṇato tayopi pattā vibhāgato nava hontīti dīpeti. Tattha yasmiṃ magadhanālidvayaṭaṇḍulodanādikāṃ sabbampi vaḍḍhanapakkhe ṭhitāṃ pakkhittāṃ sace pattassa mukhavaṭṭiyā heṭṭhimarājīsamaṃ tiṭṭhati, suttana vā hīrena vā chindantassa suttassa vā hīrassa vā heṭṭhimantaṃ phusati, ayaṃ **ukkaṭṭho** nāma patto. Sace taṃ rājiṃ atikkamma thūpīkataṃ tiṭṭhati, ayaṃ **ukkaṭṭhomako** nāma patto. Sace taṃ rājiṃ na sampāpuṇāti antogataṃeva, ayaṃ **ukkaṭṭhukkaṭṭho** nāma patto. “Ekaṃ nālikodanādi sabbampi pakkhittāṃ vuttanayeneva heṭṭhimarājīsamaṃ tiṭṭhati, ayaṃ majjhimo nāma patto”tiādīnā **majjhimamajjhimomakamajjhimukkaṭṭhā** ca “yattha upaḍḍhanālikodanādi sabbampi pakkhittāṃ heṭṭhimarājīsamaṃ tiṭṭhati, ayaṃ omako nāma patto”tiādīnā **omakaomakomakomakukkaṭṭhā** ca pattā ukkaṭṭhe vuttanayeneva veditabbā. Tesu dve apattā bhājanaparibhogena paribhuṅgitabbā, nādhiṭṭhānūpagā, na vikappanūpagā.

63. Kappo sako atirekapatto dasāhaparamaṃ dhāreyyāti yojanā. Tattha **kappoti** kappiyo. **Sakoti** attano santako. Kappiyattā pana attasantakattā ca sattannampi adhiṭṭhānavikappanūpagatā veditabbā. Tattha ayopatto pañcahi pākehi, mattikāpatto dvīhi pākehi pakko adhiṭṭhānūpago ca vikappanūpago ca, tathā ubhopi kākaṇikamattassāpi mūlassa anavasesetvā dinne, sabbaso attasantakatte viññāte ca adhiṭṭhānavikappanūpagāti daṭṭhabbaṃ. **Atirekapattoti** anadhiṭṭhitāvīkappitatāya atirekapatto. Adhiṭṭhānapaccuddhārā panettha cīvare vuttāva. Vikappentena pana pattānaṃ ekabahubhāvaṃ, sannihitāsannihitabhāvañca ñatvā “imaṃ patta”nti vā “ime patte”ti vā “etaṃ patta”nti vā “ete patte”ti vā vatvā “tuyhaṃ vikappemi”ti vattabbaṃ. Sammukhādībhedo panettha cīvare vakkhamānanayena veditabbo. **Dasāhaparamanti** dasa ahāni paramo paricchedo assāti dahāhaparamo, kālo, taṃ. Accantasamyoge upayogavacanaṃ. **Dhāreyyoti** paribhogavasena dhāretabbo. Tasmīnkāle atināmite patto nissaggiyo hotīti yojanā. **Atināmiteti** atikkāmite **nissaggiyo** hoti, ekādase aruṇuggamane saṅghassa vā gaṇassa vā puggalassa vā **padabhājanīye** (pārā. 602) vuttanayena patto nissajjitabbo hoti, tathā satī pācittiyāpatti cassa hotīti adhippāyo.

64. “**Acchedā**”tiādī cīvare vuttanayattā uttānameva. Ayaṃ pana viseso – **marañuddhaṭṭāti** uddharaṇaṃ uddhaḷaṃ, paccuddhāro. Maraṇaṃca uddhaṭṭaṃca marañuddhaṭṭā, tasmā. **Chiddenāti** yena kaṅgusitthaṃ nikkhamati ceva pavisati ca, tena mukhavaṭṭito heṭṭhā dvaṅgulachiddena. **Pattādhiṭṭhānamujjhatīti** patto adhiṭṭhānaṃ ujjhati vissajjati.

65. Idāni “**patta**”ntiādīnā aññathā pariharaṇe dukkaṭaṃ dasseti. Tattha sodakaṃ pattāṃ na paṭisāmeyyāti yojanā. **Na paṭisāmeyyāti** guttaṭṭhāne na nikkhipeyya, “sodakaṃ pattāṃ uṇhe na ca otape”tiādīnā ca yojanīyaṃ. **Na ca otape**ti neva īsakaṃ tāpeyya. **Na nīdaheti** nirudakaṃ katvāpi bhusaṃ na nīdahēyya, vodakaṃ katvā īsakaṃ tāpeyyātipi byatirekattho. **Bhūmyā na ṭhāpeti** kharāya bhūmiyā na ṭhāpeyya. Yattha pana vaṇṇo na dussati, evarūpāya mattikāya paribhaṇḍakatāya bhūmiyā vā tathārūpāya eva vālikāya vā nikkujjitvā ukkujjitvā ṭhāpetuṃ vaṭṭati. **No ca laggayeti** bhittikhilādīsu na olambeyya.

66. “Miḍḍhante vā”tiādinā vatvā pattam ṭhapetum na ca kappatīti yojetabbaṃ. **Miḍḍhanteti** ālindakamiḍḍhikādīnaṃ miḍḍhīnaṃ ante. Sace pana parivattetvā tattheva patitṭhāti, evarūpāya vitthiṇṇāya miḍḍhiyā ṭhapetum vaṭṭati. **Paribhaṇḍante vāti** bāhirapasse katāya tanukāya miḍḍhikāya ante vā. Ettha **vā**-saddo samuccaye, so ca paccekam yojetabbo. Añke pana aṃsabaddhakena aṃsakūṭe laggetvā ṭhapetuṅca vaṭṭati. Chattepi bhaṇḍakena saddhiṃ bandhitvā vā aṭṭam katvā vā ṭhapetum vaṭṭati. Mañcepi aññena saddhiṃ bandhitvā ṭhapetum, aṭṭaniyam bandhitvā olambetum vaṭṭati.

67. Pattena ucchiṭṭhodakañca calakaṭṭhikañca na nīhareyyāti sambandho. **Ucchiṭṭhodakanti** mukhavikkhālanodakam. Calakāni ca cabbetvā apaviddhāmisāni aṭṭhikāni macchamaṃsaṭṭhikāni ca **calakaṭṭhikam**. Pattam paṭiggahaṃ katvā hattham dhovitumpi hatthadhotādi udakampi patte ākiritvā nīharitumpi anucchiṭṭham suddhapattam ucchiṭṭhahatthena gaṇhitumpi na vaṭṭati. Macchamaṃsaphalāphalādīni khādanto yaṃ tattha aṭṭhiṃ vā calakam vā chaḍḍetukāmo hoti, tam patte ṭhapetum na labhati. Mukhato nīhaṭam pana yaṃ kiñci puna akhādītukāmo patte ṭhapetum na labhati. Siṅgiverādīni ḍaṃsitvā puna ṭhapetum labhati. **Pattahatthoti** patto hatthe yassāti viggaho. “Pattahattho, kavāṭa”nti ca upalakkhaṇametam. Yattha katthaci sarīrāvayave pana pattasmiṃ sati yena kenaci sarīrāvayavena kavāṭam paṇāmetum, ghaṭikam vā ukkhipitum, sūciṃ vā kuñcikāya avāpuritum na labhati. Aṃsakūṭe pana pattam laggetvā yathāsukham avāpuritum labhati.

68. Bhūmiyā bhūmisambandhī ādhārako, tasmim dantavallivettādīhi kate valayādhārake ca ekadārunā kate **dāruādhārake** ca bahūhi daṇḍehi kate **daṇḍādhārake** ca yattha ṭhapito patto yathā parivattitvā na paripatati, tathā suṭṭhu sajjite tasmim pattassupari pattoti evarūpe **duve patte** ṭhapeyyāti padatthayojanā. Bhamakoṭisadiso pana dāruādhārako tīhi daṇḍakehi baddho daṇḍādhārako ca ekassapi pattassa anokāso, tattha ṭhapetvāpi hatthena gahetvā nisīditabbaṃ. **Bhūmiyanti** kaṭasārakādīnā atthatāya bhūmiyā pana nikkujjitvā vā paṭikujjitvā vā **ekam** pattam ṭhapeyyāti yojanā.

69. Idāni akappiyapatte dasseti “**dārū**”tiādinā. Tattha suvaṇṇameva sovaṇṇam. Dāru ca rūpiyañca sovaṇṇaṅca maṇi ca veḷuriyañca dāru...pe... veḷuriyāni, tehi nibbattā **dāru...pe... mayā**. Dīgho pana “veḷuriyāmayā”ti gāthābandhasukhattham kato. Evamuparipi tādisam viññeyyam. Tattha indanīlādi **maṇi** nāma. Kaṃso ca kāco ca tipu ca sīsañca phalikā ca tambaloho cāti dvando, tehi jātā **kaṃsa...pe... jā**. Tattha kaṃsa-saddena vaṭṭalohopi saṅgahito. Setam **tipu**, kaṇham **sīsam**.

70. **Chavasīsamayoti** chavassa matamanussassa sīsam sīsakapālam, tena nibbatto chavasīsamayo. Ghaṭi ca tumbañca, tesam kaṭāho, tehi jātāti **ghaṭitumbakaṭāhajā**. Tattha **ghaṭīti** ghaṭoyeva. **Tumbam** alābu. Iti ime sabbe pattā akappiyā vuttā, dukkaṭavattukā ca vuttāti yojanā. Tattha rūpiyādīsu catūsu sace gihī bhattagesu suvaṇṇataṭṭakādīsu byañjanam katvā upanāmenti, āmasitum na vaṭṭati. Kaṃsakācaphalikajāni pana taṭṭakādīni bhājanāni puggalikaparibhogeneva na vaṭṭanti, saṅghikaparibhogena vā gihivikaṭāni vā vaṭṭanti. Ghaṭitumbakaṭāhajā pana labhitvā pariharitum na vaṭṭanti, tāvakālikam paribhuñjitum vaṭṭanti.

Pattaniddesavaṇṇanā niṭṭhitā.

## 6. Thālakaniddesavaṇṇanā

71-2. Dāru ...pe... veḷuriyāmayā akappiyā, phalikākācakaṃsajā thālakā gihisantakā saṅghikā ca kappiyā, tumbaghaṭijā tāvakālikā kappiyāti sambandho. Kappanti parikappanti avirodhibhāvenevāti kappā, tathā kappiyā. Na kappā **akappā**. Saṅghassa ime **saṅghikā**. Tāva-saddo avadhimihi. Tāva bhojanāvadhībūto kālo etāsanti **tāvakālikā**, bhuñjitvā chaḍḍetabbā, na pariharitabbāti adhippāyo.

Thālakaniddesavaṇṇanā niṭṭhitā.

## 7. Pavāraṇāniddesavaṇṇanā



73. Yena iriyāpathena upalakkhito pañcannaṃ bhojanānaṃ yaṃ kiñci bhojanaṃ **bhuñjamāno ayaṃ** bhikkhu kappiyānaṃ pañcannaṃ bhojanānaṃ hatthapāsopanītānaṃ **pavārito, tato** iriyāpathato **aññena** iriyāpathena **anātirittakaṃ** yāvakaḷikaṃ **bhuñjeyya** ce, imassa **pācitti** hotīti padatthayojanā. Bhuñjanatthāya paṭiggahaṇe pana dukkaṭaṃ. Tattha iriyāya kāyikakiriyāya patho pavattanūpāyo **iriyāpatho**, thānagamānānisajjanasayanāni. Pavāreti paṭikkhipatīti **pavārito**, atha vā pavāraṇaṃ paṭikkhipanaṃ pavāritaṃ, tamassa atthīti **pavārito**, katappavāraṇo katappaṭikkhepoti attho, atha vā parivesakena vāriyatīti **pavārito** paṭikkhepito. **Anātirittakanti** yaṃ pavāretvā āsanā vuṭṭhantassa “alametaṃ sabba”nti evaṃ atirittakaraṇādīhi sattahi vinayakammākārehi kappiyaṃ kataṃ, tañca “ajja vā yadā vā icchatī, tadā khādissatī”ti āhaṭaṃ, gilānātirittatāñca atirittāṃ adhikanti vuccati, tato aññaṃ anātirittakaṃ anādhikanti attho. Kusalaṃ cittaṃ pātetīti **pācitti**, tasmā itthiyaṃ timhi ta-kārassa ca-kāre, dvitte ca pācitti. Yāmakālikaṃ sattāhakālikaṃ yāvajīvikaṃ āhāratthāya paṭiggaṇhato āpatti dukkaṭassa, ajjhohāre ajjhohāre āpatti dukkaṭassa.

74. Idāni yāya pavāritā, sā pañcaṅgasampannāyeva pavāraṇā nāma hotīti dassetuṃ “**asana**”ntiādīmāha. Tattha **asananti** bhuñjamānassa bhuñjanaṃ. Iminā yaṃ vippakataṃ bhojanaṃ, taṃ dasseti. **Bhojanañceva**ti pavāraṇappahonakaṃ bhojanañceva hotīti. **Abhihāro**ti dāyakassa kāyena pavāraṇappahonakassa abhiharaṇaṃ, na vācāya. **Samīpatā**ti aḍḍhateyyahatthappamāṇasaṅkhātā samīpatā ca. Ettha pana sace bhikkhu nisinna hoti, āsanassa pacchimantato paṭṭhāya, sace ṭhito, pañhiantato paṭṭhāya, sace nipanna, yena passena nipanna, tassa pārimantato paṭṭhāya dāyakassa ṭhitassa vā nisinnassa vā nipannassa vā ṭhapetvā pasāritahatthaṃ yaṃ āsannataraṃ aṅgaṃ, tassa orimantena paricchinditvā aḍḍhateyyahatthapāso veditabbo. **Kāyavācāpaṭikkhepoti** tassa abhihātabhojanassa aṅgulicalanādikāyavikārena vā “ala”ntiādīnā vacīvikārena vā paṭikkhipanaṃ. Iti imehi pañcahaṅgehi pavāraṇā pakārayuttavāraṇā pañcaṅgāti sambandho. Pañca aṅgāni yassā sā **pañcaṅgā**.

75. Idāni etesu odanādipañcavidhaṃ bhojanaṃ dassetvā tāni ca puna vibhajitvā dassetuṃ “**odano**”tiādi āradhama. Tattha **sālīti** rattasālīādīkā sabbāpi sālījāti. **Vīhīti** sabbāpi vīhināmikā vīhijāti. **Kaṅgūti** setarattakālabhedā sabbāpi kaṅgūjāti. **Kudrūso** nāma kālakodravo. **Varako** nāma setavaṇṇo kodravo. Yavagodhumesu pana bhedo natthi. Evaṃ yathāvuttānaṃ sānulomānaṃ sattannaṃ dhaññānaṃ bhojjayāgu cāti sambandho. **Bhojjayāgu cāti** uṇhaṃ vā sītalāṃ vā bhuñjantānaṃ bhojānakāle gahitaṭṭhāne odhi paññāyati, sā bhojjayāgu. **Ca**-saddena odano cāti sambandho, odano nāmāti attho. Sace pana bhatte udakakañjikakhīrādīni ākirivā “yāguṃ gaṇhathā”ti denti, kiñcāpi tanukā hoti, pavāraṇaṃ janeti. Sace pana udakādīsu pakkhipitvā pacitvā denti, yāgusaṅgahameva gacchati. Sace pana tanukāyapi yāgyā sāsapamattampi macchamaṃsakhaṇḍaṃ vā nhāru vā pakkhittaṃ hoti, pavāraṇaṃ janeti.

76. Sāmākāditīnaṃ kudrūsake saṅgahaṃ gataṃ, varakacorako varake saṅgahaṃ gato, nīvāro ceva sālīyaṃ saṅgahaṃ gatoti yojanā. **Sāmākāditīnanti** sāmāko ādi yassa, tameva tiṇaṃ tiṇadhaññanti samāso.

77. **Bhaṭṭhadhaññamayoti** kharapākabhajjitehi sattavidhehi dhaññehi koṭṭetvā kato, antamaso cuṇṇampi kuṇḍakampi sattu nāmāti attho. Samapākabhajjitānaṃ pana ātapasukkhānaṃ vā taṇḍulānaṃ sattu vā kuṇḍakāni eva vā na pavārenti. Yavena sambhavo uppatti assāti **yavasambhavo, kummāso** kummāso nāma. Muggādīhi kato pana pavāraṇaṃ na janeti. **Kappiyo cāti** kappiyoyeva maṃso “maṃso”ti vuttoti yojanā. **Cāti** avadhāraṇe. Akappiyo pana paṭikkhipitabova. Paṭikkhittopi na pavāreti. Udahe sambhavo yassa so maccho nāma. Dvīsu panetesu sace yāguṃ pivantassa yāgusitthamattesupi macchakhaṇḍesu vā maṃsakhaṇḍesu vā ekaṃ khāditaṃ ekaṃ hatthe vā patte vā hoti, so ce aññaṃ paṭikkhipati, pavāreti. Dvepi khādītāni honti, mukhe sāsapamattampi avasiṭṭhaṃ natthi, sacepi aññaṃ paṭikkhipati, na pavāreti.

78. Idāni “kīdisaṃ bhuñjanto kinti vatvā upanītaṃ kiṃ nāma nisedhento pavāreti nāmā”ti codanaṃ manasi nidhāyāha “**bhuñjanto**”tiādi. Tattha kappāṃ vā akappāṃ vā pañcasu bhojanesu yaṃ

kiñci **bhojanam bhuñjanto** bhikkhu **tannāmena** tesam pavāraṇājanakabhojanānam nāmena vā “**ima**”nti sāmāññena vā vatvā **abhihaṭam** hatthapāsopaniṭam **kappam** kappiyam yathāvuttabhojanam **nisedhayam** nisedhayanto pavāreyyāti padatthasambandho. Ayamettha adhippāyo – yena ce akappiyamaṃsañca kuladūsanavejjakammauttarimanussadhammārocanaśāditarūpiyādīhi nibbattam akappiyabhojanañca tathā aññañca kappiyam vā akappiyam vā ekasitthamattampi ajjhohaṭam hoti, so sace pattamukhahatthesu yattha katthaci bhojane sati sāpekkhova aññaṃ hatthapāse ṭhitena “odanam gaṇhathā”tiādīnā pavāraṇappahonakasseva nāmena vā “ima”nti sāmāññavaseneva vā kāyeneva abhihaṭam vuttalakkhaṇam kappiyameva bhojanam kevalam vā missam vā kāyena vā vācāya vā paṭikkhipati pavāretīti. “Ākira ākira, koṭṭetvā koṭṭetvā pūrehī”ti pana vattum vaṭṭati.

**79-80.** Idāni ye pavāraṇam na janenti, te dassetuṃ “**lājā**”tiādīmāha. Tattha lājā...pe... phalādīni pavāraṇam na janentīti sambandho. **Lājāti** sāliādīhi katā lājā. **Tamsattubhattānīti** tehi lājehi katā sattu ceva bhattāni ca. **Gorasoti** gunnam raso khīrādi. **Suddhakhajjakoti** macchamaṃsehi asammissatāya suddhakhajjako. Sattuyo piṇḍetvā kato apakko sattugūlo pana sattumodakasaṅkhāto pavāreti. **Taṇḍulāti** samapākabhajjitānam sāliādīnam taṇḍulā, bhajjitataṇḍulā eva vā. **Bhaṭṭhapitṭhanti** suddham yaṃ kiñci bhajjitam piṭṭham. **Puthukāti** sāliādīnam puthukā. Puthukā hi tantiāgamayuttīyā visumpi gayhati, ekatopi, tasmā vuttāvasesānam puthukāveḷuādīnam bhattanti ca sambandho. **Veḷūti** tesam taṇḍulā vuccanti. Puthukā ca veḷu ca, te ādayo yesanti samāso. **Ca**-saddo panettha sabbathāpi yojetabbo. **Ādi**-saddena kandaṃūlaphalānīpi gayhanti. **Vuttāvasesānanti** vuttehi sattavidhehi dhaññehi avasesānam. **Rasayāgūti** rasehi pakkamaṃsādīhi sammissā yāgu. Rasopi tādisova. **Suddhayāgūti** maṃsādīhi amissā suddhayāgu. **Phalādīnīti ādi**-saddena kandaḍīnampi gahaṇam. **Api** cāti nipāto, nipātasamudāyo vā samuccaye, so paccekam yojetabbo.

**81.** Idāni yasmā sattahi vinayakammākārehi yaṃ atirittam akatam, tattha pācittiyam vuttam, byatirekato atirittakate natthi, tasmā atirittam karontena evam kātabbanti dassento “**pavāritenā**”tiādīmāha. Tattha pavāritena vuṭṭhāya atirittam na kātabbam, bhojanam abhuttana ca atirittam na kātabbanti sambandho. **Bhojananti** pavāraṇappahonakabhojanam. **Abhuttanāti** ekasitthamattampi abhuttāvinā. **Yena yaṃvā pure katanti** ettha ca **eva**-saddo dīgham katvā niddiṭṭho, so ca ajjhāhātena tam-saddena sambandhīyati, tasmā yena bhikkhunā yaṃ bhojanam pure pubbe atirittam katam, teneva tameva atirittam na kātabbanti yojetvā attho veditabbo. Tasmā kappiyam kāretvā bhuñjantassa aññaṃ āmisam ākiranti, tam so puna kātum na labhati, tasmim bhojane kariyamāne paṭhamakatena saddhim katam hotīti. Aññaṃsmim pana tena vā aññaṃ vā kātum vaṭṭati.

**82.** “**Kappiya**”ntiādīni “karonto”ti etassa kammāpadāni. Kappiyañceva gahitañceva uccāritañceva hatthapāsagañceva yāvākālikam atirittam karonto “alametam sabba”nti evam bhāsātūti yojanā. Tatthayam phalam vā kandaṃūlādi vā pañcahi samaṇakappehi kappiyam katam, yañca kappiyamaṃsam vā kappiyabhojanam vā, etam **kappiyam** nāma. **Gahitanti** bhikkhunā paṭiggahitam. **Uccāritanti** kappiyam kāretum āgatena bhikkhunā īsakampi ukkhittam vā apanāmitam vā, tam pana atirittakārakena “alametam sabba”nti vuttana kātabbam. **Hatthapāsaganti** kappiyam kāretum āgatena hatthapāsam gatam. **Atirittam karontoti** īdisam catubbidhākārasampannam bhojanam atirittam karonto pavāretvā āsanā avuṭṭhito vā appavāretvāpi sabbathā bhutto vāti evam duvidhavinayakammākārasampanno bhikkhu. **Alametam sabbanti evam bhāsātūti** alametam sabbam iti evam bhāsatu. Evam sattavidham vinayakammākāram sampādentō vacībhedam katvā sakimpi evam vadeyyāti attho.

**83.** Kappiyam karontena pana anupasampannassa hatthe ṭhitam na kātabbam. Tenāha “**na kare... pe... hatthaga**”nti. Upasampannato añño anupasampanno, tassa hatthe gatam **anupasampannahatthagam**. **Pesayitvāpīti** sace tattha añño byatto bhikkhu natthi, yattha atthi, tattha pesayitvāpi. **Tam** atirittakatam **akārako** atirittakārakato añño **sabbo** pavāritopi appavāritopi bhuñjitum labbhateti sambandhanīyam. Pavāritena pana mukhañca hatthañca sodhetvā bhuñjitabbam.

Pavāraṇāniddesavaṇṇanā niṭṭhitā.

## 8. Kālikaniddesavaṇṇanā

**84. Kālikāti** majjhanhikapacchimayāmasattāhayāvajīvappavattisaṅkhāto kālo etesamatthīti kālikā, sabbepi khajjabhojjaleyyapeyyasaṅkhātā atthā. Te pana gaṇanaparicchedato cattāro honti. Kiṃ te appaṭiggahitāpi sabhāveneva kālikavohāraṃ labhanti, udāhu aññathāpīti āha “**paṭiggahitā**”ti, paṭiggahitāyeva te yāvakālikādi kālikavohāralābhino, no aññathāti adhippāyo. Idāni te dasseti “**yāvakālika**”ntiadinā. Tattha aruṇuggamanato yāva ṭhitamajjhanhiko, tāva paribhuñjitabbattā yāva majjhanhikasāṅkhāto kālo assāti **yāvakālikam**, piṭṭhakhādānīyādikaṃ vatthu, ṭhitamajjhanhikato paṭṭhāya taṃ paribhuñjituṃ na sakkā, kālaparicchedajānanatthaṃ kālatthambho vā vojetabbo, kālantare vā bhattakiccaṃ kātabbaṃ. Yāva rattiyā pacchimasāṅkhāto yāmo, tāva paribhuñjitabbato yāmo kālo assāti **yāmakālikam**. Paṭiggahetvā sattāhaṃ nidhetabbato sattāho kālo assāti **sattāhakālikam**. Ṭhapetvā udakaṃ avasesaṃ sabbampi paṭiggahitaṃ yāvajīvaṃ pariharitvā sati paccaye paribhuñjitabbato jīvassa yattako paricchedo yāvajīvaṃ, taṃ assa atthīti **yāvajīvikam**.

Nanu ca aññattha viya “yāvajīvika”nti ettha kālasutiyā abhāve kathaṃ “cattāro kālikā”ti yujjati? Yujjati, sogatānaṃ khandhavinimuttasseva kālassābhāvato jīvasāṅkhātassa jīvitindriyassa khandhasaṅgahitattā sopi kāloyevāti. Nanu cettha “yāvakālika”ntiadinā niddiṭṭhāneva “kālikā”ti vuttāni, “kālikāni”ti vattabbaṃ siyāti? Nedamevaṃ viññeyyaṃ, “kālika”ntiadinā vattusambandhena vuttāni, “kālikā”ti pana sāmāññantaravasena atthasaddasambandhena vuttanti natthi virodhoti.

**85.** Idāni tesu “**piṭṭha**”ntiadinā yāvakālikam dasseti. Tattha **piṭṭhaṃ mūlaṃ phalanti** piṭṭhakhādānīyaṃ mūlakhādānīyaṃ phalakhādānīyaṃca. Tattha sattannaṃ tāva dhaññānaṃ dhaññānulomānaṃ aparāṇṇānaṃca piṭṭhaṃ panasalabujaambāṭakadhotatālapipiṭṭhādikañceti tesu tesu janapadesu pakatiāhārasena 03 manussānaṃ khādānīyabhojanīyakiccasādhakaṃ piṭṭhaṃ **piṭṭhakhādānīyaṃ**. “Adhotam tālapipiṭṭhaṃ khīravallipiṭṭha”ntiadinā gaṇiyamānānaṃ gaṇanāya anto natthi, khādānīyabhojanīyakiccasādhakabhāvoyeva panetesam lakkhaṇaṃ, subahuṃ vatvāpi imasmiṃyeva lakkhaṇe ṭhātābanti na vitthārayāma. Evaṃ sabbattha. Tambakataṇḍuleyyādīmūlaṃ **mūlakhādānīyaṃ**. Panasalabujanāḷikerādiphalaṃ **phalakhādānīyaṃ**. **Khajjanti** sakkhalimodakādīpubbaṇṇāparaṇṇamayam khādānīyaṃca. **Gorasoti** khīradadhitakkasaṅkhāto gunnaṃ raso ca. **Dhaññābhojananti** sānulomānaṃ dhaññānaṃ odanasattukummāsasaṅkhātābhojanaṃca. **Ṭīkāyaṃ** pana “sānulomāni sattadhaññāni ca pañcavidhabhojanaṃcā”ti vuttaṃ, taṃ na yuttaṃ, dhaññānaṃ visuṃ gahaṇe payojanābhāvā, payojanasambhave ca phalaggahaṇeneva tesam gahaṇasambhavato.

**Yāgusūpappabhutayoti** yāgu ca sūpaṇca, taṃ pabhuti yesaṃ teti ete yāvakālikā hontīti sambandho. Ettha ca pabhuti-saddena macchamaṃsaṅkhātāṃ dhaññābhojanato avasiṭṭhaṃ bhojanaṃca piṭṭhamūlaphalakhādānīyato avasiṭṭhaṃ kandakhādānīyaṃ, muḷālakhādānīyādiṃca saṅgaṇhāti. Tesu dīgho ca bhisakandādi vaṭṭo ca uppalakaṇḍādi **kandakhādānīyaṃ**, padumamūlādi ca taṃsadisaṃ erakamūlādi ca **muḷālakhādānīyaṃ**, tālādīnaṃ kaḷīrasaṅkhātā matthakā **matthakakhādānīyaṃ**, ucchukkhandhādayo nīluppalādīnaṃ daṇḍakkhandhakādi **khandhakhādānīyaṃ**, tambakataṇḍuleyyādīnaṃ paṇṇaṃ **pattakhādānīyaṃ**, ucchutacova eko saraso **tacakhādānīyaṃ**, tambakasiggupphādi **puppakhādānīyaṃ**, labujaṭṭhipanasatṭhiādikaṃ **aṭṭhikhādānīyaṃ**.

**86. “Madhū”**tiadinā yāmakālikam dasseti. Madhu ca muddikā ca sālūkaṃca cocaṃca mocaṃca ambaṃca jambu cāti dvando. Muddikā phalepi itthiyaṃ, phale sesā napuṃsake, “jambu” iti phalavācī napuṃsakasaddantaraṃ, tato jātaṃ madhupānādi **madhu...pe... jambujaṃ**, taṃca phārusaṃca pānakanti yojanā. Tattha **madhujam pānaṃ** nāma muddikānaṃ jātirasaṃ udakasambhinnaṃ katvā katapānaṃ. Taṃ attanā kataṃ purebhattameva sāmisaṃ nirāmisampi vaṭṭati. Anupasampannehi kataṃ labhitvā pana purebhattaṃ paṭiggahitaṃ purebhattaṃ sāmisaṃ vaṭṭati, pacchābhattaṃ pana

nirāmisameva vaṭṭati. Esa nayo sabbapānesu. **Muddikajaṃ pānaṃ** nāma muddikānaṃ udake madditvā katapānaṃ. Tathā sesapānāni yathānurūpaṃ veditabbāni, **sālūkaṃ** rattuppālādīnaṃ sālūkaṃ. **Cocaṃ** aṭṭhikakadaliphalaṃ. **Mocaṃ** anaṭṭhikaṃ. Imāni aṭṭha pānāni sītānīpi ādiccapākānīpi vaṭṭanti, aggpākāni pana na vaṭṭanti. Tenāha “**nāggisantatta**”nti.

**87-8.** Avasesāni pana vettatintiṇikamātulungakapitthakaramandādikhuddakaphalapānāni aṭṭhapānagatikāneva. Tenāha “**sānulomāni dhaññāni, ṭhapetvā phalajo raso**”ti. Ekassa pana vakkhamānānañca “puppharaso”tiādīnaṃ “sītodamadditādiccapāko vā yāmakāliko”ti iminā sambandho veditabbo. Tālanāḷikerapanasalabujaalābukumbhaṇḍapussaphalatipusaelālūkaphalānīti nava mahāphalāni, sabbañca aparāṇaṃ sattadhaññāni anulomentīti saha anulomehīti **sānulomāni**. Sānulomadhaññānaṃ pana raso yāvakāliko. “Sānulomāni dhaññāni”ti phalāni viññāyanti. Phalasutiyā “sesaphalajo”ti vattabbe gamyamānattā na vuttaṃ. **Madhukapupphamaññatrāti** madhukapupphaṃ ṭhapetvā. **Pakkaḍāka**janti pakkehi yāvakālikehi ḍākehi jātaṃ rasaṃ. Sītamudakaṃ **sītodaṃ**, khīrode viya sītode madditoti tappuriso. **Ādicca**-saddo ātape vattati upacāratoti ādicce pāko yassāti samāso.

**89.** Sattāhakālikaṃ dasseti “**sappi**”tiādīnā. Tattha **sattāhakālikāti** yathāvuttāni sappiādīni sattāhakālikāni. Idāni sappiādīni vibhajati “**sappi**”tiādīnā. Tattha yesaṃ gomahimā sādīnaṃ maṃsaṃ kappati, tesamā sappi sappi nāmāti “**sappi**”tiādīnā sappilakkhaṇamāha. Akappiyamaṃsasappinopi kappiyasambhave tattha sattāhātikkame dukkaṭassa vakkhamānattā nissaggiyavattumeva cettha dassetuṃ “**yesaṃ maṃsamavārita**”nti vuttaṃ. Khīrādīsu hi tesamakappiyaṃ nāma natthi. Navanītassa sappisadisatāya navanītalakkhaṇaṃ visuṃ na vuttaṃ. Upari sappipiṇḍaṃ ṭhapetvā sītalapāyāsaṃ denti, yaṃ pāyāsena asaṃsaṭṭhaṃ, taṃ sattāhakālikaṃ, missitaṃ pana ādiccapākaṃ katvā parissāvitaṃ, tathā khīraṃ pakkhipitvā pakkatelampi, tesu **navanītaṃ** nāma navuddhaṭaṃ. Tena kataṃ pana **sappi**.

**90.** Tilā ca vasā ca eraṇḍāni ca madhukāni ca sāsapā cāti dvando. Tehi sambhavo yassāti bāhirattho, taṃ telaṃ nāmāti attho. Khuddā khuddamadhumakkhikā ca bhamarā ca **khuddabhamaraṃ**, khuddajantukattā napuṃsakekavacanaṃ. Madhuṃ karontīti madhukariyo, tā eva makkhikā **madhukarimakkhikā**, khuddabhamarameva madhukarimakkhikāti kammadhārayo. Tāhi kataṃ **madhu** madhu nāmāti attho. **Ṭikāyaṃ** pana visuṃ madhukarī-saddaṃ vikappetvā “daṇḍakesu madhukarā madhukarimakkhikā nāmā”ti vuttaṃ. Madhupaṭalaṃ vā madhusitthakaṃ vā sace madhunā makkhitaṃ, madhugatikameva. Tumbalakānaṃ cīrikānañca niyyāsasadisamaṃ madhu pana yāvajīvikaṃ. Raso nikkasaṭo ādi yassā sā **rasādi**. **Ādi**-saddena phāṇitādīnaṃ gahaṇaṃ, sā ucchuvikati. **Pakkāti** avatthukapakkā vā, **phāṇitaṃ** phāṇitaṃ nāmāti attho. Sītūdakena katamadhukapupphaphāṇitaṃ pana phāṇitagatikameva. Ambaphāṇitādīni yāvakālikāni. Etāni yathāvuttāni sappiādīni purebhattaṃ sāmīsaparibhogena paribhuñjitabbaṃ, pacchābhattato paṭṭhāya pana tāni ca pacchābhattaṃ paṭiggahitāni ca sattāhaṃ nidahitvā nirāmisaparibhogena paribhuñjitabbāni.

**91.** Idāni odissa anuññātavasāya pākato vibhāgaṃ dassetvā tato sappiādīnaṃ dassetuṃ “**savatthū**”tiādīmāha. Tattha purebhattaṃ **sāmaṃ vā** attanā eva. **Vā**-saddena parehi vā. **Amānusa** manussavasārahitā. **Vasā** acchādīnaṃ akappiyānaṃ, sūkarādīnaṃ kappiyānañca sattānaṃ vasā. Savatthupakkā sattāhakālikā hotīti seso. **Savatthupakkāti** savatthukaṃ katvā pakkā. Ayamettha adhippāyo – sace pana vasamaṃ purebhattaṃ paṭiggahetvā pacitvā telaṃ parissāvitaṃ sattāhāni nirāmisaparibhogena paribhuñjitabbaṃ. Atha parehi kataṃ purebhattaṃ paṭiggahitaṃ, purebhattaṃ sāmīsampi vaṭṭati, pacchābhattato paṭṭhāya nirāmisameva, no ce, dukkaṭaṃ hotīti. Kāriye kāraṇopacārena panettha “**vasā**”ti telameva vuttaṃ, vasā pana yāvakālikāva.

**Ṭikāyaṃ** pana vasāya “sattāhakālike āgatattānaṃ natthīti vadantī”ti vatvā “taṃ upaparikkhitabba”nti vasāya sattāhakālikattamāsaṃkiyaṃ vuttaṃ. Kimettha upaparikkhitabbaṃ? Bhesajjaṃ anujānatā bhagavatā “yāni kho pana tāni gilānānaṃ bhikkhūnaṃ paṭisāyanīyāni bhesajjāni, seyyathidaṃ – sappi navanītaṃ telaṃ madhu phāṇitaṃ, tāni paṭiggahetvā sattāhaparamaṃ sannidhikāraṃ paribhuñjitabbāni”ti (pārā. 622) sappiādīnameva sattāhakālikattaṃ vuttaṃ.

**Bhesajjakkhandhakepi** “anujānāmi, bhikkhave, tāni pañca bhesajjāni paṭiggahetvā kālepi vikālepi paribhuñjitu”nti (mahāva. 260) tāni pañceva “bhesajjāni”ti vatvā telam niyamato “anujānāmi, bhikkhave, vasāni bhesajjāni acchavasam macchavasam susukāvasam sūkaravasam gadrabhavasam kāle paṭiggahitam kāle nippakkaṃ kāle saṃsaṭṭhaṃ telaparibhogena paribhuñjitu”nti (mahāva. 262) vuttaṃ. **Bhesajjasikkhāpadaṭṭhakathāyañca** (kaṅkhā. aṭṭha. bhesajjasikkhāpadavaṇṇanā) “ṭhapetvā manussavasam aññaṃ yaṃ kiñci vasa”ntiādinā vasātelassa vidhānaṃ dassetvā “aññesaṃ yāvakālikavatthūnaṃ vatthum pacitum na vaṭṭatiyevā”ti vadatā aṭṭhakathācariyena yāvakālikesu vasam ṭhapetvā aññesaṃ yāvakālikavatthūnaṃ vatthum pacitum na vaṭṭatīti ayamettha attho dīpitoti vasā “yāvakālikāyevā”ti viññāyatīti ko ettha sukhumo nayoti.

**Aññesaṃ** vasātelato paresaṃ **yāvakālikavatthūnaṃ** yesaṃ tesam yāvakālikavatthūnaṃ sappiādīnaṃ **vatthum** yāvakālikasaṅkhātaṃ khīrādikaṃ na paceti sambandho. Ayamettha adhippāyo – yathā sattāhaparibhogatthāya vasam kāle paṭiggahetvā kāle pacitum vaṭṭati, na evaṃ sappiādīnaṃ vatthubhūtaṃ khīrādiyāvakālikaṃ, taṃ pana sattāhaparibhogatthāya kālepi na vaṭṭati. Tāni hi yadi taṃ paṭiggahetvā sayam katāni, pacchābhattato paṭṭhāya na vaṭṭanti savatthukappaṭiggahitattā, sāmisaṃ na vaṭṭanti sāmampakkattā, purebhattampi na vaṭṭanti yāvakālikavatthuto vivecitattā. Parehi katāni pana purebhattaṃ sāmisaṃ vaṭṭanti attanā apakkattā. Yāvajīvikāni tu sāsapamadhucaeraṇḍaṭṭhīni telakaraṇatthaṃ paṭiggahetvā tadaheva kataṃ telam sattāhakālikaṃ, dutiyadivase kataṃ chāhaṃ vaṭṭati, evaṃ yāva sattamadivase kataṃ tadaheva vaṭṭati, uggate aruṇe nissaggiyaṃ, aṭṭhame divase anajjhoharaṇīyaṃ, uggahitena yena kenaci vatthunā katasadisam hoti. Telatthāya paṭiggahitasāsapādīnaṃ sattāhātikkamena dukkaṭṭhaṃ. Nibbattitaṃ sappi vā navanītaṃ vā kālepi vikālepi paṭiggahetvā pacitum vaṭṭati. Taṃ pana tadahu purebhattampi sāmisaṃ na vaṭṭati, saṃsaggato yāvakālikampi sāmampakkaṃ siyāti nirāmisam pana sattāhampi vaṭṭati.

**92.** Idāni “**haliddi**”ntiādinā yāvajīvikaṃ dasseti. Tattha “**haliddi** nāma nisā”tiādinā vuccamānēpi pariyaṃvacane sammoho siyāti na taṃvacanena bhusam sammohayissāma, tasmā tāni upadesatova veditabbāni. Tattha “**haliddi**”nti binduāgamena vuttaṃ. Upacārena tu mūlādīni haliddādisaddena vuttāni. Tā haliddādayo keci itthilingāyeva. Mūlaphale vacattañca...pe... bhaddamuttañca ativisāti padacchedo. **Pañcamūla**-saddena cūlapañcamūlamahāpañcamūlāni gahitāni. **Ādi**-saddena vajjakalimūle jaraṭṭhanti evamādīnaṃ saṅgaho.

**93-5. Goṭṭhaphalanti** madanaphalanti vadantīti. Tīni phalāni yassaṃ saṅgahitaṃ sā **tīphalā**. **Eraṇḍakādīnanti ādi**-saddena jātirukkādīnaṃ gahaṇaṃ. Sulasādīnaṃ paṇṇanti sambandho. **Ādi**-saddena asokādīnaṃ gahaṇaṃ. **Sūpeyyapaṇṇanti** tambakataṇḍuleyyādisūpayoggapaṇṇaṃ. Uchchuniyyāsaṃ ṭhapetvā sabbo niyyāso ca sarasaṃ ucchujam tacañca ṭhapetvā sabbo taco cāti sambandho. Tattha hīngukaṇīkārāniyyāsādi sabbo **niyyāso** nāma. Nirasaucchutacādi sabbo **taco** nāma. **Loṇaṃ** sāmuddādi. **Lohaṃ** ayatambādi. **Silā** kāḷasilādi.

**96. Suddhasitthanti** madhunā amakkhitaṃ. Madhumakkhitaṃ pana sattāhakālikaṃ. **Yañca kiñci sujhāpitanti** dujjhāpitaṃ akatvā sujhāpitaṃ yaṃ kiñci ca. **Vikaṭāḍippabhedanti** vikaṭaṃ gūthamattikāmuttachārikāsaṅkhātaṃ ādi yassa, so pabhedo yassāti bāhirattho, taṃ. Yaṃ kiñci cāti sambandho. Ettha pana **ādi**-saddena kandakhādāniye khīrakākolādayo, muḷālakhādāniye haliddisiṅgiveramūlādayo, matthakakhādāniye haliddisiṅgiverakaḷīrādayo, khandhakhādāniye uppalaṇṇanāḍādayo, pupphakhādāniye campakapupphādayo, aṭṭhikhādāniye madhukaṭṭhieraṇḍasāsapādayo, piṭṭhakhādāniye adhotatālapīṭṭhādayo ca saṅgahitāti daṭṭhabbā.

**97.** Idāni sabbaso yāvajīvikaṃ dassetum asakkuṇeyyattā vuttāni ca avuttāni ca ekato sampiṇḍetvā tattha lakkhaṇaṃ ṭhapento “**mūla**”ntiādimāha. Tattha “**sāro**”ti vattabbe “**sāra**”nti līngavipallāsēnāha. “**Sāro** bale thiraṃse cā”ti hi nighaṇḍu. **Āhāraṭṭhanti** āhārena jāto attho payojanaṃ āhārattho, sova āhāraṭṭho, taṃ āhāraḱcanti vuttaṃ hoti.

98. Idāni catūsu kappiyākappiyādivibhāgaṃ dasseti “**sabbā**”tiādīnā. Tattha sabbe kālikā, tesam sambhogo anubhavoti samāso. **Kāleti** pubbaṅhakāle. **Sabbassāti** gilānāgilānassa. **Sati paccayeti** tīsu yāmakālikam pipāsādikāraṇe sati, sattāhakālikam yāvajīvikaṅca gelaṅṅakāraṇe satīti attho, kālato vigato **vikālo**, tasmim, yāmakālikam vikāle āhāratthāya ajjhoharaṇe, sattāhakālikam pana yāvajīvikaṅca tadatthāya paṭiggahaṇamattepi dukkaṭam.

99. **Ubhoti** yāvakālikam yāmakālikaṅca. Tattha yāvakālikam attano kālātikkantaṃ vikālabhojanabhikkhāpadena pācittiyam janayati, yāmakālikam yāmātikkantaṃ sannidhisikkhāpadena. Ete ubhopi antovutthaṅca sannidhiṅca janayantīti sambandho. “**Antovuttham sannidhi**”nti bhāvappadhānoyam niddeso, antovutthattaṃ sannidhittaṅcāti attho.

100. **Atināmiteti** atikkāmite. **Pācittīti** sattāhātikkantaṃ bhesajjasikkhāpadena nissaggiyapācittiyāpatti ca hotīti attho. Sace dvinnam santakam ekena paṭiggahitaṃ avibhattam hoti, sattāhātikkame dvinnampi anāpatti, paribhuñjitum pana na vaṭṭati. **Pālināruḥeti** pāliyam anāruḥe sappiādīmhi satta ahāni atināmiteti sambandho. **Sappīti** manussādīnam sappi. **Ādi**-saddena tesamyeva navanītam, nāḷikerāditeḷam, sītodakena kataṃ madhukapupphaphāṇitaṅca saṅgahitaṃ.

101. **Nissaṭṭhaladdhanti** nissaṭṭham vinayakammavasena nissajjitaṅca tam laddhaṅca puna tathevāti nissaṭṭhaladdham. Tam gahetvāti seso. Nissajjanavidhānam pana vakkhamānanayena veditabbam. “**Naṅga**”ntiādi upalakkhaṇamatam. Tena makkhitāni kāsāvādīni ca pana aparibhogāniyeva. Aññassa pana kāyikaparibhogo vaṭṭati. **Vikappentassa sattāhe sāmaṇerassāti** ettha **ṭikāyam** “idaṃ sappim tuyham vikappemī”tiādīnā tesam tesam nāmam gahetvā sammukhāparammukhāvīkappanavasena attham dassetvā tam sādhyantehi avikappite vikappitasaññī nissaggiyam pācittiya”nti āpattivāre pāli āhaṭā. “Sace upasampannassa vikappeti, attano eva santakam hoti, paṭiggahaṇampi na vijahati”ti dosaṃ vatvā anupasampannassa vikappane attasantakattābhāvo, paṭiggahaṇavijahanaṅca payojanam vuttam. Tattha vadāma – āpattivāre “avikappite”tiādipāliyeva natthi, “adhiṭṭhite adhiṭṭhitasaññī nissaggiyam pācittiyam, avissajjite vissajjitasaññī nissaggiyam pācittiya”ntiādīnā (pārā. 624) pāliya āgatattā tadanurūpameva anāpattivāre “adhiṭṭheti, vissajjēti”tiādīnāva pāli āgatā. Yadi bhavēyya, vaṇṇanīyaṭṭhānatāya aṭṭhakathāya bhavitabbam, na cettha aṭṭhakathāyam vijjati. Anupasampannassa vikappane ca katham paṭiggahaṇam vijahati sikkhāpaccakkhānādīsu chasu paṭiggahaṇavijahanakāraṇesu vikappanassa anantogadhātā, tasmā nāyamettha atthoti.

Mayamettha evamattham bhaṅāma – **vikappentassāti** ettha **vikappanam** saṃvidahanam “cittasaṅkappo”tiādīsu viya, ubhayattha pana upasaggehi nānattamatam, tasmā antosattāhe sāmaṇerassa yassa kassaci vikappentassa saṃvidahantassa pariccāgasaññam pariccāgacetanam pariccāgādhippāyam uppādentassa anāpattīti attho. Idaṅca **mahāsumattheravādamolubbha** vuttam. Vuttañhi “tena cittenā”tiādīsu pāḷivacanesu adhippāyam dassentena, “idaṃ kasmā vuttam. Evañhi antosattāhe datvā pacchā paṭilabhivā paribhuñjantassa anāpattidassanattha”nti (pārā. aṭṭha. 2.625). **Mahāpadumatthero** panāha “sattāhātikkantassa pana paribhoge anāpattidassanatthamidam vutta”nti (pārā. aṭṭha. 2.625). Ayameva vādo tesu sundarataro. Sattāhe makkhanādiṃ adhiṭṭhato ca aññassa dadatopi ca anāpattīti sambandho. **Ādi**-saddena abbañjanādiṃ saṅgaṇhāti. Ayametthādhippāyo – sappiādīṃ abbañjanādiṃ madhum arumakkhanam, phāṇitam gharadhūpanam adhiṭṭhato anāpattīti. **Aññassāti** upasampannassa vā anupasampannassa vā.

102. Yāvakālikaādīni attanā saha saṃsaṭṭhāni sabbhāvam gāhāpayantīti sambandho. **Sabbhāvanti** sassa attano bhāvo dvitte sabbhāvo, tam. **Tasmāti** yasmā evam, tasmā. **Evamudīritanti** evam “vikappentassa sattāhe”tiādīnā vuttam. Ayamettha adhippāyo – yasmā attanā saṃsaṭṭhāni attano bhāvam gāhāpayanti yāvakālikādīni, tasmā sattāhātikkāmitāni sattāhakālikāni pācittiyajanakāni saṃsaṭṭhāni attasaṃsaṭṭhānipi pācittiyajanakāni karontīti avikappanādiṃhi sati byatirekato pācittiyāpattiparidīpakaṃ “vikappentassā”tiādīkam vākyattayam vuttanti. **Ṭikāyam** pana “idāni

vakkhamānaṃ sandhāya **evanti vutta**’nti vuttaṃ. Taṃ vakkhamānassa atītaudīritattāyogato kathaṃ yujjatīti. **Evamudīritanti** vā pāḷiyaṃ aṭṭhakathāyañca evameva vuttanti attho. **Eva**-saddo avadhāraṇe.

**103-5.** Idāni attasaṃsaṭṭhānaṃ yāvakaḷikādīnaṃ sabbhāvagāhāpanaṃ sarūpato dassetuṃ “**pure**”tiādīmāha. Tattha **sattāhanti** satta ahāni yassa taṃ sattāhaṃ, sattāhakālikaṃ. **Ca**-saddo aṭṭhānappayutto, so sattāhañca yāvajīvikañcāti yojetabbo. **Sesakālikasammissanti** sesehi tadahu paṭiggahitehi kālikehi yāvakaḷikayāmakālikasañkhātehi sammissaṃ. **Pācittīti** sannidhisikkhāpadena pācitti. **Tadahu paṭiggahitanti** tasmiṃyeva dine purebhattaṃ paṭiggahitaṃ. **Tadahevāti** tasmiṃyeva dine purebhattameva. **Sesanti** sattāhakālikaṃ yāvajīvikañca. **Evanti** yāme eva paribhuñjayeti vijānīyanti sambandho. **Itaranti** sattāhakālikato aññaṃ yāvajīvikaṃ.

Kālikaniddesavaṇṇanā niṭṭhitā.

### 9. Paṭiggāhaniddesavaṇṇanā

**106.** Dātuṃ kāmetīti dātukāmo, tassa abhihāro īsakampi oṇamanādinābhiharaṇanti tappuriso, hatthassa pāso **hatthapāso**. Ruḷhīvasena tu aḍḍhateyyahattho hatthapāso nāma. So ca sace bhikkhu nisinno hoti, āsanassa pacchimatato paṭṭhāya, sace ṭhito, pañhiantato paṭṭhāya, sace nipanno, yena passena nipanno, tassa pārimantato paṭṭhāya dāyakassa nisinnassa ṭhitassa vā ṭhapetvā pasāritahatthaṃ yaṃ āsannataraṃ aṅgaṃ, tassa orimantena paricchinditvā veditabbo. **Eraṇakkhamanti** thāmamajjhimena purisena eraṇassa ukkhipanassa khamaṃ yoggaṃ. Vatthusaddāpekkhaṃ napuṃsakattaṃ. **Tidhā denteti** kāyakāyappaṭibaddhanissaggiyaṇaṃ vasena tīhi pakārehi dāyake dadamāne. Tattha yena kenaci sarīrāvayavena antamaso pādaṅgulyiāpi dīyamānaṃ kāyena dinnāṃ nāma hoti, kaṭacchuādīsu yena kenaci dīyamānaṃ kāyappaṭibaddhena, kāyato pana kāyappaṭibaddhato vā mocetvā hatthapāse ṭhitassa kāyena vā kāyappaṭibaddhena vā pātiyamānaṃ nissaggiyena payogena dinnāṃ nāma. **Dvidhā gāhoti** kāyakāyappaṭibaddhānaṃ vasena dvīhi pakārehi yehi kehici dīyamānassa gahaṇaṃ. Evaṃ paṭiggaho pañcaṅgoti yojanā. **Pañcaṅgoti** pañca aṅgāni yassāti bahubbīhi.

**107.** Idāni aneraṇakkhame ca kismiñci kāyappaṭibaddhe ca paṭiggahaṇārohanaṃ dassetuṃ “**asamhāriye**”tiādīmāha. Tattha **asamhāriyeti** ānetumasakkuṇeyye phalapakāsāñādimhi. **Tatthajātet**i tesuyeva rukkhādīsu jāte kiṃsukapaduminipaṇṇādiḷe. Ciñcaādīnaṃ sukhume paṇṇeti sambandho. Tāni hi sandhāretuṃ na sakkonti. Tesāṃ pana sākhaṃsu vaṭṭati. **Ādi**-saddena “aṅga”ntiādikaṃ saṅgaṇhāti. **Vā**-saddo samuccaye. **Asayhabhāreti** thāmamajjhimapurisena sahituṃ sandhāretuṃ asakkuṇeyye bhāre. Sabbesaṃ paṭiggaho “na rūhatī”ti iminā sambandho.

**108.** Idāni paṭiggahaṇavijahanaṃ dasseti “**sikkhā**”tiādīnā. Tattha **sikkhāmaraṇaliṅgehīti** sikkhāpaccakkhānena ca maraṇena ca liṅgaparivattanena ca. **Anapekkhavisaggatoti** natthi apekkho etassāti anapekkho, sova visaggo, tato ca. **Acchedāti** corādīhi acchinditvā gahaṇena. **Anupasampannadānāti** anupasampannassa dānena. **Ca**-saddo sabbattha ānetabbo. **Gāhoti** paṭiggahaṇaṃ. **Upasammatīti** vijahati.

**109-10.** Idāni appaṭiggahitaṃ paribhoge dosaṃ dassetuṃ “**appaṭiggahita**”ntiādīmāha. Tattha **sabbanti** catukālikapariyāpannaṃ sakalampi. Idāni appaṭiggahetvā paribhuñjitabbaṃ dassetuṃ “**suddha**”ntiādīmāha. Tattha suddhaṃ nātibahalaṃ udakañca tathā aṅgalaggaṃ avicchinnaṃ danta... pe... gūthakañca loṇa...pe... karīsakañca kappateti sambandho. Tattha **suddhanti** rajareṇūhi aññarasena ca asammissatāya parisuddhaṃ. **Nātibahalanti** yaṃ kasitaṭṭhāne bahalamudakaṃ viya mukhe vā hatthe vā na laggaṃ, taṃ. **Avicchinnanti** aṅgato vicchinditvā na gataṃ. Dantāni ca akkhīni ca kaṇṇaṃca dantakkhikaṇṇaṃ pānyaṅgattā, tassa gūthakanti tappuriso. **Loṇaṃ** sarīruṭṭhitaṃ. **Sīghāṇīti** sīghāṇikā. Vicchinnaṃ na paṭiggahetabbaṃ.

**111.** Idāni “**gūthā**”tiādīnā kālodissam dasseti. **Tathāvidheti** sappadaṭṭhakkhaṇādiḱe tathāvidhe kāle. Tathā tādiso vidho kālo etassāti bahubbīhi. **Seveyyāti** sevanam kareyya, paribhuñjeyyāti vuttam hoti. **Asante kappakāraketi** ettha dubbacopi asamatthopi kappiyakārako asantapakkeyeva tiṭṭhatīti veditabbo. Kālodissattā pana chārikāya asati alladārum rukkhatō chinditvā katum, mattikāya asati bhūmiṃ khaṇitvāpi mattikaṃ gahetum vaṭṭati.

**112. Durūpaciṇṇeti** duṭṭhum upaciṇṇam āmaṭṭham durūpaciṇṇam. Sace bhikkhu appaṭiggahitam sāmisaṃ bhājanam ṭhitaṭṭhānato apanetvā āmasati, pidhānam āmasati, upari ṭhitakacavarādiṃ chaḍḍeti, tatthajātakaphaliniyā sākḥāya vā valliyyā vā gahetvā vā cāleti, durūpaciṇṇam nāma hoti. Tasmim dukkaṅgānti sambandho. Phalarukkham pana apassayitum vā tattha kaṅṅakam vā bandhitum vaṭṭati. Araññe patitaambaphalādiṃ “sāmaṇerassa dassāmī”ti āharitvā dātum vaṭṭati. **Rajokiṇṇeti** rajasā okiṇṇe, tasmim pattādiḱe yaṃ kiṅci paṭiggāṅhato vinayadukkaṅgam hoti attho. Sace piṇḍāya carantassa patte rajam patati, paṭiggahetvā bhikkhā gaṇhitabbā. “Paṭiggahetvā dethā”ti vuttepi ākiranti, hatthato amocenteneva paṭiggāhāpakassa santikam netvā paṭiggahetabbam. Sace mahāvāto tato tato rajam pāteṭi, na sakkā hoti bhikkham gahetum, “anupasampannassa dassāmī”ti suddhacittena ābhogam katvā gaṇhitum vaṭṭati. Tam pana tena dinnam vā vissāsenā vā paṭiggahetvā paribhuñjitum vaṭṭati.

**Athāti** vakkhamānārambhe. **Uggahappaṭiggaheti** uggahitthāti uggaho, uggahitam, tassa paṭiggaho, tasmim. Appaṭiggahitabhāvam jānato attanā eva uggahetvā gahaṇeti adhippāyo. Mātāpitūnam atthāya pana appaṭiggahetvā telādīni, chāyatthāya sākḥādīni vā gahetvā pacchato bhuñjitukāmatāya paṭiggahetvā paribhuñjitum vaṭṭati. Uccuādīsū phālitesu malaṃ na paññāyati, mūlabhesajjādīni pisantānam vā koṭṭentānam vā nisadanisadapotakaudukkhalamusalāni khīyanti, dantantare laggam sukhumaāmisam hoti, raso na paññāyati, abbohārikam. **Antovuttheti** akappiyakuṭiyā chadanabbhantare vuttheti attho. **Sayampakketi** attanā yattha katthaci pakke. Sace vāsīdiṃ tāpetvā takkādīsū pakkhipati, ettāvāpi sāmāpākato na muccati. Purimakālikadvaye punapākañhi ṭhapetvā yaṃ kiṅci āmisam bhikkhuno pacitum na vaṭṭati. Sacepissa uṇhayāgyuā sulasipaṇṇādīni vā siṅgiveram vā pakkhipanti, cāletum na vaṭṭati. Uttaṇḍulam bhattam labhitvā pidahitum na vaṭṭati. **Antopakketi** akappiyakuṭiyā anto pakke. Sabbattha dukkaṅgānti sambandho.

Paṭiggāhaniddesavaṇṇanā niṭṭhitā.

## 10. Akappiyamaṃsaniddesavaṇṇanā

**113-4.** Manussahatthiassānañca ...pe... uragassa ca yaṃ maṃsañca, yaṃ uddissakatamaṃsañca, appaṭivekkhitam yañca maṃsam, tesu maṃsesūti evam yojetvā attho veditabbo. Tattha sīsagīvātaraṅgena carantā acchavisesāva **taracchā**. **Uragassāti** iminā sabbāpi dīghajāti saṅgahitā. **Uddissakatamaṃsanti** bhikkhum uddisitvā katam uddissakatam, tañca tam maṃsañca. Ettha ca **maṃsa**-ggahaṇena macchānampi gahaṇam veditabbam upalakkhaṇavasena, ca-saddena vā. Pañcasupi sahadhammikesu yaṃ kiṅci uddissakatam sabbesampi na kappati, tampi adiṭṭhaasutaaparisaṅkitatāya tikoṭiparisuddham vaṭṭati. **Appaṭivekkhitanti** anupaparikkhitam, anāpucchitanti attho. Āpattibhīrukena hi rūpaṃ sallakkhentenāpi pucchitvā paṭiggahetabbam paribhuñjitabbāñca. Manussānam maṃsesu thullaccayanti yojanā. Thūlo accayo etthāti rasse, dvitte ca **thullaccayam**. Pārājikasāṅghādisesehi ṭhapetvā ito adhikam vajjam natthi. **Sesesūti** avasesesu ekādasasu.

**115.** Idāni manussādīnam aṭṭhiādīnipi akappiyānīti dassetum “**aṭṭhipī**”tiādīmāha. **Pi**-saddo “lohita”ntiādīsūpi anuvattetabbo. **Esanti** manussādīnam dasannam. Vasāsu pana ekā manussavasā na vaṭṭati. Khīrādīsū akappiyam nāma natthi. Uddissakatāmyeva sacittakanti yojanā. **Sacittakanti** uddissakatabhāvajānanacittena saha vattatīti sacittakam. Vatthuvītikamavijānanacittena hi sacittakattam. Ettha ca sacittakattam āpattiyā eva, na ca maṃsassa, tathāpi maṃsasīsena āpatti eva vuttatī viññātabbanti.



Akappiyamaṃsaniddesavaṇṇanā niṭṭhitā.

## 11. Nissaggiyaniddesavaṇṇanā

**116-7.** Rūpiyena arūpiyaṃ rūpiyañca itarena rūpiyañca parivatteyyāti sambandho. Tattha **rūpiyenāti** rūpiyasankhātena nissaggiyavatthunā. **Arūpiyanti** arūpiyasankhātaṃ dukkaṭavatthum kappiyavatthuñca. **Itarenāti** arūpiyena. **Nissaggi**ti nissajjanaṃ nissaggo, pubbhāge kattabbassa vinayakammassetam nāmaṃ. Nissaggo assa atthīti nissaggi, kiṃ taṃ? Pācittiyaṃ. Rūpiyassa mūlaggaḥaṇe pana rūpiyappaṭiggahaṇasikkhāpadena nissaggiyaṃ pācittiyaṃ.

Idāni rūpiyādiṃ dassetum “**idhā**”tiādi āradhā. Tattha kahā...pe... māsakaṃ idha rūpiyanti sambandho. Tattha **kahāpaṇo** nāma suvaṇṇamayo vā rajatamayo vā etarahi pakatikahāpaṇo vā. **Sajjhūti** rajataṃ. **Siṅgīti** suvaṇṇabhedo, tathāpi cettha sāmāññaena suvaṇṇamadhippetaṃ. **Vohārūpagamāsakanti** vohāraṃ kayavikkayaṃ upagacchatīti vohārūpagam, tañca taṃ māsakañca. Taṃ pana samuṭṭhāpitarūpañca asamuṭṭhāpitarūpañca lohadāruādimaṃ vuccati. **Idha rūpiyanti** imasmiṃ sikkhāpade rūpiyaṃ nāmāti attho. Vatthamuttādi kappam dukkaṭavatthuñca itaranti yojanā. Tattha vatthañca muttā ca ādi yassāti samāso. **Ādi**-saddo paccekaṃ yojetabbo “vatthādi muttādi”ti. Tattha paṭhamena **ādi**-saddena kappāsasuttāparaṇṇādikam yaṃ kiñci kappiyavatthum, dutiyena maṇi saṅkho silā pavāḷam lohitaṅko masāragallam sattadhaññaṇi dāsīdāsakhattavatthupupphārāmaphalārāmādayoti idaṃ dukkaṭavatthum saṅgaṇhāti. Vatthādikappiyavatthum, muttādidukkaṭavatthuñca itaram aññaṃ arūpiyaṃ nāmāti attho.

**118.** Ettāvata rūpiyaṃvohāraṃ dassetvā idāni kappiyabhaṇḍe kayavikkayaṃ dassetumāha “**ima**”tiādi. Tattha “imaṃ gahetvā imaṃ dehi, imaṃ kara, imaṃ ānaya”ti vā “imaṃ bhutvā imaṃ dehi, imaṃ kara, imaṃ ānaya”ti vā “imaṃ demi, imaṃ dehi, imaṃ kara, imaṃ ānaya”ti vā kayavikkaye samāpanne nissaggiṃ yojanā. Tattha **imanti** taṇḍulādiṃ. **Bhutvāti** odanādiṃ bhuñjitvā. **Imaṃ dehīti** etaṃ vatthādikam dehi. **Imaṃ karāti** etaṃ rajanapacanādiṃ karohi. **Imaṃ ānaya**ti etaṃ rajanakatthādiṃ ānehi. **Imaṃ demīti** etaṃ vatthādikam tava demi. **Samāpanneti** kate. Tasmā kappiyaṃ bhaṇḍam parivattentena aññaṭakehi saddhiṃ “imaṃ dehī”ti vadato viññatti, “imaṃ gaṇhāhi”ti vadato saddhādeyyavinipātaṃ, “iminā imaṃ dehī”ti vadato kayavikkayanti vuttā tisso āpattiyo. Mātāpitūhi pana saddhiṃ kayavikkayamattaṃ mocentena parivattetabbaṃ. Ayañhi kayavikkayo ṭhapetvā pañcasahadhammike avasesehi ghipabbajitehi na vaṭṭati. Sace pana navakammāni kāreti, atthakathāpamāṇena pācittiyamattaṃ desetabbaṃ.

**119-120.** Idāni pariṇāmanavasena āpattibhedam dassetum “**attano**”tiādi āradhā. Tatthāyaṃ piṇḍattho – saṅghassa nataṃ lābham attano pariṇāmeyya, nissaggi. Aññaṭo puggalassa pariṇāmeyya, pācitti. Aññaṭassa saṅghassa vā cetiyassa vā pariṇāmeyya, dukkaṭam. Aññaṭassa puggalassa vā cetiyassa vā nataṃ lābham attano vā saṅghassa vā aññaṭapuggalassa vā aññaṭacetiyaṃ vā pariṇāmeyya, dukkaṭanti yojanā. Tattha **natanti** kāyena vā vacasā vā ninnam kataṃ. **Lābhanti** labhitabbaṃ cīvarādi. **Aññaṭo** aññaṭasmiṃ puggale vā cetiye vā, cetiye pana dukkaṭam. **Aññaṭassāti** cetiyādino antamaso sunakhassa. **Aññaṭo vāti** cetiyādimhi vā. **Saṅghassāti** pana idaṃ kākakkhigolakaññaṇyena “nataṃ pariṇāmeyyā”ti ubhayattha parivattati. Nissattham sakasaññaṇyena na dadeyya vā, dukkaṭanti sambandho. **Aññaṭhā** aññaṇa pakārena, theyyasaññaṇyena na dadeyya ceti vuttaṃ hoti. **Itaranti** vatthuvaseṇa aññaṃ pārājikam thullaccayaṃ dukkaṭaṇca hotīti attho.

Nissaggiyaniddesavaṇṇanā niṭṭhitā.

## 12. Pācittyaniddesavaṇṇanā

**121. Musā ...pe... haraṇeti** nimittatthe bhummavacanam, tassa “pācitti vuttā”ti iminā sambandho. Evaṃ sabbattha. **Musāvādeti** nipātena saddhiṃ tappuriso. Pubbepi jānitvā vacanakkhaṇepi

jānantassa musābhaṇananimittanti attho. **Bhaṇanañca** nāma idha abhūtaṣṣa vā bhūtaṣṣa, bhūtaṣṣa vā abhūtaṣṣa katvā kāyena vā vācāya vā viññāpanappayogo. Pārājikasāṅghādisesācāravipattiyo amūlikāya codentassa yathākkamaṃ saṅghādisesapācittiyadukkaṭṭāni. Anupadhāretvā sahasā bhaṇantassa, “aññaṃ bhaṇissāmī”ti aññaṃ bhaṇantassa yassa bhaṇati, so na suṇāti, tassa ca anāpatti.

Omasati amanāpatāya kaṇṇesu vijjhati viya etena, omasati vāti **omaso**, so cāyaṃ vādo, tasmim. Dīgho pana gāthābandhavasena. Evaṃ sabbattha. Hīnukkaṭṭhesu ca jātināmagottavayakammasippaābādhalīṅgakilesaāpattiakkosasaṅkhātesu dasasu bhūtena vā abhūtena vā “khattiyosi, caṇḍālosī”tiādinā kāyena vā vācāya vā anaññāpadesena bhikkhuno khumsetukāmatāya akkosavacāneti attho. “Santi idhekacce caṇḍālā”tiādinā aññāpadesena vā “corosi, vikārīsi, mātughātakosī”tiādīhi pālimuttapadehi vā bhikkhussa, yathā vā tathā vā anupasaṃpannaṃ, parammukhā pana sabbampi akkosantassa dukkaṭṭaṃ. Kevalaṃ davakamyatāya vadato pana sabbattha dubbhāsitaṃ.

**Pesuññaharaṇeti** piṣuṇassa bhāvo pesuññaṃ. Attano piyakamyatāya vā parassa paresu bhedaḍhippāyena vā jātiādīhi omasantassa bhikkhuno vacanaṃ sutvā bhikkhussa tassa pesuññaṣṣa haraṇe. Anupasaṃpannaṣṣa haraṇe dukkaṭṭaṃ. Padaṃ padaṃ **padaso**, vicchāyaṃ so, koṭṭhāsenā koṭṭhāsenāti attho. Saṅgītittayāruḷho tipīṭakadhammo, anāruḷho ca rājovādādiko **dhammo** nāma, tena saha padasoti nipātaṣṣa tatiyāṭappuriso. **Padasodhammeti** ekakkharādinā koṭṭhāsenā koṭṭhāsenā anupasaṃpannaṣṣa saddhiṃ yathāvuttadhammabhaṇaneti attho. Padasodhammabhaṇanañhi padasodhamma-saddena upacārena vuttaṃ. Anupasaṃpannaṣṣa saddhiṃ ekato uddesaggaḥaṇe sajjhāyakaṇṇe, taṃsantike uddesaggaḥaṇādike ca tena saddhiṃ ekato yebhuyyena paṇuṇaṃ ganthaṃ bhaṇantassa osārentassa khalitaṭṭhāne “evaṃ bhaṇāhī”ti ekato bhaṇantassaṣṣa anāpatti.

Antamaso vatthādinā yena kenaci sabbacchannaṃ chadanaṃ anāhacca diyaḍḍhahatthubbedhenāpi sabbaparicchinnaṃ yebhuyyenachannaṃ yebhuyyenaparicchinnañca senāsaṃaṃ agāraṇti adhippettaṃ. Tatraṭṭho pana bhikkhuṃ ṭhapetvā antamaso pārājikavatthubhūto tiracchānagatopi antamaso tadahujātā itthīpi upacārato agāra-saddena vuccati. Saha agārenāti **sāgāro**, bhikkhu. Upacāreṇeva ca pana anupasaṃpannaṣṣa, mātugāmena ca saha seyyakappaṇaṃ sāgārabhāvo nāmāti gahetabbaṃ. Saṅghasammataṃ senāsaṃapaññāpakādibhedamaṃ upasaṃpannaṃ ayasakāmā hutvā bhikkhūhi yena ca ujjhāpentī avajānāpentī avaññāya olokāpentī, lāmakato vā cintāpentī, taṃ vacanaṃ **ujjhāpanakaṃ**. Yena khīyanti sabbattha tassa avaññaṃ pakāsentī, taṃ **khīyanaṃ**.

**122. Talanti** hatthatalamadhippettaṃ. Taggaḥaṇena pana kāyova talaṃ. **Sattīti** kāyappaṭibaddhā satti āvudhaviseso, upalakkhaṇattā pana sabbampi kāyappaṭibaddhaṃ satti. Talañca satti ca **talasatti**. Idha pana kopena bhikkhussa talasattiuggiraṇaṃ talasatti. Sace pana viraddho pahāraṃ detī, na paharītukāmatāya dinnattā dukkaṭṭaṃ, paharītukāmatāya pācittiyaṃ, anupasaṃpannaṣṣa dukkaṭṭaṃ, mokkhāḍhippāyassa anāpatti.

Paññattena vadato upasaṃpannaṣṣa vā tena vuccamānadhammaṣṣa vā anādarakaṇṇaṃ **anādaro**. Anupasaṃpannaṣṣa tena vuccamānaṣṣa vā upasaṃpannaṣṣa, pareṇa vā apaññattena vā vuccamānaṣṣa anādare dukkaṭṭaṃ.

“Īnavasso tvaṃ maññe”tiādinā bhikkhuno kukkuccassa uppādanaṃ anupasaṃpannaṣṣa dukkaṭṭaṃ.

**Anāpucchā gāmapavesaneti** pakativacānena pucchitumanurūpaṃ antoupacārasīmāya dassanūpacāre bhikkhuṃ disvā “vikāle gāmapavesanaṃ āpucchāmī”ti anāpucchitvā vikāle gāmapavesane. Dīgho pana sandhivasena. Āpadāsu anāpatti.

**Paramparabhojaneti** paro ca paro ca paramparā ma-kāro sandhivasena, tasmā paramparā

uppattavisayaapādānavacanāṃ, parato parato laddhā bhuñjaneti attho. Ayamettha adhippāyo – pañcahi bhojanehi nāmaṃ gahetvā nimantitassa yena yena paṭhamāṃ nimantito, tassa tassa bhojanato uppaṭṭipāṭiyā, “mayhaṃ bhattapaccāsaṃ tuyhaṃ dammi”ti vā “vikappemī”ti vā ādinā sammukhā vā parammukhā vā avikkappetvā vā aññato aññato pañcabhojanādīni laddhā bhuñjamāneti. Gilānacīvaradānacīvarakārasamaye anāpatti.

**123.** Seyyaṃ senāsanāni vā anuddharitvā gamaneti sambandho. **Vā**-saddo samuccaye. Tattha “bhisī cimilikā uttarattharaṇaṃ bhūmattharaṇaṃ taṭṭikā cammakkaṇḍo nisīdanāṃ paccattharaṇaṃ tiṇasanthāro paṇṇasanthāro”ti (pāci. 116) vuttāsu dasasu seyyāsu ekampi attano vassaggane gahetvā saṅghike sabbappaṭicchane gutte senāsane santharitvā vā santharāpetvā vā yathā ṭhapitaṃ upacikādīhi na khajjati, tathā ṭhapanavasena anuddharitvā parikkhittassa ārāmassa parikkhepaṃ, aparikkhittassa upacāraṃ atikkamitvā gamane ca, tathā mañcapīṭṭhatisikocchasaṅkhātāni senāsanāni vassakāle ajjhokāse santharitvā vā santharāpetvā vā anupasampannena anuddharitvā thāmamajjhimassa purisassa leḍḍupātaṃ atikkamitvā gamane cāti attho. Yathāvuttato pana aññattha dukkaṭaṃ.

**Itthiyā addhānagamāneti** “gacchāma bhagini, gacchāma ayyā”ti aññamaññaṃ saṃvidahitvā “ajja vā sve vā”tiādīnā niyamitakālavisaṅketāṃ akatvāpi dvāravisaṅketāṃ maggavisaṅketāṃ katvāpi itthiyā saddhiṃ addhānamaggagamāneti attho.

**Ekekāya nisīdaneti** ekena ekāti ekekā, tassā nisajjāyāti attho. Ekena saha ekissā nisajjāṃ vinā ekāya saha ekassa nisajjāṃ nāma natthīti ekāya saha ekassa nisajjāyaṃ sati nisinnassa bhikkhuno pācittiyanti adhippāyo. “Ekāyekanisīdane”ti vā pāṭho.

**124.** Rūpādīnaṃ upasaṃhārena, bhayānakakathākathanena vā upasampannassa **bhimsāpane**. Anupasampannassa dukkaṭaṃ.

**Ākoṭane** upasampannassa antamaso uppalapattenāpi pahāradāne. Anupasampannassa antamaso tiracchānagatassapi dukkaṭaṃ. Mokkhādhippāyassa anāpatti.

Saṅghamajjhe vinayadharena anuyuññiyamānassa pucchitato aññassa vādo aññena aññaṃ paṭicāraṇaṃ **aññavādo**. Tatheva pucchiyamānassa akathetukāmatāya vihesanaṃ tuṇhībhāvo **vihesā**. Aññavādakassa vihesakassa ca ñattidutiyakammena aññavādakavihesakakamme kate puna aññavāde vihesāya pācittiyāṃ. Anāropite pana kamme dukkaṭaṃ. Kiñci vītikkamaṃ disvā “āvuso, idaṃ nāma tayā kata”nti vutte taṃ na kathetukāmo tuṇhībhūto saṅghaṃ vihesetīti **vihesako**. Anācāraṃ ācaritvā saṅghamajjhe āpattiyā, vatthunā vā anuyuññiyamāne taṃ akathetukāmo “ko āpanno, kismiṃ āpanno”tiādīnā nayena aññehi vacanehi taṃ vacanaṃ paṭicchādento yo aññaṃ vadati, ayaṃ **aññavādako** nāma.

**Duṭṭhullaṃ** nāma pārājikasāṅghādisesā, idha pana saṅghādisesova. Pakāso ca chādo ca **pakāsachādo**, duṭṭhullaṃ pakāsachādoti tappuriso. Abhiñhāpattikassa bhikkhuno āyatim saṃvaratthāya āpattipariyaṇaṃ kulapariyaṇaṃ katvā vā akatvā vā tikkhattuṃ apaloketvā kātabbaṃ. Bhikkhusammutim ṭhapetvā anupasampannassa “ayaṃ asuciṃ mocetvā saṅghādisesaṃ āpanno”tiādīnā nayena vatthunā saddhiṃ āpattim ghaṭetvā tassa duṭṭhullaṃ pakāsane ārocane ca, tasseva yena kenaci upāyena ñatvā chādane ca, aduṭṭhullārocane chādane ca, anupasampannassa pana purimapañcamasikkhāpade itarā duṭṭhullepi dukkaṭaṃ.

**Hāsodaketi** ettha hāse udaketi padavibhāgo veditabbo. Yena kenaci sarīrāvayavena hasādhippāyassa upakacchakādīsu hāse phusane. Hāsanimittañhi phusanaṃ hāso. Anupasampanne dukkaṭaṃ. **Udake hāseti** uparigoppake udake hasādhippāyassa ummujjananimujjanena kīlāya. Kīlā hi idha hāsoti vutto. Nāvāya kīlato, hatthādīnā kaṭṭhādīnā vā udakaṃ hanato antamaso bhājanagatakañjikādīnīpi khipanakīlāya kīlato dukkaṭaṃ. Ahasādhippāyassa anāpatti.

**Nicchubhane viharā**ti saṅghikavihārato bhikkhuno nikkadḍhananikkadḍhāpane. Ettha ca ekappayoge ekā, nānāpayoge dvāragāṇanāya āpattiyo. Puggalikanikkadḍhane, tassa parikkhāranikkadḍhane, anupasampannassa pana tassa parikkhārassa vā nikkadḍhane dukkaṭaṃ. Na sammāvattantānaṃ antevāsikasaddhivihārikānaṃ vā nikkadḍhane, attano vissāsikassa viharā nikkadḍhane, bhaṇḍanakāraḥassa pana sakalasaṅghārāmato nikkadḍhane anāpatti.

**Anupakhajja sayaneti** “vuḍḍho, gilāno, saṅghena dinno”ti jānitvā mañcapīṭhānaṃ vā tassa bhikkhuno pavasantassa vā nikkhamantassa vā upacāraṃ anupakhajja anupavisitvā saṅghike vihare “yassa sambādho bhavissati, so pakkamissati”ti adhippāyena nisīdananisajjanavasena sayane. Puggalike dukkaṭaṃ.

Ettha ca **pācittī**ti uddisitvā kānici pasiddhāni dassitāni. Avuttāni pana tādisāni imināva sāmāññavacanena saṅgahetvā veditabbāni. Kathaṃ? Acelakādiaññatitthiyānaṃ yassa kassaci āmisassa sahatthā dāne ca, sappinavanītatelamadhuphāṇitamacchamaṃsakhīradadhisaṅkhātānaṃ paṇītabhojanānaṃ attano atthāya viññāpetvā bhuñjane, rāgapariyuṭṭhitaitthipurisassa yogge kule anupavisitvā nisajjanakappane, pañcannaṃ bhojanānaṃ aññatarena nimantito tasmim bhutte vā abhutte vā santaṃ bhikkhuṃ anāpucchitvā purebhattaṃ pacchābhattaṃ vā yasmim kule nimantito, tato gilānacīvaradānakārasamayāṃ ṭhapetvā aññasmim aññakulappavesane, ṭhapetvā ekadivasāṃ aññasmim dine āvasathapiṇḍassa agilānena hutvā bhuñjane, rattiparicchedaṃ vā bhesajjaparicchedaṃ vā katvā pavāritato uttari aññatra puna pavāraṇāya aññatra niccappavāraṇāya viññāpane, aññatra tathārūpapaccayā gāmato nikkhantasenādassanāya gamane, paccayenapi gantvā tirattato uttari senāya vāse, tassa ca vasantassa yuddhaṭṭhānabalagaṇaṭṭhānasenānivesaanīkadassanattamaṃ gamane, piṭṭhādīhi katamajjasaṅkhātāsurāya, pupphādīhi kataāsavaṅkhātamerayassa ca pāne, padīpujjalapattapacanādīkāraṇaṃ vinā visibbitukāmatāya agilānassa aggino jālanajālāpane, kappabindumaṃ anādāya navacīvaraparibhoge, sāmamaṃ cīvaraṃ vikappetvā apaccuddhāya paribhoge, bhikkhusantakapattādino antamaso hasādhippāyenapi apanidhāne apanidhāpane, sañcicca tiracchānagatassa jīvitavoropane, sañcicca yathādhammaṃ nihatādīhikaraṇassa punakammāya ukkoṭane, sañcicca theyyasatthena saddhimaṃ saṃvidhāya ekaddhānagamane, bhikkhūhi sikkhāpadehi vuccamānassa aññaṃ avicāretvā “na tattha sikkhissāmi”ti bhaṇane, sikkhāpadavivaṇṇane, imesaṃ “sutvā oramissāmi”ti adhippāyaṃ vinā vivādāpannānaṃ upassutiṭṭhāne, dhammikānaṃ kammānaṃ chandaṃ datvā pacchā khīyanadhammāpajjane, saṅghe vinicchaye vattamāne chandaṃ adatvā pakkamane, samaggena saṅghena cīvaraṃ datvā pacchā khīyanadhammāpajjane, aññatra ajjhārāmā ajjhāvasathā vā ratanassa vā ratanasammatassa vā uggaṇhanauggahāpane pācittiyanti.

Pācittiyāniddesavaṇṇanā niṭṭhitā.

### 13. Samaṇakappaniddesavaṇṇanā

**125. Samaṇakappā**ti samaṇavohārā. Bhavanti, ahesunti vā bhūtā, vattamāne, bhūte vā tappaccayo. Viruḷhamūlādibhāvaṃ āpajjitvā vaḍḍhamānakānaṃ, vaḍḍhitvā mahantabhāvaṃ pattānañca rukkhalatādīsaṅkhātānaṃ bhūtānaṃ gāmo, bhūtā eva vā gāmo samūho **bhūtagāmo**. Tassa samārambho chedanaphālanādi, tasmim. Nimittatthe cetamaṃ bhummaṃ, taṃhetu pācittiyaṃ hotīti attho. Katakappiyaṃ samaṇakappiyaṃ bhaveti sambandho. Tattha kataṃ kappiyaṃ yassāti bahubbīhi. Kenāti āha “**nakhenā**”tiādi.

**126.** Idāni yassa samārambho, taṃ bhūtagāmaṃ vibhajitvā dassetuṃ “**sa mūlā**”tiādi āraddhaṃ. **Soti** bhūtagāmo. Bhavitumaṃ uppajjitumaṃ payojetīti kārītāntā tappaccayo, pabhāvito uppādītōti attho. Atha vā pabhavanaṃ pabhavo, uppatti, sova pabhavo, pabhāvaṃ karotīti nāmadhātuto kattari tappaccayo, pabhāvito uppannoti attho. Mūlañca khandho ca bījañca aggañca phaḷu ca mūla...pe... phaḷūni. **Phaḷu** nāma pabbaṃ. Tāniyeva bījāni, tehi pabhāvito uppādīto, atha vā tehi avadhibhūtehi, kāraṇabhūtehi vā pabhāvito uppannoti kamena vikappadvaye samāsadvayaṃ veditabbaṃ. Tattha **mūlabījaṃ** nāma

haliddisingiverādi.

**Khandhabījaṃ** nāma assatthanigrodhādi. **Bijabījaṃ** nāma pubbaṅṅāparāṅṅādi. **Aggabījaṃ** nāma hiriverādi. **Phaḷubījaṃ** nāma ucchunaḷādi. Tattha mūlabījādīni pañca bījagāmo. Tannibbatto rukkhalatādi bhūtagāmo.

Idāni tesu bījagāmasamārambhe dukkaṭaṃ dasseti aparaddhena. Bhūtagāmaviyojitaṃ bījaṃ ārambhe dukkaṭanti sambandho. Bhūtagāmato viyojitaṃ tappuriso. **Bījanti** bhūmiyaṃ ropitamaropitampi niggatavidatthimattapattavaṭṭipi mūlabījāni. “Ārambhe”ti kitakapaccayassa yoge avutte kammani chaṭṭhuppattiyaṃ vikappena ubhayattha dutiyā. **Ārambheti** samārambhe. Tasmā “imaṃ pupphaṃ phalaṃ vā jāna, imaṃ kappiyaṃ karohī”tiādīnā kappiyavacanena bhūtagāmato viyojitaṃ bījajātaṃ bījagāmaparimocanattaṃ puna kappiyaṃ kārāpetvā paribhuñjibhabbaṃ. “Anujānāmi, bhikkhave, pañcahi samaṇakappehi phalaṃ paribhuñjituṃ aggiparijitaṃ satthaparijitaṃ nakhaparijitaṃ abījaṃ nibbattabījaññeva pañcama”nti (cūḷava. 250) vuttesu pañcasu nakhaparijitaḍḍīni tīṇi dassitāni.

**127.** Idāni avasiṭṭhāni dve dassetuṃ “**nibbattabīja**”ntiādikaṃ paṭhamaddhaṃ āha. Tattha **nibbattabījanti** nibbattaniyanti nibbattaṃ, nipubba vatu vattanetimasmā tappaccayo, nibbattaṃ bījaṃ yassa taṃ nibbattabījaṃ, bījaṃ nibbattetvā visuṃ katvā paribhuñjitabbaṃ ambapanasādi. **Nobījaṃ** nāma taruṇambaphalādi. Idāni bījagāmahūtagāmesu kappiyakaraṇappakārādivisesaṃ dassento “**kaṭāhā**”tiādīmāha. Tattha kaṭāhena baddhaṃ bījaṃ yesanti bāhirattho.

**128.** Bhājane bhūmiyampi vā ekābaddhesu bījesu ekasmiñca kappiye kateti yojanā. **Bījesūti** bījagāmahūtagāmesu. Bhūtagāmopi hi idha “bīja”nti ruḷhīvasena vuccati.

**129.** Nikkhitteti ṭhapite. **Kappiyaṃ puna kareyyāti** jātamūlapaṅṅabhāvato bhūtagāmattā bhūtagāmato parimocitaṃ bījagāmaparimocanattaṃ puna kappiyaṃ kareyyāti attho. Tenāha “**bhūtagāmo hi so tadā**”ti. **Hi**-saddo hetumhi. **Tadāti** mūle ca paṅṅe ca jātakāle sace mūlamattaṃ sañjāyati, uparibhāge sace aṅkuro jāyati, heṭṭhābhāge chindituṃ vaṭṭati. Mūlamattesu vā pana paṅṅamattesu vā niggatesu sacepi ratanappamaṅṅāpi sākā nikkhamanti, bījagāmasaṅgahitā honti.

**130.** Udakasambhavo sevālo ca cetiyādīsu sevālo ca bhūtagāmavāti sambandho. **Ādi**-saddena pākārādiggaṇaṃ. Yadi dve tīṇi paṅṅāni na jāyanti, aggabījasaṅgahaṃ gacchati. Sukkho pana sammajjitabbo. Mūlapaṅṅe viniggate bījopi bhūtagāmavāti sambandho. **Paṅṅeti** iminā aṅkuramattaṃ paṭikkhipati.

**131.** Ghaṭādipiṭṭhe sevālo ca ahichattakamakuḷaṅṅa dukkaṭasseva vatthūnīti sambandho. **Piṭṭheti** iminā anto abbohārikoti dasseti. **Phullanti** phullitaṃ ahichattakaṃ. **Abyavahārikanti** āpattivohārayoggaṃ na hotīti attho.

**132.** Allarukkhe lākhāniyyāsachattāni vikopiya gaṇhato tattha akkharaṃ chindato vāpi pācittīti sambandho. **Tatthāti** allarukkhe. “Vikopaya”nti potthakesu pāṭho dissati, so apāṭho paṭhamantatāya kāraṇābhāvato. “Vikopiya”ti pana pāṭho gahetabbo. **Vikopiyaṃ**ti iminā avikopetvā gahaṇe anāpatṭīti dīpeti.

**133.** **Dārumakkaṭakādīnāti** āṇiṃ koṭṭetvā dāruyantaṃ katvā tattha kaṅṅakaṃ olambenti, etaṃ dārumakkaṭakaṃ nāma. **Ādi**-saddena kaṅṅakabandhanādīnaṃ gahaṇaṃ. Tiṇādīṃ chindituṃ, gaṅṅhikaṃ kātuṅca na kappatīti yojanā. **Chinditunti** chindanaṃ.

**134.** **Bhūtagāmaṃ vāti** bhūtagāmaṃ vā. **Bījaṃ vāti** bījagāmaṃ vā. “Chinda vā”tiādīnā sabbattha vā-saddo yojetabbo. **Paca vāti** pacanaṃ karohīti vā. “Paṭa”iti vā pāṭho, tassa uppādehīti attho. “Imaṃ

rukkhaṃ chindāhī”tiādinā pana avatvā “rukkhaṃ chindā”tiādinā aniyametvā vattum vaṭṭati.

**135. Imanti** etaṃ rukkhaḍḍiṃ. **Imaṃ sodhehī**ti ettha iti-saddaṃ katvā attho vattabboti.

Samaṇakappaniddesavaṇṇanā niṭṭhitā.

#### 14. Bhūminiddesavaṇṇanā

**136.** Yāsu vutthaṃ pakkañca kappati, tā kappiyā bhūmiyo sammuti ca sammutikuṭi ca...pe... gahapati ca gahapatikuṭi cāti imā catasso hontīti yojetvā attho veditabbo. Tattha **bhesajjakkhandhake** (mahāva. 295) vuttāya uttidutiyakammavācāya, apalokanakammavasena vā sāvetvā sammā uttisampannaṃ karīyatīti **sammuti**, thambhānaṃ bhittipādānaṃ vā uggamaṇaṃ uddhaṃ katvā ṭhapanāṃ, “kappiyakuṭiṃ karomā”ti vācāya sāvanañca antaṃ yassā sā **ussāvanantā**. Tathā ca vuttaṃ “thambhappatiṭṭhānañca vacanapariyosānañca samakālaṃ vaṭṭatī”ti (mahāva. aṭṭha. 295). Nisādanaṃ pavisaṇaṃ sannivesanaṃ nisādo, gunnaṃ viya nisādo etissāti **gonisādi**. Bhikkhuṃ ṭhāpetvā sesasahadhammikā sabbe ca devamanussā idha **gahapatī**ti sāmāññena adhippetā. Ettha pana gahapatisambandhinī kuṭi dīghena gahapatī.

“Yaṃ pana akappiyabhūmiyaṃ sahaseyyappahonake gehe vuttha”nti (mahāva. aṭṭha. 295) **aṭṭhakathā**vacanato yaṃ saṅgho ākañkhati vihāraṃ vā aḍḍhayogaṃ vā pāsādaṃ vā hammiyaṃ vā guhaṃ vā leṇādiṃ vā, tesampi sāmāññavacanaṃ viññāyatīti taṃtaṃlakkaṇappattā sahaseyyappahonakā leṇādayo catūsveva kuṭisu antogadhāti veditabbaṃ. Imāsu catūsu sahaseyyappahonake padese yaṃ saṅghikaṃ puggalikaṃ vā bhikkhusantakaṃ ekarattampi antovutthaṃ anupasampannaṃ pakkañca yāvakaḷikaṃ yāmakālikaṃ antovutthaantopakasañkhaṃ na gacchati, ko pana vādo itaradvaye. Taṃ pana akappiyabhūmiyampi vutthaṃ pakkañca vaṭṭati. Tena vuttaṃ “**yāsu vutthaṃ pakkañca kappatī**”ti.

**137.** Vāsattāya kate saṅghike vā ekasantake vā sahaseyyappahonake gehe kappiyakuṭi laddhabbāti sambandho. Tattha **vāsattāyā**ti iminā avāsattāya kataṃ nivatteti. **Ekasantaketi** ekassa bhikkhuno santake. **Kappiyakuṭī**ti bhāvappadhānoyaṃ niddeso, na hi gehe gehaṃ laddhuṃ yujjatīti kappiyakuṭitāti attho. Dīgho pana gāthāvasena, kappiyā kuṭitāti vā visesanavasena daṭṭhabbaṃ. **Sahaseyyappahonaketi** ettha sahaseyyappahonakaṃ vāsāgāralakkaṇe vuttalakkaṇaṃ senāsaṇaṃ.

**138.** Idāni tā kuṭiyo kamena dassetvā tattha paṭipajjitabbavidhiṃ, tāsāṃ sabbathāpagamañca dassetuṃ “**gehe**”tiādimāha. Tattha “kappiyakuṭiṃ karoma, kappiyakuṭiṃ karomā”ti evamīrayanti sambandho. Iṭṭhakā ca thambhā ca “iṭṭhakāthambhā”ti vattabbe rasso. Iṭṭhakathambhā ādi yassa bhittipāsādassāti bahubbhīhi. Pacchā paṭhamasaddena kammadhārayo. “Ṭhāpeyya ce, sā ussāvanantikā”ti evaṃ ce-sā-sadde yojetvā attho veditabbo.

**139.** Sakalo aparikkhitto ārāmopi vāti sambandho. Senāsaṇaṃ parikkhittaṃ vā hotu, aparikkhittaṃ vā, na taṃ pamāṇaṃ.

**140.** Aññehi kappiyakuṭiyā atthāya dinno vā tesāṃ santako vāti yojanā.

**141.** Avirodhabhāvena kappanīyā kappā, kappa sāmattihiyamiccetaṃ itthiyaṃ āpaccaye rūpaṃ, na kappā akappā, akappā ca sā kuṭi ceti **akappakuṭi**, tāya. **Sappiādī**ti iminā sattāhakālikaṃ yāvajīvikaṇca gahitaṃ.

**142. Tehevāti** akappakuṭiyaṃ vutthasappiādīhi eva saddhiṃ sattāhakālikasaṃsaṭṭhatāya “**sattāhaṃ kappate**”ti vuttaṃ. **Sāmiseti** āmisasañkhātena purimadvayena sahite. **Sāmapākatāti**

sāmaṃ attanā pāko etassāti sāmāpākaṃ, sattāhakālikena saha pakkaṃ sāmisaṃ yāvajjivikaṃ, tassa bhāvo sāmāpākatā. Sayam pakkaṃ taṃ attanā saṃsaṭṭhatāya tampi āmisaṃ sāmāpākagatikaṃ karotīti tassa sāmāpākatā hotīti adhippāyo.

**143. Adhiṭṭhitāti patiṭṭhitā.** Eva-saddo tiṭṭhatisaddassa ante daṭṭhabbo.

**144. Sabbesūti** thambhādīsu sakalesu. Jahitaṃ vatthu kuṭibhūmi yassā **jahitavatthukā**. Parikkhitte jahitavatthukāti sambandho. **Sesāti** itarā dve kuṭiyō. **Chadanavibbhamāti** chadanassa vināsā. Etthāpi ‘‘jahitavatthukā’’ti ānetabbanti.

Bhūminiddesavaṇṇanā niṭṭhitā.

## 15. Upajjhācariyavattaniddesavaṇṇanā

**145.** ‘‘Idaṃ tayā dukkataṃ, dubbhāsita’’ntiādīni vatvā codanato, attano vajjaṃ assarantassa satuppādavasena sārānato, sammā paṭipattiyam sārānato pavattāpanato vā vajjāvajjaṃ upanijjhāyati bhusam cintetīti upajjhā. Upajjhā eva upajjhāyo. ‘‘Evaṃ tayā buddhavacanaṃ sajjhāyitabbaṃ, evaṃ atikkamitabbaṃ, evaṃ paṭikkamitabba’’ntiādīnā ācārasikkhāpane ācarati pavattatīti ācariyo. So ca nissayapabbajjāupasampadādhammācariyavasena catubbidho. Upajjhā ca ācariyo ca **upajjhācariyā**, te. **Nissāya vasamānoti** iminā nissayapabbajjāupasampadādhammantevāsikesu yo nissāya vasati, taṃ dasseti. Catūsu hi tesu nissayantevāsikena yāva ācariyam nissāya vasati, tāvasabbaṃ ācariyavattaṃ kātābbaṃ, netarehi. Itarehi, nissayamuttakehipi yāva cīvararajanaṃ, tāva ca arativinodanādikañca vattaṃ kātābbaṃ. Anāpucchitvā pattacīvaradānādīmhi pana etesaṃ anāpatti. Saddhivihārikassa pana upajjhāyānaṃ yāva cīvararajanaṃ, tāva ca arativinodanādikañca akarontassa nissayamuttakassāpi amuttakassāpi āpattiyeva. Ekaccassa pattadānādito paṭṭhāya amuttanissayasseva āpatti. Tesu majjhe dve ācariyassa yāvajjivam bhārā. Itare pana yāva samīpe vasanti, tāvadeva, tasmā ācariyenāpi tesu sammā vattitabbaṃ, upajjhāyena saddhivihārikesu vattabbameva natthi. **Supesaloti** piyam sīlamassāti pesalo, vuddhi, ya-lopena ī-kārassa attakaraṇena, suṭṭhu pesalo supesalo, sikkhākāmoti attho. ‘‘**Dantakaṭṭha**’’ntiādī ‘‘dade’’timassa kammaṃ. **Dadeti** sammā ādarena yathādhippāyam dadeyyāti attho. **Kāleti** tadanurūpe kāle.

**146.** Patte ca...pe... cīvare ca vattaṃ careti sambandho. **Careti** kareyya. Tattha nīcam katvā sādhucaṃ aparighaṃsantena dhovanaṃ, muhuttaṃ uṇhe otāpanaṃ, ṭhapanatṭhānaṃ upaparikkhitvā cammādinā kenaci antarahitāya nikkhipanaṃ **patte vattaṃ**. Gāmaṃ pavisantānaṃ nivāsanakāyabandhanasaṅghāṭidānaṃ, dhovitvā sodakapattassa dānaṃ **gāmappavese vattaṃ**. Yadi ākākhanti, parimaṇḍalaṃ nivāsetvā ca pārūpitvā ca nātidūranaccāsanne gamanaṃ, pattapariyāpanaggahaṇaṃ **gamane vattaṃ**. Nivattente pana paṭhamataram āgantvā āsanapaññāpanaṃ, pādodakādiupanikkhipanaṃ, pattacīvarappaṭiggahaṇaṃ **āgame āgamane vattaṃ**. Bhaṇantānaṃ antarā kathānopātanaṃ sabbattha vattaṃ. Āsanapaññāpanaṃ, utṭhitesu āsanauddharaṇaṃ, pādapīṭhakathalānaṃ upanikkhipanaṃ, paṭisāmanaṃ **āsane pādapīṭhe pādakathale ca vattaṃ**. Dhotapādaṭṭhapanakaṃ pādapīṭhaṃ. Aññaṃ kathalaṃ. Upāhanā ca cīvarañcāti dvando, tasmim. Sukkhaallacolehi puñchanaṃ **upāhanāya vattaṃ**. Sinnacīvarassa muhuttaṃ otāpanaṃ, caturaṅgulaṃ kaṇṇaṃ ussāretvā cīvarasaṃharaṇaṃ **cīvare vattaṃ**.

**147.** Paribhojanīya...pe... passāvattṭhānisu ca vihārasodhane ca puna paññāpane ca vattaṃ tathāti sambandho. Vaccañca passāvo ca vaccapassāvā. Tiṭṭhati etthāti ṭhānī, kuṭi. Vaccapassāvānaṃ ṭhānīti tappuriso. Atha vā tiṭṭhati etthāti ṭhānaṃ, soyeva samāso, vaccapassāvassa ca patanaṭṭhānaṃ, taṃ assa atthīti iṭṭhagehādi. Paribhojanīyañca pānīyañca vaccapassāvattṭhānī ca **pari...pe... ṭṭhānī**. Tāsu tesu vā. Pādodakaṇṇasaṅghānānodakappaṭiyādāpanaṃ **paribhojanīye vattaṃ**. Pātabbapānīyena pucchanaṃ upaṭṭhāpanaṃ **pānīye vattaṃ**. Sammajjanapānīyaupaṭṭhāpanaṃ **vaccapassāvattṭhānisu vattaṃ**. Paṭhamaṃ pattacīvarādīni harāpetvā ekamante nikkhipanādi, ullokato paṭṭhāya makkaṭasantānaṃ

ohāretvā sammajjanañca **vihārasodhane vattaṃ**. Otāpetvā sodhetvā papphoṭetvā atiharitvā yathāhāne bhūmattharaṇādipaññāpanaṃ **puna paññāpane vattaṃ**. **Tathāti** iminā “care”ti idaṃ atidisati.

**148.** Vihāraṃ sodhento bhikkhu paṭivāte vā saṅgaṇe vā pānīyasāmantā vā sayanāsanam na papphoṭeyyāti sambandho. **Pānīya**-saddena paribhojanīyañca saṅgahitaṃ. **Paṭivātet**i uparivāte. **Saṅgaṇeti** bahūnaṃ samosaraṇe vivaṭappadese. **Sayanāsanam** nāma bhūmattharaṇamañcādi.

**149.** Nhāne vattaṃ care, nhātassa kātabbe careti sambandhassa purisādhīnatāya sambandho veditabbo. Cīvarappaṭiggahaṇagattaparikkamma karaṇaṃ **nahāne vattaṃ**. **Kātabbe careti** gattato udakasammajjananivāsanaḍānādikicce pavatteyyāti attho. “Vanappagumbe”tiādīsu viya sissa e-kārādesaṃ rūpaṃ, tasmā kātabbaṃ vattaṃ careyyāti yojetvā veditabbaṃ. Budhā pana “nhāne nhātassa kātabbe vattaṃ care”ti yojetvā atthaṃ vadanti. Evaṃ sati kātabba-saddassa kammaśādhanaṭṭā vattameva kātabbaṃ nāmāti “vatte vattaṃ care”ti vuttaṃ viya hotīti virujjhati. “**Nahātena nahātassā**”ti vā pāṭho, udake gattaparikkamma theram paṭhamaṃ nahāpetvā sayampi nahātenāti attho. **Pāḷiyampi** “nahātena paṭhamataraṃ uttaritvā”ti (mahāva. 67) atthi. Atha raṅgapāke dhovane sibbane ca vattaṃ careti sambandho, rajanapāke cīvaradhovane cīvarasibbane cāti attho. Rajanto cīvare theve ṭhite na vajeti sambandho. **Rajantoti** cīvaraṃ rajanto. **Theveti** rajanabindumhi.

**150.** **Ekaccassāti** ācariyupajjhāyānaṃ verino puggalassa pattaṃ vā cīvarāni vā kiñcanaṃ parikkhāraṃ vā na dadeyya na gaṇheyya vāti sambandho. Tatha **na dadeyya na gaṇheyyāti** paṭisāmanatthāyapi na dadeyya, na gaṇheyya vāti attho. “Ākiñcana”ntiādīsu viya **kiñcana**-saddo daṭṭhabbo, tassa kiñcīti attho. **Kiñcinanti** vā pāṭho, kiñci naṃ parikkhāranti yojanā. Padasiddhivasenettha nanti ta-saddappayogo kato.

**151-2.** **Pacchato kātunti** pacchāsamaṇaṃ kātuṃ. **Tassāti** ekaccassa. **Pacchatoti** pacchāsamaṇo hutvā. **Ninnetunti** ekaccassa nīharitūṃ. Sabbattha anāpucchā na vaṭṭatīti yojetabbaṃ. **Kiccayaṃ vāti** veyyāvaccādi yaṃ kiñci kiccaṃ vā. Kiccameva kiccayaṃ, kassa yo “seniyo”tiādīsu viya. **Parikkammaṃ vāti** piṭṭhiparikkammādirikkammaṃ. **Attano kārāpetuṃ vāti** ekaccena attano kārāpetuṃ vā. **Kātuṃ vāti** tassa attanā kātuṃ vā.

**153.** Sīmato niggatā bahibhūtā **nissīmā**, taṃ. Ācariyupajjhāyesu avatvā dūraṃ bhikkhācāraṃ gatesupi apassantena gāmo pavisitabbo. Diṭṭhaṭṭhānato paṭṭhāya pana āpucchitūmyeva vaṭṭati. **Attano kiccayaṃ vāpīti** attano sīmāyapi pappapacanaḍīvararajanādikam sakaṃ karaṇīyaṃ vāpī kātuṃ.

**154.** **Aratinti** sāsane anabhiratiṃ. **Saṅghāyattesu kammesūti** parivāsāditajjanīyādīsu saṅghappaṭibaddhesu kammesu. **Ussukkaṃ vāpīti** ācariyupajjhāyesu garudhammaṃ ajjhāpannesu, kammārahesu ca “kinti nu kho saṅgho parivāsaṃ dadeyyā”tiādīnā ussāhaṃ vāpī.

**155.** **Gilānesu upaṭṭheyyāti** “pañcahi, bhikkhave, aṅgehi samannāgato gilānupaṭṭhāko alaṃ gilānaṃ upaṭṭhātuṃ, paṭibalo hoti bhesajjaṃ saṃvidhātuṃ, sappāyāsappāyaṃ jānāti, asappāyaṃ apanāmeti, sappāyaṃ upanāmeti, mettacitto gilānaṃ upaṭṭhāti no āmisantaro, ajegucchī hoti uccāraṃ vā passāvaṃ vā kheḷaṃ vā vantaṃ vā nīhātuṃ, paṭibalo hoti gilānaṃ kālena kālaṃ dhammiyā kathāya sandassetuṃ samādapetuṃ samuttejetuṃ sampahaṃsetu”nti (mahāva. 366) evaṃ vuttapañcaṅgasamannāgatena hutvā gilānesu upaṭṭhaheyyāti attho. Iminā sabbehipi ācaritabbaṃ gilānavattaṃ upadisati. **Vuṭṭhānanti** gelaññā vuṭṭhitaṃ. **Āgame**ti āgameyya, olokeyyāti attho. Upajjhācariyehi ca saddhivihārikaantevāsikesu yadi te gilānā honti, ādito paṭṭhāya cīvare rajanapariyosānañca arativinodaḍīkañca vattaṃ, agilānesu pana uddesaparipucchā ovāḍānusāsaniyā anuggahopattacīvarāḍīdānañcāti sabbaṃ kātabbaṃ. Teneva heṭṭhā vuttaṃ “tasmā ācariyenāpi tesu sammā vattitabbaṃ, upajjhāyena saddhivihārikesu vattabbameva natthī”ti.



Upajjhācariyavattaniddesavaṇṇanā niṭṭhitā.

## 16. Vaccapassāvaṭṭhānikaniddesavaṇṇanā

**156. Vaccapassāvaṭṭhānikanti** ṭhānamhi ṭhāne vā bhavaṃ vaccapassāvaṭṭhānikaṃ. Yathāvuḍḍhaṃ vaccaṃ na kareyyāti sambandho. Ye ye vuḍḍhā **yathāvuḍḍhaṃ**, āgappaṭṭipāṭiṃ hitvā vuḍḍhappaṭṭipāṭiyāti attho. **Vaccanti** upalakkhaṇamattaṃ, passāvañca nahānañca na kareyyāti adhippāyo. Tadeva samattheti “**yātānupubbiyā**”tiādīnā. **Yātānupubbiyāti** yātānaṃ gatānaṃ anupubbi anukkamo yātānupubbi, tāya. **Vacca...pe... titthañcāti** etaṃ tayaṃ labbhatīti attho, bhikkhunāti viññāyati.

**157.** Ubbhajitvā ca sahasā ca no paviseyyāti sambandho. **Ubbhajitvāti** cīvaraṃ dūratova ukkhipitvā. **Sahasāti** sīghaṃ. Ukkāsitvā paviseyyāti yojanā.

**158.** Vaccapassāvadoṇīnaṃ bahīti sambandho. **Ubhayanti** vaccampi passāvampi.

**159. Kūpeti** vaccāvāṭe. **Kaṭṭhanti** avalekhanakaṭṭhaṃ. **Pharusenāti** kharena avalekhanakaṭṭhena. **Uhatañcāpīti** attanā vā parena vā uhatañcāpī vaccamakkhitañcāpīti attho. **Dhovayeti** sati uduke, uduke asati kaṭṭhenapi sodheyya.

**160. Na nikkhame**ti na nikkhameyya. **Capu capūti** anukaraṇaṃ, vicchāyaṃ dvitte capu capu katvāti kiriyāvisesanaṃ. **Nācameyyāti** na dhoveyya. Sati pana uduke ācamitabbaṃ, asati yena kenaci puñchitvā gantabbaṃ, sabbasādhāraṇaṭṭhāne ca ācamanakumbhiyā udakaṃ na sesetabbaṃ. **Uklāpanti** kacavaraṃ. **Visodhayeti** vihārasodhane viya vaccapassāvakuṭṭiyo, pariveṇakoṭṭhake ca sammajjeyya. Sabbattheva ca pana vattabhede dukkaṭaṃ.

Vaccapassāvaṭṭhānikaniddesavaṇṇanā niṭṭhitā.

## 17. Āpucchakaraṇaniddesavaṇṇanā

**161. Āpucchakaraṇanti** āpucchāya karaṇaṃ. **Anajjhīṭṭhovāti** anāṇattova, ayācito eva vā. **Na ca vissajeti** pucchitapañhaṃ na vissajjeyya ca, āpucchitvā vā yācito vā yathāvuttametam kātuṃ labhatīti adhippāyo.

**162. Āpucchitvā kathentassāti** attano vuḍḍhaṃ āpucchitvā dhammādikaṃ bhāsantassa. **Puna vuḍḍhatarāgameti** puna aññassa vuḍḍhatarassa āgamane satīti attho. **Punaāpucchanaṃ natthīti** bhāsitaṃ ṭhapetvā puna āpucchanaṃ natthīti attho. Saṅghatthere asati āraddhampi aṭṭhapetvā kathentassāpi eseva nayo. Bhattage anumodato ca āpucchanaṃ natthīti sambandho. **Anumodatoti** dāyakehi yācitassa taṃtaṃpuññānumodanavasena dhammakathaṃ karoto ca. Anumodanañca therādheyyaṃ. “Anujānāmi, bhikkhave therena bhikkhunā bhattage anumoditu”nti (cūḷava. 362) hi vuttaṃ. “Sace manussā attano abhirucikena ekena anumodanaṃ kārenti, neva tassa anumodato āpatti, na mahātherassa bhāro hoti. Upanisinnakathāyameva hi manussesu kathāpentesu mahāthero āpucchitabbo”ti **aṭṭhakathāyaṃ** (cūḷava. aṭṭha. 362) vuttaṃ.

**163.** Vuḍḍhena ekavihārake vasanto cāti sambandho. **Vuḍḍhenāti** vuḍḍhena saddhiṃ. **Ekavihāra**keti savanūpacāre khuddakavihāre, na mahāvihāre. Kucchitthe hi kappaccayo. **Na sajjhāyeyyāti** sajjhāyanaṃ na kareyya.

**164. “Dhammaṃ na bhāsaye”**tiādīsu anāpucchāti sambandhitabbaṃ. **Na ca vijjhapeti** na ca nibbāyeyya. Vātapānañca āloka sandhiphalakaṃ kavāṭaṃ dvāraphalakaṃ **vātapānakavāṭaṃ** vā na vivareyya na thakeyya cāti **na-kāro** sabbattha yojetabbo.

**165.** Ekacaṅkame vuḍḍhena caṅkamantopi yena vuḍḍho, tena parivattayeti yojanā. **Yena tenāti** bhummatthe karaṇavacanam, yattha vuḍḍho, tatthāti attho, vuḍḍham ohāya aññato na gantabbanti adhippāyo. **Soti** navako. **Enanti** vuḍḍham. Sabbattha dukkaṭam. Ayañhi khandhakadhammatā yattha na-kārena paṭisedho, tattha dukkaṭanti.

Āpucchakaraṇaniddesavaṇṇanā niṭṭhitā.

### 18. Nagganiddesavaṇṇanā

**166.** “**Vaje**”tiādīsu na-saddo sambandhitabbo. Tattha pana yathānurūpabhojanādikaṃ kammavacanam ajjhāharitvā “bhojanam na bhuñje”tiādīnā attho vedītabbo.

**167.** Na **kareti** hatthakammādikaṃ parikammaṃ sayampi na kareyyāti attho. **Paṭicchādīsūti** niddhāraṇe bhummaṃ, jantāgharudakavatthappaṭicchādīnam majjheta attho. Parikamme duve kappiyāti sambandho. **Parikammeti** jantāghare udakepi upajjhāyādīnam kattabbaparikammavisaye, na abhivādanādīsu. **Duветi** jantāgharaudakappaṭicchādayo. Chādentī etāyāti chādi, vatthassa chādi **vatthacchādi**. **Sabbatthāti** sabbakammesūti.

Nagganiddesavaṇṇanā niṭṭhitā.

### 19. Nhānakappaniddesavaṇṇanā

**168.** Kappanam kappiyatā kappo, nhāne kappo **nhānakappo**. Navako therānam purato upari vā na ca nhāyeyyāti sambandho. **Na cāti** nayevea. **Puratoti** abhimukhe. **Uparīti** nadiyā upari.

**169-171.** Kuṭṭatthambhataruṭṭāne kāyaṃ na ghaṃsayeti sambandho. Tattha **kuṭṭam** nāma iṭṭhakadārusilābhitti. **Thambho** nāma nahānatitthe nikhānitvā ṭhapito. **Tarūti** rukkho. **Aṭṭānam** nāma tacchetvā aṭṭhapadākārena rājiyo chinditvā nahānatitthe nikhātaphalakam. Gandhabbahatthena vā...pe... mallakena vā kāyaṃ sarīrena vā aññamaññam na ghaṃsayeti sambandho. **Gandhabbahatthenāti** dārumayahatthena. **Kuruvindakasuttīyāti** kuruvindakapāsānacūṇṇāni lākhāya bandhitvā kataguḷikāvaliyā suttēna āvuṇitasuttīyā. **Mallakenāti** makaradantake chinditvā padumakaṇṇikasāṅṭhānena katamallakena. **Sarīrenāti** attano kāyena. Aññamaññassa aññamaññam kiriyākaraṇasaṅkhāte kiriyābyabhihāre dvittam. Kapāla...pe... puthupāṇi ca sabbesaṃ vaṭṭatīti sambandho. Kapālañca iṭṭhakā ca, tāsam khaṇḍāni. **Puthupāṇīti** puthu nānā pāṇi puthupāṇi, hatthaparikammaṃ ruḷhīvasena. **Sabbesanti** gilānāgilānānam. Gilānassa akatamallakam vaṭṭatīti sambandho. **Akatamallakam** nāma katamallakaviparītam. **Pheṇam** nāma samuddapheṇanti.

Nhānakappaniddesavaṇṇanā niṭṭhitā.

### 20. Avandīyaniddesavaṇṇanā

**172.** **Ukkhittoti** āpattiyā adassane appaṭīkamme ca ukkhittako pāpikāya diṭṭhiyā appaṭīnissagge ukkhittakoti tividho ukkhittako. **Nānāsaṃvāsako** nāma laddhinānāsaṃvāsakopi kammanānāsaṃvāsakopi. **Garukaṭṭho cāti** pārivāsiko mūlāyapaṭīkassanāraho mānattāraho mānattacārī abhānāraho ca idha garukaṭṭhoti adhippeto. Imehi pana aññamaññam vanditum vaṭṭatīti.

Avandīyaniddesavaṇṇanā niṭṭhitā.

### 21. Cammaniddesavaṇṇanā

173. Migā ca ajā ca eḷakā ca, tesam cammānīti samāso. **Ajo** chagalako. **Eḷako** meṇḍako. Mige dasseti “**rohite**”tiādīnā. **Rohitā**-diggahaṇaṃ upalakkhaṇamattaṃ, vātamigamigamātukādīpi ettheva saṅgayhanti.

174. **Anuññātattayā**ti anuññātā yathāvuttacammattayato. Amānusaṃva sabbam cammam thavikopāhane kappatīti sambandho. **Thavikā** satthakakosakādīti.

Cammaniddesavaṇṇanā niṭṭhitā.

## 22. Upāhananiddesavaṇṇanā

175. Navā guṇaṅguṇūpāhanā majjhadesse na kappantīti sambandho. **Navā**ti ekavārampi appaṭimukkā. Tattha **guṇaṅguṇūpāhanā** catuṣaḷalato paṭṭhāya vuccanti. Sambhave byabhicāre ca visesanaṃ sātthakaṃ bhavatīti “**majjhadesse**”ti visesanaṃ amajjhadesaṃ byabhicaratīti amajjhadesse guṇaṅguṇūpāhanā kappantīti vedītabbam. Tathā **navā**ti iminā anavā majjhadesepi. Iminā pana vākyena majjhadesepi ekavārampi paṭimukkā, aññattha tu sabbāpi guṇaṅguṇūpāhanā vaṭṭanti, na sesāti āpannaṃ, tathāpi “**anujānāmi, bhikkhave, ekapaḷāsikaṃ upāhana**”nti (mahāva. 245) vuttattā ekapaḷalikāpi vaṭṭatīti vedītabbam. **Sabbassā**ti majjhadesse paccantimepi gilānāgilānassa sabbassa. “**Anujānāmi, bhikkhave, ajjhārāme upāhanaṃ dhāretu**”nti (mahāva. 249) hi sāmāññena anuññātaṃ. **Sabbatthā**ti gāme vā araññe vā ārāmato aññatra. **Akallakassa cāti** gilānasseva.

176-9. Sabba...pe... rattā ca upāhanā sabba...pe... vicchikālikā ca...pe... dīpīnaṃ cammehi ca majjāra...pe... cammehi ca parikkhaṭā ca upāhanā saṅkamanīyā pādukā ca koci dhāreyya, dukkaṭanti yojanā. Odātāya pāḷiyā aṭṭhakathāya ca abhāvepi anulomavasenettha vuttaṃ viya dissati. Nīlako ca odāto cātiādīnā dvando. Sabbeva nīlaka...pe... kaṇhakā yāsanti samāso. “**Mahāraṅgā**”tiādīsu appayuttepi sabba-sadde pakaraṇavasena yojetvā attho vedītabbo.

“**Atthā** pakaraṇā līngā, ocityā kāladesato;  
Saddatthā vibhajyanti, na saddāyeva kevalā”ti. –

Hi vuttaṃ. **Citrā**ti vicitrā. Nīlapītādī vaddhāyeva yāsanti samāso. **Ādi**-saddena odātādīnaṃ gahaṇaṃ. Tittirapattasadiṣo vicitto vaṇṇo tittirapatta-saddena gahito. Tametesamattīti **tittirapattikā**. Meṇḍassa ca ajassa ca visāṇasadiṣā vaddhā yāsanti bāhirattho. Tā pana kaṇṇikaṭṭhāne meṇḍakaajavisāṇasaṅṭhāne vaddhe yojetvā katā. Esa nayo **vicchikālikā**dīsu. Paṇhipidhānattham tale khallaṃ baddham yāsanti viggaho. Jaṅghato sabbapādappaṭicchādānakam puṭam baddham yāsanti bahubbīhi. Tūlam picu puṇṇam yāsanti aññapadattho. Paliguṇṭhetīti paliguṇṭho, uparipādatalamattappaṭicchādakabandho, tena yojetvā katā **pāliguṇṭhimā**, vicitrā hi taddhitavutti. Vicchikānaṃ aḷasadiṣaṃ naṅguṭṭhasadiṣaṃ baddhametāsanti **vicchikālikā**. Sīhabyagghuddājīnadīpīnaṃ cammehi cāti pakaraṇato **ajinā** nāma migā. **Ulūkā** pakkhibilārā. Saṅkamanti gacchanti etāhīti **saṅkamanīyā**. Tā pana tālapaṇṇādīhi katā saṃhāriyā.

180. Sakalam ekadesaṃ vā puñchitvāvāti yojanā. **Khallakādikanti ādi**-saddena meṇḍavisāṇavaddhikādīkam sabbam saṅgaṇhātīti.

Upāhananiddesavaṇṇanā niṭṭhitā.

## 23. Anolokiyaniddesavaṇṇanā

181. **Sārattoti** saṃratto, sañjātarāgacittoti attho. **Itthiyā**ti tadahujātāyapi paṭasatanivatthāya anokāsupanijjhāyane antamaso tiracchānagatānampi dukkaṭameva. **Bhikkhādāyiyā**ti upalakkhaṇamattaṃ, itthī vā hotu puriso vā, bhikkhādānasamaye asārattenāpi mukham na ulloketabbam.

Ujjhānaṃ lāmakato saṃcintanaṃ, kopo, tatta saññā assāti **ujjhānasaññī**. Idha pana gilānopi na muccati. **Ādāse udakapatteti** iminā sesesu kaṃsapattādīsu kaññiyādīsu ca mukhanimittaṃ paññāyati, tesam saṅgaho. “Sañchavi nu kho me vaṇṇo, no, jiṇṇo nu khomhi, no”ti pana oloketuṃ vaṭṭati. **Assāti** bhikkhuno.

Anolokiyāniddesavaṇṇanā niṭṭhitā.

## 24. Añjanīniddesavaṇṇanā

**182.** Vaṭṭā vā aṭṭhasoḷasaṃsā vā maṭṭhā añjanī vaṭṭatīti yojanā. Aṭṭha ca soḷasa ca aṃsā koṇā yassā sāti viggaho. Soḷasaṃsapadesavibhattāya aṭṭhaṃsāsutiyā aṭṭhaṃsapadesavibhattā caturaṃsāpi sāmattiya gayhatīti nītabbaṃ. “Ujukameva pana caturaṃsāvā”ti hi **aṭṭhakathāyaṃ** (pārā. aṭṭha. 1.85) vuttaṃ. **Añjanīti** añjananāḷi. Mūle tissopi lekhā vaṭṭantīti yojanā. **Mūleti** bunde, heṭṭhatoti vuttaṃ hoti. **Lekhāti** vaṭṭalekhā. Bandhituṃ gīvāyaṃ ekā eva lekhā vaṭṭatīti sambandho. **Bandhitunti** pidhānabandhanatthaṃ.

**183.** **Yaṃ kiñci rūpanti** itthirūpādi yaṃ kiñci rūpaṃ. **Mālādikammanti** mālākammaṃ latākammaṃ. **Aḍḍhacandādīti** ettha **ādi**-saddena agghiyādikaṃ gahitaṃ. **Etthāti** añjanīyaṃ.

**184.** **Thavikāti** añjanithavikā. **Sipāṭīti** khurasipāṭikā. Salākāpi acittakā labbhāti sambandho. **Salākāti** añjanisalākā. Natthi cittametissāti **acittakā**. Tādisaṃ pana labhitvā upāhanāyo viya nāsetvā paribhuñjitabbaṃ.

**185.** **Aṭṭhi**-saddena manussaṭṭhiṃ ṭhapetvā yaṃ kiñci aṭṭhi gahitaṃ.

**186.** **Dhūmanettāti** dhūmanāḷikā, nissa ā-kārādesavasena vuttaṃ. **Satthakadaṇḍānīti** satthadaṇḍā. Natthuṃ denti etāyāti **natthudānā**. Aniyamena hi nadādito vā ī. Tehi saṅkhanābhiādīhi nibbattā **tammayā**.

Añjanīniddesavaṇṇanā niṭṭhitā.

## 25. Akappiyasayanāniddesavaṇṇanā

**187-9.** **Akappiyāni sayanānīti** uccāsayanamahāsayanāni. Padhānavasena pana “sayanānī”ti vuttaṃ, piṭṭhādayopi ettheva saṅgayhanti añjanī-saddena avasesāni viya. Āsandī ca...pe... ubhatorattūpadhānakañceti etāni akappiyānīti sambandho. Tatta **āsandīti** sugataṅgulena atirekaṭṭhaṅgulapādakāni mañcapīṭhāni. Tatta **piṭṭhaṃ** nāma mañco viya nātidīghaṃ vuccati. Tividhaṃ tūlametissā atthīti **tūli**, pakatitūlikā. “**Pallaṅkoti** pādesu vālarūpāni ṭhapetvā kato”ti ṭhapanassa **aṭṭhakathāyaṃ** (mahāva. aṭṭha. 254) vuttattā ṭhapanāñca yathākathañci hoti, yutti ca hotīti, “tattveva siharūpādiṃ dassetvā kato pana vaṭṭatīti vadantī”ti yaṃ **ṭikāyaṃ** vuttaṃ, taṃ “kimiti evaṃ vadantī”ti vatvā paṭikkhipitabbaṃ. “Akappiyarūpakato akappiyamañco pallaṅko nāmā”ti hi **sārasamāsepi**. Āsandī pallaṅko uccāsayanāṃ, sesā mahāsayanāṃ. **Paṭikā** uṇṇāmayo setattharaṇo. **Gono** caturaṅguladhikalomo mahākojavo. **Cittakaṃ** vānavicetro uṇṇāmayattharaṇo. **Uṇṇā** eḷakalomaṃ. **Paṭalikā** ghanapupphikā. **Vikatīti** siḥabyagghādirūpavicitto. **Uddalomīti** ekato uggatalomo. **Ekantalomikāti** ubhato uggatalomo.

**Kuttaṃ** soḷasannaṃ nāṭakithīnaṃ ṭhatvā naccanayoggo. **Koseyyaṃ** ratanaparisisbbitaṃ koseyyasuttamayaṃ paccattharaṇaṃ, **kaṭṭissaṃ** ratanaparisisbbitaṃ koseyyakaṭṭissamayaṃ. Hatthino ca assā ca rathā cāti senaṅgānaṃ bahutte samāhāradvando, hatthiassarathe tesam piṭṭhīsu attharāti tappuriso. **Ajinappavenīti** ajinānaṃ ajinamigacammānaṃ mañcappamāṇena duppaṭṭatipattāni katvā

sibbitā pavenī. Kadalimigānaṃ idaṃ **kadalimigaṃ**, kiṃ taṃ? Cammaṃ, pavaro ca so paccattharo cāti **pavarapaccattharo**, so ca taṃ setavatthassa upari atthatañca, kadalimigañca taṃ pavarapaccattharañcāti samāso, pavarapaccattharaṇasaṅkhātaṃ setavatthassa upari pattharitaṃ kadalimigappavarapaccattharaṇanti attho. Taṃ kira evaṃ karonti. **Ṭikāyaṃ** pana yathāvuttadvayena atthataṃ aññaṃeva kiñci vuttaṃ, taṃ na yuttaṃ ‘‘ajinappavenī dhāretabbā’’tiādinaṃ (mahāva. 254) visuṃ attharaṇānameva vuttattā. Tesu hi vuttasu tadatthataṃ vuttameva siyā, tathā ca vuttaṃ heṭṭhā visuṃ paṭikādikanti.

**Salohitavitānanti** etaṃ ‘‘ubhatorattūpadhānaka’’ntimassa visesanaṃ. Lohitavitānena saha vattamānanti samāso. Setavitānampi heṭṭhā akappiyapaccattharaṇe sati na vaṭṭati. Rattaṃ upadhānaṃ sīsūpadhānaṃ pādūpadhānañca **rattūpadhānakaṃ**, ubhato mañcassa sīsapādanikkhepanaṭṭhāne rattūpadhānakaṃ alopasamāso. Yaṃ pana ekameva upadhānaṃ ubhayapassesu rattādivaṇṇaṃ vicitraṃ, taṃ pamāṇayuttameva vaṭṭati. Tatriddaṃ pamāṇaṃ – vitthārato tīsu kaṇṇesu dvinnaṃ kaṇṇānaṃ antaraṃ vidatthacaturāṅgulaṃ, majjhe muṭṭhiratanaṃ, dīghato pana diyaḍḍharatanaṃ vā dviratanaṃ vā. **Paribhuñjati** iminā karontassa kārāpentassa katthaci chedanakaṃ pācittiyanti dīpeti.

**190.** Dhammāsane ca bhattage ca ghare cāpi āsandāditayā sese **gihisantake** gihivikaṭe sati nisīdituṃ labbhatīti ajjhāhāro padasambandho veditabbo. **Gihisantake**ti iminā saṅghikampi upalakkheti. ‘‘Anujānāmi, bhikkhave, ṭhapetvā tīni āsandiṃ pallaṅkaṃ tūlikaṃ gihivikaṭa’’nti (cūḷava. 314) sāmāññaṃ vuttaṃ. Sāmāññajotanāya pana visesepi avatṭhānato āsandāditayāti ettha dhammāsane āsandāditayā seseti yojetvā attho gahetabbo. **Aṭṭhakathāyañhi** ‘‘āsandī pallaṅko gonako’’tiādipāḷikkame āsandādivayamādito hitvā ‘‘gonakādīni saṅghikavihāre vā puggalikavihāre vā mañcapīṭhakesu attharivā paribhuñjituṃ na vaṭṭanti, dhammāsane pana gihivikaṭānīhārena labbhanti, tatrāpi nipajjituṃ na vaṭṭati’’ti (cūḷava. aṭṭha. 320) vuttaṃ. **Bhattageṃ** nāma vihāre dānaṭṭhānaṃ. **Dhammāsanaṃ** pana yattha katthaci. **Gharetī** antaraghare. **Nisīdituṃ labbhateti** iminā nipajjituṃ na vaṭṭatīti dīpeti. Saṃkhipanaṃ antokaraṇaṃ saṅkhepo, bhūmattharaṇe saṅkhepo assa sayanassatī samāso. Tasmīṃ bhūmattharaṇe antokaraṇabhūmattharato bhūmattharaṇamevāti datṭhabbaṃ. **Sayituñcāti** attano kappiyapaccattharaṇaṃ attharivā sayituñca nisīdituñca. ‘‘Paribhaṇḍakataṃ bhūmiṃ vā bhūmattharaṇasenaṃ vā saṅghikamañcapīṭhaṃ vā attano santakena paccattharaṇena paccattharivāva nipajjitabba’’nti hi **aṭṭhakathāyaṃ** (cūḷava. aṭṭha. 324) vuttaṃ. Idañca āsandādinampi aññathattakaraṇe paribhoge lakkhaṇavacanāṃ. Vuttañhi bhagavatā ‘‘anujānāmi bhikkhave, āsandiyaṃ pāde chinditvā paribhuñjituṃ, pallaṅkassa vāḷe bhinditvā paribhuñjituṃ, tūlikaṃ vijaṭetvā bibbohanaṃ kātuṃ, avasesaṃ bhūmattharaṇaṃ kātu’’nti (cūḷava. 320).

**191.** Caturaṃsapīṭhā ca...pe... pañcaṅgā ca uccapādakā kappantīti atthato vacanaṃ vipallāsetvā sambandhitabbaṃ, ‘‘kappiyā’’ti iminā vā sambandho veditabbo. Tattha cattāro aṃsā koṇā yesaṃ, te ca te pīṭhā cāti samāso. Tiṇṇaṃ apassayānaṃ, catunnañca pādānaṃ vasena satta aṅgāni yesanti samāso. Ekāpassayassa vasena pañcaṅgā. Caturaṃsapīṭhānaṃ visuṃ kappiyabhāvassa vuttattā sattaṅgādayo pana dīghāti viññāyanti. **Pāliyaṃ** bhattageṃ ekayoganiddiṭṭhattā ekayoganiddiṭṭhānaṃ saha vā pavatti, saha vā nivattīti **gharetī** iminā bhattageṃ gahaṇaṃ. **Eva-**saddo aṭṭhānappayutto, tasmā tūlonaddhā mañcapīṭhā ghare vā bhattageṃ vā nisīditumeva kappantīti sambandho. Tatrāyaṃ pāḷi ‘‘tena kho pana samayena manussā bhattageṃ antaraghare tūlonaddhaṃ mañcampi pīṭhampi paññapenti. Bhikkhū kukkucāyantaṃ nābhiniṣīdanti. Bhagavato etamatthaṃ ārocesuṃ. Anujānāmi, bhikkhave, gihivikaṭaṃ abhinisīdituṃ, na tveva abhinipajjitu’’nti (cūḷava. 314). Te pana karontassa vā kārāpentassa vā uddālanakaṃ pācittiyaṃ.

**192.** Sānulomānaṃ channaṃ cīvarānaṃ aññataraṃ cīvaraṃ chavi etāsanti viggaho. **Pañca bhisīti** colādītūlagaṇānāya pañcakā vuttā. **Sabbatthāti** vihāramañcapīṭhādīsu sabbattha.

**193.** **Tūlattayanti** simbalirukkhādīnaṃ khīravallīādīnaṃ erakādīnaṃ tiṇānaṃ tūlattaṃ. **Bhisigabbho** colādiko pañcavidho bhisigabbho. **Migapakkhinaṃ lomānīti** etaṃ sabbanti seso. **Miga-**

saddeneva sabbepi sīhādayo catuppadā, **pakkhi**-saddena sabbepi haṃsamorādayo gahitā. Nanu ca bhisigabbhasaddantogadhāya uṇṇāya migapakkhilomānampi gahaṇasabbhāvepi tesam visum gahaṇe sati punaruttidoso āpajjatīti? Nāpajjati manussalomapariccāgavibhāvanappayojanasabbhāvato. Nanu ca evampi dosoyeva, “manussalomamuṇṇāya”ntiādinā bhisigabbhānaṃ upari nīyamānattā gamyate bibbohanepi ayameva bhisigabbhoti? Saccam, tathāpi na doso, gamyamānathassa saddassa payogaṃ pati kāmacāroti. Masūrake tūlavajjā anuññātāti vipariṇāmetvā sambandhitabbaṃ. **Masūrakaṃ** nāma cammachavikā bhisīti vadanti.

**194.** Uṇṇāyaṃ manussalomañca paṇṇe suddhaṃ tamālakañca pupphañca appaṭivekkhitaṃ āsanañceva na labbhanti sambandho. **Manussalomanti** iminā na kevalaṃ idha eḷakalomameva uṇṇā, atha kho kappiyākappiyamaṃsajātīnaṃ pakkhicatuppadānaṃ lomampīti dasseti. **Pupphanti** piyaṅgubakulapupphādī. **Tamālakasaddeneva** upacārato pattaṃ gahetvā “**tamālaka**”nti vuttaṃ. **Appaṭivekkhanti** anupaparikkhitaṃ. Kīdisaṃ pana paṭivekkhitabbaṃ, kīdisaṃ na paṭivekkhitabanti? Yaṃ vinicchayato viññātaṃ, taṃ na paṭivekkhitabbaṃ, itaraṃ hatthena parāmasantena paṭivekkhitabbaṃ.

Akappiyasayananiddesavaṇṇanā niṭṭhitā.

## 26. Samānāsanikaniddesavaṇṇanā

**195.** Tivassantaramekamāsaṇaṃ bhikkhūnaṃ anuññātanti sambandho. Tattha ekasmiṃ āsane mañcādike dvinnaṃ āsaṇaṃ nisīdanaṃ **ekamāsaṇaṃ**. **Ma**-kāro sandhījo. Kīdisanti āha “**tivassantara**”nti. Tiṇṇaṃ vassānamantarametassāti tivassantaro, dvīhi vassehi mahantataro vā daharataro vā bhikkhu, so assa atthīti **tivassantaraṃ**, tivassantaravantanti attho. Yo pana ekena vassena mahantataro vā daharataro vā ekavassoyeva vā, tabbantatāya vattabbameva natthi. Atha vā **tivassantaranti** karaṇatthe upayogavacanaṃ, tivassantarena saddhinti attho. Tameva samattheti “**sattavasse**”ccādinā.

**196.** Muni anuññāsīti sambandho. **Sabbehevāti** samānāsanikaasamānāsanikehi sabbeheva saddhiṃ.

**197.** Dīghāsaṇaṃ dasseti “**anta**”ntiādinā. Yaṃ tiṇṇaṃ nisīdituṃ pahoti, taṃ antaṃ dīghāsananti sambandho. **Antanti** pacchimaṃ. Adīghāsane pana samānāsanikā nisīdituṃ labbhantīti dassento “**mañcake**”tiādimāha. Sabbattha ayathākaraṇato dukkaṇṭanti.

Samānāsanikaniddesavaṇṇanā niṭṭhitā.

## 27. Asaṃvāsaniddesavaṇṇanā

**198.** **Ukkhittoti** kammanāsaṃvāsakasaṅkhāto āpattiyā adassane, appaṭikamme, pāpikāya diṭṭhiyā appaṭinissagge ukkhittako. **Anupasampannoti** sikkhamānasāmaṇerasāmaṇerisikkhāpaccakkhātasāṅkhāto anupasampanno. **Chinnamūlakoti** antimavatthuajjhāpanno. Ukkhittakesu “dhammavādino ete”ti uppannāya laddhiyā nānābhūto saṃvāso etassāti **nānāsaṃvāso**, ukkhittānuvattakasaṅkhāto laddhināsaṃvāsako. Sīmato niggatā nissimā, sīmantarikā bahisimā ca, tattha hatthapāse cepi ṭhito, sīmānāsaṃvāsako **nissimattḥhito**. Vehāyase ākāse ṭhito **vehāyasaṅṭhito** bindāgamaena. Tattha “nānāsaṃvāso cā”tiādinā samāhāradvandepe kvaci napuṃsakaliṅgaṃ byabhicarātīti napuṃsakattābhāvo yathā “maggāmaggo”ti. Ekakammaṃ ekuddeso samasikkhatāti ayaṃ tividhopi saṃvāso nāma. So yesaṃ natthi, te **asaṃvāsā**. Ete hatthapāsato bahikaraṇavasena vajjetabbā. Etesu hi tividhe ukkhittake sati uposathādikaṃ kammaṃ karontassa pācittiyaṃ, itaresu dukkaṇṭanti.

Asaṃvāsaniddesavaṇṇanā niṭṭhitā.

## 28. Kammaniddesavaṇṇanā

199. Vaggena adhammakammaṇca samaggena adhammakammaṇca vaggena dhammakammaṇca samaggena dhammakammaṇcāti cattāri kammāni hontīti seso. Tattha **vaggena adhammakammanti** vaggena saṅghena karaṇīyaṃ adhammakammaṃ. Esa nayo sabbattha. **Vaggoti** ca samūho vuccati, so ca catuvaggādikaraṇīyādīsu yāvatikānaṃ kammappattānaṃ asammukhībhāvena, chandārahānaṃ chandānāharaṇena, sammukhībhūtānaṇca paṭikkosanaena, tesu ekenāpi vā idha adhippeto.

**Adhammakammanti** ettha pana **dhammo** nāma “uttidutiye ce, bhikkhave, kamme ekāya uttiyā kammaṃ karoti, na ca kammavācaṃ anussāveti, adhammakamma”’ntiādinā (mahāva. 387) ekāyeva ñattiyā, tathā dvīhi ñattīhi ekāyeva vā kammavācāya, tathā dvīhi kammavācāhīti āgatāya ca tathā hāpanaāññathākaraṇabhāvena ñattikammaṃ ṭhapetvā ñatticatutthe ca kamme āgatāya ca akammārahassa tajjanīyapabbajānīyapaṭisāraṇīyanīyassatividhaukkhepanīyānaṃ sattanaṃ kammānaṃ karaṇavasena, kammārahassa ca virādhetaṃ karaṇavasena āgatāya ca pāḷiyā viparītā ca pāḷi, upasampadādikammavasena āgatā ca pāḷi, sammukhāvīnayasativīnayaamūḷhavinayapaṭiññākaraṇayebhuyyasikātassapāpiyasikātiṇavattārasaṅkhātānaṃ sattanaṃ kammānaṃ yathālābhakaraṇavasena āgatā ca pāḷi, tena karaṇīyaṃ apalokanaññattidutiyañatticatutthasaṅkhātānaṃ catubbidhaṃ kammaṃ **dhammakammaṃ**, tappaṭipakkhaṃ **adhammakammaṃ**. Tabbipariyāyena samaggo dhammakammaṇca veditabbaṃ. Dhammo yathāvuttā pāḷi assa atthi, dhammena kataṃ vāti **dhammikaṃ**. Tabbiparītaṃ **adhammikaṃ**. **Catutthamyevāti** tesu catūsu kammesu catunnaṃ pūraṇaṃ samaggena dhammikaṃ. Sesakammānaṃ bhāvena bhikkhunā dukkaṭṭassa bhavanaṃ lakkhīyatīti **sesakammesūti** bhāvalakkhaṇe sattamī. **Dukkaṭṭanti** kuppānaṃ adhammakammavaggakammānaṃ katattā dukkaṭṭaṃ.

200. Idāni yadidaṃ samaggena dhammikaṃ nāma, taṃ yehi saṅghehi kātabbaṃ, tesam pabhedaṃ dassetuṃ “**catuvaggo**”’tiādimāha. Catvādīnaṃ saṅkhyeyavuttittā catunnaṃ vaggotiādinā viggaho. **Dasavīsativaggikoti** dasannaṃ vīsatiyā ca vaggabhedavasena dasavīsatiṇaṃ vaggoti viggaho, ṇiko sakatthe. Vīsatiyā vago, atirekena sahito vīsativaggoti viggaho.

201-2. Pañcannaṃ kammānaṃ niyāmeti “**catū**”’tiādinā. Abbhānaṃ upasampadaṃ pavāraṇaṃ ṭhapetvā catuvaggo cātiādinā yojetvā sabbakammesu kammappattoti dīpitoti yojetabbaṃ. Tattha tattha **ca**-saddo catuvaggādayo kammappattikiriyaṃ samuccinoti. Idha pana **sabba**-saddo abbhānādīnaṃ kesañci ṭhapitattā padesasabbe gayhati. **Kammappattoti** kammassa patto yutto anurūpo. **Itaroti** vīsativaggo atirekavīsativaggo. **Sabbakammesūti** ettha pana **sabba**-saddo sabbasabbe. Nanu ca vīsativaggassa kammappattabhāvesati atirekavīsativaggassa pagevāti viññāyati. Tathā sati so kasmā vuttoti? Saccam, tathāpi so catuvaggādīnaṃ saṅghena kattabbakammaṃ ūnakatarena na vaṭṭati, atirekena pana vaṭṭatīti ñāpanatthaṃ vutto.

203. Idāni catuvaggādīkena chandāharaṇena pūretabboti dasseti “**catū**”’tiādinā. Pārājikādībhāvaṃ nāpannattā pakatiyā sabhāveneva ṭhito attā yesaṃ, pakato vā tatoyeva kammesu avigato attā yesaṃ teti **pakatattakā**, pārājikaukkhattakaladdhinānāsamaṃvāsakehi aññe. **Pareti** ekasīmaṭṭhā tādisāyeva aññe. **Sesepīti** avasese pañcavaggādīkaraṇīyepi.

204. Idāni vatthuñattianussāvanasīmādivipattito, kammavipattīsu parisato ca paṭikkosato ca kammassa kuppākuppabhāvaṃ tattha ca āpattiādimṃ dassetuṃ “**catū**”’tiādi māha. Catuvaggādīkattabbaṃ asaṃvāsagaṇapūraṃ vā kammārahagaṇapūraṃ vā kammaṇca garukaṭṭhagaṇapūraṃ vā parivāsādīkammaṇcāti yojanā. Ettha ca kammāraho garukaṭṭhato añño, nikkhattavatto pana garukaṭṭho gaṇapūraṃ hotiyeva. **Katanti** catuvaggādīnaṃ kataṃ.

205. **Vāreyyāti** antarāye asati antamaso ekopi vāreyyāti attho. **Antarāyeti** pāpehi kariyamāne jīvitabrahmacariyantarāye sati. Anantarāyikā ce na vārenti, dukkaṭṭaṃ. **Diṭṭhāvinti** attano attano diṭṭhiṃ laddhiṃ “adhammakammaṃ idaṃ, na metaṃ khamatī”’ti aññamaññaṃ āvi kareyyunti seso.

**Ekodhiṭṭhānanti** eko bhikkhu “na metaṃ khamatī”ti adhiṭṭhānaṃ kareyyāti seso. **Tatodhikāti** tīhi adhikā. Te pana saṅghattā pahonti attano kammaṃ nittharituṃ.

**206. Khittacitto** nāma ummattako. **Dukhaṭṭitoti** vedanaṭṭo. **Na rūhatīti** gayhattaṃ na rohatīti attho.

**207.** Antamaso anantarassāpi ārocentassa pakata...pe... bhikkhunoti sambandho. Ekasīmāyaṃ tiṭṭhatīti **ekasīmaṭṭho**. Samo saṃvāso assāti **samasamvāso**. Ekasīmaṭṭho ca so samasamvāso ca, pakatatto ca so ekasīmaṭṭhasamasamvāso ca, so cāyaṃ bhikkhu cāti sabbattha kammadhārayo, tassa. Ettha pana avipannasīlo **pakatattoti** adhippeto. **Ārocentassāti** attano laddhiṃ pakāsentassa. **Rūhatīti** paṭikkhepo ruhati.

**208. Dhammikaṃ kammaṃ** dhammena kattabbaṃ apalokaṇādikammaṃ. **Paṭikkoseyyāti** nivāreyya. Tirokkhā kāyasāmaggiṃ vā chandaṃ vāti vā-saddaṃ netvā attho netabbo. **Tirokkhāti** parammukhā. So sammukhā-saddo viya nipāto, atha vā akkhā indriyavisayato tiro bahīti atthoti.

Kammaniddesavaṇṇanā niṭṭhitā.

## 29. Micchājīvavivajjanāniddesavaṇṇanā

**209.** Āgamma jīvanti etenāti ājīvo, ko so? Paccayapariyesanavāyāmo. Micchāya ājīvo, tassa vivajjanā **micchājīvavivajjanā**. Sā panāyaṃ atthato “idha bhikkhu pātimokkhasaṃvarasaṃvuto viharati ācāragocarasampanno”ti (vibha. 508) evaṃ pātimokkhasaṃvarasampattiyā paṭipattidassanavasena āgato ācāro ceva yathākkamena pārājikasaṅghādisesathullaccayapācittiyapāṭidesanīyadubbhāsitudukkaṭānaṃ kāraṇabhūtassa ājīvahetupaññattānaṃ abhūtārocanaṣaṅkaritānaṃ padesaṃ bhūtārocanaṣaṅkaritānaṃ bhikkhunibhojanaviññattisūpodanaviññattisikkhāpadānaṃ vītikkamassa ca kuhanalapananemittikatā nippesikatā lābhena lābhaṃ nijigīsanatāti evamādīnaṃ pāpadhammānaṃ vasena pavattaṃ micchājīvaviratisaṅkhātānaṃ ājīvapārisuddhisīlaṅga. Tassā pana kassaci idha dassanaṃ yathā dassetumāraddhaṃ pātimokkhasaṃvarasaṅkhātāya adhisīlasikkhāya, caturārakkhavipassanāvasena āgatānaṃ adhicitāadhipaṅṅasaṅkhātānaṃ dvinnānaṃ sikkhānaṅga upakāradhammaparidīpanatthanti datṭhabbaṃ, evamīdisaṃ viññeyyaṃ, taṃ dasseti “**dāru**”ntiādīnā. Tattha “**dāru**”ntiādīni “**dade**”ti etassa pattikammaṃ. **Cuṇṇaṃ** sirīsacuṇṇādinahāniyacūṇṇaṃ. **Nhānamukhodakanti** nhānaṅga mukhaṅga, tassa udakanti samāso. **Ādi**-saddena paṇṇādiṃ saṅghāti. **Kulasaṅghāti** kulasaṅghakaraṇena.

**210.** Paribhaṭṭati paresaṃ dārake pariharatīti paribhaṭṭo, paribhaṭṭassa kammaṃ paribhaṭṭako, sakatthe tameva paribhaṭṭakatā. Alaṅkaraṇādinā kuladāraṅkapaṭiharaṇassetānaṃ nāmaṃ. Muggassa sūpo muggasūpo, soyeva muggasūpo. Yathā muggasūpe paccamāne kocideva muggo na paccati, avasesā paccanti, evaṃ yassa puggalassa vacane kiṅcideva saccaṃ hoti, sesaṃ alikaṃ, ayaṃ puggalo muggasūpasadisatāya upacārena “muggasūpo”ti vuccati, tassa bhāvo muggasūpatā. Saccālikena jīvitakappanassetānaṃ adhivacanānaṃ. Gharavattuādisambandhinī vijjā vatthuvijjā. Paribhaṭṭakatā cātiādīnā dvando napuṃsakattābhāve **pāri...pe... vijjā**, tāya. Rasso pana gāthābandhavasena, tathā dīgho. Pahiṇānaṃ tasmīṃ tasmīṃ kamme tesāṃ tesāṃ niyuṅjanaṃ **paheṇaṃ**. Ādarena dūtena kāretabbaṃ yaṃ kiṅci kammaṃ **dūtakammaṃ**. Pīsaṃ pesaṃ, jaṅghāya pādēna pesaṃ jaṅghapesaṃ, tamassa atthīti **jaṅghapesaniyaṃ**. Tesāṃ tesāṃ gihīnaṃ gāmantaradesantarādīsu sāsanaṭṭisāsanaṅgaṇassetāmadhivacanānaṃ.

**211.** Lābhāsāya laṅgadānaṃ **anuppādānaṃ**. **Sambuddhappaṭikuṭṭhena** buddhagarahitena aṅgavijjānakhattavijjāsūpinavijjābhūtavijjādinā **aññaṃ vā**.



**212.** Aññātakānaṃ appavāritānaṃ viññāpanaṃ **viññatti**, yācanavasena pavatto kāyavacīpayogo. Buddhappaṭikuṭṭhena micchājīvena paccayapariyesanā **anesanā**. Abhūtassa attani avijjamānassa uttarimanussadhammassa ullapanaṃ kathanāṃ **abhūtullapanaṃ**. **Kuhanādīhīti** kuhanālapanādīhi. Tattha lābhasakkārasilokasannissitassa paccayappaṭisevanasāmantaṃ jappanairiyāpathasaṅghāpanavasena janavimhāpanā **kuhanā**. Vihāraṃ āgate manusse disvā “kimatthāya bhonto āgatā, kiṃ bhikkhū nimantetu”nti vā “mayi rājā pasanno, asuko ca asuko ca rājamahāmatto pasanno”ti vā ādinā nayena ālapanā **lapanā**. Khādanīyaṃ gahetvā gacchante disvā “kiṃ khādanīyaṃ labhitthā”tiādinā nayena nimittakaraṇādi **nemittakatā**. “Assaddho appasanno”tiādinā nayena garahaṇāni ca “etaṃ ettha kathethā”tiādinā nayena vācāya ukkhipanādi ca **nippesikatā**. Appena lābhena bahukaṃ vañcetvā gahetuṃ icchanaṃ **lābhena lābhaṃ nijjīsanatā**. **Kuladūsādīti** ettha **ādi**-saddena rūpiyappaṭiggahaṇarūpiyasamvohārā saṅgayhantīti.

Micchājīvavivajjanāniddesavaṇṇanā niṭṭhitā.

### 30. Vattaniddesavaṇṇanā

**213.** Saupāhano...pe... cīvaraṃ sīse karitvā vā āgantuko āramaṃ na paviseti sambandho. **Sachattoti** sīse katachattena sachatto. **Ogūṇṭhitoti** sasīsaṃ pārupito. “Parikkhittassa vihārassa parikkhepo, aparikkhittassa parikkhepārahaṭṭhāna”nti vuttaṃ upacārasīmāsāpamaṃ patvā upāhanāomuñcanādisabbaṃ katvā āramo pavisitabboti ayamettha byatirekaladdho attho.

**214.** Pānīyena pāde na dhoveryyāti sambandho. Paṭikkamanaṃ patvā ekamante pattacīvaraṃ nikkhipitvā patirūpe nisajja pucchitvā pānīyaṃ pātabbāṃ, paribhojanīyena yathāvuttaṃ pādā dhovittabbāti adhippāyo. **Vuḍḍhatare āvāsikepi ca abhivādeyyāti** iminā vassaṃ pucchitvā navakena āvāsikena abhivādāpetabbanti dīpeti. **Puccheyya sayanāsananti** “katamaṃ senāsanāṃ pāpuṇāti, ajjhāvuttaṃ anajjhāvuttaṃ vā”ti senāsanāṃ puccheyya. Idañca pucchāya lakkhaṇavacanaṃ. Tasmā āvāsikavatte vuttamajjhāvuttadhārikañca pucchitabbāṃ. Sace “anajjhāvutta”nti vadanti, kavāṭaṃ ākotetvā muhuttaṃ āgametvā ghaṭikaṃ ugghātetvā kavāṭaṃ paṇāmetvā bahi ṭhitena ulloketvā pavisitvā sabbaṃ senāsanavattaṃ kātabbaṃ. Āgantukavattaṃ.

**215-6.** Gamiko pakkameyyāti sambandho. “**Paṭisāmetvā**”tiādīnimassa pubbakiriyāpadāni. **Dārumattikabhaṇḍakanti** ettha mañcapīṭhādīdārubbhaṇḍaṃ rajanabhājanādīdattikābhaṇḍaṃ. **Paṭisāmetvāti** atthi ce anovassake saṅghapetvā. **Thaketvānāti** dvāravātapānehi pidhāya. **Sādhukaṃ saṅgopetvānāti** catūsu pāsānesu mañcaṃ paññāpetvā mañce mañcassa, pīṭhe pīṭhassa āropanena senāsanassa uparūpari puñjakaraṇena sādhukaṃ saṅgopanaṃ katvā. **Na cāti** neva. Gamikavattaṃ.

**217-8.** **Āvāsikoti** idaṃ “paññapeyyā”tiādīnaṃ kattupadaṃ. Navakammakaraṇādībhāranittharaṇatāya āvāso vihāro assa atthīti **āvāsiko**. Yassa pana kevalaṃ vihāre nivāsanamattaṃ atthi, so **nevāsiko**. Ubhopi te idha āvāsika-saddena saṅgahitā. **Pādodappabhutinti** ettha **pabhuti**-saddena pādapīṭhapādakathalikānaṃ gahaṇaṃ. Paccuggantvāna pattacīvaraṃ gaṇheyyāti yojanā. **Paññape sayanāsananti** “etaṃ tumhākaṃ senāsanāṃ pāpuṇāti”ti evaṃ sayanāsanāṃ paññapeyya, pakāseyyāti vuttaṃ hoti.

**219.** **Ajjhāvutthanti** pubbe bhikkhūhi nivuttaṃ. **Gocarāgocaraṃ vadeti** “bhikkhācāragāmo dūro, āsanno”ti vā, “kālasseva piṇḍāya caritabbāṃ, divā vā”ti evaṃ gocarañca, “micchādīṭṭhikānaṃ vā gāmo, paricchinnabhikkho vā”tiādinā agocarañca vadeyyāti attho. **Vaccapassāvāṭṭhānānīti**ādīnīpi “vade”ti imasseva kammavacanāni. **Sekhasammutinti** yassa saddhassa kulassa saṅgho sekhasammutiṃ deti, taṃ kulañca.

**220.** **Pavesanikkhame kālanti** “kesuci ṭhānesu vāḷamigā vā amanussā vā honti, imaṃ kālaṃ pavisitabbāṃ nikkhamitabbāñca”ti evaṃ pavesanikkhame ca kālaṃ. Etaṃ pana āsanapaññāpanādīkaṃ

sabbaṃ vattaṃ vuḍḍhatare āgate cīvarakammādiṃ vā nātigilānassa bhesajjaṃ vā ṭhapetvāpi kātappaṃ. Mahāgilānassa pana bhesajjameva kātappaṃ. Cetiyaṅgaṇavattaṃ karontenāpi tassa vattaṃ kātuṃ ārabhitappaṃ. Paṇḍito hi āgantuko “karohi tāva bhesajjaṃ, cetiyaṅgaṇaṃ sammajjāhi”ti ca vadeyya. Apica bījanena bījitaṃ, pādāpissa dhovitaṃ, telena makkhitabbā. Piṭṭhi ce āgilāyati, sambādhetabbā. Navakassa pana āgantukassa “idamāsaṇaṃ, ettha nisīdā”tiādinā ācikkhitabbanti dassento “**nisinnoyevā**”tiādimāha. **Nisinnoyevāti** iminā “ṭhitoyevā”tiādiṃ upalakkheti. **Samuddiseti** ādarena vadeyya. Āvāsikavattaṃ.

“Vatta”nti pana sāmāññena niddiṭṭhattā na there bhikkhū atiallīyivā nisīditappaṃ, mahātherassa nisinnāsanato ekaṃ dve āsanāni ṭhapetvā “nisīdā”ti vutte nisīditappaṃ, na navāpi bhikkhū āsanena paṭibāhitabbā, na saṅghātiṃ ottharivā nisīditappaṃ, saddaṃ akatvā udakakiccaṃ kātappaṃ, yathā sūpassa okāso hoti, evamattāya odano gaṇhitabbo, therena bhikkhunā “ṭhapetvā appakaṃ odanādikam sabbaṃ sabbesaṃ samakaṃ sampādehi”ti vattappaṃ, na tāva therena bhuñjitappaṃ, bhuttāvinā na tāva udakaṃ paṭiggahetappaṃ, bhattaggato nivattantehi yathānurūpaṃ nikkhamitvā viralāya pāliya gantabbanti evamādikaṇca tadanurūpaṃ sekhiyavattaṇca sampādetabbanti idaṃ **bhattaggavattaṇca** sādhuṃ ataramānena gāmo pavisitabbo, “iminā pavisissāmi, iminā nikkhamissāmi”ti nivesanaṃ pavisantena sallakkhetappaṃ, nātisahasā pavisitappaṃ, nātisahasā nikkhamitappaṃ, nātidūre naccāsanne ṭhātaṃ, nāticiraṃ ṭhātaṃ, nātilahukaṃ nivattitappaṃ, dātukāmatākāraṃ ṇatvā ṭhātaṃ, yo paṭhamaṃ gāmato paṭikkamati, tena āsanapaññapanādi sabbaṃ kātappaṃ, yo pacchā, tena āsanuddharaṇādi sabbaṃ kātabbanti evamādikaṇca tadanurūpaṃ sekhiyavattaṇca sampādetabbanti idaṃ **piṇḍacārikavattaṇca** kātappaṃ.

Senāsanatṭhāne sabbaṃ vattaṇca sampādetvā tato nikkhamitvā sādhuṃ nivāsetvā pārupitvā ca ataramānena gāmo pavisitabbotiādi sabbaṃ **piṇḍacārikavattaṃ** kātappaṃ. Pāṇiyaparibhojanīyaaggiaṇasahitakattaradaṇḍā upaṭṭhapetabbā, nakkhattapadāni sakalāni vā ekadesāni vā uggahetabbāni, disākusalena bhavitabbanti idaṃ **āraññikavattaṇca** uddiṭṭhamyeva hotīti avagantabbanti.

Vattaniddesavaṇṇanā niṭṭhitā.

### 31. Vikappanāniddesavaṇṇanā

**221. Sammukhā parammukhāti** sassa mukhaṃ, parassa mukhanti viggaho, sammukhena parammukhenāti attho. Sammukhāvikappanā parammukhāvikappanāti bhedā duve vikappanā vuttāti yojanā. **Bhedāti** visesato. Atha vā sassa mukhaṃ mukhasambandhivacanaṃ assā vikappanāyāti samāso. Tathā parammukhā. Sammukhā ca parammukhā ca, tassā bhedo, tato. **Sammukhāya** sammukhāvikappanāya. **Byattassāti** vikappanavidhānaṃ paccuddhāravidhānaṇca jānantassa.

**222. Tenāti** yassa santike vikappeti, tena bhikkhunā. **Paribhogādikanti** paribhogaṃ vissajjanaṃ adhiṭṭhānaṇca.

**224-5. Aparā sammukhāvekāti** ettha vā-saddo pakkhantare, atha vāti attho, api-saddattho vā vā-saddo, so aparā-saddato paraṃ daṭṭhabbo, aparāpi ekā sammukhāvikappanā atthīti attho. Kathanti āha “**bhikkhussā**”tiādi. “Pañcannaṃ sahadhammīna”nti vuttattā “**tissassa bhikkhuno**”tiādisu tissāya bhikkhunīyā tissāya sikkhamānāya tissāya sāmaṇeriyā tissassa sāmaṇerassātipi viññātabbaṃ.

**226. Parammukhāvikappanāti** parammukhena vikappanena, parammukhāvikappanāti vā gahetappaṃ, parammukhāvikappanā kathanti attho.

**227. Mittoti** dalhamitto. **Sandiṭṭhoti** diṭṭhamattamitto. Ettha pana dvinnaṃ vikappanānaṃ kiṃ nānākaraṇanti? Sammukhāvikappanāya tāva sayaṃ vikappetvā parena paccuddharāpeti, teneva sā

**sammukhāvīkappanā** nāma jātā. Parammukhāvīkappanāya pareneva vikappāpetvā pareneva paccuddharāpeti, teneva sā **parammukhāvīkappanā** nāma jātāti idamettha nānākaraṇanti.

**228. Dūrasantikattekkattanti** ettha āsannadūrabhāvo adhiṭṭhāne vuttanayeneva vedītabbo.

**229.** Dasāhaṃ...pe... paccāsāya sati māsakaṃ nādhiṭṭhitavīkappitaṃ nissaggiṃ nuppādayatīti sambandho. Dasa ahāni samāhaṭāni **dasāhaṃ**. Sabbattha accantasamyoge dutiyā. Tattha yaṃ divasaṃ cīvaraṃ uppannaṃ, tassa yo aruṇo, so uppannadivasanissito, tasmā cīvaruppādadivasena saddhiṃ ekādase aruṇuggamane nissaggiyaṃ hotīti āha “**dasāha**”nti. **Māsamekaṃ vāti** “anattate kathine ekaṃ pacchimakkattikamāsa”nti (pārā. 649 atthato samānaṃ) vuttattā kathinatthate pañca māseti labbhati. Kathinaṃ atthataṃ yasmiṃ vihāreti samāso. **Pāripūratthanti** pāripūri attho yassāti viggaho. Kiriyāvisesanaṃ, pāripūrippyojanaṃ katvāti attho. **Ūnassāti** yattakena kayiramānaṃ adhiṭṭhānaṃ cīvaraṃ pahoti, tattakatābhāvato ūnassa ekādasamāsasattamāsasaṅkhāte piṭṭhisamaye uppannassa mūlacīvarassa. **Paccāsā satīti** “saṅghādito yato kutoci lacchāmī”ti evaṃ satiyā paccāsāyāti attho. Ubhayampi ya-kāralopena niddiṭṭhaṃ. **Satīti** vā nipāto, līngavipallāsena vāha. Ettha pana byatirekavasena dasāhātikkamanādīsu nissaggiyaṃ pācittiyaṃ vedītabbanti.

Vīkappanāniddesavaṇṇanā niṭṭhitā.

### 32. Nissayaniddesavaṇṇanā

**230. Byattassāti** “kāriya”nti kitakayoge kattari chaṭṭhī. **Byatto** ca nāma “pañcahi, bhikkhave, āṅgehi samannāgatena bhikkhunā anissitena vatthabbaṃ, āpattiṃ jānāti, anāpattiṃ jānāti, lahukaṃ āpattiṃ jānāti, garukaṃ āpattiṃ jānāti, ubhayāni kho panassa pātīmokkhāni vitthārena svāgatāni honti suvibhattāni suppavattīni suvinicchitāni suttaso anubyañjanaso. Imehi kho, bhikkhave, pañcahi āṅgehi samannāgatena bhikkhunā anissitena vatthabba”nti (mahāva. 103) evaṃ vuttabyatto ca bahussutabyatto ca vedītabbo.

Tattha **suvibhattānīti** suṭṭhu vibhattāni padapaccābhaṭṭhasaṅkaradosavirahitāni. **Suppavattīnīti** paguṇāni vācuggatāni. **Suvinicchitāni suttasoti** khandhakaparivārato āharitabbasuttavasena suṭṭhu vinicchitāni. **Anubyañjanasoti** akkharapadapāripūriyā suvinicchitāni akkhaṇḍāni aviparītakkarāni. Etena atṭhakathā dīpitā. Atṭhakathāto hi esa vinicchayo hotīti. Bahussutabyatto pana yena sabbantimena paricchadena dve mātīkā paguṇā vācuggatā, pakkhadivasesu dhammasavanatthāya suttantato cattāro bhāṇavārā, sampattānaṃ parisānaṃ parikathanatthāya andhakavindamahārāhulovādaambaṭṭhasadiso eko kathāmaggo, saṅghabhattamaṅgalāmaṅgalesu anumodanatthāya tisso anumodanā, uposathappavāraṇādijānanatthāṃ kammākammavinicchayo, samaṇadhammakaraṇatthāṃ samādhivasena vipassanāvasena vā arahattamaggapariyosānamekaṃ kammaṭṭhānaṃ ettakaṃ uggahitaṃ, svāyaṃ vuccati. **Natthi nissāya kāriyanti** ācariyādiṃ nissāya vāsena kattabbaṃ natthi. “**Nissayakāriya**”nti vā pāṭho, nissayena kāriyanti samāso. Jīvassa yattako paricchedo **yāvajīvaṃ**.

**231.** Tena nissāya vasantena evaṃ nissayo gahetabboti dassetuṃ “**ekamsa**”ntiādi vuttaṃ. **Ekamsanti** eko aṃso assa cīvarassāti viggaho. Kiriyāvisesanaṃ vā bhummatthe vā upayogavacanaṃ, ekasmiṃ aṃseti attho. **Añjali** karapuṭo. **Yāvataṭṭhiyaṃ vadeti** upasampadāya saṭṭhivassena sattativassena vāpi byattassa navakassa santike yāvataṭṭhiyaṃ vacanaṃ kareyya. Yāvataṭṭhiyo vāro assāti kiriyāvisesanasamāso. **Āyasmatotī** āyasmantaṃ. **Vacchāmīti** vasāmi. Upajjhāṃ gaṇhantenāpi “upajjhāyo me, bhante, hohī”ti gahetabbaṃ. Taṃ pana “ācariyo”ti ettha “upajjhāyo”ti vacanaṃ visesoti ettha vācābhedaṃ na visuṃ vuttaṃ. Na kevalamettha nissayupajjhāyagahaṇe, gāmapavesanādīsupi evameva katvā “ahaṃ āvuso”ti vā “bhante”ti vā vatvā “gāmapavesanaṃ āpucchāmī”tiādinā vattabbaṃ.

**232.** Nissayaapaṭippassaddhiṃ dasseti “**pakkante**”tiādinā. **Pakkanteti** upajjhāye ācariye

saddhivihārike antevāsike ca gāmādīsu yattha katthaci āpucchitvā vā anāpucchitvā vā gate. Tesu yena kenaci “asukam nāma gāmaṃ gacchāmi”ti vutte tesuyeva yena kenaci “sādhū”ti sampatiçchitepi taṃ taṃ niyamaṃ atikkamitvā pakkantepi anāpucchā pana upacārasīmātikkamena pakkantepi nissayo **sammati** paṭippassambhati. **Pakkhasaṅkanteti** titthiyapakkhasankante cāpi vibbhante cāpi maraṇena ca taṅkhaṇaññeva paṭippassambhati. **Āṇatti** nāma “paṇāmemi ta”nti vā “mā idha pavisā”tiādikā nissayappaṇāmanā. Tāya paṇāmitena ācariyupajjhāyā khamāpetabbā. Akhamantesu daṇḍakammaṃ katvā tasmim vihare mahāthere gahetvāpi sāmantavihāre bhikkhū gahetvāpi khamāpetabbā. Na khamanti ce, ācariyupajjhāyānaṃ sabhāgānaṃ santike vasitabbaṃ. Yena kenaci kāraṇena na sakkā hoti tatra ācariyupajjhāyānaṃ sabhāgānaṃ santike vasituṃ, taṃyeva vihāraṃ āgantvā aññassa santike nissayaṃ gahetvā vasitabbaṃ. Tattha “pañcahi, bhikkhave, aṅgehi samannāgataṃ saddhivihārikaṃ appaṇāmento upajjhāyo sātisāro hoti, paṇāmento anatisāro hoti. Upajjhāyamhi nādhimattaṃ pemaṃ hoti, nādhimatto pasādo hoti, nādhimattā hirī hoti, nādhimatto gāravo hoti, nādhimattā bhāvanā hoti. Imehi kho, bhikkhave, pañcahaṅgehi...pe... hoti (mahāva. 68). Pañcahi, bhikkhave, aṅgehi samannāgataṃ antevāsikaṃ appaṇāmento ācariyo...pe... hoti”ti (mahāva. 81) vuttatā pana asammāvattante antevāsikasaddhivihārike appaṇāmentā ācariyupajjhāyā dukkaṭaṃ āpajjantīti veditabbaṃ. **Bhāvanāti** mettābhāvanā. Upajjhāyasamodhānaṃ pana tassa dassanasavanavasena veditabbaṃ.

### 233. Alajjinti –

“Sañcicca āpattim āpajjati;  
 Āpattim parigūhati;  
 Agatigamanañca gacchati;  
 Ediso vuccati alajjipuggalo”ti. (pari. 359) –

Evam vuttalakkaṇaṃ alajjim. Nissayaṃ dentenāpi lajjino yeva dātabbaṃ. “Na bhikkhave alajjīnaṃ nissayo dātabbo. Yo dadeyya, āpatti dukkaṭassā”ti (mahāva. 120) hi vuttaṃ. Adiṭṭhapubbassa katipāhaṃ ācāraṃ upaparikkhitvā dātabbaṃ. **Apubbanti** ettha sambandhisaddattā pubba-saddena pubbavāso gahito, natthi pubbo assāti apubbaṃ, navanti vuttaṃ hoti. Cattāri pañca vā parimāṇametesanti viggaho. Ettha pana parimāṇa-saddasannidhānena saṅkhyeyavācinopite saṅkhyāmattavācino hontīti catupañcasāṅkhyāparimāṇameva saṅkhyeyamāha, tasmā viggahapadatthehi bhinno aññapadattho sambhavaṭīti samāso. Vā-saddassa yo vikappattho, tattha cāyaṃ samāso, cattāri vā pañca vā, catupañca ahāni, tesam ahānaṃ samāhāro **catupañcāhaṃ. Bhikkhusabhāgatanti** samāno bhāgo lajjitāsāṅkhāto koṭṭhāso yesaṃ, bhikkhūhi sabhāgā, tesam bhāvo **bhikkhusabhāgatā**, taṃ, pesalabhāvanti attho. “Thero lajjī”ti jānantena pana pakatiyā nissayadānaṭṭhānaṃ gatena ca tadaheva gahetabbo, ekadivasampi parihāro natthi. Sace “okāse alabhante paccūsasamaye gahessāmi”ti sayati, aruṇaṃ uggatampi na jānāti, anāpatti. Laddhāparihārenāpi vasituṃ vaṭṭatīti.

**234.** “Labbhatī”ti kammani nipphannattā avuttakattāti **“addhikassā”**tiādīsu kattari sāmivacanāṃ, “addhikenā” tiādi vuttaṃ hoti. **“Sallakkhentena”**ti pana sarūpeneva niddiṭṭhaṃ. **Vasitunti** vuttakammaṃ. Bhāve hi tuṃ-paccayo, vāsoti attho. **Yācitassāti** “gilānupaṭṭhākassa cā”ti ettha viśesanaṃ. Sace pana “yācāhi ma”nti vuccamānopi gilāno mānena na yācati, gantabbaṃ. **Araññe vā sallakkhentena phāsukanti** yattha vasantassa paṭiladdhataruṇasamathavipassanāviśesabhāgitāvasena phāsu hoti, tasmim araññe tādisaṃ phāsuvihāraṃ sallakkhentena āraññakena. Dāyake asanteti padacchedo. **Tāvāti** avadhimhi, addhikādīhi yāva nissayadāyako labbhati, tāva, āraññakena pana “paṭirūpe nissayadāyake sati nissāya vasissāmi”ti ābhogaṃ katvā yāva āsāḥhipuṇṇamā, tāvāti attho. “Sace pana āsāḥhimāse ācariyo nāgacchati, yattha nissayo labbhati, tattha gantabbaṃ (mahāva. aṭṭha. 121). Antovasse pana nibaddhavāsaṃ vasitabbaṃ, nissayo ca gahetabbo”ti (mahāva. aṭṭha. 121) hi **aṭṭhakathāyaṃ** vuttaṃ.

Amhākaṃ pana keci antevāsikattherā “na bhikkhave vassaṃ na upagantabbaṃ. Yo na

upagaccheyya, āpatti dukkaṭassā'ti (mahāva. 186) ca 'na bhikkhave tadahu vassūpanāyikāya vassaṃ anupagantukāmena sañcicca āvāso atikkamitabbo. Yo atikkameyya, āpatti dukkaṭassā'ti (mahāva. 186) pālīvacanato kenaci kāraṇena nissayaṃ alabhamānenapi na sakkā antovasse vassaṃ anupagantum. 'Antovasse panā'tiādīsu pana ca-saddo anvācayatto, tasmā tenāpi vassaṃ upagantabbamevā'ti vadīmsu.

Mayaṃ panettha evamavocumha "bhagavatā anupagamane dukkaṭaṃ anantarāyikasveva vuttaṃ, teneva 'kenaci antarāyena purimikaṃ anupagatena pacchimikā upagantabbā'ti **aṭṭhakathāyaṃ** (mahāva. aṭṭha. 185) vuttaṃ. Antarāyo ca nāma antarā vemajjhe eṭṭi antarāyo, yo koci bādhakappaccayatāya adhippeto vuccati 'na labhanti patirūpaṃ upaṭṭhākaṃ, eseva antarāyoti pakkamitabba'ntiādīsu (mahāva. 201) viya, tasmā bādhakappaccayatā adhippetā. Nissayālābhopi antarāyotveva viññāyati. Sakkā hi vattum 'antarāyo vassūpagamo sannissayattā taruṇasamathavipassanālābhīnaṃ katokāso viyā'ti. Taruṇasamathavipassanālābhīnampi hi katokāsepi 'sace pana āsāḥhimāse ācariyo nāgacchati, yattha nissayo labbhati, tattha gantabba'nti dalhaṃ katvā **aṭṭhakathāyaṃ** (mahāva. aṭṭha. 121) vuttaṃ. Amhākaṃ garūhi ca **sāratthadīpaniyaṃ** (sārattha. 11. mahāvagga 3.121) 'ācariyaṃ āgamentasseva ce vassūpanāyikadivaso hoti, hotu, gantabbaṃ tattha, yattha nissayadāyakaṃ labhati'ti vassūpanāyikadivasepi nissayathāya gamanameva vuttaṃ. Atha ca pana mahākāruṇikopi bhagavā 'anujānāmi, bhikkhave, gilānupaṭṭhākena bhikkhunā nissayaṃ alabhamānena yāciyamānena anissitakena vatthu'nti (mahāva. 121) gilānavisayepi nissayaṃ garukaṃ katvā paṭṭhapesi. Yaṃ pana anissayaṃ, taṃ anantarāyaṃ nissayamuttakassa vassūpagamaṇaṃ viya. Apica nāvāya gacchantassa pana vassāne āgatepi nissayaṃ alabhantassa anāpattīti nāvāya gacchatoyeva āveṇikā anāpattikatā vuttā. Tasmā nissayālābho bādhakappaccayo vassūpagamaṇassa, na vassūpagamaṇaṃ nissayassāti antarāyoyeva nissayālābho. Tatoyeva **ṭikāyaṃ** 'antovasse pana anissitena vatthum na vaṭṭati'ti vuttaṃ. Tasmāyeva ca 'antovasse panā'tiādīsu nissayadāyake sati nibaddhavāsaṃ vasitabbañca nissayo gahetabbo ca hotīti gamanakiriyāya khīyamānatāvasena ca-saddo samuccayo gahetabbo'ti.

Nissayaniddesavaṇṇanā niṭṭhitā.

### 33. Kāyabandhananiddesavaṇṇanā

**235.** Bandhīyati anenāti bandhanaṃ, kāyassa bandhanaṃ kāyabandhanaṃ, natthi kāyabandhanametassāti **akāyabandhano**. **Dukkaṭanti** sañcicca vā asañcicca vā paviseyya ce, dukkaṭaṃ. Asatiyā gato yattha sarati, tattheva bandheyyāti sambandho. **Gatoti** antogāmaṃ gato. Saritvā yāva na bandhati, na tāva piṇḍāya caritabbaṃ.

**236.** "Paṭṭikā"tiādīnā sabbasaṅgāhakaṃ kāyabandhanaṃ niddisati. **Paṭṭikā**ti pakativitā vā macchakaṇṭakakhajjūripattavāyimā vā. Sūkarānaṃ antaṃ **sūkarantaṃ**. Idha pana taṃsadisaṃ vuccati. Caturassaṃ akatvā sajjitaṃ muddikakāyabandhanampi saṅgahetvā "**ekā rajjū**"ti vuttaṃ. Taṃ pana rajjukaṃ bandhantena ekaguṇameva katvā bandhitum vaṭṭati, majjhe bhinditvā diguṇaṃ katvā bandhitum na vaṭṭati. Diguṇaṃ pana akatvā satavārampi punappunaṃ āvijjhivā bandhitum vaṭṭati, pāmaṅgasaṅṭhānaṃ pana ekampi na vaṭṭati. Bahurajjuka ekato katvā ekena nirantaraṃ veṭhetvā kataṃ "bahurajjuka"nti na vattabbaṃ, taṃ vaṭṭati. **Tadanulomikā**ti tesam paṭṭikāsūkarantānaṃ dvinnam dve ime yathākkamamanulomikā.

**237-8.** Paṭṭikā kīdisī vaṭṭatīti āha "**macchā**"tiādi. Paṭṭikā macchakaṇṭakakhajjūripattā vā maṭṭhā vā labbhāti sambandho. **Kaṇṭaka**-saddena **patta**-saddena ca tadākāro vuccati, upacārato hi macchānaṃ kaṇṭakākāro ca khajjūrīnaṃ pattākāro ca etissāti samāso. **Maṭṭhāti** pakativitā. **ṭikāyaṃ** pana "ete macchakaṇṭakādayo maṭṭhā vikārahitā paṭṭikā ca tadantogadhāti adhippāyo"ti vuttaṃ. Kathaṃ tesamantogadhatā? Yato tāniyeva paṭṭikā nāmāti. Tathā ca vuttaṃ **aṭṭhakathāyaṃ** "pakativitā vā macchakaṇṭakavāyimā vā paṭṭikā vaṭṭatī"ti (cūlava. aṭṭha. 278). Ettha pana macchakaṇṭakeyeva

khajjūripattam paviṭṭham. Catassopi dasā labbhāti sambandho. **Catassoti** ukkaṭṭhaparicchena vuttam, tasmā tato ūnāpi vaṭṭanti. **Anteti** kāyabandhanassa ubhayante diguṇasuttakam labbhanti sambandho. Guṇo bandhanabhūtam suttakam guṇasuttakam. “Guṇo paṭalarāsīsu, ānisaṃse ca bandhane”ti hi abhidhānappadīpikā. Dvinnaṃ guṇasuttakānaṃ samāhāro **diguṇasuttakam**. Tam dasāmukhassa thirabhāvāya koṭṭetum vaṭṭati, na sobhanattham. Tenāha “**mālādi**”ntiādi.

Mālādiṃ kakkācchādiṃ kuñjaracchādiṃca dassetvā guṇasuttakakoṭṭitā paṭṭikā na kappatīti sambandho. “**Mālādi**”ntiādiṃ **ādi**-saddena tādisaṃ yaṃ kiñci vikārarūpaṃ gayhati. Kakkāṇaṃ viya acchīni, tāni ādīni yassāti samāso. Tathā **kuñjaracchādinti**.

**239. Ghaṭakanti** ghaṭakākāravaṭṭalekhārūpaṃ. **Makaramukhādinti** ettha **makaramukham** nāma makaramukhasaṅghānaṃ. Bindu pana āgamavasena vutto. **Ādi**-saddena deḍḍubhasīsādivikārarūpaṃ yaṃ kiñci saṅgayhati. **Dasāmukheti** dasānaṃ mukhabhūte ante etāni na kappantīti sambandho. Vidhe ubhante ghaṭakā lekhā aññaṃ cittakañca na kappantīti sambandho. **Ghaṭakāti** ghaṭakato. **Lekhāti** lekhāya. Pañcamiyā lopo. **Vidheti** kāyabandhanassa pāsante dasāmūle tassa thirabhāvattam kattabbe dantavisāṇādimaye vidhe.

**240. Deḍḍubhakanti** udakasappasāsadisam. **Murajanti** nānāvaṇṇehi suttehi murajavaṭṭisaṅghānaṃ veṭhetvā kataṃ. **Ṭikāyam** pana “**murajanti** bahurajjūke ekato saṅkaḍḍhitvā ekāya rajjuyā paliveṭhetvā katarajjū”ti vuttam, tam “bahurajjūke ekato katvā”tiādinā heṭṭhā vuttaatṭhakathāvacanena virujjhati. **Maddavīṇanti** pāmaṅgasaṅghānaṃ. **Kalābukanti** bahurajjukam. Tesam “na kappatī”ti iminā sambandho. **Dve majjhimāti** majjhe bhavā murajamaddavīṇasaṅkhātā dve.

**241. Gaṇṭhiyo cāpīti** cīvarassa gaṇṭhiyo cāpi. **Tammayāti** tehi veḷuādīhi nibbattā. Pasaṅgena panetaṃ vuttanti.

Kāyabandhananiddesavaṇṇanā niṭṭhitā.

Sumaṅgalappasādaniyā nāma ṭikāya

Paṭhamabhāṇavāraṇṇanā niṭṭhitā.

### 34. Pathavīniddesavaṇṇanā

**242. Jātājātāti duvidhāti** jātā pathavī ajātā pathavīti pathavī duvidhāti attho. Iminā jātāpathaviñca ajātāpathaviñca dasseti. Tāsam vibhāgaṃ dasseti “**suddhā**”tiādinā. Suddhamattikapamsukā ca adaḍḍhā ca bahumattikapamsukā ca cātumāsādhikovaṭṭhapamsumattikarāsi ca jātā pathavīti sambandho. Mattikā ca pamsu cāti dvando. Suddhā appasakkharādītāya mattikā pamsavo yassāti bāhirattho. **Adaḍḍhāti** uddhanapacanādivasena tathā tathā adaḍḍhā. Sā pana visum natthi, suddhamattikādiṃ aññatarāva veditabbā. Cattāro māsā, tehi sahito atireko kālo, tasmim ovaṭṭhoti samāso. **Ovaṭṭhoti** yena kenaci udakena ovaṭṭho. Budhā pana “ākāsato vuṭṭhaudakeneva, na aññattha paharivā patitabindunā”ti vadanti, “ovaṭṭho”ti sāmāññena vuttattā ca “pokkharāṇiyā ṭhitatanukaddamo vaṭṭati, bahalo tu na vaṭṭatī”ti (pāci. aṭṭha. 86) vuttattā ca “vinayavinicchaye sampatte garuke ṭhātabba”nti vinayalakkaṇato ca na tam yujjatīti amhākam khanti. Pamsumattikānaṃ rāsi pamsumattikarāsi. Catu...pe... vaṭṭho pamsumattikarāsi yassāti aññapadattho, kammadhārayo vā.

**243.** Vālukā ca daḍḍhā ca yebhuyyasakkharādimahīpi ca cātumāsomavaṭṭhako vuttarāsi ca dutiyā bhūmīti sambandho sakkharā ca pāsāṇā ca marumbā ca kathalā ca vālukā cāti dvando. Suddhā sakkhara...pe... vālukā yassāti viggaho. Hatthamuṭṭhinā gahetabbappamāṇā **sakkharā**, tato upari **pāsāṇā**, kaṭasakkharā **marumbā**, kapālakkaṇḍāni **kathalā**ti veditabbā. **Dutiyāti** ajātā. **Vuttarāsīti** vutto mattikapamsusirā.

244. Kīdisī yebhuyumattikādīti āha “**dve bhāgā**”tiādi. **Yassa bhūmiyāti** yassā bhūmiyā. **Sesesupīti** yebhuyyapaṃsuyebhuyyasakkharayebhuyyapāsāṇādīsu.

245. “**Pācittī**”tiādinā tattha vinicchayaṃ dasseti. Jāte jātasāññissa khaṇane pācittīti sambandho. **Jātetī** jāte bhūmibhāge, liṅgavipallāso vā, jātāyāti vuttaṃ hoti. Jāte dveḷhassa vimatissa dukkaṅṅanti sambandho. Jāte ajātasāññissa anāpatti. Tathā āṇāpane anāpattīti yojanā. **Ajātasāññissāti** ajātāti saññā ajātasāññā, sā assa atthīti ajātasāññī, tassa.

246. **Ekāyāṇattiyā ekāti** sace sakim āṇatto divasampi khaṇati, āṇāpakassa ekā eva āpattīti attho. Vācaso āpattīti sambandho. **Vācasoti** vicchāyaṃ so, vācāya vācāyāti attho.

247. “Imaṃ ṭhānaṃ khaṇa vā”tiādinā yojetabbaṃ. “Ettha aggim jālehi vā”ti yojanā. “**Vattu**”nti idaṃ “na vaṭṭatī”ti imassa kattupadavacananti attho. Atha vā “imaṃ ṭhānaṃ khaṇā”tiādippakāro vacanāya na vaṭṭatīti attho. **Niyametvāti** iminā “āvāṭṭaṃ khaṇa, kandaṃ khaṇā”tiādinā aniyametvā vattaṃ vaṭṭatīti dīpeti.

248. “Imassa thambhassa āvāṭṭaṃ jāna vā, kappiyaṃ karohi vā”ti ca “mattikaṃ jāna vā, mattikaṃ āhara vā, mattikaṃ kappiyaṃ karohi vā”ti ca edisaṃ vacanaṃ vaṭṭatīti sambandho. Etaṃ viya dissatīti **edisam**, kim taṃ? “Mattikaṃ dehī”tiādikaṃ upameyyaṃ. “Mattikaṃ jānā”tiādikaṃ pana upamaṇaṃ, tesam upamaṇopameyyānaṃ yā kappiyasaṅkhātā samānadhammatā, sā upamā. Tathā ca vuttaṃ amhehi **subodhālaṅkāre** “upamaṇopameyyānaṃ, sadhammatāṃ siyopamā”ti. Aññathā upamaṇabhūtaakkharāvaḷisadisīyeva, akkharāvaḷi upameyyaṃ siyā. Vākye viya-saddoyeva pana upamaṇaṃ jotetīti veditabbaṃ.

249. Pathaviyā asambaddhaṃ sukkhakkaddamaādikaṅca tanukaṃ ussiṅcanīyakaddamaṅca kopetum labbhanti sambandho. **Kaddamaādikanti** ettha **ādi**-saddena udakena gataṭṭhāne udakapappaṭako nāma hoti, yaṃ vātappahārena calati, taṃ saṅgaṇhāti. **Ussiṅcanīyakaddamanti** ghaṭehi ussiṅcituṃ sakkūṇeyyakaddamaṃ.

250. “Cātumāsādhikovaṭṭhaṃ gaṇḍuppāda”ntiādinā sambandhitabbaṃ. Gaṇḍaṃ pathaviyā gaṇḍasadisam mattikarāsīm uppādentīti **gaṇḍuppādā**. Idha pana tehi utṭhāpito gūtho “gaṇḍuppāda”nti niddiṭṭho. Potthakesu pana “gaṇḍuppādo”ti pāṭho dissati. Taṃ “na kopaye”ti ettha kamma bhavitabbanti na yujjati. **Mūsikukkiranti** mūsikānaṃ ukkiro khaṇitvā bahi kataṃ paṃsurāsi mūsikukkīroti. **Leḍḍādinti** ettha **leḍḍunti** kasitaṭṭhāne naṅgalacchinnamattikāpiṇḍaṃ. **Ādi**-saddena gāvīnaṃ khuracchinnaṃ kaddamaṃ saṅgaṇhāti.

251-2. Udakasantike patite vāpiādīnaṃ kūle ca pāsāṇe lagge raje ca navasonḍiyā patite raje ca abbhokāsuṭṭhite vammike ca mattikākuṭṭe ca tathāti sambandho. **Tathāti** iminā kūlādike cātumāsādhikovaṭṭhaṃ vā sabbaṃ na kopayeti idaṃ atidissati. Iṭṭhakakuṭṭako vaṭṭatīti āha “**yebhuyyā**”tiādi. Yebhuyyena kathalā etthāti **yebhuyyakathalā**, bhūmi, tiṭṭhati etthāti **ṭhānaṃ**, yebhuyyakathalāya ṭhānaṃ, tasmim. Iṭṭhakakuṭṭako yebhuyyakathalā viya hotīti adhippāyo. Kuṭṭakaṃ kopentassa anāpattīti adhippāyo. Iṭṭhakāya kato kuṭṭakoti samāso.

253-5. Sañcāletvā bhūmiṃ vikopayaṃ thambhādiṃ gaṇhituṃ vāti sambandho. Tattha **vikopayanti** karaṇatthe paccattavacanaṃ, vikopayatāti attho. Aññathā kathamettha paṭhamāpasāṅgo. Paṭhamā hi “bhava”nti vutte siyā, na ca “gaṇhitu”ntiādīsu tuṃ-paccayehi vutto koci atthi, yadā bhāve tuṃ-paccayo, tadā na kiñci vuttaṃ hotīti, “na kappatī”ti padhānakiriyāyapi heṭṭhā vuttanayena kattā aññoyevāti evaṃ sabbattha. Tatiyatthe tu sati ito cito sañcāletvā bhūmiṃ vikopayatā thambhādiṃ gaṇhituṃ na kappatīti atīva yujjati. **Dhārāyāti** passāvadhārāya. Visamaṃ samaṃ kātuṃ sammuñjānīhi ghaṃsituṃ vāti yojanā. **Visamanti** visamaṭṭhānaṃ. “Padam dassessāmi”ti bhūmiṃ bhindanto caṅkamituṃ vāti sambandho. **Bhindantoti** bhindatā. Kaṇḍurogī vā taṭṭādīsu aṅgapaccāṅgaṃ ghaṃsitunti

yojanā. **Kaṇḍurogīti** kaṇḍuroginā. **Ca**-saddo avadhāraṇe.

**256-7. Suddhacittassāti** pathavibhedādhippāyavirahena parisuddhacittassa.

**258.** Aggissa anupādāne kapāle vā anupādānāya iṭṭhakāya vā aggim pātetum vā avase sati bhūmiyaṃ pātetum vā labbhateti sambandho. **Upādānaṃ** indhanaṃ, na upādānaṃ **anupādānaṃ**, tasmim. Vaso pabhuttaṃ. “Vaso pabhutte āyatte” ti hi nighaṇḍu. Na vaso **avaso**, tasmim apabhutteti attho. Patitattāhāneyeva upādānaṃ datvā aggim kātum vaṭṭati. Sukkhakhāṇukasukkhharukkhādīsū ca aggim dātum na vaṭṭati. Sace pana “pathaviṃ appattameva nibbāpetvā gamissāmi” ti deti, vaṭṭati, pacchā nibbāpetum na sakkoti, avisayattā anāpatti. “Bhūmiyaṃ pātehi” ti evampi vattum na vaṭṭatīti.

Pathavīniddesavaṇṇanā niṭṭhitā.

### 35. Parikkhāraniddesavaṇṇanā

**259-60.** Chatte anto bahi ca pañcavaṇṇehi suttehi sibbituñca pañṇe girikūṭaaddhacandādīm chindituñca na vaṭṭatīti sambandho. **Chatteti** tālapaṇṇe chatte. **Girikūṭaṃ** nāma makaradantakaṃ, **ādi**-saddena tādisaṃ aññaṃ vikārarūpaṃ saṅgahitaṃ. **Ghaṭakanti** gehatthambhesu viya kayiramānaṃ ghaṭakaṃ. **Daṇḍeti** chattadaṇḍe. **Lekhāti** tahiṃ tahiṃ dinnā lekhā. **Sādisanti** dīghena niddiṭṭhaṃ. **Bundamhi** mūle.

**261.** Thirattamaṃ chatte ekavaṇṇena sibbitum vā pañjaraṃ vinandhitum vā vaṭṭatīti sambandho. **Sibbitunti** anto bahi ca sibbitum. **Ekavaṇṇenāti** nīlādīnā ekavaṇṇena. **Pañjaranti** chattadaṇḍagāhakasalākapañjaraṃ. **Thirattanti** iminā na vaṇṇamaṭṭhatthāyāti dasseti. Bandhitum daṇḍe lekhā vaṭṭatīti sambandho. **Bandhitunti** vātappahārena acalanattamaṃ chattamaṇḍalikaṃ rajjukehi gahetvā bandhanattāyā. **Lekhāvāti** valayamiva ukkiritvā katā lekhā eva. **Vaṭṭatīti** yadipi na bandhati, rajjukehi bandhitum yuttaṭṭhānattā vaṭṭati.

**262.** Cīvare ante vāpi paṭṭamukhe vāpi veṇipi vā saṅkhalikāpi vā aññaṃ sūcivikāraṃ vā pālīkaṇṇikaādikaṃ kappabinduvikāraṃpi vā na ca kappatīti sambandho. **Anteti** cīvarapariyante, anuvātetī vuttamaṃ hoti. **Paṭṭamukheti** paṭṭakoṭiyaṃ, dvinnamaṃ paṭṭānaṃ saṅghatitattāhānaṃ sandhāyetaṃ vuttamaṃ. **Veṇīti** varakasāsākārena sibbanamaṃ. **Saṅkhalikāti** biḷālabandhanākārena sibbanamaṃ. **Aññaṃ sūcivikāraṃ vāti** cīvaramaṇḍanattāyā kayiramānaṃ aññaṃ yaṃ kiñci sūcikkammavikāraṃ vā. **Ṭīkāyaṃ** pana “satapadisadisamaṃ aññaṃ vā sūcivikāraṃ na kappatī” ti sāmāññaena vuttamaṃ. “Cīvaramaṇḍanattāyā nānāsuttakehi satapadisadisamaṃ sibbantā āgantukapaṭṭamaṃ ṭhapenti, aññaṃpi yaṃ kiñci sūcikkammavikāraṃ karonti, sabbaṃ na vaṭṭatī” ti **aṭṭhakathāyaṃ** vuttattā pana nānāvaṇṇehi vā hotu, ekavaṇṇena vā hotu, cīvaramaṇḍanattāyā saṃsibbantānaṃ sūcikkammavikāraṃ sandhāya vuttanti cīvaresu phālitaṭṭhānassa thirabhāvattamaṃ satapadisadisampi sibbitum vaṭṭatīti amhākaṃ khanti. **Pāli**-saddena, **kaṇṇika**-saddena ca kappa-saddalopena vā upacārena vā pālīkappādayova gahitā. Pāli ca kaṇṇikā ca pālīkaṇṇikāyo, tā ādi yassa aññaṃ tādisassāti viggaho. Tattha nīlāvalīādisaṅghānāya bindupantiyā yathā sobhati, tathā kayiramāno pālīkappo. Tatheva bindusamūhe katthaci dassetvā kayiramāno kaṇṇikakappo.

**263. Gaṇṭhipāsakapaṭṭatīti** gaṇṭhino ca pāsakassa ca patiṭṭhānattāhāne ṭhapetabbā paṭṭā. **Vaṭṭatīti** ettha “gaṇṭhipāsakā” ti katvā “catukoṇāva vaṭṭanti” ti atthato vacanaṃ vipallāsetvā yojetabbamaṃ. **Agghiyanti** cetiyasaṅghānena sibbanamaṃ. Mūle ca agge ca ekasadisamaṃ katvā muggarākārena sibbanamaṃ **muggaro**. **Vikāranti** vikāro, liṅgavipallāsenā vuttamaṃ. **Etthāti** gaṇṭhipāsakapaṭṭesu.

**264. Koṇasuttāti** napuṃsakaniddeso, gaṇṭhipāsakapaṭṭānaṃ koṇehi nīhaṭasuttakoṭīyo. **Pīlakāti** tāniyeva nivattetvā pīlakākārena katāni. **Duviññeyyāvāti** tesamaṃ antesu ekavāraṃ gaṇṭhikaraṇena vā puna nivattetvā sibbanena vā duviññeyyā eva. **Gandhamaṃ telamaṃ vāti** gandhamaṃ vā telamaṃ vā.



Kañcikapitṭhakkhalikaādīnīpi vaṭṭanti.

**265. Mañināti** masāragallādīpāsāṇena. **Na ca ghaṭṭeyyāti** neva ghaṭṭeyya. **Aññena vāti** muggaramusalādīnā. Aṃsabaddhakākāyabandhanāni pana tathā kātuṃ vaṭṭati. **Doṇiyaṃ katvā na ca ghaṃseyyāti** pakkarajanākiraṇadoṇiyaṃ ṭhapetvā bhūmiyaṃ jaṇṇukāni nihantvā ito cito ca āvijjhivā neva ghaṃseyyāti attho.

**266-7. Kaṇṇakoṇakasuttānīti** cīvararajanakāle lagganathāya anuvāte catūsu koṇesu ca pāsakaṃ katvā bandhitāni suttāni, yāni “anujānāmi, bhikkhave, kaṇṇasuttaka”nti (mahāva. 344) evaṃ anuññātāni. Kaṇṇasaṅkhātā koṇā kaṇṇakoṇakā, tesu suttāni. Gaṇṭhikapāsakapaṭṭesu pana kaṇṇakoṇakasuttānaṃ duviññeyyānameva kappiyatā heṭṭhā vuttāti cīvare ratteyeva tesam chinditabbatā natthi, kaṇṇakoṇakasuttānaṃ chinditabbatāya vuttattā anuvātehi nikkhamitasuttānīpi chinditabbānīti veditabbaṃ. Dhammakaraṇe chattavaṭṭiyaṃ lekhaṃ ṭhapetvā lekhā na vaṭṭatīti yojanā. **Chattavaṭṭiyanti** chattassa mukhavaṭṭiyaṃ. **Lekhāti** upari vā heṭṭhā vā kucchiyaṃ vā aññā lekhā. Kuñcīkāya ca pipphale ca maṇikā ca pīlakā ca na vaṭṭantīti sambandho. **Maṇikāti** ekā vaṭṭamaṇi. **Pīlakāti** sāsapamattikā muttarājisadisā bahuvaṭṭalekhā. **Daṇḍamhīti** pipphaladaṇḍake.

**268-9.** Araṇiyaṃ mālādi ca pattamaṇḍale bhittikammañca na vaṭṭatīti sambandhitabbaṃ. **Araṇiyanti** uttarāraṇi adharāraṇi araṇidhanukañca sāmāññena gahitaṃ. **Pattamaṇḍaleti** tipusīsādimaye pattamaṇḍale. Ettha pana makaradaṇḍakaṃ vaṭṭati. **Heṭṭhāti** kattarayaṭṭhiyā heṭṭhā. **Uddhanti** tassāyeva upari.

**270-3. Sammuñjanimhīti** sammūñjaniyā līngavipallāso. **Avāritanti** itthirūpaṃ pana vāritaṃ. **Sovaṇṇamayampīti** suvaṇṇamayampi. **Visāṇanāli** nāma visāṇamayā nāli. Ettha pana avuttānīpi yāni kānici āraṇḍakadantakaṭṭhachedanapānīyaghaṭapānīyaṭṭhāyāṇaṃ aṭṭhāyāṇaṃ anulomānīti veditabbāni. Yo panettha vinayaññū tādisaṃ parikkhāraṃ disvā chindeyya vā chindāpeyya vā, anupavajjo soti veditabbanti.

Parikkhāraniddesavaṇṇanā niṭṭhitā.

### 36. Bhesajjaniddesavaṇṇanā

**274-5.** Janassa bhesajjaṃ kātuṃ dātuṃ vattuṇca na labbhatīti sambandhiyaṃ. **Labbhatīti** ettha “bhikkhunā”ti kattā “**bhesajja**”nti vuttakammaṃ. Nanu ca **kātunti** bhāvasādhanattā tassa avuttakammenāpi bhavitabbaṃ bhāve vihitakitakappaccayānaṃ payoge kammakārakassāpi icchitabbattāti? Saccam, tathāpi padhānabhūtakammasattiyā abhidhāne sati appadhānakitakiriyābhisambandhena guṇibhūtā kammassati abhihitā viya viññāyati. Tathā ca vuttaṃ amhehi **yogavinicchaye** “padhānānuyāyitāya janavohārāya padhānasatyābhidhāne guṇassati abhihitā viya pakāsati”ti. **Janassāti** āgatāgatajanassa. Sahadhammīnañca pitūnañca tadupaṭṭhākabhikkhunissitabhaṇḍūnañca veyyāvaccakarassa ca bhikkhācariyaviññattisakehi bhesajjakaraṇaṃ labbhanti sambandho. Tattha **sahadhamminanti** saha caritabbo dhammo sīlasaddhāpaññāsāṅkhāto sahadhammo, so etesamatthīti sahadhammino, bhikkhu bhikkhunī sikkhamānā sāmāṇero sāmāṇerīti pañca, tesam. Pitā ca mātā ca **pitaro** ekasesanayena, ubhinnaṃ sāmāññaniddeso vā, tesam. **Bhikkhunissito** nāma yo vihāre sabbakammāni karonto bhikkhuṃ nissāya vasati. **Bhaṇḍu** nāma yo pabbajjāpekkho yāva pattacīvaraṃ paṭiyādiyati, tāva vihāre vasati, so paṇḍupalāso. **Veyyāvaccakarassāti** attano upaṭṭhākassa. Etesu pana mātāpitaro sace rajjēpi ṭhitā paccāsīsanti, akātuṃ na vaṭṭati. Mātaraṃ anāmasantena sabbam parikkammaṃ kātabbaṃ. Pitā pana sahatthēna nahāpanasambāhanādīni katvā upaṭṭhātabbo.

**276.** Pitā ca mātā ca bhātā ca bhaginī cāti dvando pitā...pe... bhaginiyo. Mahanto ca cūlo ca, mahācūlā ca te pitā...pe... bhaginiyo cāti kammadhārayo. Tā ādi yesanteti aññapadattho. Mahācūla-

saddā pitādi-saddehi paccekam yojetabbā “mahāpituno cūlapituno”tiādinā. **Ādi**-saddena panettha pitucchā mātulo, tesam dasannampi yāva sattamā kulaparivaṭṭā puttaparamparañca saṅgaṇhāti. Tesam sake bhesajjakaraṇam labbhanti yojanā. Tesam mahāpitādīnaṃ santake satī tena bhesajjakaraṇam labbhātīti attho. **Nāti** natthi ce. **Attaniyeti** bhikkhuno attano santake satīti attho. **Dātabbam tāvakālikanti** tāvakālikam katvā dātabbanti attho. Te pana sace paṭidenti, gahetabbam, no ce denti, na codetabbā. Yāva tassa dānam, tāva kālo assāti **tāvakālikam**. Nīko samāsante.

**277. Bhesajjakaraṇādīti ādi**-saddena anāmaṭṭhapiṇḍadānādīnaṃ gahaṇam, **hi**-saddo hetumhi, hi yasmā etesu kuladūsanādayo na ruhanti, tasmā tesam bhesajjakaraṇam labbham, attaniye ca satī dātabbanti evamettha attho daṭṭhabbo. **Na rūhatīti** na rohati nappavattati na hoti, āpattiṃ na janetīti adhippāyo. Tesam atthāya nītisāmaṇerehi vā bhesajjam āharāpetabbam, attano atthāya vā āharāpetvā dātabbam. Tehipi “upajjhāyādīnaṃ āharissāmā”ti vattasīsenā āharitabbam. Sace aññepi ye gilānā hutvā vihāram pavisanti, tesam sabbesampi apaccāsīsentena bhesajjam kātabbam. Saddham kulaṃ hoti bhikkhusaṅghassa mātāpituṭṭhānīyam, tatra ce koci gilāno hoti, tassatthāya “bhante, itthannāmassa rogassa kiṃ bhesajjam karontī”ti kappiyam katvā pucchanti, idañcidañca gahetvā karontīti vaṭṭati, bhikkhūhi aññamaññaṃ vā kathā kātabbā.

**278.** Channaṃ mātādīnañca dāmarikacorassa issariyassa anāmaṭṭho piṇḍapāto dātuṃ avāritoti yojetabbam. **Channanti** mātādīnaṃ channaṃ majjhe. **Mātādīnanti** bhikkhunissitam ṭhapetvā avasesānaṃ pañcannaṃ mātādīnaṃ. “Channa”nti pana yojanāya aṭṭhakathāya virujjhati. Tatha hi “mātāpitūna”ntiādinā bhikkhunissitam ohāya satteva vuttā. **Ācariyabuddhadattatherena** ca theveva vuttam –

“Anāmaṭṭhopi dātabbo, piṇḍapāto vijānatā;  
Dvinnam mātāpītūnampi, tadupaṭṭhāyakassa ca.

“Issarassāpi dātabbo, coradāmarikassa ca;  
Bhaṇḍukassattano ceva, veyyāvaccakarassapī”ti. (vinaya vi. 493-495);

**Dāmarikacorassāti** rajjam patthayamānassa pākaṭacorassa. **Anāmaṭṭhoti** apabbajitassa hatthato laddhā attanā aññena vā pabbajitena aggahitaaggo, ayam anāmaṭṭhapiṇḍapāto. Paṭisanthāro “vihārappattam āgantukam vā daliddādim vā disvā ‘pānīyam pivā’ti dātabbam, pādamakkhanatelaṃ dātabbam, kāle āgatassa yāgubhattam, vikāle āgatassa sace taṇḍulā atthi, taṇḍulā dātabbā, sayanaṭṭhānaṃ dātabbam, corānaṃ pana saṅghikampidātabba”nti vutto. Avasesapaṭisanthāro pana apaccāsīsentena kātabbo. Tathā dhammapaṭisanthāropi yassa kassaci dātabbova.

**279. Tesanti** aññātakādīnaṃ gihīnaṃ. **Kayirāti** “bhaṇathā”ti vutte kareyya. “Na karomā”ti vutte sace vipaṭisārino bhavissanti, kātabbam. **Nattanoti** attano suddodakehi na kayirāti yojanīyam. Evaṃ sāmāññaṃ paritte paṭipajjanavidhiṃ dassetvā idāni āṭānāṭiyaparitte paṭipajjitabbavidhiṃ dassetum “**bhaṇitabba**”ntiādimāha. **Bhaṇāpenteti** “bhaṇathā”ti ajjhesanapubbakam payojente. **Parittam sāsanogadhanti** paṭhamameva āṭānāṭiyasuttam abhaṇitvā sāsanapariyāpannam mettasuttam dhajaggasuttam ratanasuttanti imāni suddāni sattāham bhaṇitvā yathāparikkammaṃ parittam āṭānāṭiyaparittam bhaṇitabbanti yojanā.

**280.** “Āgantvā sīlam detu, dhammam parittañca bhāsātū”ti kenaci pesito gantvā sīlam vā dātuṃ dhammam parittam vā vattum labbhātīti sambandho.

Bhesajjaniddesavaṇṇanā niṭṭhitā.

### 37. Uggahaniddesavaṇṇanā

**281.** Puggala-saddamatte payutte attanopi gahaṇasambhavo siyāti byabhicāratthaṃ **añña-**saddappayogo. Sati sambhave byabhicāre viśesanam sātthakam hotīti. **Dasabhedampi ratananti** “muttā maṇi veḷuriyo saṅkho silā pavāḷam rajataṃ jātarūpaṃ lohitaṅko masāragalla”nti (pāci. 506) evaṃ vuttaṃ dasabhedampi ratanaṃ. **Uggaṇhantassāti** gaṇhantassa sampañcchantassa.

**282-3.** Tesu attatthaṃ uggaṇhantassa dvīsu nissaggīti sambandho. **Tesūti** tesu dasasu majjhe. **Dvīsūti** rajatajātarūpasāṅkhātesu dvīsu nissaggiyavattḥūsu. **Attatthanti** iminā navakammādīnaṃ pañcannaṃ atthāya dukkaṇṭanti dīpeti. **Sesesu dukkaṇṭanti** avasesesu aṭṭhasu sabbesampi atthāya uggaṇhantassa dukkaṇṭanti attho. Gaṇaṇca saṅghaṇca puggalaṇca anāmasitvā “cetyassa navakammaṃ dammī”ti vutte ca na paṭikkhipeti sambandhanīyaṃ. **Na paṭikkhipeti** iminā saṅghādīmaṃ āmasitvā vutte paṭikkhipanaṃ dīpeti. Paṭikkhitte “kappiyakāraṇaṃ vā hatthe bhavissati, mama purisānaṃ mayhameva vā hatthe bhavissati, kevalaṃ tumhe paccaye paribhuñjathā”ti vadati, vaṭṭati. Catupaccayatthāya ca dīnaṃ yena yena attho hoti, tadatthaṃ upanetabbaṃ. Tesam cīvaratthāya dīnaṃ cīvareyeva upanetabbaṃ. Sace cīvarena tādiso attho natthi, piṇḍapātādīhi saṅgho kilamati, saṅghasuṭṭhūyā apaloketvā tadatthāyapi upanetabbaṃ. Esa nayo piṇḍapātāgilānapaccayatthāya dīnepi. Senāsanatthāya dīnaṃ pana garubhaṇḍattā tattheva upanetabbaṃ, senāsanesu nassantesu jagganatthaṃ mūlacchejjaṃ akatvā avissajjetvā yāpanamattaṃ paribhuñjitabbaṃ.

**284.** Khettādīnaṃ kesaṇci dukkaṇṭavattḥūnaṃ sampañcchanūpāyaṃ dassetuṃ “**khetta**”ntiādi vuttaṃ. Tattha **khettanti** pubbaṇnaviruhanaṭṭhānaṃ. **Vatthunti** aparāṇṇaucchuphalādīnaṃ viruhanaṭṭhānaṃ. **Dāsapasvādikanti** dāsapasupupphārāmaphalārāmādikaṃ. Paṭikkhipitvā kappiyena kamena ca gaṇheyyāti sambandho. **Kappiyena kamena cāti** ettha **kama-**saddo vohārapaṭipāṭivacano, tasmā paresaṃ attano ca kappiyavohārakkamenevāti attho.

So ca **khettavatthūsu** tāva “cattāro paccaye paribhuñjathā”ti vā “kappiyakāraṇaṃ hatthe bhavissati”ti vā “saṅgho kappiyabhaṇḍam bhuñjatū”ti vā “sīmaṃ demā”ti vā parehi vutto, “sādhu, upāsaka migapakkhino ettha nibbhayā sukhena jīvissanti”ti attanā vā taḷāke yathāvutteneva “udakaṃ paribhuñjissanti, bhaṇḍakaṃ dhovissanti, migapakkhino pivissanti”ti parehi vā “sādhu, upāsaka, saṅgho pānīyaṃ pivissati”tiādīnā attanā vā **dāse** “ārāmikaṃ dammi, veyyāvaccakaraṃ dammi, kappiyakāraṃ dammī”ti vā **pasūsu** “pañcagorasaparibhogatthāya dammī”ti **ārāme** “vanaṃ dammī”ti evamādīnā vutto vedītabbo. Sace pana koci abyatto akappiyavohārena khettādīmaṃ paṭiggahaṇāti vā kāreti vā, taṃ bhikkhūhi na paribhuñjitabbaṃ, taṃ nissāya laddhaṃ kappiyabhaṇḍampi akappiyameva. Abyattena pana lajjībhikkhunā kārapitesu kiñcāpi paṭiggahaṇaṃ kappiyaṃ, bhikkhussa payogapaccayā uppanna missattā visagatapiṇḍapāto viya, akappiyamaṃsabhojanaṃ viya ca dubbinihbhogam hoti, sabbesaṃ akappiyameva.

**285-6.** Nava...pe... kiriyā ca anave mattikuddhāraṇaṇca bandho ca āḷiyā thirakāro ca anave kedāre atirekabhāggahaṇaṇca nave ca aparicchinnabhāge sasse “ettake dethā”ti kahāpaṇuṭṭhāpanaṇcāti sabbesampi akappiyanti sambandho. Mātikā ca kedāro ca taḷāko cāti dvando mātika...pe... taḷākā. Tesam kiriyāti samāso. **Anaveti** catupaccayavasena paṭiggahite purāṇataḷāke. Udakavasena paṭiggahite pana suddhacittānaṃ vaṭṭati. **Bandhoti** pāḷiyā bandho. Porāṇakedāre niyamitapakatibhāgattā āha “**anave**”ti. **Aparicchinnabhāgeti** “ettake bhūmibhāge ettako bhāgo dātabbo”ti evaṃ aparicchinnabhāge.

**287-9.** “Kasa vappa” iccādīmaṃ avatvā ca “ettakāya bhūmiyā ettako bhāgo deyyo”ti bhūmiṃ vā paṭiṭṭhāpeti, tassevetamakappiyanti sambandho. **Ca-**saddo avadhāraṇe. **Paṭiṭṭhāpeti**ti yo bhikkhu paṭiṭṭhāpeti. **Tassevāti** tassa paṭiṭṭhāpakabhikkhusseva. **Etanti** paṭiṭṭhāpitabhūmito laddhadhaññaṃ “ettake bhūmibhāge sassaṃ kataṃ, ettakaṃ gaṇhathā”ti evaṃ vadante pamānagaṇhanatthaṃ daṇḍarajjubhi minane vā khale ṭhatvā rakkhaṇe vā taṃ nīharāpane vā koṭṭhāgarādipatisāmane vā etaṃ tasseva akappiyanti sambandhanīyaṃ. **Paṭiṭṭhāpeti cāti** so bhikkhu paṭiṭṭhāpeti ca. **Katanti** amhehi kataṃ. **Vadantevanti** evaṃ kassake vadante. **Pamāṇanti** bhūmippamāṇaṃ. **Nīharāpaneti** khalato

gehassa nīharāpane. **Etanti** mitaladdharakkhitādikaṃ. **Tassevāti** mānakarakkhakādino eva. Apubbassa anuppāditattā aññesaṃ kappatīti āha “**tassevetamakappiya**”nti.

**290.** Paṭisāmanappasaṅgenāha “**paṭisāmeyyā**”tiādi. Pitusantakampi gihisantakam yaṃ kiñcīti sambandho. **Pitusantakanti** pitā ca mātā ca pitaro, tesam santakam. **Gihisantakanti** iminā pañcannam sahadhammikānam santakam yaṃ kiñci parikkhāram paṭisāmetuṃ vaṭṭatīti dīpeti. **Yaṃ kiñcīti** kappiyam akappiyam vā antamaso mātukaṇṇapīlandhanatālapaṇṇampi. **Bhaṇḍāgārikasīsenāti** sīsaṅgamiva padhānam yaṃ kiñci “sīsa”nti idha upacāravasena vuccati, tathā bhaṇḍāgārikasaddopi bhāvappadhāno, bhaṇḍāgāriko bhaṇḍāgārikattam sīsam padhānanti visesanaparapade kammadhārayo, tena, bhaṇḍāgārikattassa padhānakaṇṇenāti attho.

**291-2.** **Avassam paṭisāmiyanti** avassam saṅgopetabbaṃ. **Vuttepīti** mātāpitūhi vuttepi.

**293-4.** Vaḍḍhakiādayo vā rājavallabhā vā “sakam parikkhāram vā sayanabhaṇḍam vā paṭisāmetvā dehī”ti yadi vadanti, chandatopi bhayāpi na kareyyāti yojanā. **Parikkhāranti** vāsipharasuādiupakaraṇabhaṇḍam. **Chandatopi bhayāpīti** vaḍḍhakiādisu chandena, rājavallabhesu bhayena.

**295-6.** Paṭisāmituṃ vaṭṭatīti yojetabbaṃ. **Saṅkantīti** yādise padese “bhikkhūhi vā sāmaṇerehi vā gahitaṃ bhavissatī”ti saṅkam uppādentī, tādise vihāravasathassantoti yojaniyam. **Vihāravasathassāti** vihārassa ca āvasathassa ca. **Ratananti** dasavidham ratanam. **Ratnasammatanti** vatthādikaṃ. **Nikkhipeyyāti** sāmike diṭṭhe niyametvā dātuṃ “ettakā kahāpaṇā”tiādinānurūpena mattikalañchanādinimittena vā saññānam katvā nikkhipeyya. **Gahetvānāti** tādise asati attanāva gahetvā. **Tādiseti** ratane vā ratanasammate vā satī. **Sāmikānāgamam** nītvāti yadi attani āsaṅkanti, maggā okkamma nisīdiya pacchā sāmikānam anāgamanam viññāya. **Patirūpanti** ratanasammate paṃsukūlaggahaṇam ratane nirussukkagamananti evarūpaṃ bhikkhūnam anurūpanti.

Uggahaniddesavaṇṇanā niṭṭhitā.

### 38. Dūsanāniddesavaṇṇanā

**297.** **Dadatoti**asantakam parasantakañca dentassa. **Kuladūsanadukkaṭanti** attano duppaṭipattiyā kulānam dūsanam pasādavināsanam kuladūsanam, tena dukkaṭam kuladūsanadukkaṭam.

**298.** Ettha saṅghikaṃ garubhaṇḍam issarena dentassa thullaccayanti sambandho. **Etthāti** etesam pupphādīnam majjhe. **Issarenāti** taddhitalopena vuttam, issariyena issaravatāyāti attho. **Dentassāti** kulasaṅgahatthāya issaravatāya dadato. **Thullaccayanti** kulasaṅgahatthāya dadato “kuladūsanadukkaṭa”nti sāmāññavihitadukkaṭena saddhiṃ “pañcimāni, bhikkhave, avissajjiyāni, na vissajjetabbāni saṅghena vā gaṇena vā puggalena vā, vissajjitānīpi avissajjitāni honti. Yo vissajjeyya, āpatti thullaccayassā”ti (cūḷava. 321) evam vuttathullaccayanti attho. Aññattha thullaccayameva. Senāsanatthāya niyamitepi eseva nayo. Saṅghassa santakam theyyā dentassa dukkaṭādīnīti sambandhitabbaṃ. **Dentassāti** vuttanayameva. **Dukkaṭādīnīti** kulasaṅgahatthāya dadato kuladūsanadukkaṭena saddhiṃ māsake vā ūnamāsake vā dukkaṭam, atirekamāsake vā ūnapañcamāsake vā thullaccayam, pañcamāsake vā atirekapañcamāsake vā pārājikanti evam dukkaṭādīni hontīti attho. Aññattha dukkaṭādīneva.

**299-300.** Kulasaṅgahattham phalapupphūpagam rukkham sabbathā ropetuñca ropāpetuñca jaggituñca na vaṭṭatīti sambandhanīyam. **Ca**-saddo ocinituṃ ocināpetuṃ, ganthituṃ ganthāpetunti ca avuttāni ca samuccinoti. Phalapupphāni sampādanavasena upagacchatīti **phalapupphūpagam**. **Sabbathāti** kappiyavohāraakappiyavohārapariyāyaobhāsanimittakammavasena sabbappakārenea. Tattha **kappiyavohāro** nāma “īmam rukkham jāna, īmam āvāṭam jāna, īmam mālāvaccham jāna, ettha

udakaṃ jānā’’ti vacanaṃ, sukkhamātikāya ujukaraṇaṅca. Tabbipariyāyena **akappiyavohāro** nāma. **Pariyāyo** nāma “paṇḍitena mālāvacchādayo ropāpetabbā, na cirasseva upakārāya saṃvattanti’’tiādivacanaṃ. **Obhāso** nāma kuddālakhaṇittādīni ca mālāvacche ca gahetvā ṭhānaṃ. **Nimittakammaṃ** nāma kuddālaudakabhājanādīnaṃ āharitvā samīpe ṭhapanāṃ. **Jaggitunti** vadanti udakasecanādīni katvā. Ganthanaganthāpanesu pana sabbāpi cha pupphavikatiyo veditabbā ganthimaṃ gopphimaṃ vedhimaṃ veṭhimaṃ pūrimaṃ vāyimanti. Nāmavaseneva panetesam viseso veditabbo. Tam pana kulasaṅgahato aññatrāpi bhikkhussa kātumpi akappiyavacanena kārāpetumpi na vaṭṭati. “Evaṃ jāna, evaṃ kate sobheyya, yathā etāni pupphāni na vikiriyaṃti, tathā karohī’’tiādinā pana kappiyavacanena kārāpetuṃ vinā kulasaṅgahaṃ vaṭṭati. **Ropanādīni**ti akappiyapathaviyaṃ ropāpanasiṅcāpanādīni, aññattha ropanādīni.

**301-2.** Idāni pupphadānādīsu aṭṭhasu kulasaṅgahavattḥūsu avasesāni dve dassetuṃ “**vuttāvā**’’tiādimāha. **Vuttāva micchājīvavivajjanāyaṃ** vuttā eva. Jaṅghapesane vinicchayo vuccatīti pāṭhaseso. Pitaro bhaṇḍuṃ sakaṃ veyyāvaccakaraṃ ṭhapetvā gihikammesu dūtasāsaṃ haraṇe padavārena dukkaṇṭanti sambandho. Sahadhammikesu vattabbameva natthīti pitādayova vuttā. **Gihikamasūti** visayasattamī. **Padavārenāti** padakkamena, pade padeti adhippāyo. Paṭhamam sāsanaṃ aggahetvāpi puna vadato dukkaṇṭanti yojetabbam. **Punāti** pacchā. “Ayaṃ dāni so gāmo, handa naṃ sāsanaṃ ārocemī’’ti maggā okkamantassa ca pade pade vadato ca dukkaṇṭanti adhippāyo. Tassa pana sāsanaṃ paṭikkhipitvā sayameva kāruṅṅhe ṭhitena gantvā attano patirūpaṃ sāsanaṃ ārocetuṃ, “mama vacanena bhagavato pāde vandathā’’tiādikam gihīnaṃ kappiyasāsanaṃ harituṅca vaṭṭati.

**303.** **Abhūtārocanarūpiyasamvohāruggahādisāti** abhūtārocanāya rūpiyasamvohāre ca uggahe uppannapaccaye ādisanti kathenti pakāsentīti abhūtā...pe... hādisā, taṃsadisāti vuttaṃ hoti.

**304.** Pitūnaṃ harāpetvā haritvāpi pupphāni vatthupūjatthaṃ dātuṃ, sesañātīnaṃ pattānaṃ vatthupūjatthaṃ dātuntī yojanīyaṃ. “Harāpetvā haritvā’’ti vutte “pakkosivā pakkosāpetvā vā’’ti vuttameva siyāti na vuttaṃ. **Pattānanti** pakkosakena pattāpi gahitā. **Vatthupūjatthanti** ratanattayapūjanatthaṃ. Upāsakānampi pana sampattānaṃ vatthupūjatthaṃ dātuṃ vaṭṭatiyeva. **Liṅgādipūjatthanti** sivaliṅgagiṇḍubimbādipūjanatthaṃ.

**305.** **Tathā phalanti** iminā pupphe vuttaṃ sabbam apadisati. **Paribbayavihīnānanti** paribbayam pātheyyam vihīnaṃ naṭṭham yesam āgantukānanti samāso. **Saparanti** attano vissāsikā. **Aṭṭhakathāyam** (pārā. aṭṭha. 2.436-437) pana “attano santakamyevā’’ti vacanaṃ thullaccayādivibhāgato mocetvā vuttaṃ.

**306.** Sammatena deyyanti yojanā. **Deyyanti** catutthabhāgaṃ dātabbam. Itarena tu apaloketvā dātabbanti sambandhitabbam. **Itarena tu** asammattena pana.

**307.** **Paricchijjāti** “ettakāni phalāni dātabbāni’’ti evaṃ phalaparicchidena vā “imehi rukkhehi dātabbāni’’ti evaṃ rukkharicchidena vā paricchinditvā. **Tatoti** paricchinnaphalato rukkhatto vā. Yācamānassa gilānassetarassa vāti sambandhanīyaṃ. **Rukkāvā dassiyāti** “idha phalāni sundarāni, ito gaṇhathā’’ti avatvā “ito gahetuṃ labbhati’’ti rukkāvā vā dassetabbā.

**308.** Idāni aṭṭhasu pupphādīnaṃ catunnaṃ vinicchayaṃ dassetvā yathāvuttaphalapupphavinicchayaṃ avasesesu catūsu apadisanto “**sirīsā**’’tiādimāha. **Sirīsacuṇṇakasavādicuṇṇeti** kasāvaṃ yaṃ kiñci ādi yassa, tameva cuṇṇam, sirīsacuṇṇaṅca kasāvādicuṇṇaṅcāti samāso. “Sirīsacuṇṇam vā aññaṃ vā kasāva’’nti hi **aṭṭhakathāyam** (pārā. aṭṭha. 2.436-437) vuttaṃ. “Kasāvādī’’ti vattabbe rassena vuttaṃ. **Sesesūti** veḷuādīsu tīsu. Pāḷiyā avuttassāpi **aṭṭhakathāyam** vuttattā āha “**paṇṇampettha pavesaye**’’ti. **Etthāti** pupphādīsūti.

Dūsananiddesavaṇṇanā niṭṭhitā.

### 39. Vassūpanāyikaniddesavaṇṇanā

**309-310.** Purimikā pacchimikā iti vassūpanāyikā duveti sambandho. Āsālhipuṇṇamāya anantare pāṭipadadivase upagantabbā pacchimikāya pure bhavāti purimā, sā eva **purimikā**. Tato pacchā bhavā aparāya puṇṇamāya anantare pāṭipadadivase upagantabbā **pacchimikā**. Upanayanam pāpuṇanam upagamanam upanāyikā, **vassanti** vuṭṭhi, idha pana vassakālam “vassa”nti upacārena gahetvā tattha vāso upacāreneva “vassa”nti vuccati, vassassa vassāvāsassa upanāyikā vacībhedavasena vā ālayakaraṇavasena vā upagamanam **vassūpanāyikā**. Tattha ālayapariggāho ca vacībhedo cāti purimikā vassūpanāyikā duve, ālayapariggāho ca vacībhedo cāti pacchimikā vassūpanāyikā duvebhi sambandhitabbaṃ. **Tatthāti** tāsū dvīsu. Tadubhayaṃ dassetuṃ “**ediso**”tiādi vuttaṃ. So ālayapariggāho ca vacībhedo ca “imasmim vihāre imaṃ temāsaṃ vassaṃ upemi, idha vassaṃ upemi”ti ediso, etādisoti attho. Ettha ca kamuppattianādarā vacībhedo paṭhamam vutto. Ubhayathā vassaṃ upagantum vaṭṭati. Teneva **aṭṭhakathāyaṃ** (vi. saṅga. aṭṭha. 179; mahāva. aṭṭha. 207) “sacepi ‘idha vassaṃ vasissāmī’ti ālayo atthi, asatiyā pana vassaṃ na upeti, gahitasenāsanam suggahitaṃ, chinnavasso na hoti, pavāretum labhatiyeva, vināpi hi vacībhedaṃ ālayakaraṇamattenapi vassaṃ upagatameva hoti”ti vuttaṃ. Nāvāsattavajesu pana pariyesitvā senāsanam alabhantena ālayakaraṇamatteneva upagantabbaṃ. Upagacchantena ca vihāram paṭijaggitvā pānīyaṃ paribhojanīyaṃ upaṭṭhāpetvā sabbaṃ cetiyavandanādisāmīcikkammaṃ niṭṭhāpetvā upagantabbaṃ. Ālayapariggahe ālayam dassetuṃ “**cittuppādettha ālayo**”ti āha. **Etthāti** dvīsu.

**311.** **Tadahūti** tasmim vassūpanāyikadivase. **Jānanti** “ajja vassūpanāyikā”ti jānanto, **anupagacchatotimassa** viśesaṃ.

**312.** **Dutiyaṃ** pacchimikaṃ. **Anupagatoti** kenaci antarāyena purimikaṃ anupagato. **Temāsanti** purimaṃ vā temāsaṃ pacchimaṃ vā temāsaṃ. Vassaṃ upagantvā pana aruṇam anuṭṭhāpetvāpi tadaheva sattāhakarāṇīyena pakkamantassāpi antosattāhe nivattentassāpi anāpatti.

**313-5.** Mātāpitūnam pañcannaṃ sahadhammikānañca atthāya gilānatadupaṭṭhākabhantaṃ osadhañca esissaṃ vā pucchissāmī vā upaṭṭhissaṃ vā gantvā aham nābhirataṃ vūpakāseṣsaṃ vā kukkucchaṃ vinodanañca diṭṭhim vivecanañca garukādikaṃ vuṭṭhānaṃ vāpi ussukkaṃ vāpi karissaṃ vāpi kāreṣsaṃ vāpīti evamādinā sattāhakkicena pahitepi vā apahitepi vā gantum labbhanti yojanā.

Ettha pana labbhamānakavasena yojetvā vakkhamānanayena attho veditabbo. Mātādisutiyaṃ teyeva gilāna-saddena gayhanti, tesam upaṭṭhākā tadupaṭṭhākā, gilānā ca tadupaṭṭhākā ca, tesam bhattanti samāso. **Osadhanti** tesameva gilānānaṃ bhesajjaṃ. **Esissanti** pariyesissāmī. **Pucchissāmīti** teyeva sattaṃjane gilāne pucchissaṃ. **Upaṭṭhissanti** teyeva gilāne upaṭṭhahissāmī. Abhiramatīti abhirato, visabhāgarūpādidassanena sāsane na abhirato **nābhirato**. Abhiramaṇam vā abhirataṃ, natthi abhiratamassāti **nābhirato**, taṃ. Sahadhammikesu yo nābhirato, taṃ **vūpakāseṣsaṃ** vikkhepahaṇatthaṃ aññattha nayissāmī. **Kukkuccanti** pañcannaṃyeva uppannaṃ vinayakukkucchaṃ. Kitakayoge vikappena dutiyā. **Diṭṭhinti** tesameva micchādiṭṭhiyā. **Garukamādikanti** garukaṃ ādi yassāti viggaho. **Ādi**-saddena sāmaṇerānaṃ vassapucchanam, sikkhāsamādayitukāmatā, tajjanīyādikammakaraṇam saṅgahitaṃ. **Vuṭṭhānanti** bhikkhuno garukāpattiyā parivāsamānattadānādīhi vuṭṭhānaṃ. **Ussukkanti** vassapucchanādiussukkaṃ. **Evamādināti** ettha **ādi**-saddena diṭṭhigatādīnaṃ dhammakathākaraṇādīṃ saṅgaṇhāti. **Gantum labbhanti** ettha gacchantena antoupacārasīmāyaṃ ṭhiteneva “antosattāhe āgacchissāmī”ti ābhogaṃ katvā gantabbaṃ. Sace ābhogaṃ akatvā upacārasīmaṃ atikkamati, chinnavasso hotīti vadanti. **Sattāhakkicēnāti** sattāhassa labbhamānakaṃ vuttaṃ vakkhamānañca saṅghakammādi kiccaṃ sattāhakkiccaṃ. Sattamaaruṇamattasseva vihāre uṭṭhāpanīyattā sattāhassa sākallena gahaṇam.

**316.** **Saṅghakamme vajeti** saṅghassa kicce uposathāgārādīsu senāsanesu vā cetiyachattavedikādīsu vā antamaso puggalikasenāsanesu vāpi kattabbanimitte vajeyyāti attho. Dhammasavanatthaṃ nimantito

vāpi vaje, garūhi pesito vāpi vaje, garūnaṃ passituṃ vāpi vajeti yojetabbaṃ. **Nimantitoti** ettha sace paṭhamānye va katikā katā hoti, “asukadivasāṃ nāma sannipatitabba”nti nimantitoyeva nāma hoti. **Garūhīti** ācariyupajjhāyehi. **Pahitoti** bhaṇḍadhovanādiatthāya pesito. **Passitunti** agilānepi.

**317.** Bhaṇḍa...pe... dassane na vajeti yojanīyaṃ. Etthāpi nimittatthe sattamī. **Bhaṇḍaṃ** nāma cīvaraṃ. **Ñāti** mātāpitūhi aññe. **Upaṭṭhākā** upāsakā. “Ajjeva āgamissa”nti adūrago na pāpuṇeyya, labbhanti sambandho. **Labbhanti** imassa apāpuṇanaṃ vuttakammaṃ. **Ajjevāgamissanti** sāmantavihāraṃ gantvā puna āgacchantassa antarāmagge sace aruṇuggamaṃ hoti, vassacchedopi na hoti, ratticchedadukkaṭṭhaṃ natthīti vadanti.

**318. Sesañātīhīti** mātāpitūhi avasesañātīhi. **Niddisitivāvāti** dānadhammasavanādīni. “Pahite pesite”ti cettha “labbha”nti anuvattanīyaṃ.

**319. Attano antarāye satīti** corasarīsapavāḷajīvitabrahmacariyantarāye, antamaso bhesajjālābhapatirūpaupaṭṭhākālābhepi. “Vassacchedakāraṇampi sattāhakarāṇīyaṃ siyā”ti keci porāṇā vadanti, taṃ yuttaṃ viya dissati, sabbathā vassacchedena bahi vāsāya anuññātakāraṇaṃ sattāhamattaṃ bahi vītināmetvā antovihāreyeva vāsena vassacchedākāraṇaṃ kathaṃ nāma na siyāti. Chinnavasso no pavārayeti sambandho.

**320.** “Asenāsanikenā”ti imināva viññāyamānatthatepi “**ajjhokāse cā**”ti vacanaṃ “ahaṃ abbhokāsiko, kiṃ me senāsanenā”ti vāsānivattanatthaṃ vuttaṃ. **Rukkhasa susireti** suddhe rukkhāsusire. Mahantassa pana susirassa anto padaracchadanakuṭikaṃ katvā pavisanadvāraṃ yojetvā upagantaṃ vaṭṭati. “Viṭapepi aṭṭakaṃ bandhitvā”tiādi vuttanayameva. Tathā chattacāṭīsūpi tadanurūpena veditabbaṃ. **Chavakuṭi** nāma ṭaṅkitamañcādibhedā kuṭi. Tattha **ṭaṅkitamañco** nāma dīghe mañcapāde majjhe vijjhivā aṭṭaniyo pavesetvā kato, catunnaṃ pāsāṇaṃ upari pāsāṇaṃ attharivā katampi ṭaṅkitamañco.

**321. Asenāsanikenāti** yassa tiṇapaṇṇaiṭṭhakasilāsudhāsankhātānaṃ pañcannaṃ chadanānaṃ aññatarena channaṃ yojitadvārabandhanaṃ senāsaṇaṃ natthi, tena. Idaṃ pana vacībhedaṃ katvā adhiṭṭhānaṃ sandhāya vuttanti vadanti, tadayuttaṃ, tathā ca satī nāvādīsu viya viṣuṃ vidhānena bhavitabbanti. **Nāvāsattavajūpagoti** iminā asenāsanikena nāvādīsu vassaṃ upagantaṃ vaṭṭatīti dīpeti. Tattha ca kuṭikaṃ pariyesitvā labhantena tattha pavisitvā vihārābhāvato “vihāre”ti avatvā “idha vassaṃ upemī”ti tikkhattuṃ vattabbaṃ, alabhantena ālayo kātabbo. **Pavāretuñcāti ca**-saddena vassacchedanimittāya āpattiyā abhāvaṃ sampiṇḍeti. “Vaje satthe nāvāyanti tīsu ṭhānesu natthi vassacchede āpatti, pavāretuñca labbhatī”ti (mahāva. aṭṭha. 203) **aṭṭhakathāyaṃ** vuttaṃ. Vassacchedeti ca “anujānāmi, bhikkhave, yena vajo tena gantu”nti (mahāva. 203) vuttattā, satthassa nāvāya ca gamanasabhāveneva ṭhitattā ca vassūpagataṭṭhāne avasitvā aññattha gamanamattaṃ sandhāya vuttanti veditabbaṃ.

Vassūpanāyikaniddesavaṇṇanā niṭṭhitā.

#### 40. Avebhaṅgiyaniddesavaṇṇanā

**322-5.** Ārāmā...pe... mattikabhaṇḍānīti ete pañca avibhājjīyāti sambandhitabbaṃ. **Pañcāti** “ārāmārāmavattthūni eka”ntiādinā rāsivasena pañca, sarūpavasena panetāni paṇṇaṃ tiṇe pakkhipitvā pañcavīsatividhāni honti. Tathā cāha –

“Dvisaṅgahāni dve honti, tatiyaṃ catusaṅgahaṃ;  
Catutthaṃ navakoṭṭhāsaṃ, pañcamaṃ aṭṭhabhedanaṃ.

“Iti pañcahi rāsīhi, pañcanimmalalocano;

Pañcavīsavidham nātho, garubhaṇḍam pakāsayī'ti. (cūlava. aṭṭha. 321);

Tattha **ārāmo** nāma pupphārāmo vā phalārāmo vā. **Ārāmavattu** nāma tesamyeva patiṭṭhānokāso, vinaṭṭhesu vā tesu porānakabhūmibhāgo. **Vihāro** nāma pāsādādi yaṃ kiñci senāsanam. **Lohakumbhī** nāma kājalohena vā tambalohena vā katakumbhī. **Kaṭāhādīsūpi** eseva nayo. Ettha **bhāṇakanti** araṅjaro vuccati. **Vārakoti** ghaṭo. Rāsiṃ apekkhitvā **eteti** pulliṅganiddeso. **Avibhājiyāti** mūlacchejjasena avebhaṅgiyā. Parivattanavasena pana paribhuñjantassa vissajjentassa ca anāpatti. **Avissajjiyāni cāti ca-**saddena avebhaṅgiyāni cāti avuttam sampiṇḍeti.

**326-8.** Ekantagarubhaṇḍattā ādito tayo rāsī ṭhapetvā catuttharāsito paṭṭhāya garubhaṇḍagarubhaṇḍe vibhajitum **“valli”** tiādi āraddham. Aḍḍhabāhumattāpi valli ca aṭṭhaṅgulāyato veḷu ca muṭṭhimattampi tiṇḍādi ca ekampi paṇṇaica pākātā vā pañcavaṇṇā vā tālapakkappamāṇāpi mattikā ca tālapakkappamāṇāpi sudhā ca tālapakkappamāṇāpi kaṅguṭṭhaādikā ca dinnā vā tatthajātakā vā saṅghikā rakkhitā abhājiyā, rajjuyottādi ca dinnā saṅghikā abhājiyāti yojanā. **Veḷu** pariṇāhato paṇṇasūcidaṇḍamatto gahetabbo. **Tiṇam** muñjam pabbajañca ādisaddasaṅghitam ṭhapetvā avasesam yaṃ kiñci tiṇam. **Paṇṇo** aṭṭhaṅgulappamāṇo rittapotthako garubhaṇḍameva. **Pākātāti** pakatiyā jātā. **Pañcavaṇṇāti** rattasetādipañcavaṇṇā. Sudhākaṅguṭṭhādayo mattikaggahaṇena gahitā. **Kaṅguṭṭhaādikāti ādi-**saddena sajjurasajātihiṅgulakādīnam gahaṇam. **Dinnāti** saṅghassa dinnā. **Tatthajātāti** saṅghikabhūmiyam jātā. **Rajjuyottādīti** suttamakacivākanālikeraḥiracammamayā rajju ca yottādi ca. **Ādi-**saddena makacivākādike vaṭṭetvā katā ekavaṭṭā gahitā. Byatirekavasena panettha catuttharāsīmhi itare bhājiyāti veditabbā. Saṅghike kamme, cetiyassa vā kamme niṭṭhite bhājiyāti yojanīyam.

**329.** Lohabhaṇḍesu bhikkhusārupam pattādi vā tathā vipakatākataṃ lohabhaṇḍam tathā pādagaṇhakam vārakam bhājiyanti yojanā. **Pattādīti** ayopatto ayathālakaṃ tambalohathālakaṃ añjanisalākā kaṇṇamalahaṇā sūci paṇṇasūci khuddako pipphalako khuddakaṃ āraṇḍakaṃ kuñcikā tālādi. **Vipakatanti** apariniṭṭhitam. **Akatanti** sabbaso akataṃ. **Pādagaṇhakanti** sihaḷadīpe pādagaṇhanakam. **Pādo** nāma catutthamso, magadhanāliya pañcanālimattā. **Magadhanāli** ca nāmesā ūnapañcapasatā veditabbā. Tathā ghaṭako telabhājanañca. Yāya vāsiyā ṭhapetvā dantakaṭṭhacchedanam vā ucchutacchanam vā aññam mahākammaṃ kātum na sakkā, ayam bhājiyā. Sammuñjanidaṇḍakhaṇanakam pana adaṇḍakaṃ phalamattameva, yaṃ sakkā sipāṭikāya pakkhipitvā pariharitum, ayam bhājanīyā. Tipukoṭṭakaupakaraṇesu tipucchedanakasatthakam suvaṇṇakārūpakaraṇesu suvaṇṇacchedanakasatthakam cammakāraupakaraṇesu cammachindanakam khuddakasattham nahāpitatuṇṇakāraupakaraṇesu ṭhapetvā mahākattarim mahāsaṇḍāsañca mahāpipphalakañca sabbāni bhājanīyabhaṇḍāni. Tathā kuñcikā. Vuttavipallāsena pana lohabhaṇḍe abhājiyāti veditabbā.

**330.** **“Veḷumhī”** tiādinā dārubhaṇḍāni dasseti. Dārubhaṇḍena pana saṅghetvā sabbāpi dāruveḷucammupāhanādivikati veditabbā. Chattadaṇḍo ca salākā cāti dvando. Upāhanāya daṇḍako **upāhanadaṇḍako**.

**331.** **Anuññātavāsidaṇḍoti** anuññātavāsiyā daṇḍo. **Araṇañjanisiṅgādīti ādi-**saddena añjanisalākā chattaṃ muṭṭhipaṇṇam upāhanā dhammakaraṇo pādagaṇhanakato anatirittam āmalakatumbaṃ āmalakaghaṭo lābukatumbaṃ lābukaghaṭo visāṇatumbanti idam saṅgaṇhāti.

**332.** Yathāvuttato aññam dārubhaṇḍesu garubhaṇḍam. Mattikāmayo pādagaṇḍako bhājiyoti yojanā. **Pādagaṇḍakoti** pādassa pahonako ghaṭako. Iminā mattikābhaṇḍam upalakkheti, tasmā patto thālakaṃ kuṇḍikāti imāni bhājanīyāni, vuttāvasesā abhājiyā.

**333-4.** Garunā garubhaṇḍaṇca thāvarena parivatteyya, thāvarena ca thāvarampi parivatteyyāti yojetabbam. **Garunā** mañcapīṭhādinā. **Thāvaranti** ārāmādi paṭhamarāsivayam. **Tathā katvā ca**



**bhuñjitunti** evañca parivattetvā tato ābhatam kappiyabhaṇḍam paribhuñjeyyāti attho, vidhimhi ayam tumpaccayo. Phātikammaena vallādiṃ gaṇheti sambandhanīyam. **Phātikammaṃ** nāma samakam vā atirekam vā tadagghanakam vā vaḍḍhikammaṃ. **Sesanti** paṭhamarāsittikanti.

Avebhaṅgiyaniddesavaṇṇanā niṭṭhitā.

#### 41. Pakiṇṇakaniddesavaṇṇanā

**335.** Sadvārabandhane sodukkhalakapāsake ṭhāne divā sayantena parivattakam dvāram bandheyyāti sambandho. Dvārañca dvārabandhanañca dvārabandhanāni majjhepadalopavasena, bandhana-saddeneva vā dvārabāhā vuccanti, saha dvārabandhanehīti **sadvārabandhanam**, ṭhānam. Heṭṭhā udukkhalakañca upari pāsako ca, saha udukkhalapāsakehīti samāso. Tādise ṭhāne pākārādiparikkhepena bhavitabbanti parikkhitteti viññāyati. So ca uccato sahaseyyappahonake vuttanayoti vadanti. **Sayantenāti** pāde bhūmito mocetvā nipajjantena. **Parivattakanti** saṃvaraṇavivaraṇavasena ito cito ca parivattanayoggaṃ. **Dvāranti** antamaso dussasāṇidvārampi. **Bandheyyāti** sabbantimena vidhinā yāvatā sīsam na pavisati, tāvatāpi bandheyya, saṃvareyyāti vuttam hoti.

**336. Ābhogo cāpīti** “esa jaggissatī”ti ābhogo cāpi. **Ca-saddena** “dvāram jaggāhī”ti vacanampi samuccinoti. **Savase tam ākāram vināti** sassa attano vase āyatte ṭhāne, yattha pana bahūnam sañcaraṇattā dvāram saṃvutampi saṃvutaṭṭhāne na tiṭṭhati, dvāram alabhantā pākāram abhiruhitvāpi vicaranti, tādise pariveṇe saṃvaraṇakiccaṃ natthi. Atha vā sassa vaso āyatto, na yakkhādīnam tehi gahitakattassa, bandhitvā nipajjāpitattassa ca abhāvenāti **savaso**. Tasmim sati pubbe vuttadvāram saṃvaraṇāābhogakaraṇavacanasankhātam ākāranti attho.

**337. Ratanānīti** muttādīni dasavidhāni. Tattha pana jātiphalikam upādāya sabbopi maṇi veluriyopi lohitaṅko masāragallo ca dhotāpi adhotaviddhāpi anāmāsā, kācamaṇi ca pānīyasaṅkho dhoto adhotopi āmāsā, silā dhotaviddhā suvaṇṇena saddhim pacitā muggavaṇṇā ca anāmāsā. Cetiyaḅharagopakānam suvaṇṇacetiye kacavaremeva haritum vaṭṭati. Arakūṭalohampi jātarūpagatikameva. **Itthirūpānīti** antamaso piṭṭhamayaitthirūpānīpi. **Dhaññanti** antamaso tathajātakampi magge pasāritampi sattavidham dhaññam. Kīḷāvasena aparāṇṇāni tālaphalādīnīpi anāmāsāni, pasāritampi na maddantena gantabbam, asati magge maggaṃ adhiṭṭhāya gantabbam. **Itthipasādhananti** antamaso piḷandhanatthāya ṭhapitam nivāsanatālapaṇṇamuddikampi.

**338. Sitthatelodatelehīti** madhusitthakaniyyāsādīsu yena kenaci telamissakasilesena ca udakamissakatelena ca. **Phaṇahatthaphaṇehīti** phaṇamiva phaṇam, aṅgulīhi phaṇakiccakaraṇena hatthoyeva phaṇam hatthaphaṇam, dantamayādi yaṃ kiñci phaṇaṅceva hatthaphaṇaṅcāti dvando. **Osaṅtheyyāti** olikhitvā sannisīdāpeyya.

**339.** Ekapāvuraṇā vā ekattharaṇā vā na tuvaṭṭayum, ekamañce na tuvaṭṭayunti yojanā. Ekaṃ pāvuraṇam ekaṃ attharaṇam etesanti viggaho. **Na tuvaṭṭayunti** na nipajjeyyum. Ekasmim bhājane vāpi na bhuñjeyyunti yojetabbam.

**340.** Manussānam pamāṇaṅgulena aṭṭha aṅgulāni yassa, adhikena sahitaṃ aṭṭhaṅgulanti samāso. **Lasuṇam** magadhesu jātam āmalakabhaṇḍikam lasuṇam na khādeyyāti sambandho. **Na akallakoti** agilāno.

**341.** Hīnukkaṭṭhehi jātiādīhi ukkaṭṭham vā hīnam vā ujum vā aññāpadesena vā davā vade, dubbhāsītanti sambandho. **Jātiādīhīti** jātināmagottakammasippāābādhalīṅgakilesaāpattiakkosehi. **Ukkaṭṭhanti** jātyādīhiyeva ukkaṭṭham upasampannam anupasampannam vā. **Davāti** keḷihasādhippāyatāya. **Ujum vāti** “caṇḍalosī”tiādīnā nayena. **Aññāpadesena vāti** “santi idhekacce caṇḍalā”tiādīnā nayena.

**342. Dīghe nakheti** maṃsappamāṇato. **Dīghe keseti** dvaṅgulato. Sacepi na dīghā, dumāsato ekadivasampi atikkāmetuṃ na labhati. **Dīghe nāsalometi** nāsato bahi nikkhante. **Vīsatiṃmaṭṭhanti** vīsatiyā nakhānaṃ maṭṭhañca. **Sambādheti** ubhosu upakacchakesu, muttakaraṇe ca lomahāraṇaṃ na labbhāti sambandhanīyaṃ. **Na labbhāti** ete maṭṭhādayo na labbhantīti attho, nipāto vā **labbhāti**. Ābādhapaccayā pana sambādhe lomāṃ saṃharituṃ vaṭṭati.

**343.** Saṅghuddiṭṭhaṃ vā saṅghikaṃ vā sayanāsanāṃ yathāvuḍḍhaṃ na bādheyyāti yojanā. Saṅghassa uddiṭṭhaṃ **saṅghuddiṭṭhaṃ**, saṅghaṃ uddissa katanti adhippāyo. Yo yo vuḍḍho **yathāvuḍḍhaṃ**, vuḍḍhappaṭipāṭiyāti attho. **Na bādheyyāti** na paṭibāheyya. **Allapādā** nāma yehi akkantaṭṭhāne udakaṃ paññāyati. **Sayanāsananti** mañcapīṭhādi, iminā paribhaṇḍakatā bhūmītipi upalakkhitā. Sudhotapādakaṃ vāpi saupāhano tathevāti sambandho. **Sudhotapādakanti** dhotapādeheva akkamitabbaṭṭhānaṃ. Dhotā pādā yassa akkamanassāti kiriyāvisesanasamāso. Yadi pana tattha nevāsikā adhotapādehipi vaḷaṅjenti, tatheva vaḷaṅjetuṃ vaṭṭati. **Tathevāti** paribhaṇḍakataṃ bhūmiṃ senāsanāṃ vā nakkameti attho.

**344. Saṅghāṭiyāti** adhiṭṭhitasāṅghāṭiyā. Pāde pariggahetvā āsanāṃ pallattho, pallatthaṃ karotīti pallatthātidhātussa pallattheti rūpaṃ. Vihārepi antaragharepi pallatthikāya na nisīdeyyāti adhippāyo, parikammakataṃ bhittādinti yojanā. **Parikammakanti** setavaṇṇena vā cittakammena vā kataparikkammaṃ. **Ādi**-saddo dvāravātapānādiṃ saṅgaṇhāti. **Na apassayeti** cīvarādinā appaṭicchādetvā apassayanāṃ na kareyya. **No na ācameti** neva na ācame, ācameyyāti attho. Dve paṭisedhā pakatīyatthaṃ gamentīti. **Santeti** iminā udake asante anāpattīti dīpeti.

**345. Akappiyasamādāneti** bhikkhūnaṃ sāmaṇeraṇaṃ akappiye samādāne. **Davāti** nipāto, kilādhippāyenāti attho. **Silāpavijjhaneti** antamaso hatthayantenapi sakkharikāyapi khipane. Sabhāgāya desanāya āvikamme ca dukkaṭanti yojetabbaṃ. **Sabhāgāyāti** vatthivasena samāno bhāgo etissā āpattiyāti viggaho. **Ca**-saddo tādisiyā paṭiggahaṇamattaṃ samuccinoti.

**346. Paṭissavo** nāma “ubhopi mayaṃ idha vassaṃ vasissāma, ekato uddisāpema” tiādiṃ paṭijānaṃ, tassa visaṃvādo pacchā akaraṇaṃ **paṭissavavisaṃvādo**, tasmim, nimittatthe bhumbaṃ. **Suddhacittassāti** kathanasamāye “karissāmī” ti evaṃ pavattacittassa. **Itarassāti** aññassa asuddhacittassa.

**347. Kicceti** sukkhakaṭṭhādiggahaṇakicce sati eva porisaṃ purisappamāṇaṃ abhiruheyāti sambandho. **Āpadāsūti** vālamigadassanādīsu.

**348.** Parissāvanaṃ vināti sambandho. **Addhānanti** heṭṭhimantena addhayojanasāṅkhātaṃ addhānaṃ. Sace na hoti parissāvanaṃ vā dhammakaraṇo vā, saṅghāṭikaṇṇopi adhiṭṭhātabbo. **Yācamānassāti** parissāvanaṃ yācantassa.

**349.** Ābādhapaccayā aññatra sesaṅge ca attaghātane ca dukkaṭanti yojanā. **Sesaṅgeti** aṅgajātato kaṇṇanāsādiavasese avayavacchedane. **Attaghātaneti** āhārupacchedādīnā attano māraṇe.

**350.** Tūlikāya kayiramānaṃ itthipurisādikaṃ cittañca potthakañca kaṭṭhādīsu kayiramānaṃ cittapotthakāni, tāniyeva rūpānīti samāso. Jātakādīni pana parehi kārāpetuṃ labbhanti. Mālākammādīni sayampi kātuṃ labbhanti. Ārāmāraññagehesu bhuñjantaṃ na uṭṭhāpeyyāti yojetabbaṃ. Vihārasāṅkhāto ārāmo ca araññañca antaragharasāṅkhātaṃ geḥācāti dvando. “Ārāma...pe... gehesū” ti vattabbe e-kārassa a-kārakaraṇena gāthābandhavasena vuttaṃ. Okāse kate pana “pavisathā” ti vutte ca pavisitabbaṃ upanisīditabbañca.

**351.** Pumayuttāni yānāni ca sivikañca hatthavaṭṭakañca pāṭaṅkiñca abhiruhituṃ gilānassa kappateti sambandho. **Pumayuttānīti** assagavādipurisayuttāni, na dhenuyuttāni, sārathi pana itthī vā hotu puriso

vā, vaṭṭati. Hatthavaṭṭakepi eseva nayo, **yānānīti** rathasakaṭādīni, **sivikanti** pīṭhakasivikaṃ, pīṭhakayānanti attho. **Pāṭānkīti** andolikā. **Gilānassāti** ettha **gilāno** nāma na appakenapi sisābādhādimmattena veditabbo, yo pana na sakkoti vinā yānena gantum, evarūpo veditabbo. Tathā hi yānaṃ anujānantena bhagavatā kosalesu janapadesu bhagavantam dassanāya sāvattim gacchantam aññataram gilānaṃ bhikkhum gantum sakkuṇeyyatāya aññatarasmim rukkhamūle nisinnaṃ disvā manussehi tam pavattim ṇatvā “ehi, bhante, gamissāmā” ti vutte “nāhaṃ, āvuso, gamissāmi, gilānomhī” ti **vuttavattusmim** (mahāva. 253) anuññātam, tathā vadanto ca so bhikkhu gamanupacchedasādhakameva gelaññaṃ sandhāyāhāti viññāyati adhippetatthanipphattiyā upacchinnattā, apica yānena ekaparicchedāya upāhanāya paricchedam ṭhapentena aṭṭhakathācariyena “gilānena bhikkhunā saupāhanenāti ettha gilāno nāma yo na sakkoti anupāhanena gāmaṃ pavisitu” nti **aṭṭhakathāyam** (mahāva. aṭṭha. 256) vuttam, tasmā yathāvuttatilānava gilānoti niṭṭhamettha gantabbam.

**352. Davam karaṇeti** keḷiyā karaṇe. **Aññassāti** antamaso dussīlassāpi. **Upalājaneti** “pattam dassāmi, cīvaram dassāmī” tiādīnā.

**353.** Vivarivā na dassayeti sambandhanīyam. **Tā** bhikkhuniyo.

**354. Ovādanti** bhikkhunīhi terasiyam vā cātuddasiyam vā āgantvā uposatham pucchivā “cātuddaso” tiādīnā bhikkhunā ācikkhite puna tāhi uposathadivase samāgantvā ovādūpasānkamanayācanaṃ, tam pātimokkhuddesakassa ārocetvā tena katasanniṭṭhānaṃ gahetvā pāṭipade paccāharitabbanti ajānanakam **bālañca** tathā kātuṃ asamattham **gilānañca** pāṭipade gantukāmaṃ **gamiyañca** vajjetvā aññassa gahaṇapaccāharaṇāni akātuṃ na vaṭṭati. Tena vuttam “**na gaṇhato**” tiādi.

**355. Lokāyatanti** niratthakakāraṇappaṭisaṃyuttam titthiyasattham. Tiracchānavijjā ca imināva upalakkhitā. **Na vāceyyāti** paresam na vāceyya. Imināva attano pariyāpuṇanampi paṭikkhittam lokāyatatiracchānavijjāti ca rāgadosamohavaḍḍhāni buddhādigarahitā saggamokkhānaṃ tiro tiriyo añcītā gatā pavattā kabbanāṭakādikā sabbāpi vijjā anulomavasena vā vinayapariyāyam patvā garuke ṭhātabbanti vinayayuttitopi saṅgahitāti veditabbā. Evañca no garūnamupadeso. **Peḷāyapīti** yattha pātim ṭhapetvā sukhino bhuñjanti, tambalohena rajatena vā katāya tāya āsittakūpadhānasānkhatāya peḷāya ṭhapetvā.

**356.** Pārutañca nivāsanañca, gihīnaṃ hatthisoṇḍādivasena pārutanivāsanaṃ yassa pārupanassa nivāsanassāti kiriyāvisesanasamāso. Gihipārutanivāsanaṃ na pārūpe na nivāseyyāti sambandho. **Samvelliyaṃ na nivāseyyāti** mallakammakarādayo viya kaccham katvā na nivāseyya. Evaṃ nivāsetum gilānassāpi maggappaṭipannassāpi na vaṭṭati. Yampi maggam gacchantā ekaṃ vā dve vā koṇe ukkhipitvā antaravāsakassa upari lagganti, na vaṭṭati. Evaṃ apārupitvā anivāsetvā ca nibbikāram parimaṇḍalam pārupitabbam timaṇḍalam paṭicchadentena parimaṇḍalam nivāsetabbañca, tathā apārupitvā anivāsetvā ca ārāme vā antaraghare vā anādarena yaṃ kiñci vikāram karontassa dukkaṭam. **Dāyanti** vanaṃ. **Nālimpayeyyāti** “sabbūpakārāni vinassantū” ti vā khiḍḍādhīppāyena vā nālimpayeyya.

**357.** Vaḍḍhim no payojaye aññātakappavārite no yāceti yojanā. **Aññassāti** sahadhammikassāpi. Katipāham bhutvā vāti yojanīyam. **Punoti** nipāto.

**358.** Daṇḍinaṃ ṇatvā vā añatvā vā uddissa rakkham yācane daṇḍite daṇḍo assa gīvāti yojanā. Daṇḍam gaṇhatīti paccayantassa daṇḍinaṃ daṇḍaggahaṇanti attho. **Uddissāti** “amhākam vihāre asukena ca asukena ca idaṃ nāma kata” nti, “karissa” nti vā evam atītam vā anāgataṃ vā ārabba. **Yācaneti** vohārikesu yācane satī. **Daṇḍiteti** tehi daṇḍe gahite so daṇḍo assa yācakassa bhikkhuno gīvā, iṇam hotīti attho. Vohārikehi pana “kenā” ti vutte “asukenāti vattum amhākam na vaṭṭati, tumheyeva jānissatha, kevalaṇhi mayam rakkham yācāma, tam no detha, avahaṭabhaṇḍaṇca mam āharāpethā” ti vattabbam.

Evam anodissa ācikkhaṇā hoti, sā vaṭṭati. **Pārājikādikāti** pārājikathullaccayadukkaṭāni.

**359.** ‘‘Harantesu parikkhāraṃ,  
Coro coroti bhāsīte;  
Anatthāyesaṃ gaṇhante’’ti. –

Pāṭhehi bhavitabbaṃ. Evañhi sati ‘‘harantesū’’ti bahuvacanena saha ghaṭate. Parikkhāraṃ harantesu esaṃ anatthāya ‘‘coro coro’’ti bhāsīte daṇḍaṃ gaṇhante tattakaṃ assa gīvāti yojetabbaṃ. **Harantesūti** coresu gahetvā gacchantesu. **Esanti** corānaṃ. **Gaṇhanteti** vohārikajane gaṇhante. Yattakaṃ gahitaṃ, tattakaṃ assa bhikkhuno gīvā, bhaṇḍadeyyaṃ hotīti attho.

**360.** Pākāraḷḷānaṃ bahi vaḷaṅṅe vāpi vīhādinaḷḷikerādiropime harite vāpi vighāsuccārasaṅkāramuttaṃ nāvalokiya chaḍḍeyya, dukkaṭanti sambandho. **Vaḷaṅṅe nāvalokiyāti** ca iminā oloketvā vā avaḷaṅṅe vā vighāsādīni chaḍḍentassa anāpattīti dīpeti. Vīhi ādi yesaṃ sāliādīnaṃ te vīhādayo, nāḷikerō ādi yesaṃ ambapanasādīnaṃ te nāḷikerādayo, vīhādayo ca nāḷikerādayo cāti dvando, tesam ropo, tena nibbattaṃ **vīhādi...pe... ropimaṃ**. **Hariteti** haritaṭṭhāne. **Vighāso** nāma ucchiṭṭhodakacalakādi.

**361.** Dhammayuttampi naccaṅca gītaṅca vāditaṅca yojāpetuṅca payojetuṅca payuttāni passituṅca ‘‘upahāraṃ karomā’’ti vutte sampaṭicchitūṃ vā na labbhanti sambandho. **Dhammayuttampīti** ratanattayaḷḷupasaṃhitatāya antamaso dhammena puññaena saṃyuttampi. **Naccanti** antamaso morasukamakkaṭādināṃ naccampi. **Gītanti** antamaso gītassa pubbabhāge kayiramānaṃ dantaḷḷitampi. **Vādīti** antamaso udakabherivādīti. **Yojāpetunti** aññehi kāraṇetūṃ. **Payojetunti** attanā kātūṃ. Āyatakena gītassarena dhammampi bhāsītūṃ na vaṭṭati. **Payuttānīti** parehi yehi kehici katāni. **Passitunti** iminā anolocanadassanampi gahitanti sotuntipi attho viññāyati. Antarārame ṭhitassa passato anāpattī. Vīthiyaṃ ṭhatvā gīvaṃ parivattetvā passatopi āpattīyeva. Yena kenaci karaṇīyena gataṭṭhāne passati, suṇāti vā, anāpattī. **Sampaṭicchitunti** ‘‘sādhū’’ti sampaṭicchitūṃ. ‘‘Upahāraḷḷānaṃ nāma sundara’’nti vattuṃ vaṭṭati. **Vā-saddo** samuccaye.

**362.** ‘‘Kīḷatthaṃ kataṃ rājāgāra’’ntiādīnā sambandhitabbaṃ. Cittena vicittakaṃ āgāraṃ **cittāgāraṃ**.

**363.** Āsanena nave na paṭibāheyyāti yojanā. **Āsanenāti** āsanato. **Na paṭibāheyyāti** na utṭhāpeyya. Uṇhe cīvaraṃ na nidaheyyāti yojanīyaṃ. **Na nidaheyyāti** adhikaṃ na nidaheyya. **Garunāti** ācariyupajjhāyena. **Paṇāmitoti** ‘‘mā idha pavisa’’tiādīnā nikkadḍhito.

**364.** Sattahi āpattīhi ca bhikkhuṃ vāpi aññeneva ca upāsakaṃ vāpi parammukhā akkosane dukkaṭanti yojetabbaṃ. **Āpattīhi cāti ca-saddo** avadhāraṇe. **Aññeneva cāti** ettha **eva cāti** nipātasamudāyo, eko eva vā avadhāraṇe, vuttato aññeneva ‘‘asaddho’’tiādīnāti attho. **Parammukhāti** nipāto, tassa asammukheti attho. Sammukhā vadantassa pācittiyaṃ. Pāpagaraḷḷāvasena pana vadato anāpattī.

**365.** **Saddhādeyyaṃ** saddhāya dātābbaṃ cīvaraṅca ca-saddena avasesampi **vinipātetūṃ** nāsetūṃ na labbhaṃ, pitūnaṃ labbhanti sambandho. **Nātīnampīti pi-saddo** sambhāvane.

**366.** Aññatra vassaṃvuttho aññato bhāgaṃ gaṇheyya, dukkaṭanti sambandho. **Aññatrāti** aññasmiṃ vihāre. **Aññatoti** aññavihāro. **Paṭideyyāti** gahitaṭṭhāne dadeyya. Gahite tasmiṃ vatthusmiṃ naṭṭhe vā jiṅṅhe vā tassa gīvāho tīti sambandho. Codito no dadeyya, tesam dhuranikkhepato bhaṇḍagghakāriyo hotīti yojanā. **Coditoti** vatthusāmihehi ‘‘dehī’’ti vutto. **Tesanti** tasmiṃ vihāre lābhīnaṃ bhikkhūnaṃ.

**367.** Santaruttaro vā kallo saupāhano vā gāmaṃ na paviseyya, cāmarīmakasabjaniṃ na dhāreyyāti

yojanīyaṃ. Antarañca uttarañca, saha antaruttarena **santaruttaro**. Aggaḷagutte vihāre saṅghāṭiṃ nikkhipitvā gantuṃ vaṭṭati. Āraññakena pana bhaṇḍukhalikāya pakkhipitvā pāsāṇarukkhasusirādīsū paṭicchannesu ṭhapetvā gantabbaṃ. Antaruttarānaṃ nikkhepe ayameva nayo. **Kalloti** agilāno. Makasānaṃ bījanī makasabījanī, camarīnaṃ vāḷehi katā makasabījanīti samāso.

**368.** Ārāmato bahīti sambandhanīyaṃ. **Ārāmatoti** ārāmūpacārato. **Na dhāreyyāti** agilāno na dhāreyya. Yassa pana kāyadāho vā pittakopo vā hoti, cakkhu vā dubbalaṃ, añño vā koci ābādho vinā chattaṇa uppajjati, tassa gāme vā araññe vā chattaṃ vaṭṭati. **Guttiyā labbhatīti** vasse cīvaraguttatthaṃ, vālamigacorabhayesu attaguttatthampi labbhatīti attho. Ekapaṇṇachattaṃ pana sabbattheva vaṭṭati.

**369.** Ubhatokājaṃ na gāheyyāti sambandho. Ubhato daṇḍassa ubhayakoṭīyaṃ bhārabandhakājaṃ **ubhatokājaṃ**, alopattapuriso. **Ekantarikakājakanti** antameva antarikaṃ, ekañca antarikañcāti dvando, ekantarike bhārabandhakājanti tappuriso ekatokājakāṃ, antarikakājakanti vuttaṃ hoti. Hatthe olambo assa bhārassāti samāso.

**370. Anokāsakatanti** “karotu me āyasmā okāsaṃ, ahaṃ taṃ vattukāmo”ti evaṃ codakena okāse kārāpīte natthi okāso kato anena cuditakenāti bahubbīhi. **Codeyyāti** cāvanaakkosakammavuṭṭhānādhippāyena codeyya. Uposathappavāraṇaṭṭhapanaanuvijjadhammakathādhippāyesu okāsakammaṃ natthi. **Suddhassāti** anāpattikatāya suddhassa. **Avatthusminti** akāraṇe. **Tathāti** dukkaṭaṃ atidisati. Karontenāpi “bhūtameva nu kho āpattim vadati, abhūta”nti evaṃ upaparikkhitvā kātabbā. “Anujānāmi, bhikkhave, puggalaṃ tulayitvā okāsaṃ kātu”nti (mahāva. 153) hi vuttaṃ.

**371.** Sattānaṃ pakataṅgulena aṭṭhaṅgulādhikaṃ mañcappaṭipādaṃ vā uccapādakaṃ mañcaṃ vā na dhārayeti yojanā. Pakatiyā aṅgulaṃ **pakataṅgulaṃ**. Tañca vaḍḍhakiāṅgulaṃ veditabbaṃ. Aṭṭha ca tāni aṅgulāni ca, tehi tamadhikaṃ yassāti samāso. Mañcānaṃ paṭipādo, yattha mañcapāde nikkhipanti. Aṭṭhaṅgulato uccā pādā yassāti bahubbīhi.

**372. Mūgabbatādinti** mūgānamiva tuṅhībhāvasaṅkhātaṃ vataṃ ādi yassa govatādino titthiyavatassāti samāso. Khurameva bhaṇḍaṃ **khurabhaṇḍaṃ**. Pubbe nhāpito **nhāpītapubbako**, visesanassa paranipāto.

**373. Hatthakammanti** hatthena kātabbaṃ vaḍḍhakiādīnaṃ kammaṃ. Anussaraṇaṃ “kappiyattaṃ me yena yācītaṃ, amhehi imassa dātabba”nti evaṃ cittappavattianusāro, tassā yācanāya anusāro **tadanusāro**, tato laddhaṃ yaṃ kiñci gahetunti yojanā. Kammato niggato **nikkammo**, vighāsādādi. Taṃ ayācītvāpi kāretunti sambandho. **Āharāpetunti** araññato ānetuṃ. **Aparasantakanti** dāruṇaṅgalādikāṃ aparapariggahitaṃ.

**374.** Gihīnaṃ yattakaṃ deti, gopake dente gahetuṃ labbhaṃ, saṅghacetiyasantake yathāparicchedaṃ gahetuṃ labbhanti yojanā. **Detīti** gopako bhikkhūnaṃ deti. **Gahetunti** tattakaṃ gahetuṃ. **Saṅghacetiyasantaketi** vetanagopakehi dīyamāne saṅghassa cetiyassa ca santake. **Yathāparicchedanti** yaṃ tesāṃ saṅghena anuññātaṃ hoti “divase divase ettakaṃ nāma khādathā”ti, taṃ paricchedaṃ anatikkamma. Saṅghike ca cetiyasantake ca keṇiyā gahetvā āraḅhantasseva hi dāne paricchedo natthi.

**375.** “**Kāyavācāhi dvīhi āpattim āpajjeyyā**”ti yebhuyyavasena vuttaṃ, methunadhamme parūpakkame sati sādīyantassa akiriyasamuṭṭhānabhāvasambhavato. **Chahi vāti** āpattupattikāraṇasaṅkhātehi chahi samuṭṭhānehi vā āpattim āpajjeyyāti sambandho. Sabbāpattīnañhi kāyo vācā kāyavācā kāyacittaṃ vācācittaṃ kāyavācācittanti cha samuṭṭhānāni. Tattha purimāni tīṇi acittakāni, pacchimāni sacittakāni.

Tidhā ekasamuṭṭhānā, pañcadhā dvisamuṭṭhitā;  
Dvidhā ticaturo ṭhānā, ekadhā chasamuṭṭhitā.

Tattha catutthena pañcamena chaṭṭhena ca samuṭṭhānato **ekasamuṭṭhānā tidhā**. Paṭhamacatutthehi ca dutiyapañcamehi ca tatiyachaṭṭhehi ca catutthachaṭṭhehi ca pañcamachaṭṭhehi ca samuṭṭhānato **dvisamuṭṭhitā pañcadhā**. Paṭhamehi ca tīhi pacchimehi ca tīhi samuṭṭhānato **tisamuṭṭhānā dvidhā**. Paṭhamatatiyacatutthachaṭṭhehi ca dutiyatatiyapañcamachaṭṭhehi ca samuṭṭhānato **catusamuṭṭhānā dvidhā**. Chahipi samuṭṭhito **chasamuṭṭhānā ekadhā**. Alajji...pe... saññitāya cāti imehi chahi vā āpattiṃ āpajjeyyāti sambandho. Yo sañcicca āpattiṃ āpajjati, āpattiṃ parigūhati, agatigamanañca gacchati, ediso vuccati alajjī puggalo. Alajjī ca aññāno ca kukkucapakato ca kukkucena abhibhūtoti dvando. Bhāve ttappaccayo.

Tattha yo akappiyabhāvaṃ jānantoyeva madditvā vītikkamaṃ karoti, ayaṃ **alajjitā āpajjati**. Mando momūho kattabbākattabbaṃ ajānanto akattabbaṃ karoti, kattabbaṃ virādheti, ayaṃ **aññānattā āpajjati**. Kappiyākappiyaṃ nissāya kukkucce uppanne vinayadharaṃ apucchitvā madditvā vītikkamati, ayaṃ **kukkucapakatattā āpajjati**. Satiyā plavo sammoho **satiplavo**, sahaseyyaticīvaravippavāsādīni satiplavā āpajjati. Kappañca akappiyañca kappākappiyaṃ, kappākappiye saññā, sā assa atthīti kappā... pe... saññī, tassa bhāvoti tā-paccayo. Ya-lopena pana “**saññitā**”ti vuttaṃ, karaṇatthe vā paccattavacanamaṃ. Te ca “akappiye”tiādīnaṃ yathākkamena yujjanti. Tattha yo acchamaṃsaṃ “sūkaramaṃsa”nti khādati, vikāle kālasaññitāya bhuñjati, ayaṃ **akappiye kappiyasaññitāya āpajjati**. Yo pana sūkaramaṃsaṃ “acchamaṃsa”nti khādati, kāle vikālasaññāya bhuñjati, ayaṃ **kappiye akappiyasaññitāya āpajjati**.

**376.** Alajjiaññānatāya kāyavācāhi āpattiṃ chādayeti yojanā. **Liṅgeti** liṅgaparivattananimittamaṃ. Liṅge saṅghe ca gaṇe ca ekasmiṃ cāti āpattivuṭṭhiti catudhā hotīti seso.

**377. Paccayadvayeti** cīvare piṇḍapāte ca. **Parikathobhāsaviññattī** abhilāpamattametaṃ. Sahacaritassa pana nimittakammassāpi ettheva saṅgaho vedītabbo. Tattha pariyāyena kathanaṃ **parikathā**. Ujukameva avatvā yathā adhippāyo vibhūto hoti, evaṃ obhāsanamaṃ **obhāso**. Paccaye uddissa yathā adhippāyo ñāyati, evaṃ viññāpanamaṃ **viññatti**. Nimittakaraṇamaṃ **nimittakammaṃ**. **Tatīyeyeti** senāsane. **Seseti** gilānapaccaye.

**378.** Pañcannaṃ sahadhammikānaṃ accaye dānaṃ na rūhatīti sambandho. **Accaye dānanti** “mamaccayena mayhaṃ santakaṃ upajjhāyassa hotū”tiādīnā evaṃ attano apagame dānaṃ. **Tanti** accayena dīnaṃ cīvarādīkaṃ saṅghasseva ca hoti, na bhikkhunoti adhippāyo. **Gihīnaṃ panāti** gihīnaṃ accaye dānaṃ pana. Idamettha dānaggahaṇalakkhaṇamaṃ – “idaṃ tuyhaṃ dammī”tiādīnā sammukhā vā “itthannāmassa demī”tiādīnā parammukhāpi dīnaṃyeva hoti. “Tuyhaṃ gaṇhāhī”ti vutte “mayhaṃ gaṇhāmī”ti vadati, sudīnaṃ suggahitañca. “Tava santakaṃ karohi, tava santakaṃ hotu, tava santakaṃ kārāpehī”ti vutte “mama santakaṃ karomī, mama santakaṃ hotu, mama santakaṃ karissāmī”ti vadati. Duddīnaṃ duggahitañca. Sace pana “tava santakaṃ karohī”ti vutte “sādhu, bhante, mayhaṃ gaṇhāmī”ti gaṇhāti, suggahitanti.

**379.** Bhikkhu vā sāmaṇero vā **upassaye** bhikkhunīnaṃ vihāre **kālaṃ kayirātha** yadi kālaṅkareyya, **tattha** tasmīṃ ubhinnaṃ santake bhikkhusaṅgho eva **dāyajjo** sāmī hotīti seso. **Sesepīti** avasese bhikkhunīsikkhamānasāmaṇerisantakepi. **Ayaṃ nayoti** yadi te bhikkhūnaṃ vihāre kālaṃ kareyyuṃ, tesamaṃ santake bhikkhusaṅgho eva dāyajjoti ayameva nayoti attho.

**380.** “Imaṃ netvā asukassa dehī”ti **dīnaṃ** yāva parassa hatthaṃ na pāpuṇāti, tāva **purimasseva**, yo paṇiṇati, tassevāti attho. **Dammīti** “itthannāmassa demī”ti **dīnaṃ** pana **pacchimasseva**, yassa paṇiṇati, tasseva santakanti attho. **Imaṃ vidhiṃ** “vuttanayena ime sāmīno hontī”ti etaṃ pakāraṃ **ñatvā** vissāsaggāhaṃ vā gaṇhe, matakacīvaram vā adhiṭṭheti yojanā. **Vissāsagāhanti** sāmīsu jīvantesu

vissāsenā gāhaṃ gaheṭvā. **Matakacīvaraṃ adhiṭṭheti** tesu matesu aññe ce bhikkhū na santi, “mayhaṃ taṃ pāpuṇātī” ti matakacīvaraṃ adhiṭṭheyya. Aññesaṃ adavā dūre ṭhapitamatakaparikkhārā pana tattha tattha saṅghasseva honti. Bhikkhumhi kālakate saṅgho sāmī pattacīvare, apica gilānupaṭṭhākā bahūpakārā, saṅghena ticīvaraṅca pattaṅca gilānupaṭṭhākānaṃ dātabbaṃ. Yaṃ tattha lahubhaṇḍaṃ lahuparikkhāraṃ, taṃ sammukhībhūtena saṅghena bhājetabbaṃ. Yaṃ tattha garubhaṇḍaṃ garuparikkhāraṃ, taṃ āgatānāgatassa cātuddisassa saṅghassa avissajjiyaṃ avebhaṅgiyaṃ. **Gilānupaṭṭhako** nāma gihī vā hotu pabbajito vā, antamaso mātuḡāmpi, sabbe bhāgaṃ labhanti. Bahū ce sabbe samaggā hutvā upaṭṭhahanti, sabbesaṃ samabhāgo dātabbo. Yo panettha visesena upaṭṭhahati, tassa viseso kātabbo.

**381.** “Lohabhaṇḍe paharaṇiṃ ṭhapetvā sabbaṃ kappatī” tiādinaṃ yojetabbaṃ. **Paharaṇinti** āvudhaṃ. Pādukā ca saṅkamaṇiyo pallaṅko cāti dvando. Mattikāmaye katakaṃ kumbhakārikaṅca ṭhapetvā sabbaṃ kappatīti yojaniyaṃ, dhaniyasseeva sabbamattikāmayakuṭi **kumbhakārikāti**.

Pakiṇṇakaniddesavaṇṇanā niṭṭhitā.

#### 42. Desanāniddesavaṇṇanā

**382.** Idāni desanānidassanabyāsenā heṭṭhā avuttāni kānici sikkhāpadāni upadisituṃ “cāgo” tiādimaḡa. Bhikkhubhāvassa yo cāgo, sā pārājikadesanāti sambandho. Bhavati anenāti bhāvo, saddappavattinimittaṃ, bhikkhuno bhāvo bhikkhu-saddassa pavattinimittaṃ bhikkhukiccaṃ **bhikkhubhāvo**, tassa. Disī uccāraṇe, uccāraṇā pakāsanā desanā. “Channamativassati, vivaṭṭaṃ nātivassatī” ti (udā. 45) hi vuttaṃ. Idha pana bhikkhubhāvapariccāgoyeva pārājikāya pakāsanā nāma pārājikāya desanā. “Yo” ti vuttattā “so” ti vuttuṃ yuttaṃ, tathāpi sabbādīhi vuttassa vā liṅgamādiyyate vakkhamānassa vāti vakkhamānadesanāpekkhāya “so” ti vuttaṃ. Yathā yena pakārena “chādeti jānamāpanna” ntiādinaṃ vuttaṃ **yathāvuttaṃ**, tena. Vuttamanatikkammāti abyayībhāvavasena vā attho veditabbo. Idhāpi garukāpattiyā vuṭṭhānānatikkameneva pakāsanā desanā siyāti “**vuṭṭhānaṃ garukāpattidesanā**” ti vuccati.

**383.** Idāni vattabbaṃ sandhāya “eva” nti vuttaṃ. **Ekassāti** ekassa bhikkhuno.

**384.** **Tumhamūleti** tumhākaṃ mūle samīpe. **Paṭidesemīti** pakāsemi. **Samvareyyāsīti** samyameyyāsī, samvare patiṭṭheyyāsīti attho.

**385.** **Nissajjitvānāti** ekabahubhāvaṃ sannihitāsannihitabhāvaṃ ñatvā “idaṃ me, bhante, cīvara” ntiādinaṃ nissajjitvā. **Tenāti** yassa cīvaraṃ nissaṭṭhaṃ, tena. “Imaṃ...pe... dammī” ti nissaṭṭhacīvaraṃ deyyanti sambandhitabbaṃ. “Imaṃ cīvaraṃ dasāhātikanta” ntiādinaṃ yojetabbaṃ.

**386.** (Ka) **cīvaranti** ticīvarādhiṭṭhānanayena adhiṭṭhitesu saṅghāṭīdīsū yaṃ kiñci cīvaraṃ. **Vippavutthanti** vippayuttana vuttaṃ.

(Kha) **akālacīvaranti** anattate kathine vassānassa pacchimamāsaṃ ṭhapetvā sese ekādasamāse, atthate kathine taṅca māsāṃ hemantike cattāro māse ca ṭhapetvā sese sattamāse uppannaṃ, kālepi saṅghassa vā “idaṃ akālacīvara” nti ekapuggalassa vā “idaṃ tuyhaṃ dammī” ti uddisitvā dinnāṃ. Itaraṃ pana kālacīvaraṃ. **Māsātikantanti** akālacīvare uppanne ūnassa pāripūriyā saṅghagaṇādito satiā paccāsāya māsamekaṃ parihāro labbhati, taṃ māsāṃ atikkantaṃ.

(Ga) **purāṇacīvaranti** yaṃ antamaso ussīsaṃ katvā nipanno. **Cīvaraṃ** nāma channaṃ aññataraṃ vikappanūpagaṃ. Eseeva nayo sabbesu vakkhamānacīvarappaṭisaṃyuttasikkhāpadesu.

(Gha) **aññatra pārivattakā**ti antamaso harītakīkhaṇḍenapi pārivattakaṃ vinā.

(Ña) **gahapatikanti** bhikkhūsu apabbajitakaṃ. **Aññatra samayā**ti acchinnacīvaranaṭṭhacīvarasamayaṃ vinā, acchinnacīvarehi pana sākāpalāsaṃ attanā bhaññitvāpi vākādīni gaṇhitvāpi nivāsetuṃ vaṭṭati, pageva viññatti. Cīvaraṃ viññāpitanti sambandho. Kanti āha “**aññātaka**”ntiādi.

(Ca) **taduttarī**ti tato vuttappamāṇato uttari, acchinnacīvarena bhikkhunā kāyena vā vācāya vā abhiharitvā pavāritacīvarato tīsu naṭṭhesu dve sādītābbāni, dvīsu naṭṭhesu ekaṃ sādītābbaṃ. Pakatiyā santaruttarena carantena dvīsu naṭṭhesu dveyeva sādītābbāni, ekasmiṃ naṭṭhe ekaṃyeva sādītābbaṃ. Yassa ekaṃyeva hoti, tasmīṃ naṭṭhe dve sādītābbāni.

(Cha) **appavāritoti** gahapatinā vā gahapatāniyā vā. **Vikappanti** paṭhamaadhippetato mūlaṃ vaḍḍhāpento sundarakāmatāya “āyataṃ vā”tiādinā viṣiṭṭhakappaṃ adhikavidhānaṃ.

(Ja) **aññātaka gahapatiketi** bahūnaṃ vasena vuttamattameva purimato viseso.

(Jha) **codanāyā**ti “attho me, āvuso, cīvarenā”ti codanāya. **Ṭhānenā**ti kāyacodanamāha. Rājādīhi pesitena hi dūtena veyyāvaccakarassa hatthe cīvaracetāpanne nikkhitte tisso codanā anuññātā, codanāya diguṇaṃ ṭhānaṃ, tasmā sace codetiyeva, **na** tiṭṭhati, cha codanā labbhanti. Sace tiṭṭhatiyeva, na codeti, dvādasa ṭhānāni labbhanti. Sace ubhayaṃ karoti, ekāya codanāya dve ṭhānāni hāpetābbāni.

(Ṭa) suddhāni ca tāni kālakāni ca jātiyā rajanena vā.

(Ṭha) **tulanti** catūhi tulāhi kāretukāmataṃ sandhāya vuttaṃ. Atthato pana yattakehi eḷakalomehi kātukāmo hoti, tesu dve koṭṭhāsā kālakānaṃ, eko odātānaṃ, eko gocariyānaṃ gahetabbo. **Tulā** nāma palasataṃ. **Gocariyā** nāma kapilavaṇṇā. Imaṃ me santhatāṃ kārāpitanti yojanā.

(Ña) **tiyojanaparamanti** gahitaṭṭhānato tīṇi yojanāni paramo assa atikkamanassāti bhāvanapuṃsakavasena attho veditabbo. **Atikkāmitānī**ti antamaso suttakenapi bhaṇḍakatabhaṇḍaharaṇaṃ vinā antamaso vātābādhappaṭikāratthaṃ kaṇṇacchidde pakkhittāni atikkāmitāni.

**387-9. Nissajjitvānā**ti vuttanayena vatthūni nissajjitvā. **Athā**ti desitānantaram. “Imaṃ jānāhī”ti gihiṃ vadeti yojanā. **Soti** ārāmikādiko gihi. “Iminā kiṃ āharāmi”ti vadeyyāti sambandho. **Vadeyyā**ti yadi vadati. **Imanti avatvā**ti “imaṃ āharā”ti avatvā bhikkhūnaṃ kappiyaṃ telādinti vadeti sambandho. **Ādinti** sandhivasena niggaḥitaṃ. Tena parivattetvāna so yaṃ kappiyaṃ āharatīti yojanā. **Tenā**ti nissaggiyavatthunā. **Dvepete ṭhapetvā**ti ete rūpiyappaṭiggāhakarūpiyasamvohārake dve ṭhapetvā sesehi paribhuñjituṃ labbhanti sambandho. **Paribhuñjinti** taṃ bhuñjituṃ. **Tatoti** parivattitakappiyato. **Aññenā**ti antamaso ārāmikenāpi. **Tesanti** vuttānaṃ dvinnaṃ.

**390.** Antamaso tannibbattā rukkacchāyāpīti sambandho. **Tannibbattā**ti nissaṭṭhavatthunā kiṇitvā gahitāārāme rukkacchāyā tannibbattā hotīti tato nibbattāti samāso. **Ādito santhatattayanti** ādimhi kosiyasuddhakālakadvebhāgasanthatattayaṃ.

**391. Evaṃ ce no labhethā**ti evaṃ parivattetvā kappiyakārako no ce labheyya, **so** gihi “imaṃ chaḍḍehī”ti **samsiyo** vattabbo, evaṃ rūpiyachaḍḍako gihi no ce labheyya, sammato bhikkhu chaḍḍeyyāti sambandho. **Sammatotī** “yo chandāgatiṃ na gaccheyyā”tiādinā (pārā. 584) vuttapañcaṅgasamannāgato rūpiyachaḍḍakasammutiyaṃ sammato bhikkhu.



**392. Etānīti** paṭiggahitarūpiyāni. **Dutiyaṃ pattanti** ūnapañcabandhane sati viññāpitapattamaṃ saṅghe vattumaṃ labbhareti padasambandho. **Vattunti** “ahaṃ bhante rūpiyaṃ paṭiggahesi”ntiādinā vattumaṃ. Sesāni avasesanissaggiyavatthūni saṅghe ekasmiṃ gaṇe ca vattumaṃ labbhareti yojanā. **Bhāsantarenapi vattumaṃ labbhanti** na kevalaṃ pāḷibhāsāyameva, sīhaḷādibhāsāyapi nissajjītuṃ labbhatīti attho.

**393. (Ka) nānappakāraṇanti** cīvarādīnaṃ kappiyabhaṇḍānaṃ vasena anekavidhaṃ. Kayo gahaṇaṃ, vikkayo dānaṃ. Kayo ca vikkayo ca **kayavikkayaṃ**.

(Ga) **ūnapañcabandhanenāti** ūnāni pañca bandhanāni yassa, tena, itthambhūtalakkhaṇe karaṇavacanaṃ. Yathākathañci pana pañcabandhano patto, pañcabandhanokāso vā, so apatto, aññaṃ viññāpetuṃ vaṭṭati.

**394. Sammānitvānāti** padabhājanīye vuttañattidutiyaṃkammaṇa sammānitvā. **Saṅghassa pattantanti anta-**saddena pattānaṃ ante bhavo lāmaṃ pattoyeva gahito, nissatṭhapattassa vijjamaṇaguṇaṃ vatvā theramaṃ, therassa pattamaṃ dutiyattheramaṃ gāhāpetvā eteneva upāyena yāvasaṅghanavakaṃ gāhāpetvā yo tattha sannipatitasāṅghassa pattesu pariyaṇto patto, taṃ pattanti. **Tassāti** katanissajjanassa bhikkhuno. **Dāpayeti** sammatena pattaḡāhāpakena dāpeyya.

**395. (Ka) bhesajjanti** bhesajjakiccaṃ karotu vā, mā vā, evaṃ laddhavohāraṃ sappiādikaṃ sattāhakālikamaṃ.

(Kha) gimhānassa pacchimamāse purimo addhamāso pariyesanakaraṇānaṃ khettaṃ, pacchimaddhamāso pariyesanakaraṇanivāsanānaṃ khettaṃ, vassikamāsā cattāropi adhiṭṭhānena saha catunnampi khettaṃ, imeyeva pañcamāsā kucchisamayo, itarasattamāsā piṭṭhisamayo. Piṭṭhisamaye pariyesantassa nissaggiyaṃ pācittiyaṃ, kucchisamaye ca atirekaddhamāse katvā paridahato nissaggiyaṃ pācittiyaṃ. Tena vuttaṃ “**atirekamāse sese**”ti.

(Ga) **sāmaṃ datvāti** veyyāvaccādīni paccāsīsamāno sayameva datvā. **Acchinnanti** taṃ akarontaṃ disvā sakasaññāya acchinnamaṃ. Bhikkhunopi cīvaraṃ ṭhapetvā aññaṃ parikkhāraṃ, anupasampannaṃ ca yaṃ kiñci parikkhāraṃ acchindato dukkaṭamaṃ. Pariccajivā dinnamaṃ sakasaññaṃ vinā acchindanto bhaṇḍagghena kāretabbo.

(Ña) **vikappanti** “āyatañca karohi vitthatañcā”tiādikaṃ adhikavidhānaṃ.

(Ca) **accekacīvaranti** gamikagilānagabbhiniabhinavuppannasaddhānaṃ aññatarena pavāraṇamāsassa juṇhapakkhapañcamito paṭṭhāya “vassāvāsikaṃ dassamī”ti dinnamaṃ accāyikacīvaraṃ. Accekacīvarassa anattate kathine ekādasadivasādhiko māso, atthate kathine ekādasadivasādhikā pañca māsā cīvarakālasamayo, taṃ atikkāmentassa nissaggiyaṃ pācittiyaṃ. Tena vuttaṃ “**cīvarakālasamayaṃ atikkāmita**”nti. Kālo ca so samayo ca cīvarassa kālasamayo, taṃ.

(Cha) sappatibhaye āraññakasenāsane vassaṃ upagantvā viharantena bhikkhunā tiṇṇamaṃ cīvarānaṃ aññataraṃ cīvaraṃ purimikāya upagantvā mahāpavāraṇāya pavāritatā, kattikamāsatā, pañcadhanusatikapacchi mappamaṇayuttasenāsanatā, sāsāṅkasappaṭibhayatāti evaṃ vuttacaturāṅgasampattiyāantaraghare nikkhipitvā sati paccaye chārattaparamaṃ tena cīvarena vippavasitabbaṃ. Tato ce uttari vippavaseyya, nissaggiyaṃ pācittiyaṃ. Tena vuttaṃ “**atirekachāratta**”ntiādi.

(Ja) **jānanti** jānanto.

**396. Ādimhi viyāti** paṭhamanissaggiye viya.

397. (Kha) antaragharaṃ pavittihāya bhikkhuniyā hatthato khādanīyādippaṭiggahaṇe ca bhikkhūsu kulesu bhujjantesu “idha pūvaṃ, sūpaṃ dethā” tiādinā nayena vosāsamānāya bhikkhuniyā anapasādanena ca sekhasammatesu kulesu pubbe animantitassa khādanīyādīnaṃ paṭiggahaṇe ca sappaṭibhaye āraññakasenāsane viharantassa pubbe appaṭisaṃviditakhādanīyādippaṭiggahaṇe ca pāṭidesanīyaṃ nāma āpattinikāyo vutto. Tena vuttaṃ “**gārayha**” tiādi.

398. “**Adesanāgāminiya**” tiādi “na desaye” ti ettha kammaṃ. Pārājikā saṅghādisesā ca **adesanāgāminiyo** nāma. Na āpatti **anāpatti**, taṃ. Katadesanaṃ **desitaṃ**. Nānāsaṃvāsaniṣṭhitaṇaṃ na desayeti sambandho. Evaṃ catupañcahi na desaye, manasā na desaye, apakatattānaṃ na desaye, nānā “ekā” ti na desayeti. **Manasāti** kevalaṃ citteneva. **Nānāti** sambahulā āpattiyo “ekā” ti vatvā. Ekaṃ pana āpattiṃ “sambahulā” ti desetum vaṭṭatīti.

Desanāniddesavaṇṇanā niṭṭhitā.

### 43. Chandadānaniddesavaṇṇanā

399. **Kammappatteti** uposathādino kammaṃ patte yutte anurūpe. **Saṅhe samāgateti** catuvaggādike saṅhe ekattha sannipatite. Ettha ca chandahārakenāpi saddhiṃ catuvaggādiko veditabbo.

400. Chandadānādividhiṃ dassetuṃ “**eka**” tiādimāha. **Upāgammāti** santiṃ āpattiṃ pakāsetvā tato pacchā upagantvā. **Chandaṃ dadeṭi** vakkhamānesu tīsu ekenapi bahi uposathaṃ katvā āgato chandaṃ dadeyya, kenaci karaṇīyena sannipātaṭṭhānaṃ gantvā kāyasāmaggiṃ adento pana pārisuddhiṃ dento chandaṃ dadeyya.

402. Ubhinnaṃ dāne kiṃpayojananti āha “**pārisuddhī**” tiādi. Pārisuddhippadānena saṅghassa attano cāpi uposathaṃ sampādetīti sambandho. Pārisuddhi eva pārisuddhi, tassa padānaṃ, tena. Nanu ca pārisuddhitāpadānamattameva uposathakammaṃ nāmāti pārisuddhippadānaṃ attano uposathaṃ sampādetu, kathaṃ saṅghassatī? Vuccate – pārisuddhidānassa dhammakammaṭāsampādanena saṅghassāpi uposathaṃ sampādetīti.

Ettha pana catūsu ekassa chandapārisuddhiṃ āharitvā tayo pārisuddhiuposathaṃ karonti, tīsu vā ekassa chandapārisuddhiṃ āharitvā dve pātimokkhaṃ uddisanti, **adhammena vaggam** uposathakammaṃ. Cattāro pārisuddhiuposathaṃ karonti, tayo vā dve vā pātimokkhaṃ uddisanti, **adhammena samaggam**. Catūsu ekassa āharitvā tayo pātimokkhaṃ uddisanti, tīsu vā ekassa āharitvā dve pārisuddhiuposathaṃ karonti, **dhammena vaggam**. Sace pana cattāro sannipatitvā pātimokkhaṃ uddisanti, tayo pārisuddhiuposathaṃ, dve aññamaññaṃ pārisuddhiuposathaṃ karonti, **dhammena samaggam**. Pavāraṇakammesupi pañcasu ekassa pavāraṇaṃ āharitvā cattāro gaṇaṇattim ṭhapetvā pavārenti, catūsu tīsu vā ekassa āharitvā tayo dve vā saṅghaṇattim ṭhapetvā pavārenti, adhammena vaggam pavāraṇakammantiādi vuttanayameva. **Sesakammaṃ vibādhatīti** avasesasaṅghakiccaṃ vibādheti aladdhādhippāyattāti adhippāyo.

403. **Dvayanti** uposathakaraṇaṇceva avasesakiccaṇca. Attano na sādhetīti sambandhanīyaṃ.

404. **Hareyyāti** pubbe vuttaṃ suddhikachandaṃ vā imaṃ vā chandapārisuddhiṃ hareyya. **Paramparā na hārayeti** paramparā na āhareyya. Kasmāti āha “**paramparāhaṭā**” tiādi. **Tenāti** paṭhamato gahitachandapārisuddhikena. **Paramparāhaṭāti** yathā biḷālasaṅkhalikāya paṭhamaṃ valayaṃ dutiyaṃ pāpuṇāti, tatiyaṃ na pāpuṇāti, evaṃ dutiyassa āgacchati, tatiyassa na āgacchati. “Parimparāhaṭā chanda-pārisuddhi na gacchati” ti vā pāṭho.

405. **Sabbūpacāranti** “ekamaṃ cīvaram katvā” tiādi sabbam upacāram.

**406.** So āgato ārocetvā saṅghaṃ pavāreyyāti yojanā. **Athāti** anantarathe. **Āgatoti** pavāraṇaṃ gahetvā āgato bhikkhu. **Ārocetvāti** bhikkhusaṅghassa ārocetvā. **Evanti** vakkhamānakkamena.

**407-8.** Gahetvā hārakoti sambandho. **Nāhaṭāti** āhaṭāva na hotīti attho. Hāraako saṅghaṃ patvā tathā heyya, āhaṭā hotīti yojanā. Tathā **heyyāti** vibbhantādiko bhavēyya.

**409.** Saṅghaṃ patto pamatto vā sutto vā nārocayeyya anāpatti cāti sambandho. **Ca**-saddo chandapārisuddhiharaṇaṃ sampiṇḍetīti.

Chandadānaniddesavaṇṇanā niṭṭhitā.

#### 44. Uposathaniddesavaṇṇanā

**410. Duve uposathāti** sulabhappavattivasena vuttaṃ. Tayo pana divasavaseneva uposathā cātuddasiko pannarasiko sāmaggikoti. Tattha hemantagimhavassānānaṃ tiṇṇaṃ utūnaṃ tatiyasattamaṃ pakkesu dve dve katvā cha **cātuddasikā**, sesā **pannarakā**ti evaṃ ekasamvaccare catuvīsatiuposathā. Idaṃ tāva lokassa pakaticārittaṃ. “Āgantukehi āvāsikānaṃ anuvattitabba”ntiādivacanato (mahāva. 178) pana tathārūpapaccaye sati aññasimipi cātuddase uposathaṃ kātuṃ vaṭṭati.

**411.** Suttuddeso saṅghassevāti yojanā. Adhiṭṭhānaṃca taṃ uposatho cāti kammadhārayo. **Sesānanti** dvinnāṃ tiṇṇaṃ vā. “Duve”tiādinā ca cātuddaso pannaraso sāmaggīti divasavasena, suttuddeso adhiṭṭhānaṃ pārisuddhīti karaṇappakārena, saṅghuposatho gaṇuposatho puggaluposathoti puggalavasena cāti nava uposathā dīpitā honti.

#### 412. Pubbakicceti –

“Chandapārisuddhiutukkhānaṃ, bhikkhugaṇānaṃ ca ovādo;  
Uposathassa etāni, pubbakiccanti vuccatī”ti. (mahāva. aṭṭha. 168) –

Evaṃ aṭṭhakathācariyehi vutte pubbakaraṇānantaraṃ katabbe pubbakicce.

#### Pubbakaraṇeti –

“Sammajjanī padīpo ca, udakaṃ āsanena ca;  
Uposathassa etāni, pubbakaraṇanti vuccatī”ti. (mahāva. aṭṭha. 168) –

Evaṃ aṭṭhakathācariyeheva vutte sabbapaṭhamaṃ katabbe pubbakaraṇe. **Pattakalleti** uposathādīnaṃ catunnaṃ aṅgānaṃ sambhavanaṃ patto kālo imassāti pattakālaṃ, pattakāleva pattakallaṃ. Kim taṃ? Uposathādīkammaṃ. Taṃ pana catūhi aṅgehi saṅgahitaṃ. Yathāhu aṭṭhakathācariyā –

“Uposatho yāvatikā ca bhikkhū kammappattā,  
Sabhāgāpattiyo ca na vijjanti;  
Vajjanīyā ca puggalā tasmīṃ na honti,  
Pattakallanti vuccatī”ti. (mahāva. aṭṭha. 168);

**Samāniteti** sammā ānīte pavattiteti attho. **Soti** suttuddeso. **Pañcadhāti** nidānuddeso pārājikuddeso saṅghādisesuddeso aniyatuddeso vitthāruddesoti evaṃ pañcadhā.

#### 413. Vināntarāyanti rājantarāyo corantarāyo agyantarāyo udakantarāyo manussantarāyo

amanussantarāyo vāḷantarāyo sarīsapantarāyo jīvitantarāyo brahmacariyantarāyoti (mahāva. 150) vuttesu dasasu yaṃ kiñci antarāyaṃ vinā. **Saṅkhepenāti** vinā vitthāraṃ. “Ettha dvīsu tīsu vā uddesesu visadesu therova issaro”ti vuttattā avattantepi vaṭṭatīti yojanā. **Etthāti** pañcasu uddesesu. **Avattanteti** therassa vitthārena avattamāne appaṅuṇe. **Vaṭṭatīti** saṃkhittena uddisitumpi vaṭṭati. Imināva yassa kassaci uddesakassa avattantepi vaṭṭatīti viññāyati. Dvīsu vattamānesu issaratte adhike vattabbameva natthīti dassanattam **“tīsū”**ti vuttam. **“Therova issaro”**tiādīnā idaṃ paridīpeti – dve akhaṇḍā suvisadā vācuggatā, therādheyyaṃ pātimokkhaṃ, sace pana ettakampi visadaṃ kātuṃ na sakkoti, byattassa bhikkhuno āyattam hoti, tasmā sayam uddisitabbaṃ, aññā vā ajjhesitabboti.

**414.** Uddisante samā vā atha thokikā vā yadi āgaccheyyunti sambandhanīyaṃ. **Uddisante** āvāsikehi pātimokkhe uddissamāne. **Samā vā thokikā vāti** āvāsikehi samā vā thokikā vā āgantukā bhikkhū. **Avasesakaṃ sotabbanti** iminā ettāvataṃpi uposatho katoyeva nāmāti dīpeti.

**415. Uddiṭṭhamatteti** uddiṭṭhamāyeva uddiṭṭhamattam. **Matta**-saddo avadhāraṇe. Sakalāya ekaccāya vā uṭṭhitāya samā vā thokikā vā yadi āgaccheyyunti yojanā. **Sakalāyāti** sabbāya parisāya. **Esam santike pārisuddhiṃ kareyyunti** esam āvāsikānaṃ samīpe te āgantukā bhikkhū pārisuddhiuposatham kareyyunti attho. Atha bahukā ce, sabbavikappesu pubbakiccaṃ katvāti yojanīyaṃ. Vikappīyanti parikappīyantīti vikappā, avasesasavanapārisuddhiuposathavidhānā sabbe ca te vikappā ceti **sabbavikappā**. Tesu. **Punuddiseti** puna pātimokkhaṃ uddiseyya.

**416. Itarānanti** āgantukānaṃ. **Itaroti** cātuddaso. Ettha pana yesam pannaraso, te atītam uposatham cātuddasikaṃ akamsūti veditabbā. Ayamethādhippāyo – tādise paccaye sati cātuddasikassa katattā tesam yathāvuttatatiyasattamapakkhāsāṅkhātacātuddasike sampatte terasīcātuddasikattabbattā anuposathattā pana tattha uposatho na katoti cātuddasoyeva pannaraso jāto. **Samānetareti** samā unā itareti padacchedo. **Itareti** āgantukā. **Purimānaṃ anuvattantūti** āvāsikehi “ajjuuposatho pannaraso”ti pubbakicce kayiramāne purimānaṃ āvāsikānaṃ anuvattantūti attho. **Sacedhikāti** yadi āgantukā bahukā honti. **Purimāti** āvāsikā. **Tesam anuvattantūti** tesam āgantukānaṃ “ajjuuposatho cātuddaso”ti pubbakicce kayiramāne anuvattantu. **Sesepīti** āgantukānaṃ pannarasavārepi. **Ayam nayoti** “āgantukānaṃ pannaraso itarānaṃ sacetaro”tiādiko ayameva nayo. Ettha pana yesam pannaraso, te tiroraṭṭhato vā āgatā atītam vā uposatham cātuddasikaṃ akamsūti veditabbo.

**417.** Atītiposathassa cātuddasiyaṃ katattā cātuddasiyaṃ pannarasuposatho katoti pannarasī āvāsikānaṃ pāṭipado jātoti āha **“āvāsikānaṃ pāṭipado”**ti. **Itarānanti** āgantukānaṃ. **Uposathoti** pannaraso uposatho. **Samathokānanti** attanā samānaṃ vā thokānaṃ vā āgantukānaṃ. **Mūlaṭṭhāti** āvāsikā. **Kāmato dentūti** attano icchāya dentu.

**418. No ce dentīti** yadi āvāsikā kāyasāmaggiṃ na denti, tesam pana āvāsikānaṃ hiyyo uposathassa katattā ajja uposathakaraṇaṃ natthi. Bahūsu anicchāya kāyasāmaggiṃ dadeyyāti yojanā. **Bahūsūti** āgantukesu bahukesu. **Bahi vā vajeti** āvāsikabhikkhuparisā nissīmaṃ vā vajeyyāti attho.

**419. Sāveyya suttanti** pātimokkhasāṅkhātaṃ suttam vāyāmitvā sāveyya.

**420.** Sammajjituṃ ...pe... udakāsaṇaṃ pañṇapetuñca mahātherena pesito kallo na kareyya tathāti sambandho. **Kalloti** agilāno. **Tathāti** dukkaṭam atidisati. Āsanesu asati antamaso sākhaḥhaṅgampi kappiyaṃ kārapetvā pañṇapetabbaṃ. Tele asati kapalle aggipi jāletabbo.

**421-3. Paṭṭhapetvā dakāsananti** paribhojanīyapānīyodakañca āsanañca sannihitaṃ katvā. **Gaṇaṇattinti** idāni vakkhamānaṃ gaṇena ṭhapetabbaṃ ñattim. **Teti** aññe duve bhikkhū. **Samattapubbārambhenāti** samatto niṭṭhito pubbesu uttarāsaṅgaekamaṃsakaraṇādīsu ārambho yassāti tipadabahubbhī. Navena te evamīriyāti sambandho. **Teti** itare dve.

**424. Kattabbaṃ katvā** pubbakiccādikaṃ sampādetvā navo evaṃ īriyoti yojanā.

**427. Yatthāti** yasmim vihāre ekekassa pārisuddhiṃ haritvānāti sambandho. **Ekekassāti** ettha vicchāyaṃ dvittaṃ. Kiriyaṃ guṇena dabbena vā bhinne atthe byāpituṃ icchā vicchā. Ettha pana chandapārisuddhiharaṇasaṅkhātāya kiriyaṃ catūsu ca tīsu ca dvīsu ca bhinnamekekaṃ byāpituṃ sambandhituṃ icchāti vicchā. **Itarītareti** etthāpi karaṇakiriyaṃ vasena veditabbaṃ. Tayo dve eko vā taṃ taṃ saṅghuposathaṃ gaṇuposathaṃ puggaluposathaṃ vāti vuttaṃ hoti. Ayametthādhippāyo – catūsu ekassa āharitvā tayō pārisuddhiuposathaṃ karonti, tīsu vā ekassa āharitvā dve saṅghuposathaṃ karonti, **adhammena vaggam** uposathakammaṃ. Atha pana ekassa āharitvā tayō saṅghuposathaṃ karonti, ekassa āharitvā dve pārisuddhiuposathaṃ karonti, **adhammena vaggam** nāma hoti. Yadi pana cattāropi sannipatitvā pārisuddhiuposathaṃ karonti, tayō vā dve vā saṅghuposathaṃ karonti, **adhammena samaggam** nāma hotīti. Tabbipariyāyena **dhammena samaggam** veditabbaṃ.

**428.** Vagge samagge vā “vaggo”ti saññino vimatissa vā karoto dukkaṭanti sambandho. **Vaggeti** vaggasaṅghe. **Vimatissāti** “vaggo nu kho, samaggo”ti evaṃ vematikassa. Imināva kukkucapakatavāropi upalakkhito. **Karototi** uposathaṃ karontassa. Bhedādhippāyena karototi yojanā. Ettha pana pāpassa balavatāya thullaccayaṃ vuttaṃ. **Saññinoti** saññāsīsena cittaṃ vuttaṃ, cittavatoti attho.

**429-30. “Ukkhittassā”**tiādinā vajjanīyapuggale dasseti. **Ukkhittassāti** kattuatthe sāmivacanāṃ. Nisinnasaddassa kammaśādanattā ukkhittādīhi kattūhi bhavitabbanti. **“Sesāna”**nti visesanassa bhikkhūnaṃ byabhicārena sātthakatā. **Abhabbassa** paṇḍakādiekādasavidhassa abhabbassa. Nisinnaparisāyaṅca pātimokkhaṃ na uddiseti sambandho. Sabhāgāpattiko tathā na uddiseti yojetabbaṃ. Vikālabhojanādivatthuto samāno bhāgo koṭṭhāso etissāti sabhāgā, sā āpatti assāti bahubbīhi.

**Chandena parivutthenāti** ettha catubbidhaṃ pārivāsiyaṃ parisapārivāsiyaṃ rattipārivāsiyaṃ chandapārivāsiyaṃ ajjhāsayaṃ pārivāsiyanti. Tattha bhikkhū kenacideva karaṇīyena sannipatitā honti, atha megghuṭṭhānādinā kenacideva karaṇīyena anokāso, atha “aññattha gacchāmā”ti chandaṃ avissajjitvāva uṭṭhahanti, idaṃ **parisapārivāsiyaṃ** nāma kiñcāpi parisapārivāsiyaṃ, chandassa pana avissaṭṭhattā kammaṃ kātuṃ vaṭṭati.

“Yāva pana sabbe sannipatanti, tāva dhammaṃ sunissāmā”ti ekaṃ ajjhesanti, tasmim dhammakathaṃ kathenteyeva aruṇo uggacchati, sace cātuddasikaṃ kātuṃ nisinnā, pannarasoti kātuṃ vaṭṭati, sace pannarasikaṃ kātuṃ nisinnā, pāṭipade anuposathe uposathaṃ kātuṃ na vaṭṭati, aññaṃ pana saṅghakiccaṃ kātuṃ vaṭṭati, idaṃ **rattipārivāsiyaṃ** nāma.

Evaṃ pana nisinne koci nakkhattapāṭhako bhikkhu “ajja nakkhattaṃ dāruṇaṃ, imaṃ kammaṃ mā karoṭhā”ti vadati, te tassa vacanena chandaṃ vissajjetvā tattheva nisinnā honti, athañño āgantvā “nakkhattaṃ paṭimānentaṃ, attho bālaṃ upaccagā”ti (jā. 1.1.49) vatvā “kiṃ nakkhattena, karoṭhā”ti vadati, idaṃ **chandapārivāsiyaṅceva ajjhāsayaṃ pārivāsiyaṅca**. Ekasmim pārivāsiye puna chandapārisuddhiṃ ānetvā kammaṃ kātuṃ vaṭṭati.

**431.** Āpannaṅca vematikaṅca adesayitvā vā nāvikatvā vā uposathaṃ kātuṃ na ca kappatīti sambandho. **Nāvikatvāti** garukāpattim anāvikatvā. **Na cāti** neva.

**432. Aṭṭhitoposathāti** aṭṭhito avissaṭṭho uposatho yasminti bahubbīhi. **Tadahūti** tasmim uposathadivase. Antarāyaṃ vā saṅghaṃ vā vinā adhiṭṭhātuṃ sīmameva vā na vajeti yojanā. **Adhiṭṭhātuntī** iminā gaṇuposathampi upalakkheti. **Sīmanti** iminā nadimpī.

Uposathaniddesavaṇṇanā niṭṭhitā.

#### 45. Pavāraṇāniddeṣavaṇṇanā

**433.** “**Aññamaññappavāraṇā**” tyādīnaṃ aññamaññehi kātabbā pavāraṇā. Tattha tiṇṇaṃ catunnañca gaṇaṇattim ʒhapetvā aññamaññappavāraṇā, dvinnaṃ pana aṭṭhapetvāva. **Adhiṭṭhānanti** adhiṭṭhānappavāraṇā, yuppaccayantānaṃ bhāve niyatanapumsakattā “adhiṭṭhāna”nti vuttaṃ. **Sesā** pañcādīhi kātabbā avasesā **saṅghappavāraṇā** saṅghavasena ñattim ʒhapetvā kātabbā. Etena navasu saṅghappavāraṇādayo tisso dassitā. Nava hi pavāraṇā cātuddasī pannarasī sāmaggīti divasavasena, tevācī dnevācī ekavācīti kattabbākāravasena, saṅghe pavāraṇā, gaṇe pavāraṇā, puggale pavāraṇāti kārakavasena ca. Tattha purimavassaṃvutthānaṃ pubbakattikapuṇṇamā vā tesameva sace bhaṇḍanakārahehi upaddutā pavāraṇaṃ paccukkaḍḍhanti, atha kattikamāsassa kāḷapakkhacātuddaso vā pacchimakattikapuṇṇamā vā pacchimavassaṃvutthānañca pacchimakattikapuṇṇamā eva vā pavāraṇādivasā honti. Idaṃ pana pakaticārittaṃ. Tathārūpappaccaye sati dvinnaṃ kattikapuṇṇamānaṃ purimesu cātuddasesupi pavāraṇaṃ kātuṃ vaṭṭati. Bhinnassa pana saṅghassa sāmaggīyaṃ yo koci divaso pavāraṇādivaso hoti. Imā divasavasena tisso pavāraṇā. Kattabbākāravasena pana vakkhamānanayena viññātabbā.

**434.** “**Pubbakicce**”tiādīsū –

“Sammajjanī padīpo ca, udakaṃ āsanena ca;  
Pavāraṇāya etāni, pubbakaraṇanti vuccati.

“Chandappavāraṇā utukkhānaṃ, bhikkhugaṇanā ca ovādo;  
Pavāraṇāya etāni, pubbakiccanti vuccati.

“Pavāraṇā yāvatikā ca bhikkhū kammappattā,  
Sabhāgāpattiyo ca na vijjanti;  
Vajjanīyā ca puggalā tasmim na honti,  
Pattakallanti vuccatī”ti. –

Evam **aṭṭhakathāyaṃ** vuttā pubbakiccādayo veditabbā. **Ñattinti** idāni vakkhamānaṃ sāmāññaṃ saṅghaṇattim. Evam pana ñattiyā ʒhapitāya kāraṇe sati tevācīkadnevācīkaekavācīkasamānavassikavasenaṇapi pavāretuṃ vaṭṭati. Ayameva pana ñatti “saṅgho pavāreyyā”ti ettha “saṅgho tevācīkaṃ pavāreyya, saṅgho dnevācīkaṃ pavāreyya, saṅgho ekavācīkaṃ pavāreyya, saṅgho samānavassikaṃ pavāreyyā”tipi ʒhapetuṃ vaṭṭati. Cātuddasiyaṃ pana sāmaggīyañca “cātuddasī sāmaggī”ti vattabbaṃ.

**437.** Theresu ukkuṭikaṃ nisajja pavārentesu navo yāva sayam pavāreti, tāva ukkuṭiko eva acchatūti yojanā. **Acchatūti** nisīdeyya.

**440-2.** Dhammasākacchā ca kalaho cāti dvando. Rattiyā khepitabhāvato tevācīkāya okāse asati dasavidhe vā antarāye sati “suṇātu me...pe... samānavassikaṃ pavāreyyā”ti anurūpato ñattim vatvā yathāṭṭhapitañattiyā anurūpena pavāreyyāti sambandho veditabbo. **Anurūpatoti** “suṇātu me...pe... dānaṃ dentehi ratti khepitā, sace...pe... ratti vibhāyissati, yadi saṅghassa pattakalla”ntiādīnā tena khepitarattiyā anurūpena. “Suṇātu me bhante saṅgho, ayaṃ rājantarāyo, sace saṅgho tevācīkaṃ...pe... saṅgho bhavissati, athāyaṃ rājantarāyo bhavissati, yadi saṅghassa pattakalla”ntiādīnā rājantarāyādīnaṃ anurūpena vāti attho. “Athāyaṃ brahmacariyantarāyo bhavissati”ti pana peyyālavasena ante vuttaṃ brahmacariyantarāyaṃ gahetvā vuttaṃ. “Dnevācīka”ntiādikaṃ pana visuṃ visuṃ vattabbampi laṅghanakkamena sampiṇḍetvā vuttaṃ. Vacanasamaye pana “dnevācīkaṃ pavāreyya”iccādīnā vattabbaṃ. **Āgaccheyyaṃ yadi samāādīkā cāti** “āgaccheyyaṃ yadi samā”iccādayo uposathe vuttā gāthāyo ca. **Etthāti** etissaṃ pavāraṇāyaṃ. Ayameva ca āharaṇakkamo –

Āgaccheyyumaṃ yadi samā, pavārenteva thokikā;  
Pavāritā te suppavāritā, aññehi ca pavāriyaṃ;  
Pavāritesu sakalā-yekaccāyuttāhitāya vā.

Pavāreyyūñca te tesamaṃ, santike bahukā sace;  
Katvā sabbavikkappesu, pubbakiccaṃ punuddiseti.

“Āvāsikānaṃ pannaraso” tiādikā gāthāyo pana etthāpi samānā.

**443. Ānattim vatvāti** vakkhamānagaṇānattim vatvā.

**444. Samudīriyāti** aññe dve tayo vā vakkhamānakkamena vattabbā.

**446-8.** Kattabbaṃ katvāti yojetabbaṃ. **Kattabbanti** pubbakiccādikaṃ. Navenapi “ahaṃ bhante... pe... paṭikarissāmī” ti thero īriyoti yojetabbaṃ. **Evanti** idāni vakkhamānaṃ parāmasati.

**449. “Yasmi”**ntiādi vuttanayattā uttānameva.

**450. Gāthāyoti** “vagge samagge vaggoti, saññino” tiādikā heṭṭhā vuttagāthāyo vā. Ayaṃ panettha viseso – **karototi** ettha pavāraṇaṃ karototi attho gahetabbo. Tatiya gāthāya “pātimokkhaṃ na uddise” ti apanetvā “no kareyya pavāraṇa” ti padaṃ pakkhipitabbaṃ. Catutthagāthāya “anuposathe” tiādigāthābandhaṃ apanetvā “neva pavāraṇe kātumaṃ, sā kappati pavāraṇā” ti pakkhipitabbaṃ. Pañcamagāthāya “atṭhitoposathāvāsā” ti apanetvā “pavāraṇāṭṭhitāvāsā” ti pakkhipitabbaṃ.

**451. Saṅghamhi pavāritevāti** purimavassūpagate saṅghamhi pavārite eva. **Pārisuddhiuposathaṃ kareyyāti** na ekasmiṃ uposathagge dve ñattiyo ṭhapetabbāti adhippāyo. Pacchimikāya upagantvā apariniṭṭhitavasso **avuttho. Anupāgatoti** vassaṃ anupāgato. Ayametthādhippāyo – purimikāya vassaṃ upagatā pañca vā atirekā vā pacchimikāya upagatā tehi samā vā ūnatarā vā purimikāya vā upagatehi pacchimikāya upagatā thokatarā ceva honti, saṅghappavāraṇāya gaṇaṃ pūrenti saṅghappavāraṇāvasena ñattim ṭhapetvā, atha ca ubhopi ekato hutvā saṅghaṃ na pūrenti, gaṇaṃ pana pūrenti, gaṇānattim ṭhapetvā pavāretabbaṃ, pacchā tesamaṃ santike pārisuddhiuposatho kātabbo. Yadi pana purimikāya eko, pacchimikāya eko, ekena ekassa santike pavāretabbaṃ, ekena pārisuddhiuposatho kātabbo. Sace purimehi vassūpagatehi pacchā vassūpagatā ekenapi adhikā saṅghaṃ pūrenti, paṭhamaṃ pātimokkhaṃ uddisitvā pacchā tesamaṃ santike pavāretabbanti. Gaṇepi eseva nayo. Evamuparipi yathāyogaṃ cintanīyaṃ.

**452. Cātumāsiniyāti** aparakattikapuṇṇamāyaṃ. **Saṅghenāti** paṭhamaṃ vassūpagatena saṅghena. Vutthā vassā yehi te **vutthavassā**, pacchimavassūpagatā. **Sace appatarā siyunti** iminā yadi adhikatarā vā samasamā vā honti, pavāraṇānattim ṭhapetvā pacchimavassūpagatehi paṭhamaṃ pavārite pacchā itarehi pārisuddhiuposatho kātabboti dipetīti.

Pavāraṇāniddeśavaṇṇanā niṭṭhitā.

#### 46. Saṃvaraniddeśavaṇṇanā

**453.** Saṃvaraṇaṃ cakkhudvārādīnaṃ satikavāṭeṇa pidhanaṃ **saṃvaro**. Tattha kiñcāpi cakkhundriye saṃvaro natthi, na hi cakkhupasādaṃ nissāya sati uppajjati, neva bhavaṅgasamaye āvajjanādīnaṃ aññatarasamaye, javanakkhaṇe pana uppajjati tadā saṃvaro hoti, evaṃ honte pana so cakkhudvārādīnaṃ saṃvaroti vuccati. **Cakkhusotādibhedehīti** cakkhu ca sotañca, tāni ādi yesamaṃ, teva

bhedā cāti samāso, tehi dvārehi. Abhijjhādiḍḍipavattiyā accantopakārakattā karaṇatthe cettha tatiyā. Etena cakkhusotaghānājavhākāyamanasaṅkhātāni dvārāni vuttāni. **Rūpasaddādigocareti** rūpasaddagandharasaphoṭṭhabbadhammasaṅkhāte visaye. **Abhijjhādomanassādiḍḍipavattinti** ettha parasampattiṃ abhimukhaṃ jhāyatīti abhijjhā, balavataṇhā. **Ādi**-saddena micchādiṭṭhiādayo aneke akusalā dhammā saṅgahitā.

**454.** Sakaṃ cittaṃ kiṭṭhādiṃ duppasuṃ viya niggaṇṇheyāti sambandho. **Kiṭṭhanti** kiṭṭhaṭṭhāne uppannaṃ sassaṃ gahitaṃ. Kiṭṭhaṃ adatīti **kiṭṭhādi**, taṃ. **Sampajānoti** sātthakasappāyagocaraasammohasaṅkhātena catusampajāññena sammā pajāno. Iminā indriyasamvarasīlaṃ kathitaṃ.

Saṃvaraniddesavaṇṇanā niṭṭhitā.

#### 47. **Suddhiniddesavaṇṇanā**

**455.** Desanā saṃvaro eṭṭhi paccavekkhaṇanti bhedato suddhi catubbidhāti sambandho. “Paccavekkhaṇaṃ bhedato”ti vattabbe niggahitalopo daṭṭhabbo, desanāsuddhi saṃvarasuddhi pariyetthisuddhi paccavekkhaṇasuddhīti catubbidhāti vuttaṃ hoti. Tattha sujjetṭhiṃ suddhi, yathādhammaṃ desanāya suddhi **desanāsuddhi**. Vuṭṭhānassāpi cettha desanāya eva saṅgaho daṭṭhabbo. Mūlapattīnaṃ pana abhikkhutāpaṭiññāva desanāti heṭṭhā vuttā, sāvassa pārājikāpannassa visuddhi nāma hoti. Ayañhi yasmā pārājikaṃ āpanno, tasmā bhikkhubhāve ṭhatvā abhabbo jhānādīni adhigantaṃ. Bhikkhubhāvo hissa saggantarāyo ceva hoti, maggantarāyo ca. Vuttañhettaṃ –

“Sāmaññaṃ duppārāmaṭṭhaṃ, nirayāyūpakaḍḍhatī”ti. (dha. pa. 311);

Aparampi vuttaṃ –

“Sithilo hi paribbajo, bhiyyo ākirate raja”nti. (dha. pa. 313);

Iccassa bhikkhubhāvo visuddhi nāma na hoti. Yasmā pana gihiādiko hutvā dānasaraṇasīlasaṃvarādīhi saggamaggaṃ vā jhānavimokkhamaggaṃ vā ārādettaṃ bhabbo hoti, tasmāssa gihiādibhāvo visuddhi nāma hoti. Adhiṭṭhānaviṭṭhena saṃvarena visuddhi **saṃvaravisuddhi**. Dhammena samena paccayānaṃ eṭṭhiyā suddhi **eṭṭhisuddhi**. Catūsu paccayesu paccavekkhaṇena suddhi **paccavekkhaṇasuddhi**. “Catubbidhā pātī”tiādīsu **pātimokkhasaṃvarasammataṃ** “pātimokkhasaṃvaro”ti sammataṃ sīlaṃ.

**456.** Cittādiṭṭhānasamvarā sujjetṭhiṃ indriyasamvaro saṃvarasuddhīti vuttoti yojanā.

**457.** Anesanaṃ pahāya dhammena uppādentassa eṭṭhiyā suddhattā ājīvanissitaṃ eṭṭhisuddhīti vuttanti sambandho. **Uppādentassāti** paccaye uppādentassa.

**458.** **Paccavekkhaṇasujjetṭhiṃ** hetumhi pañcamīti.

Suddhiniddesavaṇṇanā niṭṭhitā.

#### 48. **Santosaniddesavaṇṇanā**

**459.** Paṃsukūlaṃ piṇḍiyālopo rukkhamaṃ pūtimuttābhāsajanti ime cattāro paccayā appagghanakatāya appā ceva kassacipi ālayābhāvena anavaṃjā ca gatagataṭṭhāne labbhamānatāya sulabhā cāti vuccanti, tenāha “**appenā**”tiādi. **Mattaññūti** pariyesanappaṭiggahaṇaparibhogavissajjanesu catūsu



mattaññutāvasena pamāṇaññū.

**460.** Kathaṃ santuṭṭhoti āha “**atīta**”ntiādi. **Paccuppanna** yāpentoti yathālābhayathābalayathāsārubbavāsena paccuppanna yathāvuttacatubbidhapaccayena yāpentoti.

Santosaniddesavaṇṇanā niṭṭhitā.

#### 49. Caturārakkhaniddesavaṇṇanā

**461-2.** Buddhānussati ...pe... maraṇassatīti imā caturārakkhā nāmāti seso. **Ārakattādinā**ti ārakabhāvo ārakattaṃ, taṃ ādī yassa “arīnaṃ hatattā”tiādīkassa taṃ **ārakattādi**. Tena tena maggena savāsānānaṃ arānaṃ hatattā ārakā sabbakilesehi suvidūraviddhāre ṭhitoti ā-kārassa rassattaṃ, ka-kārassa ha-kāraṃ sānūnāsikaṃ katvā “araha”nti padasiddhi vedītabbā. “Ārakā”ti ca vutte sāmāññajotānāya visese avatṭhānato, visesatthīnā ca visesassa anuppajoyitabbatā “kilesehi”ti labbhati.

**Sammā**ti aviparītaṃ. **Sāmanti** sayameva, aparaneyyo hutvāti attho. “Sambuddho”ti hi ettha saṃsaddo “saya”nti etassa atthassa bodhako daṭṭhabbo. **Buddhatoti** bhāvappadhānoyaṃ niddeso, buddhattāti attho. “Arahaṃ” iti vā “sammāsambuddho” iti vā bhagavato navabhede guṇe yā punappunaṃ anussati, sā buddhānussatīti yojanā. “Sammāsambuddho itī”ti vattabbe a-kāro sandhivasena āgato. **Iti**-saddo panettha ādiattho, iccādīti attho. **Navabhedeti** “anuttaro purisadammasārathī”ti ekato gahetvā. Ettha pana upacāro uppajjati, na appanā, tathā maraṇassatiyaṃ. Itaresu pana ubhayampi uppajjati vedītabbaṃ. Buddhānussati.

**463-4.** “**Sīmaṭṭhā**”tiādinā mettābhāvanāṃ dasseti. **Sīmaṭṭhasaṅgheti** sīmāyaṃ tiṭṭhatīti sīmaṭṭho, sova saṅgho. Gocaragāmaṃhi issare janeti sambandho. Tattha mānuse upādāya sabbasattesūti yojetabbaṃ. **Tatthāti** tasmiṃ gāme. Sukhitā hontu averāti padacchedo. **Ādināti** “abyāpajjā hontu, anīghā hontu, sukhī attānaṃ pariharantū”ti iminā. **Paricchijja paricchijjāti** “imasmiṃ vihāre sabbe bhikkhū”tiādinā evampi paricchinditvā paricchinditvā. Mettābhāvanā.

**465-6.** Idāni asubhaṃ niddisanto sabbapaṭṭhamāṃ sādhetabbaṃ sattavidhamuggahakosallaṃ “**vaṇṇe**”ccādinā dasseti. Sattavidhañhi taṃ nayato āgataṃ vācāsajjhāyamaṇasāsajjhāyehi saddhiṃ. Tattha paṭṭhamāṃ vācāya sajjhāyantena cattāri tacapañcakādīni paricchinditvā anulomappaṭilomavasena kātabbaṃ. Yathā pana vacasā, tatheva maṇasāpi sajjhāyo kātabbo. Vacasā sajjhāyo hi maṇasā sajjhāyassa paccayo. So pana lakkhaṇappaṭivedhassa paccayo. Tattha **vaṇṇo** nāma kesādīnaṃ vaṇṇo. **Saṅghānaṃ** tesameva saṅghānaṃ. **Okāso** tesameva patiṭṭhokāso. **Disā** nābhito uddhaṃ uparimadisā, adho heṭṭhimā. **Paricchedo** nāma “ayaṃ koṭṭhāso heṭṭhā ca upari ca tiriyañca iminā nāma paricchinnō”ti evaṃ sabhāgaparicchedo ceva “kesā na lomā, lomā na kesā”ti evaṃ amissakatāvasena visabhāgaparicchedo ca. Kesādīkoṭṭhāse vavatthapetvāti sambandho. **Vavatthapetvāti** vuttanayena vavatthapetvā.

Evaṃ vavatthapentena yathāvuttaṃ sattavidhaṃ uggahakosallaṃ sampādetvā aṭṭhārasavidhaṃ maṇasikāraṃkosallaṃ sampādetabbanti dassetuṃ “**anupubbato**”tiādimāha. Tattha appanāto tayo ca suttantāti ime cattāropi nayatovāgate nātisīghādīsu pakkhipitvā dasavidhatā vedītabbā. **Anupubbato**ti sajjhāyakaraṇato paṭṭhāya anupaṭipāṭiyā. **Nātisīghaṃ nātisaṅghikaṃ katvāti** kiriyāvīsesanaṃ. **Vikkhepaṃ paṭibāhayanti** kammaṭṭhānaṃ vissajjtvā bahiddhā puthuttārammaṇe cetaso vikkhepaṃ paṭibāhanto. **Paṇṇattim samatikkammāti** yāyaṃ “kesā lomā”ti paṇṇatti, taṃ atikkamitvā, “paṭikkūla”nti cittaṃ ṭhapetvāti adhippāyo. **Anupubbato muñcantassāti** yo yo koṭṭhāso na upaṭṭhāti, taṃ taṃ anukkamena muñcato, tassa “bhāvanā”ti iminā sambandho vedītabbo.

**467.** Evaṃ ubhayakosallaṃ sampādetvā sabbakoṭṭhāse vaṇṇādivasena vavatthapetvā vaṇṇādivaseneva pañcadhā paṭikkūlatā vavatthapetabbāti dassetuṃ “**vaṇṇā**”tiādimāha. Vaṇṇa...pe...

okāsehi koṭṭhāse paṭikkūlāti bhāvanā asubhanti yojanā. Tatra kesā tāva pakativaṇṇena kālakā addarīṭṭhakavaṇṇā, saṅṭhānato dīghavattatūlādaṇḍasaṅṭhānā, disato uparimadisāya jātā, okāsato ubhosu passesu kaṇṇacūlikāhi, purato naḷāṭantena, pacchato gaḷavāṭakena paricchinnā, sīsakaṭṭhāveṭṭhanaallacammaṃ kesānaṃ okāso. Paricchedato kesā sīsaveṭṭhanacamme vīhaggamattamaṃ pavisitvā paṭiṭṭhitena heṭṭhā attano mūlatalena, upari ākāsena, tiriyaṃ aññamaññaṃ paricchinnā. Dve kesā ekato natthīti ayaṃ sabhāgaparicchedo. “Kesā na lomā, lomā na kesā”ti evaṃ avasesaekatiṃ sakoṭṭhāsehi amissikāṭā kesā nāma pāṭiyekko eko koṭṭhāsoti ayaṃ visabhāgaparicchedo. Idamaṃ kesānaṃ vaṇṇādito nicchayanaṃ. Idamaṃ pana nesaṃ vaṇṇādivasena pañcadhā paṭikkūlato nicchayanaṃ – kesā nāmete vaṇṇatopi paṭikkūlā āsayatopi saṅṭhānatopi gandhatopi okāsatopi paṭikkūlāti evaṃ sesakoṭṭhāsānaṃpi yathāyogaṃ veditabbaṃ.

### Uddhumātādivatthūsūti

uddhumātākaṇṇavipubbakavicchiddakavikkhāyitakavikkhittakahatavi-  
kkhittakalohitakapuḷavakaaṭṭhikasāṅkhātesu dasesu aviññāṇakaasubhavatthūsū asubhākāraṃ gahetvā pavattā bhāvanā vā asubhanti sambandho. Asubhabhāvanā.

**468.** “Maraṇaṃ me bhavissatī”ti vā “jīvitamaṃ me uparujjhatī”ti vā “maraṇaṃ maraṇa”nti vā yoniso bhāvayitvānāti yojanā. **Jīvitanti** rūpajīvitindriyaṇca arūpajīvitindriyaṇca. **Yonisoti** upāyena. Evaṃ pavattayatoyeva hi ekaccassa nīvaraṇāni vikkhambhanti, maraṇārammaṇā sati saṅṭhāti, upacārapattameva kammaṭṭhānaṃ hoti.

**469-470.** Yassa pana ettāvātā na hoti, tena vadhakapaccūpaṭṭhānādīhi aṭṭhahākārehi maraṇaṃ anussaritabbanti dassetuṃ “**vadhakassevā**”tiādīmāha. **Vadhakassa iva upaṭṭhānāti** “imassa sīsamaṃ chindissāmī”ti asīmaṃ gahetvā gīvāya sañcārayamānassa vadhakassa viya maraṇassa upaṭṭhānato. **Sampattīnaṃ vipattitoti** bhogasampattiyā jīvitasampattiyā ca vināsamaraṇasaṅkhātavipattito. **Upasaṃharatoti** yasamahattato puññamahattato thāmamahattato iddhimahattato paññamahattato paccakabuddhato sammāsambuddhatoti imehi sattahākārehi attano upasaṃharaṇato. **Kāyabahusādhāraṇāti** asītiyā kimikulānaṃ, anekasatānaṃ rogānaṃ, bāhirānaṇca ahivicchikādīnaṃ maraṇassa paccayānaṃ sādharmaṇato. **Āyudubbalatoti** assāsapassāsūpanibaddhattairiyāpathūpanibaddhattādīnā āyuno dubbalato. **Kālavavatthānassa abhāvato** “imasmiṃyeva kāle maritabbaṃ, na aññasmi”nti evaṃ kālavavatthānassa abhāvato. **Addhānassa paricchedāti** “manussānaṃ jīvitassa paricchedo nāma etarahi paritto, addhā yo cīraṃ jīvati, so vassasataṃ jīvati”ti evaṃ addhānassa kālassa paricchedato.

Ettha pana kammaṭṭhānaṃ bhāvetvā vipassanāya saha paṭisambhidāhi arahattaṃ pattukāmena buddhaputtana yaṃ kātabbaṃ, taṃ ādikammikassa kulaputtassa vasena ādīto paṭṭhāya saṅkhepenopadissāma. Catubbidhaṃ tāva sīlaṃ sodhetabbaṃ. Tattha tividhā visujjanā anāpajjanaṃ, āpannavuṭṭhānaṃ, kilesehi ca appaṭipīḷanaṃ. Evaṃ visuddhasīlassa hi bhāvanā sampajjati. Yampidaṃ cetiyaṅgaṇavattādīnaṃ vasena ābhisamācārikasīlaṃ vuccati, tampi sādhukaṃ paripūretabbaṃ. Tato –

“Āvāso ca kulaṃ lābho, gaṇo kammaṇca pañcamaṃ;  
Addhānaṃ nāti ābādho, gantho iddhīti te dasā”ti. (visuddhi. 1.41) –

Evaṃ vuttasu dasasu palibodhesu yo palibodho, yo upacchinditabbo. Evaṃ upacchinnapalibodhena –

“Piyo garu bhāvanīyo, vattā ca vacanakkhama;  
Gambhīraṇca kathamaṃ kattā, no cāṭṭhāne niyojako”ti. (a. ni. 7.37) –

Evaṃ vuttalakkaṇaṃ ācariyaṃ upasaṅkamitvā kammaṭṭhānaṃ uggahetabbaṃ. Taṃ duvidhaṃ hoti sabbatthakakammaṭṭhānaṇca pārihāriyakammaṭṭhānaṇca. Tattha **sabbatthakakammaṭṭhānaṃ** nāma bhikkhusaṅghādīsū mettā, maraṇassati ca, “asubhasañña”tipi eke. Etaṃ pana tayaṃ sabbattha

atthayitabbaṃ icchitabbanti katvā, adhippetassa ca yogānuyogakammassa padaṭṭhānattā  
 “sabbatthakakammaṭṭhāna”nti vuccati. Aṭṭhatimsārammaṇesu pana yaṃ yassa caritānukūlam, taṃ tassa  
 niccaṃ pariharitabbattā yathāvutteneva nayena “**pārihāriyakammaṭṭhāna**”nti vuccati, tato –

“Mahāvāsaṃ navāvāsaṃ, jarāvāsañca panthanim;  
 Soṇḍim paṇṇaṅca pupphaṅca, phalaṃ patthitameva ca.

“Nagaraṃ dārunā khettaṃ, visabhāgena paṭṭanaṃ;  
 Paccantasīmāsappāyaṃ, yattha mitto na labbhati.

“Aṭṭhāresetāni ṭhānāni, iti viññāya paṇḍito;  
 Ārakā parivajjeyya, maggaṃ sappaṭibhayaṃ yathā”ti. (visuddhi. 1.52) –

Vuttaaṭṭhārasasenāsanadosavajjitaṃ “idha, bhikkhave, senāsaṃ nātidūraṃ hoti naccāsannaṃ  
 gamanāgamanasampannaṃ divā appākiṇṇaṃ rattiṃ appasaddaṃ appanigghosaṃ  
 appaḍaṃsamakasaṃvātāpasarīsapasamphassaṃ. Tasmim kho pana senāsane viharantassa  
 appakasireneva uppajjanti cīvarapiṇḍapātasenāsanagilānapaccayabhesajjaparikkhārā. Tasmim kho pana  
 senāsane therā bhikkhū viharanti bahussutā āgatāgamā dhammavinayadharā mātikādhārā. Te kālena  
 kālaṃ upasaṅkamitvā paripucchati paripaṇḥati ‘idaṃ bhante kathaṃ, imassa ko attho’ti. Tassa te  
 āyasmanto avivaṭṭāneva vivaranti, anuttānikataṅca uttāniṃ karonti, anekavihitesu ca kaṅkhāṭṭhānīyesu  
 dhammesu kaṅkhaṃ paṭivinodenti. Evaṃ kho, bhikkhave, senāsaṃ pañcaṅgasamannāgataṃ hoti’ti  
 (a. ni. 10.11) vuttapañcaṅgasamannāgataṃ senāsaṃ upagamma tattha vasantena “dīghāni  
 kesalomanakhāni chinditabbāni, jīṇṇacīvaṇesu aggaḷaanuvātaparibhaṇḍadānādīnā dalhikammaṃ vā  
 tantacchedādīsu tunnakammaṃ vā kātabbaṃ, kiliṭṭhāni rajitabbāni, sace patte malaṃ hoti, patto  
 pacitabbo, mañcapīṭhādīni sodhetabbāni”ti evaṃ vuttaupacchinnakhuddakapalibodhena  
 katabhattakiccena bhattasammadaṃ vinodetvā ratanattayaguṇānussaraṇena cittaṃ sampahaṃsetvā  
 ācariyuggahato ekapadampi asammuyhantena manasi kātabbanti.

Caturārakkhaniddesavaṇṇanā niṭṭhitā.

## 50. Vipassanāniddesavaṇṇanā

**471-2. Nāmarūpanti** cittacetāsikaṅkhātāṃ nāmaṅca aṭṭhavīsatividhaṃ rūpaṅca.

“Namanalakkhaṇaṃ nāmaṃ, ruppanalakkhaṇaṃ rūpaṃ, nāmarūpato na añño attādiko koci atthi”ti  
 evaṃ jhānalābhī ce, jhānato vuṭṭhāya jhānagataṃ vā vipassanāyāniko ce, pakīṇṇakabhūtaṃ nāmarūpaṃ  
 pariggahetvā. Pātimokkhasaṃvaraḍi sīlavissuddhi, caturārakkhavasena dīpitaḍi sopacārasamādhisaṅkhātā  
 cittavisuddhi ca vuttāva nāmāti iminā dīṭṭhivissuddhi kathitā. Tato tassa paccayaṅca pariggahetvāti  
 sambandho. **Tassa paccayanti** “paṭisandhikkhaṇe nāmarūpadvayameva avijjātaṅhāupādānakammehi  
 uppajjati, na issarādikāraṇeṇā”tiādīnā tassa kāraṇaṃ, iminā kaṅkhāvitaraṇavisuddhi dassitā.

**Hutvā abhāvato aniccāti** sabbepi nāmarūpasaṅkhārā uppajjitvā abhāvāpajjanato aniccā.

**Udayabbayapīlanā dukkhāti** uppādanirodhavasena pīlanato dukkhā. **Avasavattittā anattāti** attano  
 vase avattanato anattāti evaṃ saṅkhārehi saddhiṃ tilakkhaṇaṃ āropetvā. **Punappunaṃ sammasantoti**  
 yathāvuttanayena sammasantō samathayāniko vipassanāyāniko ca yogāvācaro. Iminā  
 maggāmaggañāṇadassanavisuddhi, paṭipadāñāṇadassanavisuddhi ca dassitā. Saṅkhārānameva hi  
 udayabbayādīnānupassanato  
 udayabbayabhaṅgabhaṅgāyādīnavanibbidāmuñcitukamyatāpaṭisaṅkhānupassanāsa-  
 ṅkhārupekkhāñāṇasaṅkhātassa aṭṭhavidhassa ñāṇassa vasena sikhāpattāṃ vipassanāñāṇaṃ  
 paṭipadāñāṇadassanavisuddhi nāma. **Anupubbena sabbasaṃyojanakkhayaṃ pāpuṇeyyāti** iminā  
 ñāṇadassanavisuddhi dassitā. **Sabbasaṃyojanakkhayaṃ** orambhāgiyānaṃ pañcannaṃ saṃyojanānaṃ  
 heṭṭhā maggattayena khepitattā, itaresaṃ uddhambhāgiyānaṃ saṃyojanānaṃ khepitattā ca sabbesaṃ

saṃyojanānaṃ khayante jātaṃ arahattamaggaṃ.

### Nigamanakathāvaṇṇanā

473. Yasmā kāraṇā yā sikkhanā, ayaṃ bhikkhukiccaṃ, ato tasmā kāraṇāti attho.

474. **Niccaso lokavicārinoti** niccaṃ loke vicarato. Mālutasseva parissamo na sambhotīti yojanā. **Mālutassevāti** vātassa iva. **Na sambhotīti** na hoti.

475-6. Tambapaṇṇi eva tambapaṇṇiyo, ketu viya ketu, tambapaṇṇiye ketūti tappuriso. Tena racitā dhammavinayaññupasaṃsitā ayaṃ khuddasikkhā parimāṇato gāthānaṃ pañcamattehi satehi ettāvataṃ niṭṭhānamupāgatāti sambandho.

Nigamanakathāvaṇṇanā niṭṭhitā.

### Nigamanakathā

Kārāpitetirucire pavare vihāre;  
Mānādhikāripurinā garunā guṇena;  
Vassaṃ vasaṃ dāmaṃ vidhamaṃ akāsiṃ;  
Ākaṅkhaṭika jinasāsanasampavuddhiṃ.

Puññaena sattharacanājanitena tena;  
Sambuddhasāsanavarodayakāraṇena;  
Lokāmissesu pana me samayaṃ alaggo;  
Sambuddhasāsanavarodayamācareyyaṃ.

Atthesu akkharapadesu vinicchayesu;  
Pubbāparesu likhitaṃ khalitaṃ yadatthi;  
Ohāya khantumarahanti vadantu santā;  
Diṭṭhāparādhamatha vā kimulālanena.

Yenantatantaratanākaramanthanena;  
Manthācalollasitaññāvarena laddhā;  
Sārāmatātisukhitā sukhayanti caññe;  
Te me jayanti garavo garavo guṇehi.

Paratthasampādanato, puññaenādhigatenahaṃ;  
Paratthasampādanako, bhavēyyaṃ jātijātiyaṃ.

Sisso āha –

Paramappicchatānekasantosopasamesinaṃ;  
Sucasallekhavuttīnaṃ, sadāraññānivāsinaṃ.

Sāsanujjotakārīnaṃ, ācerattamupāgataṃ;  
Udumbaragirikhyātayatīnaṃ yatipuṅgavaṃ.

Medhaṅkara iti khyātanāmadheyyaṃ tapodhanaṃ;  
Theraṃ thiradayāmedhānidhānaṃ sādhuṇṇijitaṃ.

Sissaṃ sahāyamāgamma, kalyāṇamittamattano;  
Sodhetuṃ sāsanaṃ satthu, parakkamamakāsi yo.

Susaddasiddhiṃ yo yoganicchayaṃ sabbhi vaṇṇitaṃ;  
Akā subodhālaṅkāraṃ, vuttodayamanākulaṃ.

Saṅgharakkhitaṇāmena, mahātherena dhīmatā;  
Nivāsabhūtenānekaguṇānappicchatādināṃ.

Teneva racitā sādhu, sāsanaodayakārinā;  
Khuddasikkhāya ṭikāpi, sumaṅgalappasādanī.

Nigamanakathā niṭṭhitā.

Iti sumaṅgalappasādanī nāma

Khuddasikkhā-abhinavaṭṭikā samattā.

Namo tassa bhagavato arahato sammāsambuddhassa

## **Mūlasikkhā**

### **Ganthārambhakathā**

Natvā nāthaṃ pavakkhāmi, mūlasikkhaṃ samāsato;  
Bhikkhunā navakenādo, mūlabhāsāya sikkhituṃ.

### **1. Pārājikaniddeso**

1. Saṃ nimittaṃ pavesanto, bhikkhu maggattaye cuto;  
Pavesanaṭṭhituddhāra-paviṭṭhe cepi sādīyaṃ.
2. Adinnaṃ mānuṣaṃ bhaṇḍaṃ, theyyāyekena ādiyaṃ;  
Pañcaviśāvahāresu, garukaṃ ce cuto bhava.
3. Ādiyanto harantova-harantopiriyāpathaṃ;  
Vikopento tathā ṭhānā, cāventopi parājiko.
4. Tattha nānekabhaṇḍānaṃ, pañcakānaṃ vasā pana;  
Avahārā dasañceti, viññātabbā vibhāvinā.
5. Sāhatthāṇattiko ceva, nissaggo cātthasādhako;  
Dhuranikkhepanañceva, idaṃ sāhatthapañcakaṃ.
6. Pubbasahappayogo ca, saṃvidhāharaṇampi ca;  
Saṅketakammaṃ nimittaṃ, pubbappayogapañcakaṃ.
7. Theyyāpasayhaparikappa-ppaṭicchannakusādikā;  
Avahārā ime pañca, viññātabbā vibhāvinā.

8. Manussapāṇaṃ pāṇoti, jānaṃ vadhakacetasā;  
Jīvitā yo viyojeti, sāsanaṃ so parājito.
9. Jhānādibhedaṃ hadaye asantaṃ,  
Aññāpadesaṇca vinādhimānaṃ;  
Manussajātissa vadeyya bhikkhu,  
Ñātakkaṇe tena parājiko bhaveti.

## 2. Garukāpattiniddeso

10. Mocetukāmacittena, upakkamma vimocayaṃ;  
Sukkamaññātra supinā, samaṇo garukaṃ phuse.
11. Kāyasaṃsaggarāgena, manussitthiṃ parāmasaṃ;  
Itthisaññī upakkamma, samaṇo garukaṃ phuse.
12. Duṭṭhullavācassādena, maggaṃ vārabbha methunaṃ;  
Obhāsanto manussitthiṃ, suṇamānaṃ garuṃ phuse.
13. Vaṇṇaṃ vatvāttanokāma-pāricariyāya methunaṃ;  
Itthiṃ methunarāgena, yācamāno garuṃ phuse.
14. Sandesaṃ paṭiggaṇhitvā, purisassitthiyāpi vā;  
Vīmaṃsitvā haraṃpaccā, samaṇo garukaṃ phuse.
15. Cāvetukāmo codento, amūlantimavatthunā;  
Codāpayāṃ vā samaṇo, suṇamānaṃ garuṃ phuse.
16. Lesamattaṃ upādāya, amūlantimavatthunā;  
Cāvetukāmo codento, suṇamānaṃ garuṃ phuseti.

## 3. Nissaggiyaniddeso

17. Vikappanamadhiṭṭhāna-makatvā kālacīvaraṃ;  
Dasāhamatimāpeti, tassa nissaggiyaṃ siyā.
18. Bhikkhusammutiyāññātra, ticīvaramadhiṭṭhitaṃ;  
Ekāhamatimāpeti, nissaggi samayaṃ vinā.
19. Aññātikā bhikkhuniyā, purāṇacīvaraṃ pana;  
Dhovāpeti rajāpeti, ākoṭāpeti taṃ siyā.
20. Aññātikā bhikkhuniyā, hatthato kiñci mūlakaṃ;  
Adatvā cīvarādāne, nissaggiyamudīritaṃ.
21. Appavāritamaññātiṃ, viññāpentassa cīvaraṃ;  
Aññātra samayā tassa, nissaggiyamudīritaṃ.
22. Rajataṃ jātarūpaṃ vā, māsakaṃ vā kahāpaṇaṃ;  
Gaṇheyya vā gaṇhāpeyya, nissaggi sādiyeyya vā.
23. Parivatteyya nissaggi, rajatādi catubbidhaṃ;

Kappiyaṃ kappiyenāpi, ṭhapetvā sahadhammike.

24. Vikappanamadhiṭṭhāna-makatvāna pamāṇikaṃ;  
Dasāhamatimāpeti, pattaṃ nissaggiyaṃ siyā.
25. Pañcabandhanato ūna-patte sati paraṃ pana;  
Viññāpeti navam pattaṃ, tassa nissaggiyaṃ siyā.
26. Paṭiggahetvā bhuñjanto, sappitelādikaṃ pana;  
Sattāhamatimāpeti, tassa nissaggiyaṃ siyā.
27. Bhikkhussa cīvaraṃ datvā, acchindantassa taṃ puna;  
Sakasaññāya nissaggi, acchindāpayatopi vā.
28. Appavāritamaññātiṃ, suttaṃ yāciya cīvaraṃ;  
Vāyāpentassa nissaggi, vinā ñātipparite.
29. Jānanto bhikkhu saṅghassa, lābhaṃ pariṇataṃ pana;  
Attano pariṇāmeti, tassa nissaggiyaṃ siyāti.

#### 4. Pācittyaniddeso

30. Sampajānamusāvāde, pācittiyamudīritaṃ;  
Bhikkhuñca omasantassa, pesuññaharaṇepi ca.
31. Ṭhapetvā bhikkhuniṃ bhikkhuṃ, aññena piṭakattayaṃ;  
Padasodhammaṃ bhaṇantassa, pācittiyamudīritaṃ.
32. Anupasampanneneva, sayitvāna tirattiyaṃ;  
Pācitti saḥaseyyāya, catutthatthaṅgate puna.
33. Itthiyā ekarattampi, seyyaṃ kappayatopi vā;  
Desentassa vinā viññuṃ, dhammañca chappaduttariṃ.
34. Duṭṭhullaṃ bhikkhuno vajjaṃ, bhikkhusammutiyā vinā;  
Abhikkhuno vadantassa, pācittiyamudīritaṃ.
35. Khaṇeyya vā khaṇāpeyya, pathaviñca akappiyaṃ;  
Bhūtagāmaṃ vikopeyya, tassa pācittiyaṃ siyā.
36. Ajjhokāse tu mañcādiṃ, katvā santharaṇādikaṃ;  
Saṅghikaṃ yāti pācitti, akatvāpucchanādikaṃ.
37. Saṅghikāvasathe seyyaṃ, katvā santharaṇādikaṃ;  
Akatvāpucchanādiṃ yo, yāti pācitti tassapi.
38. Jānaṃ sappāṇakaṃ toyaṃ, pācitti paribhuñjato;  
Aññātikā bhikkhuniyā, ṭhapetvā pārivattakaṃ.
39. Cīvaraṃ deti pācitti, cīvaraṃ sibbatopi ca;  
Atirittaṃ akāretvā, pavāretvāna bhuñjato.

40. Bhikkhuṃ āsādanāpekkho, pavāreti pavāritaṃ;  
Anatirittena bhutte tu, pācittiyamudīritaṃ.
41. Sannidhibhojanaṃ bhuñje, vikāle yāvakālikaṃ;  
Bhuñjato vāpi pācitti, agilāno paṇītaṃ.
42. Viññāpetvāna bhuñjeyya, sappibhattādikaṃ ca;  
Appaṭiggahitaṃ bhuñje, dantakaṭṭhodakaṃ vinā.
43. Titthiyassa dade kiñci, bhuñjitabbaṃ sahatthato;  
Nisajjaṃ vāraho kappe, mātuḡāmena cekato.
44. Surāmerayapānēpi, pācittiyamudīritaṃ;  
Aṅgulipatodake cāpi, hasadhammēpi codake.
45. Anādarepi pācitti, bhikkhuṃ bhīsayatopi vā;  
Bhayānakaṃ kathaṃ katvā, dassētvā vā bhayānakaṃ.
46. Ṭhapētvā paccayaṃ kiñci, agilāno jaleyya vā;  
Jotiṃ jalāpayeyyāpi, tassa pācittiyaṃ siyā.
47. Kappabindumanādāya, navacīvarabhogino;  
Hasāpekkhassa pācitti, bhikkhuno cīvarādikaṃ.
48. Apanētvā nidhēntassa, nidhāpēntassa vā pana;  
Jānaṃ pāṇaṃ mārentassa, tiracchānagataṃ ca.
49. Chādetukāmo chādeti, duṭṭhullaṃ bhikkhunopi ca;  
Gāmantaragataṃ cāpi, saṃvidhāyitthiyā saha.
50. Bhikkhuṃ paharato vāpi, talasattikamuggire;  
Codeti vā codāpeti, garukāmūlakenapi.
51. Kukkuccuppādane cāpi, bhaṇḍanattāyupassutiṃ;  
Sotuṃ bhaṇḍanajātānaṃ, yāti pācittiyaṃ siyā.
52. Saṅghassa lābhaṃ pariṇāmitaṃ tu,  
Nāmeti yo taṃ parapuggalassa;  
Pucchaṃ akatvāpi ca santabhikkhuṃ,  
Pācitti gāmassa gate vikāleti.

### 5. Pakiṇṇakaniddeso

53. Saṅghikaṃ garubhaṇḍaṃ yo, deti aññassa issaro;  
Thullaccayaṃ yathāvattthuṃ, theyyā pārājikādipi.
54. Kusādimayacīrāni, kambalaṃ kesavālaṃ;  
Samayaṃ vinā dhārayato, lūkapakkhājīnakkhipaṃ.
55. Sattakamme vatthikamme, saṃ nimittaṅca chindato;  
Thullaccayaṃ manussānaṃ, maṃsādibhojanēpi vā.



56. Kadalerakakkadussāni, potthakaṃ sabbanīlakam;  
Sabbapītādikañcāpi, dhārayantassa dukkaṭam.
57. Hatthissuragasoṇānam, sīhabyagghacchadīpinam;  
Taracchassa ca maṃsādiṃ, uddissakatakampi ca.
58. Anāpucchitamamṣaṇca, bhuñjato dukkaṭam siyā;  
Yātānupubbaṃ hitvāna, dakatitthādikaṃ vaje.
59. Sahasā vubbhajitvāna, pavise nikkhameyya vā;  
Vaccapassāvakuṭikaṃ, vinā ukkāsikaṃ vise.
60. Nīttunanto kare vaccaṃ, dantakaṭṭhaṇca khādayam;  
Vaccapassāvadoṇīnam, bahi vaccādikaṃ kare.
61. Kharena cāvalekheyya, kaṭṭham pāteyya kūpake;  
Ūhataṇca na dhoveyya, uklāpaṇca na sodhaye.
62. Dakakiccaṃ karontassa, katvā ‘‘capucapū’’ti ca;  
Anajjhīṭṭhova therena, pātimokkhampi uddise.
63. Anāpucchāya pañhassa, kathane vissajjanepi ca;  
Sajjhāyakaraṇe dīpa-jālāne vijjhāpanepi ca.
64. Vātapānakavāṭāni, vivareyya thakeyya vā;  
Vandanādiṃ kare naggo, gamanaṃ bhojanādikaṃ.
65. Parikammaṃ kare kāre, tipaṭicchannakaṃ vinā;  
Kāyaṃ nahāyaṃ ghaṃseyya, kuṭṭe thambhe tarumhi vā.
66. Kuruvindakasuttena, aññamaññassa kāyato;  
Agilāno bahārāme, careyya saupāhano.
67. Upāhanaṃ yo dhāreti, sabbanīlādikampi ca;  
Nimittaṃ itthiyā ratto, mukhaṃ vā bhikkhadāyiyā.
68. Ujjhānasaññī aññassa, pattaṃ vā attano mukhaṃ;  
Ādāsādimhi passeyya, uccāsanamahāsane.
69. Nisajjādiṃ karontassa, dukkaṭam vandanepi ca;  
Ukkhittānupasampanna-nānāsaṃvāsakādinam.
70. Ekato paṇḍakitthīhi, ubhatobyañjanena vā;  
Dīghāsane nisīdeyya, adīghe āsane pana.
71. Asamānāsānikena, mañcapīṭhe sayeyya vā;  
Kulasaṅgahatthaṃ dadato, phalapupphādikampi ca.
72. Ganthimādiṃ kare kāre, jinavāritapaccaye;  
Paribhuñjeyya abyatto, anissāya vaseyya vā.
73. Anuññātehi aññassa, bhesajjaṃ vā kare vade;

- Kare sāpattiko bhikkhu, uposathappavāraṇaṃ.
74. Dvārabandhādike ṭhāne, parivattakavāṭakaṃ;  
Apidhāya vinābhogaṃ, niyogaṃ vā saye divā.
75. Dhaññitthirūparatanaṃ, āvudhitthipasādhanam;  
Tūriyabhaṇḍaṃ phalaṃ rukkhe, pubbaṇṇādiñca āmase.
76. Sasitthodakatelehi, phaṇahatthaphaṇehi vā;  
Kesamosaṇṭhanekasmiṃ, bhājane bhojanepi ca.
77. Ekattaraṇapāvuraṇā, sayeyyumaṃ dvekamañcake;  
Dantakaṭṭhañca khādeyya, adhikūnaṃ pamāṇato.
78. Yojeti vā yojāpeti, naccaṃ gītañca vāditaṃ;  
Dassanaṃ savanaṃ tesam, karontassa ca dukkaṭaṃ.
79. Vīhādiropime cāpi, bahipākāraḷṭṭake;  
Vaccādichaḍḍanādimhi, dīghakesādidhāraṇe.
80. Nakhamatṭhakaraṇādimhi, sambādhe lomahāraṇe;  
Parikammakataṃ bhūmiṃ, akkame saupāhano.
81. Adhotaallapādehi, saṅghikaṃ mañcapīṭhakaṃ;  
Parikammakataṃ bhittiṃ, āmasantassa dukkaṭaṃ.
82. Saṅghāṭiyāpi pallatthe, dupparibhuñjeyya cīvaraṃ;  
Akāyabandhano gāmaṃ, vaje katvāna vaccakaṃ.
83. Nācameyya dake sante, samādeyya akappiye;  
Desanārocanādimhi, sabhāgāpattiyāpi ca.
84. Na vase vassaṃ viṣaṃvāde, suddhacitte paṭissavaṃ;  
Vassaṃ vasitvā gamane, ananuññātakiccato.
85. Vināpadaṃ tarussuddhaṃ, porisamhābhirūhaṇe;  
Aparissāvanoddhānaṃ, vaje taṃ yācato na de.
86. Attano ghātane itthi-rūpādiṃ kārayeyya vā;  
Hitvā mālādikaṃ cittaṃ, jātakādiṃ sayam kare.
87. Bhuñjantamuṭṭhape tassa, sālādīsu nisīdato;  
Vuḍḍhānaṃ pana okāsaṃ, adatvā vāpi dukkaṭaṃ.
88. Yānādimabhirūheyya, kallako ratanattayaṃ;  
Ārabba vade davanña-parisāyopalālāne.
89. Kāyādiṃ vivaritvāna, bhikkhunīnaṃ na dassaye;  
Vāce lokāyataṃ palitaṃ, gaṇheyya gaṇhāpeyya vā.
90. Yattha katthaci peḷāyaṃ, bhuñjato pattahatthako;  
Vātapānakavāṭaṃ vā, paṇāme sodakampi ca.

91. Uṇheyya paṭisāmeyya, atiuṇheyya vodakaṃ;  
Ṭhapeyya bhūmiyaṃ pattamaṃ, aṅke vā mañcapīṭhake.
92. Miḍḍhante paribhaṇḍante, pāde chatte ṭhabeti vā;  
Calakādiṃ ṭhape pattamaṃ, patte vā hatthadhovane.
93. Pattena nīharantassa, ucchiṭṭhamudakampi ca;  
Akappiyampi pattamaṃ vā, paribhuñjeyya dukkaṭamaṃ.
94. Vade ‘jīvā’ ti khipite, na sikkhati anādaro;  
Parimaṇḍalakādimhi, sekhiye dukkaṭamaṃ siyā.
95. Yo bhaṇḍagāre payutova bhaṇḍakaṃ,  
Mātūna pācittiyamassa gopaye;  
Davāya hīnenapi jātiādinā,  
Vadeyya dubbhāsitamuttamampi yoti.

### 6. Vattādikaṇḍaniddeso

96. Upajjhācariyavattañca, gamikāgantukampi ca;  
Senāsanādivattañca, kātabbaṃ piyasīlinā.
97. Hatthapāse ṭhito kiñci, gahitabbaṃ dade tidhā;  
Gahetukāmo gaṇheyya, dvidhāyaṃ sampaṭiggaho.
98. Saṅghāṭimuttarāsaṅgaṃ, tathā antaravāsakaṃ;  
‘‘Etaṃ imaṃ adhiṭṭhāmi’’, tathā ‘‘paccuddharāmi’’ ti.
99. ‘‘Imaṃ imāni etāni, etampi cīvara’’ nti vā;  
‘‘Parikkhāracoḷānī’’ ti, tathā ‘‘paccuddharāmi’’ ti.
100. ‘‘Etaṃ imaṃ adhiṭṭhāmi, pattamaṃ paccuddharāmi’’ ti;  
Evaṃ paccuddharedhiṭṭhe, cīvarādiṃ yathāvidhi.
101. Sañcarittaṃ vinā sesā, sacittā garukantimā;  
Acchinnaṃ pariṇataṃ hitvā, nissaggiyamacittakaṃ.
102. Padasodhammaṃ duve seyyā, itthiyā dhammadesanā;  
Duve senāsanānīpi, sibbanamaṃ cīvarassapi.
103. Pavāritaṃ surāpānaṃ, pañcasannidhiādikaṃ;  
Jotinujjālanañceva, kappabindumanādikaṃ;  
Gāmappavesanantete, pācittīsu acittakā.
104. Pakiṇṇakesu uddissa-kataṃ hitvāññamaṃsakamaṃ;  
Ekattaraṇapāvuraṇamaṃ, ekamañce tuvaṭṭanaṃ;  
Ekato bhuñjanañcāpi, naccagītādisattapi.
105. Akāyabandhanañcāpi, pattahatthakavāṭakaṃ;  
Acittakamidaṃ sabbaṃ, sesamettha sacittakaṃ.
106. Vītikamanacittena, sacittakamacittakaṃ;

Paññattijānanenāpi, vadantācariyā tathā.

107. Pubbakaraṇādikaṃ katvā, uposathappavāraṇaṃ;  
Navadhā dīpitaṃ sabbaṃ, kātabbaṃ piyasīlinā.

108. Sammajjanī padīpo ca, udakaṃ āsanena ca;  
Uposathassa etāni, pubbakaraṇanti vuccati.

109. Chandapārisuddhiutukkānaṃ, bhikkhugaṇanā ca ovādo;  
Uposathassa etāni, pubbakiccanti vuccati.

110. Uposatho yāvaticā ca bhikkhū kammappattā,  
Sabhāgāpattiyo ca na vijjanti;  
Vajjanīyā ca puggalā tasmīṃ na honti,  
Pattakallanti vuccati.

111. Pubbakaraṇapubbakiccāni samāpetvā desitāpattikassa samaggassa bhikkhusaṅghassa  
anumatiyā pātimokkhaṃ uddisitūṃ ārādhaṇaṃ karoma.

112. Pārisuddhiadhiṭṭhāna-suttuddesavasā tidhā;  
Gaṇapuggalasaṅghā ca, taṃ kareyyuṃ yathākkamaṃ.

113. Cātuddaso pannaraso, sāmaggī dinato tidhā;  
Dinapuggalakattabbā-kārato te naveritā.

114. Tayo tayoti katvāna, dinapuggalabhedato;  
Tevācīdvēkavācīti, nava vuttā pavāraṇā.

115. Kattikantimapakkhamhā, hemaṃ phaggunapuṇṇamā;  
Tassa antimapakkhamhā, gimhaṃ āsāhipuṇṇamā;  
Vassakālaṃ tato sesaṃ, catuvīsatuposathā.

116. Cātuddasā cha etesu, pakkhā tatiyasattamā;  
Ñeyyā pannarasā sesā, aṭṭhārasa uposathā.

117. “Chandaṃ dammi, chandaṃ me hara, chandaṃ me ārocehī”ti chandaṃ dātabbaṃ.

118. “Pārisuddhiṃ dammi, pārisuddhiṃ me hara, pārisuddhiṃ me ārocehī”ti pārisuddhi dātabbā.

119. “Pavāraṇaṃ dammi, pavāraṇaṃ me hara, pavāraṇaṃ me ārocehi, mamatthāya pavārehi”ti  
pavāraṇā dātabbā.

120. Āpattidesakena “ahaṃ, bhante, sambahulā nānāvattukā āpattiyo āpajjīṃ, tā tumhamūle  
paṭidesemī”ti vatvā paṭiggaṇhantena “passasi, āvuso, tā āpattiyo”ti vutte “āma, bhante, passamī”ti  
vatvā puna paṭiggaṇhantena “āyatim, āvuso, saṃvareyyāsī”ti vutte “sādhu, suṭṭhu, bhante  
saṃvarissamī”ti tikkhattuṃ vatvā desetabbaṃ.

121. Vematim ārocentena “ahaṃ, bhante, sambahulāsu nānāvattukāsu āpattīsu vematiko, yadā  
nibbematiko bhavissāmi, tadā tā āpattiyo paṭikarissamī”ti tikkhattuṃ vatvā ārocetabbaṃ.

122. “Ajja me uposatho ‘pannaraso, cātuddaso’ti vā adhiṭṭhāmī”ti tikkhattuṃ vatvā puggalena

adhiṭṭhānuposatho kātabbo.

**123.** Dvīsu pana therena “parisuddho ahaṃ āvuso, ‘parisuddho’ ti maṃ dhārehī” ti tikkhattuṃ vattabbaṃ. Navakenāpi tatheva vattabbaṃ. “Bhante, dhārethā” ti vacanaṃ viseso.

**124.** Tīsu pana “suṇantu me āyasmantā, ajjuposatho pannaraso, yadāyasmantānaṃ pattakallaṃ, mayaṃ aññaṃaññaṃ pārisuddhiuposathaṃ kareyyāma” ti ñattiṃ ṭhapetvā paṭipāṭiyā vuttanayena pārisuddhiuposatho kātabbo.

**125.** “Ajja me pavāraṇā ‘cātuddasī, pannarasī’ ti vā adhiṭṭhāmī” ti tikkhattuṃ vatvā ekena pavāretabbaṃ.

**126.** Dvīsu pana therena “ahaṃ, āvuso, āyasmantaṃ pavāremi diṭṭhena vā sutena vā parisāṅkāya vā, vadatu maṃ āyasmā anukampaṃ upādāya, passanto paṭikarissāmī” ti tikkhattuṃ vatvā pavāretabbaṃ. Navakenāpi tatheva vattabbaṃ. “Bhante” ti vacanaṃ viseso.

**127.** Tīsu vā catūsu vā pana “suṇantu me āyasmantā, ajja pavāraṇā pannarasī, yadāyasmantānaṃ pattakallaṃ, mayaṃ aññaṃaññaṃ pavāreyyāma” ti ñattiṃ ṭhapetvā therena “ahaṃ, āvuso, āyasmante pavāremi diṭṭhena vā sutena vā parisāṅkāya vā, vadantu maṃ āyasmantā anukampaṃ upādāya, passanto paṭikarissāmī” ti tikkhattuṃ vatvā pavāretabbaṃ. Navakehipi tatheva paṭipāṭiyā pavāretabbaṃ. “Bhante” ti vacanaṃ viseso.

**128.** Catūhi adhikesu pana “suṇātu me āvuso saṅgho, ajja pavāraṇā pannarasī, yadi saṅghassa pattakallaṃ, saṅgho pavāreyyā” ti ñattiṃ ṭhapetvā vuḍḍhatarena “saṅghaṃ, āvuso, pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmī” ti tikkhattuṃ vatvā pavāretabbaṃ. Navakehipi tatheva paṭipāṭiyā “saṅghaṃ, bhante, pavāremi diṭṭhena vā sutena vā parisāṅkāya vā, vadantu maṃ āyasmanto anukampaṃ upādāya, passanto paṭikarissāmī” ti tikkhattuṃ vatvā pavāretabbaṃ.

Mūlasikkhā niṭṭhitā.

Namo tassa bhagavato arahato sammāsambuddhassa

## Mūlasikkhā-ṭīkā

### Ganthārambhakathā

Sabbakāmadadaṃ sabbaratane ratanattayaṃ;  
Uttamaṃ uttamataṃ, vanditvā vandanārahaṃ.

Caraṇe brahmacārīnaṃ, ācariyānaṃ siraṃ mama;  
Ṭhapetvāna karissāmi, mūlasikkhatthavaṇṇanaṃ.

### Ganthārambhakathāvaṇṇanā

Tatthādo tāva sabbasakkatassa sabbasattuttamassa sathuno paṇāmaṃ dassento āha “**natvā nātha**” ntyādi. **Nāthaṃ** catūhi nāthaṅgehi samannāgataṃ bhagavantaṃ **natvā** vanditvā **ādo** ādimhi upasampannato paṭṭhāya **navakena bhikkhunā** adhunā pabbajitena upasampannena **mūlabhāsāya** māgadhabhāsāya sikkhituṃ **samāsato** saṅkhepena mūlasikkhaṃ ahaṃ pavakkhāmīti piṇḍattho.

Ayaṃ pana avayavattho – **natvā**ti tanninnatappaṇatappabbhāro hutvā kāyavacīmanodvārehi vanditvāti attho. Nāthatīti nātho, veneyyānaṃ hitasukhaṃ mettāyanavasena āsīti patthetīti attho, atha vā nāthati veneyyagate kilese upatāpetīti attho, nāthati vā yācatīti attho. Bhagavā hi “sādhu, bhikkhave, bhikkhu kālena kālaṃ attasampattiṃ paccavekkheyyā”tiādīnā (a. ni. 8.7) sattānaṃ taṃ taṃ hitappaṭipattiṃ yācitvāpi karuṇāya samussāhito te tattha niyojēti. Paramena vā cittissariyena samannāgato sabbasatte īsati abhibhavatīti paramissaro bhagavā “nātho”ti vuccati. Sabbo cāyamattho saddasatthānusārato vedītabbo. **Pavakkhāmī**ti pakārena kathessāmi. **Mūlasikkhā**ti adhisīlaadhicittaadhipaññāvasena tissopi sikkhā, upasampannaṃ suppaṭiṭṭhitabhāvasādhanatthēna mūlā ca sā sikkhitabbato sikkhā cāti mūlasikkhā. Ganthavasenettha saṅkhipitvā vuttattā taddīpano gantho “mūlasikkhā”ti vuccati.

Tattha katamaṃ sīlaṃ, katamaṃ adhisīlaṃ, katamaṃ cittaṃ, katamaṃ adhicittaṃ, katamā paññā, katamā adhipaññāti? Vuccate – pañcaṅgaatthāṅgadasaṅgasīlaṃ tāva sīlameva. Pātīmokkhasaṃvarasīlaṃ pana “adhisīla”nti vuccati. Tañhi sūriyo viya pajjotānaṃ, sineru viya pabbatānaṃ sabbalokiyasīlaṃ adhikañceva uttamañca. Pātīmokkhasaṃvaratopi ca maggaphalasampayuttameva sīlaṃ adhisīlaṃ, taṃ pana idha nādhippetā. Na hi taṃ sikkhanto methunaṃ dhammaṃ paṭisevati. Kāmāvacarāni pana atthā kusalacittāni, lokiyaatthasamāpatticittāni ca ekajjhaṃ katvā cittameva. Vipassanāpādakaṃ atthasamāpatticittaṃ pana “adhicitta”nti vuccati. Tañhi sabbalokiyacittaṃ adhikañceva uttamañca. Tatopi ca maggaphalacittameva adhicittaṃ, taṃ pana idha nādhippetā. Na hi taṃ sikkhanto methunaṃ dhammaṃ paṭisevati. “Atthi dinnā, atthi yiṭṭhā”ntiādīnāyappavattaṃ kammassakatāññaṃ paññā, tilakkhaṇākāraparicchedakaṃ pana vipassanāññaṃ “adhipaññā”ti vuccati. Sā hi sabbalokiyapaññānaṃ adhikā ceva uttamā ca. Tatopi ca maggaphalapaññāva adhipaññā, sā pana idha nādhippetā. Na hi taṃ sikkhanto methunaṃ dhammaṃ paṭisevati.

Tāsu tīsu adhisīlasikkhā cārittavārittavasena duvidhampi sīlaṃ yathānusiṭṭhaṃ paṭipajjamānena, tappaṭipakkhe kilese tadaṅgappahānavasena pajahantena sikkhitabbā. Adhicittasikkhā yathāvuttēsu ārammaṇesu abhiyogavasena jhānapaṭipakkhānaṃ nīvaraṇagaṇānaṃ vikkhambhanappahānaṃ kurumānena sikkhitabbā. Adhipaññāsikkhā pana yathānurūpaṃ tadaṅgappahānasamucchedavasena sānusaye kilese samucchindantena sikkhitabbā. Tasmā suppaṭiṭṭhitabhāvasādhanatthēna mūlā ca sā sikkhitabbato sikkhā cāti mūlasikkhā, kammavacanicchāyaṃ “mūlasikkhā”nti vuttam.

Samāsīyate saṅkhipīyatēti samāso, tato **samāsato**. Samaggena saṅghena ñatticatutthēna kammena akuppena ṭhānārahena upasampannoti bhikkhu. Tattha sabbantimena pariyāyena pañcavaggakaraṇīye kamme yāvaticā bhikkhū kammappattā, tesam āgatattā, chandārahānaṃ chandassa āhaṭattā, sammukhībhūtānañca appaṭikkosanato ekasmiṃ kamme samaggabhāvaṃ upagatena saṅghena tīhi anussāvanāhi ekāya ñattiyā kātabbakammasaṅkhātena ñatticatutthēna dhammikena vinayakammena vatthuñattianussāvanasīmāparisāsampattisampannattā akopetabbataṃ, appaṭikkositabbataṃ upagatena ṭhānārahena kāraṇārahena satthusāsanārahena upasampanno nāma, uparibhāvaṃ samāpanno pattoti attho. Bhikkhubhāvo hi uparibhāvo. Tañcesā yathāvuttēna kammena samāpannattā “upasampanno”ti vuccati, tena **bhikkhunā**. Ūnapanācavassatāya navako, tena **navakena** adhunā pabbajitena, acirapabbajitēnāti vuttam hoti. **Ādoti** ādimhiyēvāti attho, ādito paṭṭhāyāti vā. Api ca thero “ādo”ti vacanena saddhāpabbajitānaṃ kulaputtānaṃ ālasiyadosena, appaṭipajjantānaṃ aññāñadosena ca aññathā paṭipajjantānaṃ saṃvegaṃ janēti. Kathaṃ? Atidullabhaṃ khaṇaṃ samavāyaṃ paṭilabhitvā taṅkhaṇaṃ na kusītena vā niratthakakathāpasutena vā vītināmetabbaṃ, kiṃ kātabbaṃ? Ādito paṭṭhāya nirantameva tīsu sikkhāsu ādaro janētabboti.

“Sā māgadhī mūlabhāsā, narā yāyādīkappikā;  
Brahmāno cassutālāpā, sambuddhā cāpi bhāsare”ti. –

Vacanato **mūlabhāsāyāti** māgadhāmūlāya bhāsāya, sabhāvaniruttīyā bhāsāyāti vuttam hoti. **Sikkhitunti** uggaṇhituṃ.

## 1. Pārājikaniddesavaṇṇanā

1. Idāni sabbasikkhānaṃ pana mūlabhūtattā adhisīlasikkhāva paṭhamam vuttā, tatrāpi mahāsāvajjattā, mūlacchejjavasena pavattanato ca sabbapaṭhamam pārājikaṃ jānitabbanti dassento “**saṃ nimitta**”ntyādimāha. Tattha maggattaye saṃ nimittam pavesanto bhikkhu cutoti attho. **Saṃ nimittanti** attano aṅgajātam, sabbantimena paricchena ekatilabījammattampi attano aṅgajātanti vuttam hoti. **Bhikkhūti** anikkhittasikkho. **Maggattayeti** ettha manussāmanussatiracchānagātānaṃ vasena tisso itthiyo, tayo ubhatobyañjanakā, tayo paṇḍakā, tayo purisāti pārājikavatthubhūtānaṃ nimittānaṃ nissayā dvādasā sattā honti. Tesam vaccapassāvamukhamaggavasena tayo maggā. Tattha manussitthiyā tayo, amanussitthiyā tayo, tiracchānagatitthiyā tayoti nava, tathā manussubhatobyañjanakādīnaṃ. Manussapaṇḍakādīnaṃ pana vaccamukhamaggavasena dve dveti cha, tathā manussapurisādīnanti sabbesaṃ vasena tiṃsa maggā honti. Te sabbe pariggahetvā idha “maggattaye”ti vuttam, tasmim maggattaye, dvādasannaṃ sattānaṃ tisu maggesu yattha katthaci maggeti attho. **Cutoti** sakkattā vā brahmattā vā cutasatto viya sāsanaṃ cuto hoti, pārājiko hotīti attho.

Idāni pavesanaṃ nāma na kevalam attupakkameneva hoti, parūpakkamenāpi hoti, tathāpi sevanacitte sati pārājiko hotīti dassanattam “**pavesanā**”tyādi vuttam. Tassattho – yo bhikkhu pavesanaṭṭhitauddharaṇapaviṭṭhakkhaṇesu aññataram khaṇam **cepi sādiyam** sādiyanto sacepi tasmim khaṇe sevanacittam upaṭṭhāpento, **cuto** pārājiko hoti. Yo pana sabbaso asādiyanto āsīvisamukham aṅgarakāsum pavīṭṭham viya ca maññati, so nipparādho hoti. Ettha pana **ṭhitam** nāma sukkavissaṭṭhisamayappattam. Paṭhamapārājikaṃ.

2-7. Idāni dutiyam dassetum “**adinnam mānusaṃ bhaṇḍa**”ntyādimāha. Tattha yo bhikkhu adinnam mānusaṃ garukaṃ bhaṇḍam pañcavīsāvahāresu yena kenaci avahārena ādiyanto cuto bhaveti sambandho. **Adinnanti** yaṃ kiñci parapariggahitam sassāmikaṃ bhaṇḍam, tam tehi sāmikehi kāyena vā vācāya vā na dinnanti adinnam, anissaṭṭham apariccattam rakkhitam gopitam mamāyitam parapariggahitam. Manussassa idanti **mānusaṃ**, manussasantakam, “bhaṇḍa”ntiminā tulyādhikaraṇam. **Theyyāyekenāti** theyyāya ekena, ekena avahārenāti attho. Liṅgabhedam katvā vuttam. “Theyyā kenacī”ti vā pāṭho. Tattha **thenoti** coro, thenassa bhāvo **theyyā**, karaṇatthe cetam paccattavacanam, tasmā kenaci theyyena avahārenāti attho. **Ādiyanti** ādiyanto gaṇhanto. **Pañcavīsāvahāresūti** pañcapañcake samodhānetvā pañcavīsati avahārā. Tattha **pañcapañcakāni** nāma nānābhaṇḍapañcakaṃ ekabhaṇḍapañcakaṃ sāhatthikapañcakaṃ pubbappayogapañcakaṃ theyyāvahārapañcakaṃ.

Tattha saviññānakāvīññānakamissakabhaṇḍavasena nānābhaṇḍapañcakaṃ, saviññānakabhaṇḍavasena ekabhaṇḍapañcakaṃ. Tattha nānābhaṇḍavasena tāva evam veditabbo – yo ārāmaṃ abhiyuñjati, āpatti dukkaṭassa. Sāmikassa vimatiṃ uppādeti, āpatti thullaccayassa. Sāmiko “na mayham bhavissati”ti dhuraṃ nikkhipati, āpatti pārājikassa. Aññassa bhaṇḍam haranto sīse bhāram theyyacitto āmasati, āpatti dukkaṭassa. Phandāpeti, āpatti thullaccayassa. Khandham oropeti, āpatti pārājikassa. Upanikkhitam bhaṇḍam “dehi me bhaṇḍa”nti vuccamāno “nāham gaṇhāmī”ti bhaṇati, āpatti dukkaṭassa. Sāmikassa vimatiṃ uppādeti, āpatti thullaccayassa. Sāmiko “na mayham dassati”ti dhuraṃ nikkhipati, āpatti pārājikassa. “Sahabhaṇḍahāraṃ nessāmī”ti paṭhamam pādam saṅkāmeti, āpatti thullaccayassa. Dutiyam pādam saṅkāmeti, āpatti pārājikassa. Thalaṭṭham bhaṇḍam theyyacitto āmasati, āpatti dukkaṭassa. Phandāpeti, āpatti thullaccayassa. Ṭhānā cāveti, āpatti pārājikassa. Ayamettha nānābhaṇḍavasena yojanā. Ekabhaṇḍavasena pana sassāmikaṃ dāsam vā tiracchānaṃ vā yathāvuttena abhiyogādīnā nayena ādiyati vā harati vā avaharati vā iriyāpatham kopeti vā ṭhānā cāveti vāti. Ayamettha ekabhaṇḍavasena yojanā.

Pañca avahārā sāhatthiko āṇattiko nissaggiyo atthasādhako dhuranikkhepoti. Tattha **sāhatthiko** nāma parassa bhaṇḍam sahatthā avaharati. **Āṇattiko** nāma “asukassa bhaṇḍam avahārā”ti aññam āṇāpeti. **Nissaggiyo** nāma antosūnkaghāte ṭhito bahisūnkaghātam pāpeti, āpatti pārājikassa. **Atthasādhako** nāma “asukam bhaṇḍam yadā sakkosi, tadā avahārā”ti āṇāpeti. Tattha sace paro

anantarāyiko hutvā taṃ avaharati, āṇāpako āṇattikkhaṇeyeva pārājiko hoti, avahārako pana avahaṭakāle, ayaṃ atthasādhako. **Dhuranikkhepo** pana upanikkhittabhaṇḍavasena veditabboti idaṃ sāhatthikapāṇcakaṃ.

Apārepi pañca avahārā pubbappayogo saḥappayogo saṃvidhāvahāro saṅketakammaṃ nimittakammanti. Tattha āṇattivasena **pubbappayogo** veditabbo, ṭhānācāvanavasena **saḥappayogo**. **Samvidhāvahāro** nāma sambahulā bhikkhū “amukaṃ nāma gehaṃ gantvā, chadanaṃ vā bhinditvā, sandhiṃ vā chinditvā bhaṇḍaṃ harissāmā”ti saṃvidahitvā gacchanti, tesu eko bhaṇḍaṃ avaharati, tassuddhāre sabbesaṃ pārājikaṃ. **Saṅketakammaṃ** nāma sañjānanakammaṃ kālaparicchedavasena saññākaraṇaṃ. Ettha ca “purebhattaṃ avahārā”ti vutte aṃja vā purebhattaṃ avaharatu, sve vā anāgate saṃvacchare vā, natthi visāṅketo, saṅketakāraḥassa āṇattikkhaṇe, itarassa ṭhānā cāvaneti evaṃ āpatti ubhinnaṃ pārājikassa. **Nimittakammaṃ** nāma saññuppādanatthaṃ kassaci nimittassa karaṇaṃ akkhinikhaṇanahatthālaṅghanapāṇippahāraṅguliphoṭanagīvunnāmanaukkāsanādīnā anekappakāraṃ. Avahārako āṇāpakena yaṃ nimittasaññaṃ katvā vuttaṃ, taṃ “eta”nti maññaṃāno tameva avaharati, ubhinnaṃ pārājikaṃ. Yaṃ “avahārā”ti vuttaṃ, taṃ “eta”nti maññaṃāno aññaṃ tasmimyeva ṭhāne ṭhapitaṃ avaharati, mūlaṭṭhassa anāpatti. Idaṃ pubbappayogapañcakaṃ.

Apārepi pañca avahārā theyyāvahāro pasayhāvahāro parikappāvahāro paṭicchannāvahāro kusāvahāro. Tattha yo kūṭamānakūṭakahāpaṇādīhi vañcetvā gaṇhāti, tassevaṃ gaṇhato avahāro **theyyāvahāro**. Yo santajjetvā sayāṃ dassetvā tesāṃ santakaṃ gaṇhāti, yo vā attano pattabalito ca adhikaṃ balakkārena gaṇhāti rājarājamahāmattādayo viya, tassevaṃ gaṇhato avahāro **pasayhāvahāro**. Parikappetvā gaṇhato pañāvahāro **parikappāvahāro**. So duvidho bhaṇḍokāsaparikappavasena. Tatra yo “sāṭako ce, gaṇhissāmī, suttaṃ ce, na gaṇhissāmī”ti parikappetvā andhakāre pasibbakaṃ gaṇhāti, tatra sāṭako ce, uddhāreyeva pārājikaṃ, suttaṃ ce hoti, rakkhati. Ayaṃ **bhaṇḍaparikappo** nāma. Yo ṭhānaṃ parikappetvā bhaṇḍaṃ gaṇhāti, tassa taṃ parikappitaparicchedaṃ atikkantamatte pārājikaṃ. Ayaṃ **okāsaparikappo** nāma. Evamimesaṃ dvinnaṃ parikappānaṃ vasena parikappetvā gaṇhato avahāro parikappāvahāro. Paṭicchādetvā parassa bhaṇḍaṃ gaṇhato avahāro **paṭicchannāvahāro** nāma. Kusaṃ saṅkāmetvā avaharaṇaṃ **kusāvahāro**. Yo kusaṃ pātetvā cīvare bhājiyamāne attano koṭṭhāsassa samīpe ṭhitaṃ appagghataṃ vā mahagghataṃ vā samasamaṃ vā parassa koṭṭhāsaṃ disvā sace paṭhamataṃ parakoṭṭhāsato kusadaṇḍakaṃ uddharati, attano koṭṭhāse pātetukāmatāya uddhāre rakkhati, pātanepi rakkhati, attano koṭṭhāsato pana kusadaṇḍaṃ uddharati, uddhāre rakkhati, taṃ uddharitvā parakoṭṭhāse pātentassa hatthato muttamatte pārājikaṃ. Ayaṃ kusāvahāro nāmāti imesu pañcaviśāvahāresu yena kenaci avahārena gaṇhanto pārājiko bhaveti attho.

**Garukanti** pañcamāsakaṃ. Vīsativāsako hi kahāpaṇo, kahāpaṇassa catuttho bhāgo pādo nāma, tasmā pañcamāsakaṃ vā pādaṃ vā garukanti veditabbaṃ. Tattha “cattāro vīhayo guñjā, dve guñjā māsako bhava”ti vacanato vīhivasena cattālīsa vīhayo dasa guñjā pañcamāsakoti veditabbo. Yaṃ pana sāmāṇerasikkhāyaṃ “vīsativīhī”ti vuttaṃ, taṃ neva pālīyaṃ, na aṭṭhakathāyaṃ atthi, vīmaṃsitabbametam. Dutiyapārājikaṃ.

8. Idāni tatiyaṃ dassetuṃ “**manussapāṇaṃ pāṇo**”tyādi vuttaṃ. Tattha yo bhikkhu “manussapāṇo” iti jānanto vadhakacittena manussapāṇaṃ jīvitā viyojeti, so bhikkhu sāsanā pārājiko hotīti samudāyattho.

**Manussapāṇanti** mātukucchismiṃ paṭisandhicittena saḥuppannaṃ atiparittaṃ kalalarūpaṃ ādiṃ katvā pakatiyā vīsavassasatāyukassa sattassa yāva maraṇakālā etthantare anupubbena vuddhippatto atabhāvo, eso manussapāṇo nāma, evarūpaṃ manussapāṇanti attho. **Pāṇoti jānanti** “pāṇo” iti jānanto “taṃ jīvitā voropemī”ti jānanto. **Vadhakacetāsati** vadhakacittena, itthambhūte karaṇavacanāṃ, vadhakacitto hutvā maraṇādhippāyo hutvāti vuttaṃ hoti. **Jīvitāti** jīvitindriyato. **Yoti** aniyamavacanāṃ. **Soti** etena niyamaṇaṃ veditabbaṃ. **Viyojetīti** vuttappakāraṃ manussaviggahaṃ kalalakālepi tāpanamaddanehi vā bhesajjasampadānena vā tato vā uddhampi tadanurūpena upakkamena jīvitā



viyojetīti attho. **Sāsanāti** parāpubbajidhātuppayoge nissakkavacanaṃ, tena satthusāsanatoti attho. **Parājītoti** parājayamāpanno. Hotīti pāṭhaseso. Tatiyapārājikaṃ.

9. Idāni catutthaṃ dassetuṃ “**jhānādibheda**” ntyādi vuttaṃ. Tattha yo bhikkhu aññāpadesaṅca adhimānaṅca vajjetvā hadaye asantaṃ jhānādibhedaṃ dhammaṃ manussajātikassa sattassa vadeyya, tasmim̄ khaṇe ñāte so tato sāsanā pārājiko eva hotīti attho.

**Jhānādibhedanti** ‘‘jhānaṃ vimokkho samādhi samāpatti ñāṇadassanaṃ maggabhāvanā phalasadakkhikariyā kilesappahānaṃ vinīvaraṇatā cittassa suññāgāre abhiratī’’ti (pārā. 198) evaṃ vuttaṃ jhānādibhedaṃ uttarimanussadhammaṃ. **Hadayeti** citte. **Asantanti** asaṃvijjamānaṃ. **Aññāpadesanti** ‘‘yo te vihāre vasi, so bhikkhu paṭhamassa jhānassa lābhī’’tiadinā nayena aññāpadesaṃ vajjetvāti attho. **Vināti** vajjanatthe nipāto, tassa vajjetvāti attho. **Adhimānanti** ‘‘adhigatā mayā’’ti evaṃ uppannaṃ mānanti attho. Adhigato mānoti viggaho, taṃ adhimānaṃ vajjetvāti attho. **Manussajātissāti** manussajātikassa, na devabrahmādīsu aññatarassāti attho. **Vadeyyāti** āroceyya. **Ñātakkhaṇeti** ñāte khaṇeti chedo, tasmim̄ tenārocitakkhaṇe manussajātikena ñātetī attho. **Tenāti** nissakke karaṇavacanaṃ, tato sāsanato pārājikoti attho. Catutthapārājikaṃ.

Pārājikaniddesavaṇṇanā niṭṭhitā.

## 2. Garukāpattiniddesavaṇṇanā

10. Idāni saṅghādisesaṃ pakāsetuṃ “**mocetukāmacittena**”tiādimāraddhaṃ. Tattha mocetuṃ kāmetīti mocetukāmaṃ, mocetukāmaṅca taṃ cittañcāti **mocetukāmacittaṃ**, tena, mocanassādacittena attho. Ekādasannañhi rāgānaṃ ekena mocanassādēna āpatti hotīti vuttaṃ hoti.

Tatrimē ekādasa assādā mocanassādo mucanassādo muttassādo methunassādo phassassādo kaṇḍūvanassādo dassanassādo nisajjassādo vācassādo gehasitapemaṃ vanabhaṅgiyanti. Tattha **mocanassādacetanāya** cetento ceva assādento ca upakkamati, muccati, saṅghādiseso, na muccati ce, thullaccayaṃ. Sace pana sayanakāle rāgapariyuṭṭhito hutvā ūrunā vā muṭṭhinā vā aṅgaṅgātaṃ gālhaṃ pīletvā mocanathāya saussāho supati, supantassa cassa asuci muccati, saṅghādiseso. **Mucanassāde** attano dhammatāya mucamānaṃ assādeti, na upakkamati, muccati, anāpatti. **Muttassāde** attano dhammatāya mutte thānā cute asucimhi pacchā assādentassa vinā upakkamena muccati, anāpatti. **Methunassāde** methunarāgena mātuḅgāmaṃ gaṅhāti, tena asuci muccati, anāpatti, dukkaṅgaṃ pana āpajjati. **Phassassādo** duvidho ajjhattiko bāhiro cāti. Tattha attano nimittaṃ ‘‘thaddhaṃ, mudukanti jānissāmī’’ti vā lolabhāvena vā kīlāpayato asuci muccati, anāpatti. Bāhiraphassassāde pana kāyasamsaggarāgena itthim̄ phusato, āliṅgato ca asuci muccati, anāpatti, kāyasamsaggasaṅghādisesaṃ pana āpajjati.

**Kaṇḍūvanassāde** daddukacchupiḷakapāṇakādīnaṃ aññatarena khajjamānaṃ nimittaṃ kaṇḍūvanassādēna kaṇḍūvato asuci muccati, anāpatti. **Dassanassāde** itthiyā anokāsaṃ upanijjhāyato asuci muccati, anāpatti, dukkaṅgaṃ pana hoti. **Nisajjassāde** mātuḅgāmena saddhim̄ raho nisinnassa muttepi anāpatti, rahonisajjāpatti pana hoti. **Vācassāde** mātuḅgāmaṃ methunappaṭisaṃyuttāhi vācāhi obhāsantassa muttepi anāpatti, duṭṭhullavācāsaṅghādisesaṃ pana āpajjati. **Gehasitapeme** mātādīnaṃ mātādīpemaṃ āliṅganādiṃ karontassa muttepi anāpatti. **Vanabhaṅgaṃ** santhavakaraṅgātaṃ itthiyā pesitapupphādivanabhaṅgasaññitaṃ paṇṇākāraṃ ‘‘itthannāmāya imaṃ pesita’’nti assādēna āmasantassa muttepi anāpattīti. Evametesu mocanassādēna āpatti hotīti dassetuṃ ‘‘mocetu...pe... nā’’ti vuttaṃ. Atha vā mocetukāmaṃ cittaṃ yassa soyaṃ **mocetukāmacitto**, tena, itthambhūte karaṇavacanaṃ, mocetukāmacitto hutvāti attho.

**Upakkammāti** hatthādīsu yena kenaci nimitte upakkamitvāti attho. **Vimocayanti** yaṃ antamaso ekā khuddakamakkhikā piveyya, tattakampi vimocentoti attho. **Sukkanti**

nīlapītalohitodātatakkateladakakhīradadhisappivaṇṇasaṅkhātesu dasavidhesu sukkesu yaṃ kiñci sukkaṃ. **Aññatra supināti** yā supinante sukkavissaṭṭhi hoti, taṃ ṭhapetvāti attho. **Samaṇoti** yo koci upasampanno. **Garukanti** saṅghādisesaṃ. **Phuseti** āpajjeyyāti attho. Cetanā upakkamo mucchananti imānettha tīṇi aṅgānī. Sukkavissaṭṭhisikkhāpadaṃ.

11. Idāni kāyasamsaggaṃ dassetuṃ “**kāyasamsaggarāgenā**”tiādimāraddhaṃ. Bhikkhu manussitthiyā manussitthisaññī hutvā kāyasamsaggarāgena upakkamivā manussitthiṃ parāmasanto saṅghādisesaṃ āpajjeyyāti yojanā. Tattha **kāyasamsaggarāgenāti** hatthaggaṇādikāyasamphassena rāgena kāyamissarāgena. **Manussitthinti** tadahujātampī jīvamānakamanussitthiṃ. **Parāmasanti** parāmasanto, itthīti saññā itthisaññā, sā assa atthīti **itthisaññī**, itthisaññī hutvāti attho. Manussitthī, itthisaññitā, kāyasamsaggarāgo, tena rāgena vāyāmo, hatthaggaṇādisamāpajjananti imānettha pañca aṅgāni. Kāyasamsaggasikkhāpadaṃ.

12. Idāni duṭṭhullaṃ dassetuṃ “**duṭṭhullavācassādenā**”tiādi āraddhaṃ. Tattha **duṭṭhullavācassādenāti** vaccamaggapassāvamaggamethunadhammappaṭisaṃyuttavācassādarāgena. **Maggaṃ vārabbha methunanti** vaccamaggapassāvamaggānaṃ aññataraṃ maggaṃ vā methunaṃ vā ārabbhāti attho. **Obhāsantoti** avabhāsanto. **Manussitthinti** viññuṃ paṭibalaṃ subhāsītadubbhāsitaṃ duṭṭhullāduṭṭhullaṃ sallakkhaṇasamatthaṃ manussitthiṃ. **Suṇamānanti** suṇantiṃ. Iminā paṭibalāyapi itthiyā aviññattipathe ṭhitāya dūtena vā paṇṇena vā ārocetassa duṭṭhullavācāpatti na hotīti dīpitaṃ hoti. Manussitthī, itthisaññitā, duṭṭhullavācassādarāgo, tena rāgena obhāsaṇaṃ, taṅkhaṇavijānananti imānettha pañca aṅgāni. Duṭṭhullavācassāsikkhāpadaṃ.

13. Idāni attakāmapāricariyaṃ dassetuṃ “**vaṇṇa**”ntyādi vuttaṃ. Tattha yo bhikkhu attano kāmapāricariyāya vaṇṇaṃ vatvā methunarāgena itthiṃ methunaṃ yācamāno garuṃ phuseti sambandho. **Vaṇṇaṃ vatvāti** guṇaṃ ānisaṃsaṃ pakāsetvā. **Attanokāmapāricariyāti** methunadhammasaṅkhātena kāmena pāricariyā kāmapāricariyā, attano atthāya kāmapāricariyā attanokāmapāricariyā, aluttasamāsoyaṃ. Atha vā attanoti katvatthe sāmivacanaṃ, attano kāmitā icchitāti attanokāmā, sayāṃ methunarāgavasena patthitāti attho, attanokāmā ca sā pāricariyā cāti attanokāmapāricariyā, tāya **attanokāmapāricariyāya**, “etadaggaṃ, bhagini, pāricariyānaṃ, yā mādisaṃ sīlavantaṃ kalyāṇadhammaṃ brahmacāriṃ etena dhammena paricareyyā”ti evaṃ vaṇṇaṃ vatvāti attho. Yācadhātuno dvikammikattā “**itthiṃ methunaṃ yācamāno**”ti vuttaṃ. Tattha **itthinti** duṭṭhullobhāsane vuttappakāraṃ itthiṃ. Manussitthī, itthisaññitā, attakāmapāricariyāya rāgo, tena rāgena vaṇṇabhaṇaṇaṃ, taṅkhaṇavijānananti imānettha pañca aṅgāni. Attakāmapāricariyasikkhāpadaṃ.

14. Idāni sañcarittaṃ dassetuṃ “**sandesa**”ntyādimāraddhaṃ. Tattha bhikkhu purisassa vā sandesaṃ, itthiyā vā sandesaṃ paṭiggahetvā vīmaṃsitvā paccāharanto garukaṃ phuseti sambandho. Tattha **sandesanti** “gaccha, bhante, itthannāmaṃ māturakkhitaṃ brūhi ‘hohi kira itthannāmassa bhariyā dhanakkīṭā’”ti (pārā. 305) evaṃ vuttaṃ purisassa sāsanaṃ, “gaccha, bhante, itthannāmaṃ purisaṃ brūhi ‘ahaṃ tassa bhariyā bhavissāmi’”ti (pārā. 326-327 thokaṃ visadisāṃ) evaṃ vuttaṃ itthiyā sāsanaṃ. **Paṭiggaṇhitvāti** “sādhu upāsakā”ti vā “hotū”ti vā “ārocassāmi”ti vā yena kenaci ākārena vacībhedāṃ katvā vā sīsakampanādīhi vā paṭiggaṇhitvā sampācicchitvāti attho. **Vīmaṃsitvāti** vuttappakārena sāsanaṃ gahetvā purisassa vā itthiyā vā tesāṃ avassārocanakānaṃ mātāpitābhātābhaginiādīnaṃ vā ārocetvāti attho. **Haraṃpaccāti** ettha “paccāhara”nti vattabbe chandahānibhayaṃ hara-saddaṃ pubbanipātaṃ katvā vuttanti daṭṭhabbaṃ. Yathā pahitena tattha gantvā tena ārocitā sā itthī “sādhū”ti sampācicchatu vā paṭikkhipatu vā lajjāya vā tuṅhī hotu, puna āgantvā tassa purisassa haranto ettāvātā imāya paṭiggahaṇārocanappaccāharaṇasaṅkhātāya tivaṅgasampattiyā so bhikkhu saṅghādisesaṃ āpajjeyyāti attho. Tesāṃ manussajātikatā, alaṃvacanīyatā, paṭiggaṇhanavīmaṃsanappaccāharaṇānīti imānettha pañca aṅgāni. Sañcarittasikkhāpadaṃ.

15. Idāni amūlakaṃ pakāsetuṃ “**cāvetukāmo**”tiādimāraddhaṃ. Cāvetukāmo bhikkhu amūlantimavatthunā aññaṃ suṇamānaṃ bhikkhuṃ codento vā codāpento vā garuṃ phuseti sambandho.

Tattha **cāvetukāmoti** brahmacariyā cāvetukāmo. **Codentoti** “tvam pārājikaṃ dhammaṃ āpannosi, assamaṇosi, asakyaputtiyosī” tiādīhi vacanehi sayam codentoti attho. Evaṃ codentassa vācāya vācāya saṅghādiseso. **Amūlantimavatthunāti** yaṃ codakena cuditakamhi puggale aditṭhaṃ asutaṃ aparisaṅkitaṃ, idaṃ etesaṃ dassanasavanaparisaṅkitasaṅkhātānaṃ mūlānaṃ abhāvato nāssa mūlanti amūlaṃ, antimavaṃ vatthu yassa pārājikassa tadidaṃ antimavatthu, amūlañca taṃ antimavatthu ceti amūlantimavatthu, tena amūlantimavatthunā, bhikkhuno anurūpesu ekūnavāsatiyā pārājikesu aññatarenāti attho. **Codāpayanti** codāpayanto, tassa samīpe ṭhatvā aññaṃ bhikkhuṃ āṇāpetvā codāpento tassa āṇattassa vācāya vācāya garuṃ phuseti attho. **Suṇamānanti** iminā parammukhā dūtena vā paṇṇena vā codentassa na ruhatīti dīpitaṃ hoti. Parammukhā pana sattahi āpattikkhandhehi vadantassa dukkaṭaṃ. Yaṃ codeti, tassa upasampannoti saṅkhyūpagamaṇaṃ, tasmīṃ suddhasaññitā, yena pārājikena codeti, tassa dīṭṭhādivasena amūlakatā, cāvanādhīppāyena sammukhā codanā, tassa taṅkhaṇavijānananti imānettha pañca āṅgāni. Amūlakasikkhāpadaṃ.

**16.** Idāni aññabhāgiyaṃ dassetuṃ “**lesamatta**” ntiādīmāha. Tattha **lesamattamupādāyāti** jātīnāmagottalingāpattipattacīvarūpajjhāyācariyasenaśanalesasaṅkhātesu dasasu lesesu yo tasmīṃ puggale dissati, taṃ lesamattaṃ upādāya nissāya bhikkhuṃ brahmacariyā cāvetukāmo amūlantimavatthunā suṇamānaṃ bhikkhuṃ codento garuṃ phuseti attho. Kathaṃ? Añña khattiyajātiko iminā codakena pārājikaṃ dhammaṃ ajjhāpajjanto dīṭṭho hoti, so aññaṃ attano veriṃ khattiyajātikaṃ bhikkhuṃ passivā taṃ khattiyajātilesaṃ gahetvā evaṃ “khattiyō mayā dīṭṭho pārājikaṃ dhammaṃ ajjhāpajjanto, tvam khattiyō pārājikaṃ dhammaṃ āpannosi” ti vā “tvam so khattiyō, nāñña, pārājikaṃ dhammaṃ ajjhāpannosi” ti vā codeti, evaṃ nāmalesādayopi veditabbā. Āṅgāni panettha anantarasadisāni. Aññabhāgiyasikkhāpadaṃ.

Garukāpattiniddesaṇṇanā niṭṭhitā.

### 3. Nissaggiyaniddesaṇṇanā

**17.** Idāni cīvaravidhiṃ dassetuṃ “**vikappana**” ntyādīmuddhaṭaṃ. Yo bhikkhu akālacīvaraṃ vikappanañca adhiṭṭhānañca akatvā dasāhaṃ atikkāmeti, tassa bhikkhuno nissaggiyaṃ siyāti piṇḍattho. Tattha **akālacīvaranti** akāle cīvaraṃ, khomaṃ kappāsikaṃ koseyyaṃ kambalaṃ sāṇaṃ bhaṅganti jātito cha cīvarāni, dukūlaṃ paṭṭuṇṇaṃ somārapaṭṭaṃ cīnapaṭṭaṃ iddhijaṃ devadinnanti imāni pana cha anulomacīvarāni. Tesu dukūlaṃ sāṇassa anulomaṃ vākamayattā. Paṭṭuṇṇādīni tīni koseyyassa anulomāni pāṇakehi katasuttamayattā. Iddhijādīni dvayāni khomādīnaṃ anulomāni tesamaññatarabhāvato. Imesaṃ channaṃ cīvarānaṃ aññataraṃ akālacīvaraṃ.

**Vikappanamadhiṭṭhānanti** ettha pana vikappanūpagaṃ adhiṭṭhānūpagañca evaṃ veditabbāṃ. Tatrāyaṃ pālī – “anujānāmi, bhikkhave, āyāmena aṭṭhaṅgulaṃ sugataṅgulaena caturaṅgulavittathaṃ pacchima cīvaraṃ vikappetu” nti (mahāva. 358). Majjhimassa purisassa dīghaso dve vidatthiyo, tiriyaṃ vidatthi. Dve vikappanā sammukhāvīkappanā ca parammukhāvīkappanā ca. Kathaṃ? “Imaṃ cīvaraṃ tuyhaṃ vikappemī” ti vattabbaṃ, ayaṃ **sammukhāvīkappanā**. “Mayhaṃ santakaṃ paribhuñja vā vissajjehi vā yathāpaccayaṃ vā karohī” ti, ekassa santike “imaṃ cīvaraṃ tissassa bhikkhuno vikappemī” ti vattabbaṃ, ayaṃ aparāpi **sammukhāvīkappanā**. Tena bhikkhunā “tissassa bhikkhuno santakaṃ paribhuñja vā vissajjehi vā yathāpaccayaṃ vā karohī” ti, “imaṃ cīvaraṃ tuyhaṃ vikappanattāya dammī” ti vattabbaṃ, tena vattabbo “ko te mitto vā sandiṭṭho vā sambhatto vā” ti, tato itarena “tisso bhikkhū” ti vattabbaṃ, puna tena “ahaṃ tissassa bhikkhuno dammī” ti vattabbaṃ, ayaṃ **parammukhāvīkappanā**. “Tissassa bhikkhuno santakaṃ paribhuñja vā vissajjehi vā yathāpaccayaṃ vā karohī” ti vutte paccuddhāro nāma hoti. Bahuke “imānī” ti, ahatthapāse “etaṃ, etānī” ti vā. Evaṃ vikappanañca akatvāti attho.

Ticīvarassa pana pamāṇaṃ ukkaṭṭhaparicchedena sugatacīvarato ūnakaṃ vaṭṭati, lāmakaparicchedena saṅghāṭiyā, uttarāsaṅgassa ca dīghato muṭṭhipaṅcakaṃ, tiriyaṃ muṭṭhittikaṃ,

antaravāsako dīghato muṭṭhipañcako, tiriyam dvihatthopi adḍhateyyo vā vaṭṭati. Vuttappamānato adhikañca ūnakañca “parikkhāraḥa”nti adhiṭṭhātabbam. Dve cīvarassa adhiṭṭhānā kāyena vā adhiṭṭheti, vācāya vā adhiṭṭheti. Ticīvaram adhiṭṭhahantena rajitvā kappabindum datvā purāṇasaṅghāṭim “imaṃ saṅghāṭim paccuddharāmī”ti paccuddharitvā navaṃ saṅghāṭim hatthena gahetvā “imaṃ saṅghāṭim adhiṭṭhāmī”ti cittena ābhogaṃ katvā kāyavikāram karontena kāyena adhiṭṭhātabbā, idaṃ kāyena adhiṭṭhānam. Taṃ yena kenaci sarīravayavena aphasantassa na vaṭṭati. Vācāya adhiṭṭhānam pana vacībhedam katvā vācāya adhiṭṭhātabbam, sace hatthapāse “imaṃ saṅghāṭim adhiṭṭhāmī”ti, sace ahatthapāse ṭhapitaṭṭhānam sallakkhetvā “etaṃ saṅghāṭim adhiṭṭhāmī”ti vācā bhinditabbā. Esa nayo uttarāsāṅge, antaravāsake ca. Ticīvarādīni sabbāni ekato katvā “imāni cīvarāni parikkhāraḥaṇi adhiṭṭhāmī”ti adhiṭṭhātumpi vaṭṭatīti. Evaṃ adhiṭṭhānañca akatvāti attho.

Dasa ahāni **dasāham**. **Atimāpetīti** atikkāmeti. **Tassāti** tassa bhikkhuno. **Nissaggiyanti** nissajjanam nissaggiyam, pubbabhāge kattabbassa vinayakammassetam nāmam, nissaggiyamassa atthīti nissaggiyam, kiṃ taṃ? Pācittiyam, taṃ atikkāmayato sahanissaggiyavinayakammaṃ pācittiyam siyā, ayamettha attho. Taṃ panetaṃ cīvaram yaṃ divasaṃ uppannam, tassa yo aruṇo, so uppannadivasanissito, tasmā cīvaruppādadivasena saddhim ekādase aruṇuggamane dasāhātikkamitam hotīti. Cīvarassa attano santakatā, jātippanāyuttatā, chinnapalibodhabhāvo, atirekacīvaratā, dasāhātikkamoti imānettha pañca āngāni. Paṭhamakathinasikkhāpadam.

**18.** Idāni dutiyam dassetuṃ “**bhikkhusammutiyā**”tyādimāraddham. Yo bhikkhusammutim vajjetvā kālañca vinā adhiṭṭhitam ticīvaram ekāham atikkamāpeti, tassa nissaggiyam siyāti sambandho. Tattha **bhikkhusammutiyāññātrāti** yaṃ saṅgho gilānassa bhikkhuno ticīvarena vippavāsasammutim deti, taṃ ṭhapetvā. **Ticīvaramadhiṭṭhitanti** karaṇatthe upayogavacanam, tena ticīvarādhiṭṭhānanayena adhiṭṭhitesu saṅghāṭiādīsu yena kenaci cīvarena. **Ekāhanti** ekarattam. **Atimāpetīti** vippavasati, viyutto vasatīti attho. Tassa aladdhasammutikassa bhikkhuno ekarattampi cīvarena vippavāsato nissaggiyam pācittiyam siyāti attho. **Samayam vināti** cīvarakālam vajjetvā. Adhiṭṭhitacīvaratā, anattakathinatā, aladdhasammutitā, rattivippavāsoti imānettha cattāri āngāni. Dutiyakathinasikkhāpadam.

**19.** Idāni purāṇacīvaram dassetuṃ “**aññātikā**”tyādi āradham. Tattha **aññātikāti** aññātikāya “paṭisaṅkhā yoniso”tiādīsu viya, aññātikāya neva mātusambandhena na pitusambandhena sambaddhāyāti vuttam hoti. **Bhikkhuniyāti** aṭṭhavācīkakammaṃ upasampannāya. **Ākoṭāpetīti** paharāpeti. Tanti nissaggiyam pācittiyam bhavēyyāti attho. Purāṇacīvaratā, upacāre ṭhatvā aññātikāya bhikkhuniyā āṇāpanam, tassā dhovanādīni cāti imānettha tīṇi āngāni. Purāṇacīvarasikkhāpadam.

**20.** **Kiñci mūlakanti** kiñci pābhatam. **Cīvarādāneti** cīvarassa ādāne cīvarappaṭiggahaṇe. Vikappanūpagacīvaratā, pārivattakābhāvo, aññātikāya hatthato gahaṇanti imānettha tīṇi āngāni. Cīvarappaṭiggahaṇasikkhāpadam.

**21.** **Appavāritanti** “vadeyyātha, bhante, yena attho”ti icchāpitam iccham rucim uppāditam, na pavāritanti appavāritam. **Viññāpentassāti** yācantassa. **Aññātra samayāti** naṭṭhacīvarakālam ṭhapetvā. Vikappanūpagacīvaratā, samayābhāvo, aññātakaviññānti, tāya ca paṭilābhoti imānettha cattāri āngāni. Aññātakaviññāntisikkhāpadam.

**22.** **Rajatanti** rūpiyam. **Jātarūpanti** suvaṇṇam. **Māsakanti** tayo māsakā lohamāsako dārumāsako jatamāsakoti. Tattha **lohamāsakoti** tambalohādīhi katamāsako. **Dārumāsakoti** sārādārunā vā velupesikāya vā antamaso tālapanṇenapi rūpaṃ chinditvā katamāsako. **Jatumāsakoti** lākhāya vā niyyāsena vā rūpaṃ samuṭṭhāpetvā katamāsako. **Kahāpaṇanti** suvaṇṇamayam vā rūpiyamamam vā pākaticam vā. **Gaṇheyyāti** attano atthāya dīyamānam vā katthaci ṭhitam vā nippariggaham disvā sayam gaṇheyya. **Gaṇhāpeyyāti** tadeva aññena gāhāpeyya. **Nissaggīti** gahaṇādīsu yaṃ kiñci karontassa aghanabaddhesu vatthugaṇanāya nissaggi siyāti attho. **Sādiyeyya vāti** kāyavācāhi appaṭikkhipitvā cittena adhvāseyya. Jātarūparajatabhāvo, attuddesikatā, gahaṇādīsu aññātarabhāvoti imānettha tīṇi

āṅgāni. Rūpiyappaṭiggahaṇasikkhāpadaṃ.

23. Rajatādicatubbidhaṃ akappiyaṃ kappiyenāpi parivatteyya sahadhammike ṭhapetvā, nissaggiyaṃ siyāti sambandho. Tattha **akappiyanti** akappiyavattthuṃ. **Kappiyenāti** kappiyavattthunā. **Sahadhammike**ti bhikkhubhikkhunisāmaṇerasāmaṇerisikkhamānasāṅkhāte pañca sahadhammike. Rūpiyabhāvo, parivattanañcāti imānettha dve āṅgāni. Rūpiyaparivattanasikkhāpadaṃ.

24. “Imaṃ pattaṃ tuyhaṃ vikappemī” tiādina **vikappanañca** “imaṃ pattaṃ adhiṭṭhāmī” tiādina **adhiṭṭhānañca** akatvāti attho. **Pamāṇikanti** etthāyaṃ vinicchayo – anupahatapurāṇasālitaṇḍulānaṃ sukoṭṭitaparissuddhānaṃ dve magadhanāliyo gahetvā tehi taṇḍulehi anuttaṇḍulamakilinnamaṇḍitaṃ suvisadaṃ kundamakūlarāsisadisamaṃ avassāvītodanaṃ pacitvā niravasesaṃ patte pakkhipitvā tassa odanassa catutthabhāgappamāṇo nātighano nātitanuko hatthahāriyo sabbasambhārasāṅkhato muggasūpo pakkhipitabbo, tato ālopassa anurūpaṃ yāvacarimālopappahonakaṃ macchamaṃsādibyañjanaṃ pakkhipitabbaṃ. Sappitelatakkarasakañjikādīni pana aḡaṇanūpagāni honti. Tāni hi odanagatikāni neva hāpetuṃ, na vaḍḍhetuṃ sakkonti. Evametam sabbampi pakkhittaṃ sace pana pattassa mukhavaṭṭiyā heṭṭhimarājisamaṃ tiṭṭhati, suttena vā hīrena vā chindantassa suttassa vā hīrassa vā heṭṭhimantaṃ phusati, ayaṃ **ukkaṭṭho** nāma patto. Sace taṃ rājiṃ atikkamma thūpīkataṃ tiṭṭhati, ayaṃ **ukkaṭṭhomako** nāma patto. Sace taṃ rājiṃ na sampāpuṇāti, antogatameva hoti, ayaṃ **ukkaṭṭhukkaṭṭho** nāma. Ukkaṭṭhato upaḍḍhappamāṇo **majjhimo**. Majjhimato upaḍḍhappamāṇo **omako**. Tesampi vuttanayeneva pabhedo veditabbo. Icchetesu ukkaṭṭhukkaṭṭho ca omakomako cāti dve apattā, sesā satta pattā pamāṇayuttā nāmāti evaṃ pamāṇena yutto pamāṇiko, taṃ pamāṇikaṃ. **Pattanti** sattasu pattesu aññataraṃ pattaṃ. Pattassa attano santakatā, pamāṇayuttatā, adhiṭṭhānūpagatā, atirekapattatā, dasāhātikkamoti imānettha pañca āṅgāni. Paṭhamapattasikkhāpadaṃ.

25. Yo bhikkhu pañcabandhanato ūnapatte sati paraṃ pana navaṃ pattaṃ viññāpeti, tassapi bhikkhuno nissaggiyaṃ siyāti sambandho. Tattha **paranti** aññaṃ, “navaṃ patta” ntiminā tulyādhipakāraṇaṃ. Adhiṭṭhānūpagapattassa ūnapañcabandhanatā, attuddesikatā, kataviññatti, tāya ca paṭilābhoti imānettha cattāri āṅgāni. Ūnapañcabandhanasikkhāpadaṃ.

26. Yo sappitelādikaṃ pana bhesajjaṃ paṭiggahetvā sattāhaparamaṃ sannidhikāraṃ bhuñjanto sattāhaṃ atikkāmeti, tassa nissaggiyaṃ siyāti attho. Tattha **sappitelādikanti** ettha **ādi**-saddo navanītamadhuphāṇitaṃ saṅgaṇhāti. Tattha **sappi** nāma gavādīnaṃ sappi, yesaṃ maṃsaṃ kappati, tesam sappi, tathā **navanītaṃ**. **Telaṃ** nāma tilasāsapamadhukaeraṇḍavasādīhi nibbattaṃ. **Madhu** nāma makkhikāmadhumeva. Ucchurasam upādāya pana apakkā vā avatthukapakkā vā sabbāpi ucchuvikati **phāṇitanti** veditabbaṃ. Bhesajjavidhānasikkhāpadaṃ.

27. Bhikkhussa cīvaraṃ datvā puna taṃ cīvaraṃ sakasaññāya acchindantassa vā acchindāpayatopi vā nissaggiyaṃ siyāti yojanā. Tattha **datvāti** veyyāvaccādīni paccāsīsamāno datvā. **Acchindantassāti** veyyāvaccādīni akarontaṃ disvā balakkārena gaṇhantassa, tathā **acchindāpayatoti**. Vikappanūpagacīvaratā, sāmāḍinnatā, sakasaññitā, upasampannatā, kodhavasena acchindanaṃ vā acchindāpanaṃ vāti imānettha pañca āṅgāni. Acchindanasikkhāpadaṃ.

28. Appavāritaṃ aññātiṃ gahapatiṃ suttaṃ yācitvā ñātippavārite vajjetvā tantavāyehi cīvaraṃ vāyāpentassa nissaggiyaṃ siyāti piṇḍattho. Tattha **suttanti** chabbidhaṃ khomasuttādikaṃ vā tesam anulomaṃ vā. **Yāciyāti** cīvaratthāya yācitvā. Cīvaratthāya viññāpitasuttaṃ, attuddesikatā, akappiyatantavāyena akappiyaviññattiyā vāyāpananti imānettha tīni āṅgāni. Suttaviññattisikkhāpadaṃ.

29. Yo bhikkhu saṅghassa pariṇataṃ lābhaṃ jānanto attano pariṇāmeti, tassa nissaggiyaṃ siyāti attho. Tattha **jānanti** jānanto. **Lābhanti** labhitabbaṃ cīvarādivattthuṃ. **Pariṇatanti** saṅghassa ninnam saṅghassa poṇaṃ saṅghassa pabbhāraṃ hutvā ṭhitaṃ. **Attano pariṇāmetīti** “mayhaṃ dethā” tiādīni vadanto attani ninnam karoti. Saṅhe pariṇatabhāvo, taṃ ñatvā attano pariṇāmanaṃ, paṭilābhoti

imānettha tīṇi aṅgāni. Pariṇāmanasikkhāpadaṃ.

Nissaggiyaniddesavaṇṇanā niṭṭhitā.

#### 4. Pācittianiddesavaṇṇanā

**30.** Idāni pācittiyaṃ dassetuṃ “**sampajānamusāvāde**” tyādi āraddhaṃ. Tattha **sampajānamusāvādeti** nimittatthe bhummavacanaṃ, tasmā yo bhikkhu sampajānanto musā vadati, tassa tannimittaṃ taṃhetu tappaccayā pācittiyaṃ udīritanti attho. **Bhikkhuñca omasantassāti** jātināmagottakammasippavayaābādhalīṅgakilesāpattiakkosesu bhūtena vā abhūtena vā yena kenaci mukhasattinā bhikkhuṃ ovijjhantassa bhikkhuno pācittiyaṃ udīritanti attho. **Pesuññaharaṇepi cāti** bhikkhussa pesuññaharaṇe, jātiādīhi akkosavatthūhi bhikkhuṃ akkosantassa bhikkhuno sutvā bhikkhuno piyakamyatāya vā bhedādhīppāyena vā yo akkuddho, tassa bhikkhussa kāyena vā vācāya vā pesuññaharaṇavacane pācittiyaṃ udīritanti attho.

**31.** Saṅgītittayamāruḷhaṃ piṭakattayaṃ dhammaṃ bhikkhuñca bhikkhuniñca ṭhapetvā aññena puggalena saddhiṃ ekato padaṃ padaṃ bhaṇantassa bhikkhuno padagaṇanāya pācittiyaṃ udīritanti samudāyattho.

**32. Anupasampannenevāti** bhikkhuṃ ṭhapetvā antamaso pārājikavatthubhūtena tīracchānagatenāpi saha tīrattiyaṃ sayitvā catutthadivase atthaṅgate sūriye puna sahaseyyāya pācitti siyāti sambandho. Tattha **sahaseyyāyāti** sabbacchannaparicchinne, yebhuyyenacchannaparicchinne vā senāsane pubbāpariyena vā ekakkhaṇe vā ekato nisajjanāya. Tattha chadanaṃ anāhacca diyaḍḍhahatthubbedhena pākārādīnā paricchinnaṃpi sabbaparicchinnaṃmicceva veditabbaṃ.

**33.** Ekarattampi itthiyā saddhiṃ seyyaṃ kappayato tassa bhikkhunopi pācitti siyāti attho. Tattha **itthiyāti** antamaso tadahujātāyapi manussitthiyā. **Desentassa vinā viññuṃ, dhammañca chappaduttarinti** viññuṃ purisaṃ vinā itthiyā chappadato uttariṃ dhammaṃ desentassa bhikkhuno pācitti siyāti attho. Tattha “chappaduttari”nti ettha eko gāthāpādo ekaṃ padanti evaṃ sabbattha padappamāṇaṃ veditabbaṃ. Cha padāni chappadaṃ, chappadato uttariṃ chappaduttariṃ.

**34.** Bhikkhusammutiṃ ṭhapetvā bhikkhuno duṭṭhullaṃ vajjaṃ abhikkhuno vadantassa pācittiyaṃ udīritanti attho. Tattha **duṭṭhullanti** idha saṅghādīsesaṃ adhippettaṃ. **Bhikkhusammutiyāti** yaṃ saṅgho abhiñhāpattikassa bhikkhuno āyatiṃ saṃvaratthāya āpattīnañca kulānañca pariyaṇtaṃ katvā vā akatvā vā tikkhattuṃ apaloketvā katikaṃ karoti, taṃ ṭhapetvā. **Abhikkhunoti** anupasampannaṃ. **Vadantassāti** ārocentassa.

**35.** Yo akappiyaṃ pathaviṃ khaṇeyya vā khaṇāpeyya vā, tassa pācittiyaṃ siyā. Tattha **akappiyanti** uddhanapacānādīvasena vā tathā tathā adaḍḍhā vā jātapathavī vuccati. Sā tividhā suddhamissapuñjivasena. Tattha **suddhapathavī** nāma pakatīyā suddhapamsu vā suddhamattikā vā. **Missapathavī** nāma yattha paṃsuto vā mattikato vā pāsāṇasakkharakathalamarumbavālukāsu aññatarassa tatiyabhāgo hoti. **Puñjapathavī** nāma atirekacātumaṃsaṃ ovaṭṭho paṃsupuñjo vā mattikāpuñjo vā hoti. Vuttalakkhaṇena pana missakapuñjopi piṭṭhipāsāṇe ṭhitasukhumarajampi ca deve phusayante sakiṃ ce tintaṃ, cātumaṃsaccayena tintokāso puñjapathavīsaṅkhameva gacchati. Yo bhikkhu bhūtagāmaṃ vikopeyya, tassa pācittiyaṃ siyāti sambandho. Tattha **bhūtagāmanti** bhavanti, abhavaṃ cāti bhūtā, jāyanti vaḍḍhanti jātā vaḍḍhitā cāti attho, gāmoti rāsi, bhūtānaṃ gāmo, bhūtā eva vā gāmoti bhūtagāmo, patiṭṭhitaharitatīṇarukkādīnametaṃ adhivacanaṃ. Taṃ bhūtagāmaṃ. **Vikopeyyāti** chedanabhedanādīni kareyya.

**36.** Yo bhikkhu saṅghikaṃ mañcādiṃ ajjhokāse santharaṇādīkaṃ katvā āpucchanaḍīkaṃ akatvā yāti, tassa pācitti siyāti attho. Tattha **saṅghikanti** saṅghassa santakaṃ. **Mañcādinti** ettha **ādī**-saddena

pīṭhabhisikocchādiṃ saṅgaṇhāti. **Santharaṇādikanti** santharaṇādiṃ katvā vā kārāpetvā vā. **Āpucchanādikanti** āpucchanam vā uddharaṇam vā uddharāpanam vāti attho. **Yāṭṭi** gacchati.

**37.** Yo bhikkhu saṅghikāvasathe seyyam santharaṇādikaṃ katvā āpucchanādikaṃ akatvā yāti, tassa bhikkhuno pācitti siyāti attho. Tattha **saṅghikāvasatheti** saṅghassa santake āvasathe vihāre gabbhe vā aññasmiṃ vā sabbaparicchinne guttasenāsane. **Seyyanti** bhisi cimilikā pāvuraṇam uttarattharaṇam bhūmattharaṇam taṭṭikā cammakkaṇḍam nisīdanam paccattharaṇam tiṇasanthāro paṇṇasanthāroti evamādikaṃ. **Santharaṇādikanti** tesu yena kenaci attharaṇādikaṃ katvā vā kārāpetvā vā.

**38-9.** Yo pana bhikkhu jānam sappāṇakam toyam paribhuñjaye, tassa bhikkhuno pācitti siyāti yojanā. Tattha **jānam sappāṇakanti** “sappāṇakamida”nti disvā vā sutvā vā yena kenaci ākārena jānanto. **Toyanti** udakam. **Paribhuñjeyeti** paribhuñjeyya. Yo bhikkhu pārivattakam ṭhapetvā aññātikāya bhikkhuniyā cīvaram deti, tassa bhikkhuno pācitti siyā. Cīvarappaṭiggahaṇasikkhāpade bhikkhu paṭiggāhako idha bhikkhunī, ayam viseso. Aññātikāya bhikkhuniyā cīvaram sibbatopi tassa bhikkhuno pācitti siyāti attho. **Cīvaranti** nivāsanapārupanūpagam. **Sibbatoti** sayam sibbantassa sūciṃ pavesetvā nīharaṇe payogagaṇanāya pācitti. Sibbāpentassa pana “sibbā”ti vutto sacepi sabbam sūcikkammaṃ niṭṭhāpesi, ekameva pācitti, āṇattassa payogagaṇanāya pācitti hoti. Pavāretvāna atirittam akāretvā bhuñjato pācitti siyāti attho. Tatrāyam vinicchayo – odano sattu kummāso maccho maṃsanti pañcannam bhojanānam aññataram sāsapamattampi ajjhoharivā bhojanam paṭikkhepam katvā aññena iriyāpathena “alametaṃ sabba”nti atirittam akāretvā paribhuñjato pācitti hotīti.

**40.** Yo bhikkhu āsādanāpekkho bhuttāvim pavāritam bhikkhum “handa, bhikkhu, khāda vā bhuñja vā”ti anatirittena pavāreti, bhojane bhutte tassa pācittiyam udīritanti attho. Tattha **āsādanāpekkhoti** āsādanam codanam maṅkukaraṇabhāvam apekkhamāno.

**41-2.** Yo bhikkhu sannidhibhojanam bhuñjeyya, tassa bhikkhuno pācitti siyāti attho. Tattha **sannidhibhojananti** paṭiggahetvā ekarattam vītināmitabhōjanam. Vikāle yāvākālikam bhuñjato vāpi pācitti siyāti yojanā. Tattha **vikāleti** vigatakāle, majjhanhikātikkamato paṭṭhāya yāva aruṇuggamanāti attho. **Yāvākālikanti** vanamūlaphalādikaṃ āmisabhōjanam. Agilāno bhikkhu paṇītakam sappibhattādikampi viññāpetvāna bhuñjeyya, tassa bhikkhuno pācitti siyāti yojanā. Tattha **agilānoti** kallako. **Paṇītakanti** sappitelamadhuphāṇitamacchamaṃsakhīradadhisaṅkhātehi saṃsaṭṭham sattadhaññanibbattam paṇītabhōjanam. Yo bhikkhu dantakaṭṭhodakam vajjetvā appaṭiggahitakam bhuñjeyya, pācitti siyāti attho. Tattha **appaṭiggahitanti** kāyena vā kāyappaṭibaddhena vā gaṇhantassa hatthapāse ṭhatvā kāyakāyappaṭibaddhanissaggiyānam aññatarena na dīnam appaṭiggahitam nāma.

**43.** Yo bhikkhu titthiyassa sahatthato kiñci bhuñjitabam dadeyya, tassa pācitti siyāti sambandho. Tattha **titthiyassāti** aññatitthiyassa. **Kiñci bhuñjitabbanti** yam kiñci bhojanīyam. **Sahatthototi** sahatthā. Yo bhikkhu mātuḡāmena ekato raho nisajjam kappeyya, tassa pācitti siyāti sambandho. Tattha **rahoti** paṭicchanne. **Kappeti** kappeyya. **Ekatoti** saddhiṃ.

**44.** **Surāmerayapānepīti** ettha piṭṭhādīhi katam majjam **surā**. Pupphādīhi kato āsavo **merayam**. Yo bhikkhu tadubhayampi bījato paṭṭhāya kusaggenāpi pivati, tassa tappānapaccayā pācittiyam udīritanti attho. **Aṅgulipatodake cāpīti** aṅgulīhi upakacchakādīnam ghaṭṭanapaccayā pācitti siyāti attho. **Hasadhammepi codaketi** uparigoppake udake hasadhamme kīlānimittam tassa pācitti siyāti attho.

**45.** **Anādarepi pācittīti** puggalassa vā dhammassa vā anādarakaraṇepi pācitti siyāti attho. Yo bhikkhu upasampanna paññātena vuccamāno tassa vā vacanam akattukāmatāya, tam vā dhammam asikkhitukāmatāya anādariyam karoti, tassa tasmim anādariye pācitti siyāti attho. Bhayānakam katham katvā vā bhayānakam rūpam dassetvā vā bhikkhum bhīsayatopi pācitti siyāti attho.

**46.** Yo bhikkhu agilāno kiñci paccayam ṭhapetvā jotim jaleyya vā jalāpeyya vā, tassa pācittiyam

siyāti sambandho. Tattha **kiñci paccayanti** padīpujjalanam vā pattapacanādīsu jotikaraṇam vāti evarūpaṃ paccayaṃ ṭhapetvā. **Jotinti** aggim.

**47-8.** Kappabindum anādāya **navacīvarabhogino** navam cīvaram bhuñjantassa pācitti siyāti attho. **Kappabindunti** morakkhimaṅḍalamaṅgulapiṭṭhīnam aññatarappamāṇam kappabindum. **Anādāyāti** anādiyitvā. Bhikkhuno cīvarādikaṃ parikkhāram apantevā nidhentassa vā nidhāpentassa vā hasāpekkhassa bhikkhuno pācitti siyāti attho. **Cīvarādikanti ādi-saddena** pattanisīdanasūciḡharakāyabandhanādiṃ saṅgaṇhāti. **Nidhentassāti** nidahantassa. **Hasāpekkhassāti** hasādhīpāyassa. **Jānam pāṇam hane bhikkhu, tiracchānagatampi** cāti yo bhikkhu “pāṇo”ti jānanto tiracchānagatam pāṇam khuddakampi mahantampi haneyya, tassa pācittiyam siyāti attho.

**49. Chādetukāmo chādeti, duṭṭhullaṃ bhikkhunopi** cāti yo bhikkhu bhikkhuno duṭṭhullasaṅkhātāṃ saṅghādisesaṃ chādetukāmo hutvā chādeti, tassa pācittiyam siyāti attho. Itthiyā saha saṃvidhāya gāmantaragatassa bhikkhuno pācittiyam siyāti yojanā.

**50. Bhikkhum vā pahareyyāthāti** yo bhikkhu bhikkhum pahareyya, tassa pācittiyam siyāti yojanā. **Talasattikamuggireti** yo bhikkhu paharaṇākāram dassento kāyam vā kāyappaṭibaddham vā uggireyya, tassa pācittiyam siyāti attho. **Codeyya vā codāpeyya, bhikkhum amūlakena cāti** yo bhikkhu bhikkhum amūlakena saṅghādisesena codeyya vā codāpeyya vā, tassa pācittiyam siyāti attho. Tattha **amūlakenāti** diṭṭhādīmūlavirahitena.

**51. Kukkuccuppādane cāpīti** “ūnavīsativasso tvam maññe”tiādīni bhaṇanto kukkuccam uppādeyya, tassa kukkuccuppādanapaccayā pācittiyam hoti. Yo bhikkhu bhaṇḍanattāya bhaṇḍanajātānaṃ vacanaṃ sotum upassutim yāti, tassa pācittiyam siyāti sambandho. Tattha **bhaṇḍanattāyāti** kalahattāya. **Bhaṇḍanajātānanti** kalahattānaṃ. **Upassutinti** sutisamīpaṃ.

**52.** Yo bhikkhu saṅghassa pariṇāmitam yaṃ lābham, taṃ parapuggalassa nāmeti, tassa pācittiyam siyāti sambandho. Tattha **nāmetīti** pariṇāmeti. **Pucchaṃ akatvāti** “vikāle gāmapavesanaṃ āpucchāmī”ti vā “gāmaṃ pavississāmī”ti vā anāpucchitvā. **Santabhikkhanti** antoupacārasīmāya dassanūpacāre bhikkhum disvā yaṃ sakkā hoti pakativacanena āpucchitum, tādisaṃ vijjamānaṃ bhikkhum. **Gāmassāti** gāmaṃ, kammatthe sāmivacanam. **Gateti** sampadānatthe bhumvacanam, gatassāti attho. Santaṃ bhikkhum anāpucchitvā vikāle gāmaṃ gatassa bhikkhuno pācittiyam siyāti attho. Sesam uttānamevāti.

Pācittyaniddesavaṇṇanā niṭṭhitā.

## 5. Pakiṇṇakaniddesavaṇṇanā

**53.** Idāni pakiṇṇakaṃ dassetum “**saṅghika**”ntyādi āraddham. Tattha yo bhikkhu issaro hutvā saṅghikaṃ garubhaṇḍam aññassa deti, tassa thullaccayaṃ siyā. Theyyāya aññassa deti, yathāvatthu pārājikādi siyā, dukkaṭavatthu dukkaṭam, thullaccayaṃ vatthu thullaccayaṃ, pārājikavatthu pārājikaṃ siyāti vuttaṃ hoti.

**54. Kusādimayacīrānīti** ettha **ādi-saddo** vākaphalakaṃ saṅgaṇhāti, kusamayacīraṃ vākamayacīraṃ phalakamayacīranti. Tattha kuse ganthetvā katacīraṃ kusamayacīraṃ. Vākamayacīraṃ nāma tāpasānaṃ vakkalam. Phalakamayacīraṃ nāma phalakaṣaṅṭhānāni phalakāni sibbetvā katacīraṃ. **Kambalam kesavālaṃjanti** kesajaṃ kambalam vālaṃjanti kambalam, kesakambalam vālakambalanti attho. Kesehi tante vāyitvā katakambalam kesakambalam. Camarivālehi vāyitvā katakambalam vālakambalam. **Samayaṃ vināti** naṭṭhacīvarakālam ṭhapetvā. **Dhārayato** dhārayantassa. **Lūkapakkhājinaṃkhipanti** ulūkapakkhājinaṃkhipam. Tattha **ulūkapakkhīti** ulūkasakuṇapakkhehi katanivāsanaṃ. **Ajinakkhipanti** salomaṃ sakhuraṃ ajinamigacammaṃ. Naṭṭhacīvarakālam ṭhapetvā imesu sattuvaṃ vatthūsu yaṃ kiñci



dhārayato thullaccayaṃ siyāti attho.

**55.** Satthakena kattabbaṃ kammaṃ satthakammaṃ, tasmim̐ **satthakamme**. Vatthimhi kattabbaṃ kammaṃ vatthikammaṃ, tasmim̐ **vatthikamme**. **Sam̐ nimittanti** attano aṅgajātaṃ. Taṃ chindato thullaccayaṃ siyāti sambandho. **Maṃsādibhojaneti** ettha **ādi**-saddo aṭṭhilohitacammalomāni saṅgaṇhāti. Tasmā manussānaṃ maṃsaatṭhilohitacammalomabhojanapaccayā thullaccayaṃ siyāti attho.

**56. Kadalera**kakkadussānīti ettha kadalierakaakkavākehi katāni vatthāni dhārayantassa dukkaṭaṃ. **Potthakanti** makacivākehi kataṃ potthakadussaṃ. **Sabbapītādikanti** ettha **ādi**-saddena sabbalohitakasabbakaṇhakasabbamañjeṭṭhikaṃ saṅgaṇhāti. Tattha sabbameva nīlakaṃ **sabbanīlakaṃ**. Evaṃ sesesupi. **Nīlaṃ** ummārapupphavaṇṇaṃ. **Pītaṃ** kaṇikārapupphavaṇṇaṃ. **Lohitaṃ** jayasumanapupphavaṇṇaṃ. **Kaṇhakaṃ** addāriṭṭhakavaṇṇaṃ. **Mañjeṭṭhikaṃ** lākhārasavaṇṇaṃ. Imesu aṭṭhasu vatthūsu yaṃ kiñci dhārayantassa dukkaṭaṃ siyāti attho.

**57-8. Hatthissuragasonānanti** hatthiassauragasonānaṃ maṃsaṃ aṭṭhirudhiracammalomāni. **Sīhabyagghacchadīpinanti** sīhabyagghaacchadīpīnaṃ maṃsādīni. Taracchassa ca maṃsādīṃ uddissakatamaṃsaṇca anāpucchitamāsaṇca bhuñjato dukkaṭaṃ siyā. **Dakatitthādikanti** ettha **ādi**-saddo vaccapassāvakuṭiyo saṅgaṇhāti. Tena **yātānupubbaṃ** āgatappaṭipāṭiṃ **hitvāna** vajjetvā nahānatitthaṇca vaccakuṭiṇca passāvakuṭiṇca **vaje** vajeyya gaccheyya, dukkaṭaṃ tassa siyāti attho.

**59. Sahasāti** vegasā vegena. **Vubbhajitvānāti** antaravāsakaṃ dūratova ukkhipitvā, va-kāro sandhivasenāgato. **Paviseti** paviseyya. **Vaccapassāvakuṭikanti** vaccakuṭikaṃ passāvakuṭikaṃ. **Viseti** paviseyya. Yo bhikkhu vaccapassāvakuṭikaṃ sahasā paviseyya vā nikkhameyya vā, ubbhajitvā vā paviseyya vā nikkhameyya vā, ukkāsikaṃ vajjetvā taṃ paviseyya, tassa dukkaṭaṃ siyāti yojanā.

**60.** Nīttunanto vaccaṃ kareyya dantakaṭṭhaṇca khādanto, tassa dukkaṭaṃ siyāti attho. Vaccapassāvadoṇīnaṃ bahi vaccādikaṃ vaccapassāvaṃ kareyya, tassa dukkaṭaṃ siyā.

**61. Kharena cāvalekheyāti** phālitaṭṭhena vā pharusena vā gaṇṭhikena vā pūtikaṭṭhena vā susirena vā avalekheyāti attho. **Kaṭṭhanti** avalekhanakaṭṭhaṃ. **Kūpaketi** vaccakūpake. **Ūhatañcāti** gūthamakkhitaṇca. **Na dhoveyyāti** attanā vā na dhoveyya parena vā na dhovāpeyya. **Uklāpañcāti** kacavaraṇca. **Na sodhayena** sammajjeyya.

**62. Capucapūti** saddaṃ katvā udakakiccaṃ karontassa ācamantassa dukkaṭaṃ siyāti attho. **Anajjhīṭṭhovāti** anāṇattoyeva. **Therenāti** saṅghattherena. **Pātimokkhanti** pātimokkhuddesaṃ. **Uddise** uddiseyya, dukkaṭaṃ siyā.

**63.** Anāpucchāya pañhassa kathane, anāpucchāya pañhassa vissajjane, anāpucchāya sajjhāyakaṇe, anāpucchāya padīpajālāne, anāpucchāya padīpavijjhāpaneti imesu catūsu paccayesu tassa dukkaṭaṃ siyā.

**64.** Anāpucchā vātapānakavāṭāni vivareyya vā thakeyya vā, tassa dukkaṭaṃ siyāti sambandho. **Vandanādinti** ettha **ādi**-saddo vandāpanaṃ saṅgaṇhāti. Yo bhikkhu naggo vandanaṃ kareyya, vandāpanaṃ kareyya, gamanaṃ kareyya, bhojanaṃ kareyya, pivaṇaṃ kareyya, khādanaṃ kareyya, gahaṇaṃ kareyya, dānaṃ kareyya, tassa sabbattha dukkaṭanti sambandho.

**65. Tipaṭicchannakaṃ vināti** “anujānāmi, bhikkhave, tisso paṭicchādiyo jantāgharappaṭicchādīṃ udakappaṭicchādīṃ vatthappaṭicchādī”nti (cūḷava. 261) evaṃ vuttā tisso paṭicchādiyo samāhaṭāti “tipaṭicchādī”ti vuttaṃ. Tipaṭicchannakaṃ ṭhapetvā parikammaṃ sayāṃ kareyya, paraṃ kāraṇe, tassa dukkaṭaṃ siyāti attho. Yo bhikkhu **nahāyaṃ** nahāyanto kuṭṭe vā thambhe vā tarumhi vā kāyaṃ

upaghamseyya, tassa dukkaṭaṃ siyā.

**66.** Yo bhikkhu nahāyanto kuruvindakasuttena kāyaṃ ghaṃseyya, **kāyato** kāyena aññamaññaṃ ghaṃseyya, tassa dukkaṭaṃ siyāti sambandho. Yo agilāno saupāhano **bahārāme** bahārāme careyya, tassa dukkaṭaṃ siyāti sambandho.

**67. Sabbanīlādikampi cāti ettha ādi-saddo**

lohitodātapītakaṇhamañjeṭṭhamahāraṅgamahānāmarāṅgarattādayo upāhanāyo saṅgaṇhāti. Yo bhikkhu sabbanīlasabbalohitādikaṃ upāhanaṃ dhāreti, tassa dukkaṭaṃ siyāti sambandho. Yo bhikkhu **ratto** rattacitto tadahujātāyapi **itthiyā** nimittaṃ passeyya, tassa dukkaṭaṃ siyā. Yo bhikkhu **bhikkhadāyiyā** bhikkhadāyikāya itthiyā mukhaṃ passeyya, tassa dukkaṭaṃ siyā.

**68-9.** Yo bhikkhu ujjhānasaññī hutvā **aññassa** bhikkhuno pattaṃ vā passeyya, tassa dukkaṭaṃ siyā. Ādāsādimhi udakapatte attano mukhaṃ passeyya, tassa dukkaṭaṃ siyā. Uccāsanamahāsane **nisajjādiṃ** nisīdanasayanādiṃ karontassa bhikkhuno dukkaṭaṃ siyā. Ukkhittānupasampannanānāsaṃvāsakādīnaṃ vandaneṃ dukkaṭaṃ siyāti sambandho. Tattha **ukkhittoti** āpattiyā adassane ukkhittako, āpattiyā appaṭikamme ukkhittako, pāpikāya diṭṭhiyā appaṭinissagge ukkhittakoti tividhopi idhāhippeto. **Anupasampannoti** iminā bhikkhunīsāmaṇerasāmaṇerisikkhamānapaṇḍakaitthisikkhāpaccakkhātakā gahitā. **Nānāsaṃvāsakāti** laddhinānāsaṃvāsakā gahitā. **Ādi-saddena** chinnamūlakā gahitā.

**70-71.** Yo dīghāsane **paṇḍakitthīhi** paṇḍakena vā itthiyā vā ubhatobyañjanena vā ekato nisīdeyya, tassa dukkaṭaṃ siyā. **Adīghe āsaneti** rasse āsane. Yo bhikkhu rassāsane mañce vā pīṭhe vā asamānāsānikena ekato sayeyya, tassa dukkaṭaṃ siyāti attho. **Phalapupphādikanti** ettha **ādi-saddena** veḷucunṇadantaḥamattikādayo saṅgahitā. Kulasaṅgahatthāya phalapupphādikaṃ dadato dukkaṭaṃ siyāti sambandho.

**72-3.** Yo bhikkhu ganthimādiṃ sayāṃ kareyya, paraṃ kārāpeyya, tassa dukkaṭaṃ siyā. Yo bhikkhu jinena vāritapaccaye paribhuñjeyya, tassa dukkaṭaṃ siyā. **Abyatto** bālo yo bhikkhu ācariyupajjhāye **anissāya** nissayaṃ aggahetvā vaseyya, tassa dukkaṭaṃ siyā. Yo bhikkhu **anuññātehi** mātāpituādīhi puggalehi **aññassa** puggalassa bhesajjaṃ kareyya vā vadeyya vā, tassa dukkaṭaṃ siyā. Sāpattiko yo bhikkhu uposathappavāraṇaṃ kareyya, tassa dukkaṭaṃ siyāti sambandho. Tattha jinena bhagavatā vāritā jinavāritā, jinavāritā ca te paccayā ceti jinavāritapaccayā, te **jinavāritapaccaye**. Dvemātikāappaguṇatāya **abyatto**.

**74.** Yo bhikkhu ābhogaṃ vā niyogaṃ vā vajjetvā dvārabandhādike ṭhāne parivattakavāṭakaṃ apidhāya divā sayeyya, tassa dukkaṭaṃ siyāti sambandho. **Dvārabandhādiketi** yena kenaci parikkhitte abbhokāsepi rukkhamūlepi antamaso iminā lakkhaṇena yuttaākāsaṅgaṇepi. **Apidhāyāti** apidahitvā. **Vinābhoganti** “esa dvāraṃ jaggissatī”ti ābhogaṃ ṭhapetvāti attho. **Niyoganti** avasaṭṭhānaṃ, attano avasaṃ bahusādhāraṇaṭṭhānaṃ ṭhapetvā. “Savaso”ti vā pāṭho, savaso hutvāti attho. **Divāti** divākāle.

**75. Dhaññanti** sāli vīhi yavo godhumo kaṅgu varako kudrūsakoti sattavidhaṃ dhaññaṃ. **Itthirūpanti** dārulohamayādiitthirūpaṃ. **Ratananti** muttādidasavidhaṃ ratanaṃ. **Āvudhanti** sattitomarādisabbāvudhabhaṇḍaṃ. **Itthipasādhananti** itthiyā sīsādialaṅkāraṃ. **Tūriyabhaṇḍanti** dhamanasāṅkhādisabbaṃ tūriyabhaṇḍaṃ. **Phalarukkheti** phalitarukkhe. **Pubbapāṇḍikanti** muggamāsādikaṃ. **Ādi-saddena** vākurakuminādayo gahitā. Etesu yaṃ kiñci āmaseyya, tassa dukkaṭaṃ siyāti attho.

**76. Sasitthodakatelehi** yo pana madhusitthakatelena vā udakamissakatelena vā yena kenaci cikkhallena vā. **Phaṇahatthaphaṇehi vāti** dantamayādiphaṇena vā phaṇakiccasādhakehi hatthaṅgulīhi vā kocchena vā kesamosaṇṭhane dukkaṭaṃ siyāti attho. Ekasmim bhājane bhojananimitte dukkaṭaṃ siyāti attho.

77. Dve bhikkhū ekattharaṇā sayeyyūṃ, dve bhikkhū ekapāvuraṇā sayeyyūṃ, dve bhikkhū ekamañcake sayeyyūṃ, tesam dukkaṭāni hontīti sambandho. Pamāṇato adhikaṃ vā ūnaṃ vā dantakaṭṭhaṃ khādeyya, tassa dukkaṭaṃ siyāti yojanā. Tattha **adhikanti** aṭṭhaṅgulato adhikaṃ. **Ūnanti** caturaṅgulato ūnaṃ.

78. Yo bhikkhu naccañca gītañca vāditañca yojeti vā yojāpeti vā, tassa dukkaṭaṃ siyā. Tesam naccānaṃ dassanaṃ, tesam gītānaṃ savanaṃ, tesam vādītānaṃ savanañca karontassa dukkaṭaṃ siyāti attho.

79. **Vihādiropimeti** vihiādīnaṃ ruhanaṭṭhāne. **Bahipākāraṅgakuṭṭaketi** pākāraṅgakuṭṭānaṃ bahi. **Vaccādichaddanādīmhi**ti vaccapassāvasaṅkārācalakādīnaṃ chaddanavissajjanapaccayā dukkaṭaṃ siyāti attho. **Dīghakesādihāraṇeti** dīghakesadhāraṇe dīghanakhadhāraṇe dukkaṭaṃ siyāti attho.

80. **Nakhamaṭṭhakaraṇādīmhi**ti ettha **ādi**-saddena rajanakaraṇaṃ gahitaṃ. **Sambādhe lomahāraṇeti** sambādhe upakacchakamuttakaraṇaṭṭhāne lomuddharaṇe. Saupāhano bhikkhu parikammakataṃ bhūmiṃ akkameyyāti sambandho.

81. **Adhotaallapādehī**ti yo bhikkhu adhotapādehi vā allapādehi vā saṅghikaṃ mañcaṃ vā pīṭhaṃ vā akkameyya, parikammakataṃ bhittiṃ vā kāyato āmasantassa dukkaṭaṃ siyāti attho.

82-3. **Saṅghāṭiyāpi pallattheti** adhiṭṭhitacīvarena vihāre vā antaraghare vā pallatthikaṃ kareyya, tassa dukkaṭaṃ. **Dupparibhuñjeyya cīvaranti** tiṇṇaṃ cīvarānaṃ aññataraṃ cīvaraṃ dupparibhogena paribhuñjeyya. **Akāyabandhanoti** kāyabandhanavirahito bhikkhu gāmaṃ vajeyya gaccheyya. Yo bhikkhu **vaccakaṃ** uccāraṃ katvāna uduke sante **nācameyya** udakasuddhiṃ na kareyya, tassa dukkaṭaṃ siyāti attho. **Samādeyya akappiyeti** bhikkhuṃ vā sāmaṇerādike sesasahadhammike vā akappiye niyojeyya, tassa dukkaṭaṃ siyāti attho. Sabhāgāpattiyā desanārocanaṃ paccayā dukkaṭaṃ siyāti attho. **Sabhāgā**ti ettha vatthusabhāgatāva idhādhippetā, na āpattisabhāgatā.

84. **Na vase vassanti** yo bhikkhu vassaṃ na vaseyya na upagaccheyya, tassa dukkaṭaṃ siyā. **Visaṃvāde suddhacitteti** ettha sampadānatthe bhummavacanaṃ, paṭissavaṃ visaṃvādentassa suddhacittassa dukkaṭaṃ siyāti attho. Vassaṃ vasitvā **ananuññātakiccato** ananuññātakiccena bhikkhuno gamane dukkaṭaṃ siyāti yojanā.

85. Āpadaṃ vajjetvā tarussa uddhaṃ porisamhā abhiruhaṇe dukkaṭaṃ siyāti sambandho. **Āpadanti** antarāyaṃ. **Tarussā**ti rukkhaṃ. **Porisamhā**ti ekaporisappamañā majjhimassa purisassa pañcahatthā. Aparissāvano yo bhikkhu addhānaṃ gaccheyya, yo ca bhikkhu taṃ parissāvanaṃ yācato na dadeyya, tassa dukkaṭaṃ siyāti yojanā. **Addhānanti** addhayojanameva antimamaddhānaṃ.

86. Attano ghātane dukkaṭaṃ siyāti sambandho. Yo bhikkhu itthirūpādirūpaṃ kareyya vā kārāpeyya vā, tassa dukkaṭaṃ siyā. Mālādikaṃ vicittaṃ ṭhapetvā jātakādivatthuṃ sayāṃ kareyya, dukkaṭaṃ siyāti sambandho.

87. **Bhuñjantamuṭṭhapeti** yo bhikkhu bhuñjantaṃ uṭṭhāpeyya, tassa dukkaṭaṃ siyā. Bhattasālādīsu vuḍḍhānaṃ okāsaṃ adatvā nisīdato dukkaṭaṃ siyāti yojanā.

88. **Yānānī**ti vayhaṃ ratho sakaṭaṃ sandamānikādīni. **Kallakoti** agilāno. Agilāno yo bhikkhu yānāni abhiruheyya, tassa dukkaṭaṃ siyāti attho. **Vade davanti** keḷiṃ vadeyya, ratanattayaṃ ārabha keḷiṃ vadeyya, tassa dukkaṭaṃ siyāti attho. Aññāparisāya upalālāne dukkaṭaṃ hoti.

89. **Kāyādinti** ettha **ādi**-saddo ūrunimittaṃ saṅgaṇhāti. Kāyaṃ vā ūruṃ vā nimittaṃ vā vivarivā

bhikkhunīnaṃ **na dassaye** na dasseyyāti attho. Lokāyatam tiracchānādivijjam na ca sayam vāceyya, parañca na vācāpeyya. Palitam gaṇheyya vā gaṇhāpeyya vā, tassa dukkaṭam siyāti yojanā.

**90-92.** Yattha katthaci peḷāyam pakkhipitvā bhattam bhuñjantassa dukkaṭam siyāti sambandho. Pattahatthako yo bhikkhu vātapānaṃ vā kavāṭam vā **paṇāme** paṇāmeyya, **sodakam** pattam **uṇheyya** uṇhe otāpeyya vā paṭisāmeyya vā, **vodakam** pattam **atiuṇheyya** atīṭhāpeyya, tassa dukkaṭam siyāti attho. Yo bhikkhu pattam bhūmiyam vā anke vā mañce vā piṭhe vā miḍḍhante vā paribhaṇḍante vā pāde vā chatte vā ṭhāpeyya, tassa dukkaṭam siyāti sambandho. **Bhūmiyanti** yena kenaci anattatāya paṃsusakkharamissāya. **Anketi** dvinnam ūrūnaṃ majjhe. **Miḍḍhanteti** miḍḍhapariyante. **Paribhaṇḍanteti** bāhirapasse katāya tanukamiḍḍhiyā ante. Yo bhikkhu calakādim vā patte ṭhāpeyya, patte vā **hatthadhovane** hatthassa dhovanappaccayā tassa dukkaṭam siyāti sambandho.

**93.** Ucchiṭṭham mukhadhovanam **udakampi** pattena **nīharantassa** bhikkhuno dukkaṭam siyā. Yo bhikkhu akappiyam pattam paribhuñjeyya, tassa dukkaṭam siyāti attho. Tattha **akappiyam** pattanti dārumayapattādim.

**94.** Yo bhikkhu khipite “jīvā”ti **vade** vadeyya, tassa dukkaṭam siyāti attho. Yo bhikkhu parimaṇḍalakādimhi pañcasattati **sekhiye** anādaro hutvā na sikkhati, tassa dukkaṭam siyāti sambandho.

**95.** Yo bhikkhu bhaṇḍāgāre payuto mātuyā pituno ca bhaṇḍakam gopeyya, **assa** bhikkhuno pācittiyam siyāti sambandho. Tattha **payutoti** bhaṇḍāgāre byāpāravasena yuttappayutto. **Gopayeti** gopeyya. **Yo** bhikkhu davāya hīnena jātiādīnā uttamampi vadeyya, dubbhāsitaṃ siyāti sambandho. Tattha hīnehi vā ukkaṭṭhehi vā jātiādīhi evam ukkaṭṭham vā hīnam vā “caṇḍālosī”tiādīnā nayena ujum vā “santi idhekacce caṇḍālavēnanesādā”tiādīnā nayena aññāpadesena vā upasampannam vā anupasampannam vā akkosādhippāyam vinā kevalam kīlādhippāyena vadeyya, dubbhāsitaṃ siyāti.

Pakiṇṇakaniddesavaṇṇanā niṭṭhitā.

## 6. Vattādikaṇḍaniddesavaṇṇanā

**96.** Idāni vattam dassetuṃ “**upajjhācariyavatta**”nti vuttam. Tattha upajjhāyavattañca ācariyavattañca gamikavattañca āgantukavattañca senāsanādivattañca **piyasīlena** bhikkhunā kātabbanti sambandho. **Gamikāgantukanti** gamikam āgantukanti chedo, gamikavattam āgantukavattañcāti attho.

**97.** Dātukāmo hatthapāse ṭhito **kiñci gahitabbam** ekena purisena gahitabbam ukkhipanakkhamam vatthum **tidhā** tisu pakāresu ekenākārena dadeyya, **gahetukāmo** bhikkhu **dvidhā** dvīsu ekena gaṇheyya, **ayam** pañcaṅgo paṭiggahoti attho.

**98-100.** Dūre ṭhitaṃ cīvaram ṭhapitokāsam sallakkhetvā “eta”nti vattabbam. Hatthapāse ṭhitaṃ hatthena āmasitvā “ima”nti vattabbam. “Etaṃ adhiṭṭhāmi, imam adhiṭṭhāmī”ti imesam padānam majjhe saṅghāṭīdīsu paccekam yojetvā ticīvaram adhiṭṭheyya. Katham? “Etaṃ saṅghāṭim adhiṭṭhāmi, imam saṅghāṭim adhiṭṭhāmī”ti adhiṭṭheyya. Evam sesesu ca cīvaresu. Yathā cīvarādim vidhānam evam pattepi adhiṭṭheyya paccuddhareyyāti attho.

**101.** Sañcarittam ṭhapetvā sesā garukā ca pārājikā ca sacittakāti sambandho. **Antimāti** pārājikā. Acchinnaikkhāpadaṃ, pariṇatasikkhāpadañcāti imam dvayam ṭhapetvā sesam nissaggiyam acittakanti attho.

**102-3.** **Gāmappavesananteti** gāmappavesanam iti ete. Pācittīsu **ete** padasodhammādayo gāmappavesanantā sattarasa sikkhāpadā acittakā.

**104-5.** Pakiṇṇakesu uddissakataṃ ṭhapetvā **aññamaṃsakam** sesamaṃsam acittakanti attho. Ettha pakiṇṇakesu aññamaṃsādikaṃ pattahattho kavātakantaṃ terasavidhaṃ idaṃ sikkhāpadaṃ acittakaṃ, sesaṃ sabbaṃ sacittakanti attho.

**106.** Ācariyā vītikkamanacittena sacittakaṃ acittakanti vadanti, paññattijānanena cittaena tathā sacittakaṃ acittakanti ācariyā vadantīti attho. **Tathā**-saddena “sacittakaṃ acittaka”nti idaṃ gahitaṃ.

**107-9. Pubbakaraṇādikaṃ** ettha **ādi**-saddo pubbakiccaṃ saṅgaṇhāti. Tattha –

“Sammajjanī padīpo ca, udakaṃ āsanena ca;  
Uposathassa etāni, pubbakaraṇanti vuccati.

“Chandapārisuddhiutukkhānaṃ, bhikkhugaṇaṇā ca ovādo;  
Uposathassa etāni, pubbakiccanti vuccatī”ti. –

Evam pubbakaraṇādikaṃ navadhā dīpitaṃ sabbaṃ uposathappavāraṇaṃ piyasīlinā kātabbanti attho.

**112. Yathākkamanti** etthāyamadhippāyo – gaṇo pārisuddhiuposathaṃ kareyya, puggalo adhiṭṭhānauposathaṃ kareyya, saṅgho suttuddesauposathaṃ kareyyāti.

**113. Cātuddaso pannaraso, sāmaggī dinato tidhāti** cātuddaso uposatho, pannaraso uposatho, sāmaggīuposatho dinato tidhā honti. Dinato puggalato kattabbākārato te uposathā nava iti īritāti attho.

**114. Tevācī dvekavācīti** tevācīkā pavāraṇā, dvevācīkā pavāraṇā, ekavācīkā pavāraṇā iti nava pavāraṇā vuttā.

**115. Tassāti** phaggunamāsassa. **Tato sesanti** āsāḷhiantimapakkhamhā yāva kattikapuṇṇamā vassakālanti attho. Ettha hi ekasmiṃ saṃvacchare catuvīsatiuposathā honti.

**116. Etesūti** etesu tīsu catūsu ekekasmiṃ utumhi tatiyapakkhā sattamapakkhā. **Cātuddasāti** cha cātuddasāti attho. Sesāni uttānatthānevāti.

Vattādikaṇḍaniddesavaṇṇanā niṭṭhitā.

### Nigamanakathā

Ettāvatā samāraddhā, mūlasikkhatthavaṇṇanā;  
Niṭṭhitā yā samāsenā, aḍḍhamāsassa accaye.

Adhunūpasampannānaṃ, hitatthāya samāsato;  
Imaṃ atthaṃ vaṇṇayatā, yaṃ puññaṃdhigataṃ mayā.

Tena puññenayaṃ loko, sukhāya paṭipattiyā;  
Pāpuṇātu visuddhāya, nibbānaṃ ajaraṃ padaṃ.

Nānātarugaṇākiṇṇe, nānākusalakāmīno;  
Ramme yuddhānapatino, vihāre vasatā satā.

Sāsane siddhipattassa, siddhinā ñāṇasiddhinā;  
Paṇḍitena katā esā, mūlasikkhatthavaṇṇanā.

Mūlasikkhā-ṭīkā samattā.